

Bible. O.T. Pentateuch. Choctaw. 1867.

THE BOOKS

OF

GENESIS, EXODUS, LEVITICUS, NUMBERS,
AND DEUTERONOMY,

TRANSLATED INTO

THE CHOCTAW LANGUAGE.

Bible. O.T. Pentateuch. Choctaw. 1867.

CHENESIS, EKSOTUS, LEFITIKUS, NUMBAS,

MICHA TUTELONOMI HOLISSO

AIENA KUT TOSHOWUT

CHAHTA ANUMPA TOBA HOKE.

NEW YORK:

AMERICAN BIBLE SOCIETY,

INSTITUTED IN THE YEAR MDCCCXVI.

1867.

BS
345
C 623
1867
C. 1
SOA

CHENESIS HOLISSO.

MOSES I HOLISSO UMMONA KUT

CHENESIS HOHCHIFO HOKE.

CHAPTA I.

U^UMMONA ka Chitokaka yvt vba, micha yakni aiena ka ikbi tok.

2. Mihma yakni vt shahahbi bieka, micha nana kut vlhtai-yaha iksho bieka tok ; mihma okhlili hut oka hofobi chito paknaka ya onvtoyula tok : mihma Chitokaka imi Shilombish vt oka pataiya paknaka ai o kanahanli tok.

3. Mihma Chitokaka yvt, Tohwikelashke, achi tok : mihma tohwikeli tok.

4. Mihma Chitokaka yvt towikeli hut achukma ho pisa tok : mihmut Chitokaka yvt tohwikeli ash okhlilika ai iti filvmmichi tok.

5. Micha Chitokaka yvt tohwikeli ash, Nitak hochifo tok, mihmut okhlilika, Ninak hochifo tok : mihma opia kut, micha onnahunli kut nitak ummona hatok.

6. Mihma Chitokaka yvt, Oka pataiya ka itintakla ya shutik osh talaiashke ; micha mihi yosh oka ya oka bika iti filvmmichashke, achi tok.

7. Mihma Chitokaka yvt shutik a ikbi cha, shutik nutaka oka aiasha ka, micha shutik paknaka oka aiasha ka iti filvmmichi tok : mihma yvmohmi tok.

8. Mihma Chitokaka yvt shutik a Uba hochifo tok : mihma opia kut, micha onnahunli kut nitak atukla hatok.

9. Mihma Chitokaka yvt, Oka pataiya shutik nutaka aiasha kut itiba fohkut atalaia achufa ho ai itvnaashke, mikma a shila yvt haiakashke, achi tok : mihma yvmohmi tok.

10. Mihma Chitokaka yvt ashila yash Yakni hochifo tok ;

mihmut oka itiba fohkut itvnaha yash, Okhvta hochifo tok : mihma yummvt achukma ho Chitokaka yvt pisa tok.

11. Mihma Chitokaka yvt, Yakni vt hvshuk, haiyukpulo vt nihi waya, micha iti vni vt ilap aiachvfa vnit, nihi mut ilap akinli ho foka ho, offochi na yakni paknaka ya aia-shashke, achi tok : mihma yvmohmi tok.

12. Mihma yakni vt hvshuk, micha haiyukpulo ilap aiachvfa nihi waya, micha iti vni ilap aiachvfa vni, nihi mut ilap akinli ho foka ho, offochi tok : mihma yummvt achukma ho Chitokaka yvt pisa tok.

13. Mihma opia kv̄t, micha onnahinli kv̄t nitak atuchina hatok.

14. Mihma Chitokaka yvt, Nitak a ninak iti filvmmicha chi kv̄t tohwikelichi hv̄t vba shutik a hiohm̄ayashke : micha nana isht vlhpisa kv̄t kocha ilaiyuka nitak, micha afummi aiena ka isht vlh̄pisashke.

15. Mich̄a yvm̄mak osh tohwikelichi yosh vba shutik a ataloha cha, yakni ya on tohwikelichashke, achi tok : mihma yvmohmi tok.

16. Mich̄a Chitokaka yvt tohwikelichi chito tuklo ho, tohwikelichi i shahli kv̄t nitak ak o ayakma, tohwikelichi ik lauwo hokvto ninak ak o aya hi yo ikbi tok : mihmut fochik puta ka aieninchit ikbi tok.

17. Mich̄a Chitokaka yvt yakni ya on tohwikelicha he yo,

18. Mich̄a nitak ma aya he, micha ninak ma aya he, micha tohwikeli kash okhlileka iti filvmmicha he yo, vba shutik a talohli tok : mihma yummvt achukma ho Chitokaka yvt pisa tok.

19. Mihma opia kv̄t, micha onnahinli kv̄t nitak ai ushta hatok.

20. Mihma Chitokaka yvt, Oka puta kv̄t nana ilhkohonli im ilhf̄iopak āsha ya lauachit ikbashke ; mikma hushi vt yakni paknaka vba shutik takla ya helit itvnowashke, achi tok.

21. Mich̄a Chitokaka yvt nvni hochito, micha nan okchaya ilhkohonli ilap aiachvfa aiyukali oka yvt lauachit ikbi ya moma, micha hushi sanahchi āsha puta ilap aiachvfa aiyukali

ka ikbi tok: micha yummvt achukma ho Chitokaka yvt pisa tok.

22. Mihma Chitokaka yvt yukpalit, Chelit hvsh apakna cha, okhvta puta oka ya hvsh alotashke; mikma hushi vt yakni ya apaknashke, achi tok.

23. Mihma opia kvv, micha onnahinli kvv nitak ishit tahlapi hatok.

24. Mihmvt Chitokaka yvt, Yakni vt nan okchaya puta ilap aiachvfa aiyukali, micha nan vllhpoa, micha nana aka balvlli, micha nampo a yakni paknaka asha ilap aiachvfa aiyukali ka tobachashke, achi tok: mihma yvmohmi tok.

25. Mich a Chitokaka yvt nampo a puta ilap aiachvfa aiyukali, micha nan vllhpoa puta ilap aiachvfa aiyukali, micha nana hosh yakni paknaka om balvlli puta ilap aiachvfa aiyukali ka ikbi tok: mihma yummvt achukma ho Chitokaka yvt pisa tok.

26. Mihmvt Chitokaka yvt, Hatak a ila hobachit pishno pi holba ho kiloh ikbi: mikma nuni okhvta aiasha, micha hushi vba itvnova, micha nan vllhpoa puta, micha yakni moma, micha nana balvlli puta yakni ya om balvlli ya a mominchi hosh i shahlashke, achi tok.

27. Yohmi cha Chitokaka yvt ilap akinli holba ho hatak a ikbi tok; Chitokaka holba ho ikbi tok; nakni, micha tek itatuklo ho ikbi tok.

28. Mich a Chitokaka yvt yukpali tok, micha Chitokaka yvt, Wayvt hvsh apaknashke, micha yakni ya hvsh alotowa cha, hvsh imaiyachashke: micha nuni okhvta aiasha, micha hushi vba itvnova, micha nan okchaya puta yakni paknaka itvnova moma ka hvsh i shahli hashke.

29. Mich a Chitokaka yvt, Yakeh! haiyukpulo puta nihi waya yakni paknaka moma aiasha, micha iti puta iti nan vni nihi waya moma ka hvchim issa lishke: hvchim ilhpak ahi oke.

30. Mikmvt nampo a puta yakni paknaka aiasha ka, micha vba hushi puta, micha nana puta yakni paknaka om balvlli ilhfiopak asha ya, im ilhpak ahe mak o, haiyukpulo okchaki moma ka im issa lishke, achi tok: mihma yvmohmi tok.

31. Mihma Chitokaka yvt nana moma ikbi tuk vt pisa ma, yakeh! achukma fehna tok. Mihma opia kv̄t micha onnahinli kv̄t nitak ishit hannali tok.

CHAPTA II.

YAKOHMI hosh vba moma, micha yakni, mikmvt nana ai i̇ puta kv̄t momvt vlhtaiyaha tok.

2. Mihma nitak ont isht untuklo ma Chitokaka yvt natoksvli ikbi tuk vt atahli tuk atok: micha nitak ont isht untuklo ma natoksvli moma isht ahanta tuk vt foha tok.

3. Michā Chitokaka yvt nitak ont isht untuklo kak o, Chitokaka nana isht ikba chi hosh ikbi tuk toksvli puta kv̄t yummak o issvt a foha hatuk okvt, holitoblichit hullochi tok.

4. Ilvppa puta kak osh Chihowah Chitokaka yvt yakni, micha vba moma aiena ikbi tok, nitak a vba moma, micha yakni aiena kv̄t toba tok a isht annoa hoke;

5. Chihowah Chitokaka yvt yakni, micha vba moma ikbi tok nitak a, haiaka itvpushi moma kv̄t yakni ya ik ai iksho ma, haiaka haiyukpulo moma kv̄t ik ai offo kisha tok: Chihowah Chitokaka yvt yakni paknaka ik on umbacho hatuk o, mihma yakni toksvla hi vt hatak nana kia iksho tok.

6. Yohmi tuk kia yakni ya a kifillit vba ia cha, yakni paknaka moma ka shummichi tok.

7. Mihma Chihowah Chitokaka yvt yakni ya lukfi ak o ai ishi cha, hatak ikbi mvt, ilhfiopak okchaya ya ibishakni chiluk ak o fioptv fohki tok; mihma hatak ash osh shilombish okchaya toba tok.

8. Mihma Chihowah Chitokaka hv̄t hv̄shi akochaka imma yo Eten a osapushi ya ahokchi tok; micha yummak o hatak a ikbi tuk vt bohli tok.

9. Michā Chihowah Chitokaka yvt iti pisa achukma puta, micha vpa achukma aiena, iti aiokchaya, micha iti nana achukma, micha nana ik achukmo aiena isht ai ithvna yak kia osapushi iklunna hikia ka, yakni ya ai offochi tok.

10. Mihma okhina yvt osapushi yash shummicha chi kvt Eten a ai atehli cha, yvmma ont ia mvt, iti filamohli cha, okhina ushta toba tok.

11. Ummona hohchifo kvt Pison oke : yvmmak osh Hafilah yakni moma, yvmma tvli lakna vt aiasha ka apakfoyupa mak oke.

12. Micha yakni yvmma tvli lakna asha kvt achukma hoke : yvmma betellium micha oniks tvli vt asha hoke.

13. Mikma okhina atukla hohchifo kvt Kihon oke : yvmmak osh Ehliopia yakni moma ka apakfoyupa mak oke.

14. Mikma okhina atuchina hohchifo kvt Hittekel oke : yvmmak osh Assilia i hvshi akochaka imma pit yanvlli mak oke. Mikma okhina ai ushta kvt Euflates ak oke.

15. Mihma Chihowah Chitokaka yvt hatak ash ishi cha, Eten osapushi ya a toksvlit atona chi ho bohli tok.

16. Micha Chihowah Chitokaka yvt hatak ash im apesvt, Osapushi ya iti aiasha puta ka pilla ish ai vpashke.

17. Amba nana achukma, micha nana ik achukmo aiena isht ai ithvna iti ak okvno chik ai vpo kashke : yvmmak o ish ai vpa hokvto, i nitak makinli ho chilli pulla hi okvt, achi tok.

18. Mihmvt Chihowah Chitokaka yvt, Hatak vt ilap banot ahanta kvt ik achukmoshke : apelvchi ilap a im vlhpiesa ho im ikbi lashke, achi tok.

19. Micha Chihowah Chitokaka yvt nampoa yakni haiaka aiasha moma ka yakni ya ai isht ikbi tuk atok ; micha hushi vba itvnowa moma aiena ka ikbi tuk vt Alam vt nana ho hochifo na pisa chi kvt pehlichit isht im ona tok ; atuk o nan okchaya puta ka nana ho Alam vt hochifokma, yvmmak osh hohchifo hatok.

20. Mihma Alam vt nanvlhpoa moma, micha vba hushi puta, micha nampoa haiaka aiasha puta aiena ka hohchifo imvt tahli tok : yohmi kia Alam ak okvno apelvchi ilap a im vlhpiesa kvt iksho tok.

21. Mihma Chihowah Chitokaka yvt Alam a nusi kullo ho nusechi na, nusi tok : mihma naksi foni ya achvfalit ishi cha, yvmmak atuk a nipi ya it afvmmichi tok.

22. Micha Chihowah Chitokaka yvt hatak ash naksi foni im ishi tuk vt ohoyo ho ikbi cha, ilaelit hatak ash isht im ona tok.

23. Mihma Alam vt, Himak a sa foni ya ai achvfa foni yoke, micha sa nipi ya ai achvfa nipi yoke : hatak o ai ishi tuk oka, Ohoyo hohchifashke, achi tok.

24. Yvmohmi hoka hatak vt iki, micha ishki ya issa cha, tekchi ak o asitia hi oke : mikmvt itatuklo kvt nipi achvfa hi oke.

25. Mihma hatak ash osh micha tekchi itatuklo kvt nipi bano hosh ahashwa cha, hofahya iksho tok.

CHAPTA III.

ATUK o sinti ak osh nahaksichi imponna kvt nampoai haiaka itvnowa Chihowah Chitokaka yvt ikbi tuk a moma i shahli tok. Atuk osh ohoyo hash, Yohmi mvhli cho? Iti puta osapushi anuka aiasha ka hvch ik ai apo kashke, Chitokaka yvt achi tuk oh cho? im achi tok.

2. Mihma ohoyo hash osh sinti ya, Iti osapushi anuka aiasha ka vni ya il ai vpa hinla hoke :

3. Amba iti osapushi iklvnna hikia vni ak o, Chitokaka yvt, Hvsh ai vpa he keyu, micha hvsh potola he keyu, yohmi cha hvch illi ná, achi tuk oke, achi tok.

4. Mihma sinti yash osh, ohoyo ha Hvch illi pulla he keyu hoke.

5. Yvmma hvsh ai vpakmvt i nitak mak inli ho, hvchi nishkin vt fatuma hi yo Chitokaka yvt ithana hoka ; mikmvt Chitokaka chohmit, nana achukma, micha nana ik achukmo aiena ka hvsh ithana hi oke, im achi tok.

6. Mihma ohoyo hash osh iti ya vpa achukma ho, micha nishkin ishit pisa ka achukma ho, micha hopoyuksvla hi ya iti ya bvna he vhpesa ho pisa mvt, yvmmak ash o vni ya ishi cha, vpa tok : mikmvt i hatak ash kia aieninchit ipeta na, vpa tok.

7. Mihma itatuklo kvt nishkin vt fatuma cha, nipi bano

hatuk vt akostininchi tok; mihmvt fik hishi yo it achonli cha tikba takali ikbit isht il atahlit okla tok.

8. Atuk osh nitak vt kapvssvchit taha ho, Chihowah Chitokaka yvt osapushi aya na, im anumpa ha haklot okla tok; mihmvt Alam, micha tekchi itatuklo kvv Chihowah Chitokaka ya osapushi iti hiohmaya ka ai in lumbovt okla tok.

9. Mihma Chihowah Chitokaka yvt Alam a pit i howvt, Katima ak o ish anta cho? im achi tok.

10. Mihma Osapushi ya chim anumpa ha a haiyaklo li mvt, sa nipi bano hatuk osh, sa nukshopa cha, luma li tuk oke, achi tok.

11. Mihma, Kvta hosh chi nipi bano hoka, chim anoli tuk o? Ish ai vpa he keyu chim apesa li kash o iti ya ish ai vpa tuk o? achi tok.

12. Mihma hatak ash osh, Si awant ahanta chi ho ohoyo is soma kash osh, iti ya ai ishit vma na vpa li tuk oke, achi tok.

13. Mihma Chihowah Chitokaka yvt ohoyo hash, Ilvppvt nanta mak o ish yvmihchi tuk oh cho? achi tok. Mihma ohoyo hash osh, Sinti ak osh sa haksichi na vpa li tuk oke, achi tok.

14. Mihma Chihowah Chitokaka yvt sinti yash, Ilvppa ish yvmihchi tuk okvt, kalakshi kvv nanvlhpoa moma, micha nampoa moma yakni haiaka aiasha ka ish i shahlishke : chikfoka ak o ishit shalvllit ish aya cha, chi okchaya takla nitak moma kvv lukfi ak o ish pa hi oke.

15. Mikma chishno, micha ohoyo hash micha chishtaiunchololi micha ohoyo ishtaiunchololi aiena ka hvch itin tanampichi la chi hoke : yvmmak okvt chi noshkobo ha lito-likma, chishno mvt iyikotoba ya ish litola hi oke, im achi tok.

16. Micha ohoyo hano, Chakalit isht chilbvsha hi ya chim apaknvchi li fehna chi hoke ; ilbaiyvsha hosh vlla ish esha hi oke ; mikmvt nana ish ahni kvv chi hatak ak o ish anukchietokma, yvmmak osh chi shahlit chilauela hi oke, im achi tok.

17. Micha Alam ano, Chi tekchi im anumpa ha ish i ha-ponaklo cha yummak oka chim apesvt, Ish ai vpa he keyu hoke, achi li tuk iti ya ish ai vpa tuk oka, chishno ak atuk pulla kak o yakni vt kalakshi hoke; chi okchaya nitak moma kv̄t nukhaklo hosh ish ai vpa hi oke.

18. Nana halupa puta, micha shumo aiena ka chi wayvcha he; mikma osapa haiyukpulo aiasha kak o ish ai vpa hi oke.

19. Chi nashuka yvt laiyaksha hosh pvska ihishpa tuk osh falamvt lukfi ish toba hi oke; yummak o a chishi tuk oka: lukfi chia hokvt, falamvt lukfi ish toba hi oke, im achi tok.

20. Mihma Alam vt tekchi ya Ef hochifo tok: yummak osh okchaya moma ka ishki yoka.

21. Mihma Alam micha tekchi aiena ka Chihowah Chitokaka yvt na hakshup o nafohka isht im ikbi cha, fohkvchechi tok.

22. Mihmvt Chihowah Chitokaka yvt Yakeh! hatak ash osh hv̄pishno akinli chohmi ho tobt, nana achukma, micha nana ik achukmo aiena ka ithanvshke: yohmi kv̄t himak a ibbak a pit weli cha, iti aiokchaya ak kia ai ishit vpa cha, okchaya na bilia yoba ná, achi tok.

23. Yohmi hatuk osh Chihowah Chitokaka yvt yakni yummak o ai ishi tuk a atoksula chi ho osapushi Eten a a kochi tok.

24. Yvmohmi hosh hatak ash kocha pit chrffichi tok: mihmvt osapushi Eten hv̄shi akochaka ont vhli ka Chelubim vhleha, micha iti aiokchaya aiona ya atoni yosh bv̄shpo falaia lihimbi, kanima moma pit bihliblit fullota aiena ho hilechi tok.

CHAPTA IV.

MIHMA Alam vt tekchi Ef a ithana tok; mihma yummak ash osh chakali tuk osh Ken a eshi mvt, Chihowah vt ahni ho hatak o eshi lishke, achi tok.

2. Atuk osh anonti nakfish Abel a eshi tok. Atuk o

Abel ak osh chukfulhpoa apesvchi yokma, Ken ak osh osapa toksvli atok.

3. Atuk osh nitak vt ont ai vlhpiesa yvt vla ma, yakohmi tok, Ken vt yakni nana awaya ya nan im issa yo Chihowah ya isht im ona tok.

4. Mihma Abel yummak kia nan im vlhpoa chipinta che-lahpi puta, micha i nia aiena ka isht ona tok. Mihma Chihowah vt Abel micha nan im issa aiena ka im aiokpanchi tok:

5. Amba Ken, micha nan im issa aiena ka ik im ahnincho tok. Mihma Ken vt nukhobela fehna cha, nashuka vt ilapissa tok.

6. Mihma Chihowah vt Ken a Nanta katiohmi ho chi nukhobela cho? micha nanta katiohmi ho chi nashuka vt ilapissa cho?

7. Ai vlhpiesa ho ish yvmohmikma chim aiokpvchi kak a hetuk keyu cho? micha aivlhpiesa ho ish yvmhichi keyu hokma nanashvchi vt okhissa yakinli ho itoyula hoke. Mikma Abel nana ahni kvv chishno ak o chi pihisakma, ish i shahla hi oke, im achi tok.

8. Atuk o Ken vt itibapishi Abel a im anumpuli tok; atuk o yakohmi tok, yakni haiaka ashwa ma, Ken vt itibapishi Abel a i sanalit wakaya cha, vbi tok.

9. Mihma Chihowah vt Ken a, Chitibapishi Abel mvto? im achi tok. Mihma, Ak ithano; vno ak osh itibapishi li ha apistikeli sia hoh cho? achi tok.

10. Mihma, Nanta mak o ish katiohmi tuk oh cho? chitibapishi im issish vt anumpulit aka ya, auet ai a pahayvshke.

11. Yohmi ka himak a yakni ya yummak okvt itakha ya wakkmmi cha, chitibapishi im issish a chibbak a ai ishi tuk ash a kalakshi hosh ish ayashke.

12. Yakni ya ish a toksvli hokma, himak pilla ka im i hlampko hosh chi waya he keyu hoke: i yakni kohcha yosh yakni paknaka ya fullokahanchit aya hatak chia ha chi hoke, im achi tok.

13. Mihma Ken vt Chihowah ya, Nan ashvchi lish nan isht vm a palvmmi vt chito kvv vm atampa fehntvshke.

14. Yakeh! himak nitak a yakni paknaka a kohchit is sa chvffichishke: yohmi na chi nashuka yatukma ai in luma la chishke; micha hatak kvnia, micha yakni paknaka ya fullo-kahanchit aya hatak sia ha chi hoke; atukma yakohma chi hoke, kvna hosh si ahayuchikmvt, svba chi hoke, im achi tok.

15. Mihma Chihowah vt, Yvmohmi hoka kvna hosh Ken a vbikma napalvmmi vt mihinlohmi untuklo hosh onvtola chi hoke, im achi tok. Mihmvt kvna hosh ahayuchikmvt, ik bo ka hi yo, Chihowah vt Ken a inchuwa ka lapalichi tok.

16. Mihma Ken vt Chihowah itikba yash a kohchvt ia cha, Eten i hvshi akochaka Not yakni ak o ont vtta tok.

17. Michu Ken vt tekchi ya ithana tok: atuk o chakali tuk osh Enok a eshi tok; mihma tumaha holihta ya ikbi mvt, tumaha holihta yash ushi hohchifo ha a hochifochit Enok hochifo tok.

18. Atuk o Enok a Ilat vt im vtta tok: atuk o Ilat vt Mehuchael a tobachi tok: atuk o Mehuchael vt Mehulusael a tobachi tok: atuk o Mehulusael vt Lamek a tobachi tok.

19. Atuk o Lamek vt ohoyo tuklo ho ishit itauwaya tok: achvfa yvt hohchifo kvv Atah yokma, achvfa yvt hohchifo kvv Sillah atok.

20. Mihma Atah vt Chabal a eshi tok: yvmmak okvt vlhtipo anuka asht aya, micha nan vlhpoa im asha chohmi kak o iki atok.

21. Mihma itibapishi hohchifo kvv Chubal atok: yvmmak okvt hap, micha vhlepa chito olachi chohmi kak o iki atok.

22. Atuk o Sillah vt yvmmak kia Tubal-ken asonak lakna, micha tuli pilesa puta ithvnanchi ya eshi tok: mihma Tubal-ken in tek vt Naamah atok.

23. Atuk o Lamek vt tekchi tuklo Atah, micha Sillah yash, Um anumpa ha ho haklo; anumpuli li ka oh a haponaklo Lamek tekchi hvchia ma: Uno ishit sa hotopa chi mak osh hatak a, micha ishit sa hotopa chi mak osh hatak himita ya vbi li tuk oka.

24. Ken a vlhtoba kv̄t mihinlohmi untukla hetuk okma, Lam̄ek a mihinlohmi pokoli untuklo akucha untukla he vlhp̄esvshke, im achi tok.

25. Atuk o anonti Alam vt tekchi ya ithana tok : mihma vlla nakni yo eshi cha, hohchifo h̄a Selh hochifo tok : Ken vt vbi tuk Ebel ash o vlhtomba h̄o Chitokaka yvt vlla inla h̄o auet vma hoka, achi tok.

26. Atuk o Selh yvm̄mak kia ushi vt im vtta tok : mihma hohchifo h̄a Enos hochifo tok : yohmi ma hatak puta kv̄t Chihowah hohchifo h̄a i payvt wakaya tok.

CHAPTA V.

ILUPPAK osh Alam isht-atiaka isht annoa holisso hoke. Chitokaka yvt hatak a ikbi tuk nitak fehna k̄a Chitokaka hak o holba h̄o ikbi tok.

2. Nakni, micha tek itatuklo h̄o ikbi tok ; mihmvt yuk-pali cha, tobtv̄t okla nitak makinli h̄o hohchifo h̄a Alam hochifo tok.

3. Atuk o Alam vt okchayvt ahanta tok afv̄m̄mi tahlepa achv̄fa cha, pokoli tuchina mvt, vlla nakni ilap chohmi, micha ilap holba h̄o tobachi tok ; micha hohchifo h̄a Selh hochifo tok.

4. Atuk osh Selh a tobachi hayvt nitak ahanta kv̄t afv̄m̄mi tahlepa untuchina tok ; micha ushi vhleha, micha ushetik vhleha h̄a tobachi tok.

5. Mihma nitak moma Alam vt okchayvt ahanta kv̄t afv̄m̄mi tahlepa chakkali cha, pokoli tuchina tok ; atuk osh illi tok.

6. Atuk o Selh vt okchayvt ahanta tok afv̄m̄mi tahlepa achv̄fa cha tahlapi mvt Enos a tobachi tok.

7. Atuk osh Selh vt Enos a tobachi hayvt afv̄m̄mi tahlepa untuchina cha untuklo h̄o okchayvt ahanta cha, nshi vhleha, micha ushetik vhleha h̄a tobachi tok.

8. Mihma nitak moma Selh vt ahanta kv̄t afv̄m̄mi tahlepa chakkali cha, auah tuklo tok ; atuk osh illi tok.

9. Atuk o Enos vt okchayvt ahanta tok afvmmi pokoli chakkali mvt Kainan a tobachi tok.

10. Atuk osh Enos vt Kainan a tobachi hayvt afvmmi tahlepa untuchina cha auah tahlapi ho okchayvt ahanta cha, ushi vhleha, micha ushetik vhleha ha tobachi tok.

11. Mihma nitak moma Enos vt ahanta kvf afvmmi tahlepa chakkali cha tahlapi tok; atuk osh illi tok.

12. Atuk o Kainan vt okchayvt ahanta tok afvmmi pokoli untuklo mvt, Mahalaleel a tobachi tok.

13. Atuk osh Kainan vt Mahalaleel a tobachi hayvt afvmmi tahlepa untuchina cha pokoli ushta ho okchayvt ahanta cha ushi vhleha micha ushetik vhleha ha tobachi tok.

14. Mihma nitak moma Kainan vt ahanta kvf afvmmi tahlepa chakkali cha pokoli tok; atuk osh illi tok.

15. Atuk o Mahalaleel vt okchayvt ahanta tok afvmmi pokoli hannali akucha tahlapi mvt, Chalet a tobachi tok.

16. Atuk osh Mahalaleel vt Chalet a tobachi hayvt afvmmi tahlepa untuchina cha pokoli tuchina ho okchayvt ahanta cha, ushi vhleha micha ushetik vhleha ha tobachi tok.

17. Mihma nitak moma Mahalaleel vt ahanta kvf afvmmi tahlepa untuchina cha pokoli chakkali akucha tahlapi tok; atuk osh illi tok.

18. Atuk o Chalet vt okchayvt ahanta tok afvmmi tahlepa achvfa cha, pokoli hannali akucha tuklo mvt Enok a tobachi tok.

19. Atuk osh Chalet vt Enok a tobachi hayvt afvmmi tahlepa untuchina ho okchayvt ahanta cha ushi vhleha micha ushetik vhleha ha tobachi tok.

20. Mihma nitak moma Chalet vt ahanta kvf afvmmi tahlepa chakkali cha, pokoli hannali akucha tuklo tok atuk osh illi tok.

21. Atuk o Enok vt okchayvt ahanta tok afvmmi pokoli hannali akucha tahlapi mvt Mehluselah ya tobachi tok.

22. Atuk osh Enok vt Mehluselah ya tobachi hayvt Chitokaka ya ibanovvt ahanta na afvmmi tahlepa tuchina cha, ushi vhleha, micha ushetik vhleha ha tobachi tok.

23. Mihma nitak moma Enok vt ahanta kv̄t afv̄mmi tahlepa tuchina cha pokoli hannali akucha tahlapi tok.

24. Micha Enok vt Chitokaka ya ibanohowa tok, atuk osh iksho tok : Chitokaka yvt ishi tuk'oka.

25. Atuk o Mehluselah vt okchayvt ahanta tok afv̄mmi tahlepa achvfa cha, pokoli untuchina akucha untuklo mvt Lamek a tobachi tok.

26. Atuk osh Mehluselah vt Lamek a tobachi hayvt afv̄mmi tahlepa untuklo cha, pokoli untuchina akucha tuklo ho okchayvt ahanta cha, ushi vhleha micha ushetik vhleha ha tobachi tok.

27. Mihma nitak moma Mehluselah yvt ahanta kv̄t afv̄mmi tahlepa chakkali cha, pokoli hannali akucha chakkali tok : atuk osh illi tok.

28. Atuk o Lamek vt okchayvt ahanta tok afv̄mmi tahlepa achvfa cha pokoli untuchina akucha tuklo mvt vlla nakni yo tobachi tok.

29. Micha hohchifo ha Noah hochifot, Ilvppak osh Chihowah yvt yakni ya kalakshichi tuk ak o, pibbak na toksvli a pilbvsha pulla ka pi hopohlula hi oke, achi tok.

30. Atuk osh Lamek vt Noah ya tobachi ha yvt afv̄mmi tahlepa tahlapi cha pokoli chakkali akucha tahlapi ho okchayvt ahanta cha, ushi vhleha, micha ushetik vhleha ha tobachi tok.

31. Mihma nitak moma Lamek vt ahanta kv̄t afv̄mmi tahlepa untuklo cha, pokoli untuklo akucha untuklo tok : atuk osh illi tok.

32. Mihma Noah hvt afv̄mmi tahlepa tahlapi tok : mihmvt Noah hvt Shem, Ham, micha Chafelh a tobachi tok.

CHAPTA VI.

ATUK o yakohmi tok, hatak vt yakni paknaka ya ai apaknvt ishtia cha, ushetik puta kv̄t im asha ma,

2. Chitokaka ushi vhleha hvt hatak ushetik vhleha hvt

aiokli hō pisa tok: mihmut aiahni tuk aiยุกali kv̄t ishi cha, itauwaya tok.

3. Mihma Chihowah yvt, (Hatak vt nanashv̄chit ahanta ka,) Ūmi Shilombish vt hatak takla ahanta na, bilia he keyu hoke, hatak vt nipi akinli hoka: yohmi kia i nitak vt afv̄m̄mi tahlepa achv̄fa cha, pokoli tuklashke, achi tok.

4. Nitak yv̄mma foka k̄a hatak hofaloha yvt yakni paknaka ȳa aiasha tok; atuk o i himmak ak kia Chitokaka ushi v̄hleha hv̄t hatak ushetik v̄hleha h̄a itauwayvt m̄aya na, v̄lla ȳa okla im eshi tok o, yv̄mmak ash osh hatak hlampko chilita cha chashpo k̄a annohowa fehna tok.

5. Atuk o hatak vt yakni paknaka ȳa a haksi kv̄t atampa fehna mv̄t, chukv̄sh im anukfila nana isht ahni puta kv̄t peh ik achukmo banot nitak bilia hō Chitokaka yvt p̄ih̄isa tok.

6. Mihmut Chihowah yvt hatak a ikbit yakni paknaka ȳa o hilechi tuk vt nukh̄aklot chukv̄sh hotopa tok.

7. Micha Chihowah yvt, Hatak a ikbi le tuk vt yakni paknaka ȳa a mosholechit, hatak, micha nampoa, micha nana aka balv̄lli, micha hushi v̄ba itv̄nowa aiena ka yv̄mihchi lashke; ikbi le tuk vt sa nukh̄aklo hokv̄t, achi tok.

8. Yohmi kia Noah hv̄t Chihowah itikba ȳa isht i kana ȳa ai ahayuchi tok.

9. Ilv̄ppak osh Noah ȳa anoli holisso hoke: Noah hv̄t hatak aiv̄lhpiesa, micha ai itishali yv̄mma aiahli hosh ahanta tok; micha Noah hv̄t Chitokaka ȳa iba nohowa tok.

10. Micha Noah hv̄t ushi tuchina Shem, Ham, micha Chafelh a tobachi tok.

11. Yakni ak kia Chitokaka itikba ȳa okpulo tok: micha yakni ȳa nan ik v̄lhpeso bano kak osh alotowa tok.

12. Atuk o Ckitokaka yvt yakni ȳa et pisa tok, mihma yakeh! okpulo tok; nipi moma kv̄t yakni paknaka ȳa ai il aiokpv̄nit tahli hatuk oka.

13. Mihmut Chitokaka yvt Noah ȳa Nana nipi moyuma kv̄t sa tikba ȳa ant aiv̄hli hoke; Ilv̄ppa pulla hatuk mak o yakni paknaka ȳa nan ik v̄lhpeso bano kak osh alotowa

hoka: yohmi hoka yakeh! yummak atukma mosholichit yakni ya ai okpune la he akinli hoke.

14. Kofi iti yo chi peni chito ish ikbashke: micha peni chito anukaka ya abohushi puta ish ai ikbashke; micha anukaka, micha kocha aiena ka tiak nia isht ish apolushashke.

15. Micha yakohmichit ish ikbashke: Peni chito yvt falaia kvt kubit tahlepa tuchina, pvtha kvt kubit pokoli tahlapi, micha chaha kvt kubit pokoli tuchinashke.

16. Peni chito ya atohwikeli ya ish ai ikbi cha kubit achvfa ho paknaka ya ish ai atahlashke: micha peni chito okhowata yak o okhissa ya ish hilechashke: micha aka ishtaiyopi, atukla, micha ont atuchina patvlhpo yo ish ikbashke.

17. Atuk o yakeh! vno, vno fehna kvt nipi puta ilhflopak okchaya a foyuka ka mominchit shutik nutaka ya a mosholichi la chi kvt oka falama yo yakni paknaka ya isht aya la chi hoke: mikma nana puta yakni paknaka aiasha kvt illa chi hoke.

18. Amba chishno yano kvllochit na chitim apesa la chi hoke: mikma chishno vt, micha chiso vhleha, micha chi tekchi, micha chiso vhleha tekchi aiena kvt chi apiha ho peni chito ya ish chukowa hi oke.

19. Mikmvt nan okchaya nipi puta moma tuklo bieka ho pehlinchit peni chito ya ish chukowana, chibai okchayashke; nakni, micha tek ashke.

20. Hushi puta kvt ilap ai achvfa aiyukali, micha nampoapa puta kvt ilap ai achvfa aiyukali, micha nana aka balvlli yakni paknaka aiasha moma ilap ai achvfa tuklo aiyukali hosh okchaya chi hosh chim ai vla hi oke.

21. Micha nan ilhpak vpa chatuk a mominchit chishno inli osh hoyot ish itvnahlashke; mikma yummak osh chishno, micha yummak ash aiena kvt hvchim ilhpak ashke, im achi tok.

22. Ilvppak o Noah hvv yvmihchi tok: Chitokaka yvt im apesa tuk mak o moma yvmihchi tok.

CAPTA VII.

MIHMA Chihowah vt Noah ya, Chishno, micha chin chuka achvfa moma aienvt peni chito ya ant hvsh chukowashke: aaitishali achvfa ilvppa chishno ak osh aivlhpiesa kv̄t sa tikba ya ish ahanta na chi pihisa li hoke.

2. Nampoa kashofa puta kv̄t nakni, micha tek itichapa hosh untuklo bieka, micha nampoa kashofa keyu vt nakni, micha tek itichapa hosh tuklo bieka,

3. Michā hushi vba itvnova nakni, micha tek itichapa hosh untuklo bieka hō ish ishi cha, ish okchalinchī na, ishtai unchuloli vt yakni paknaka moma k̄a aiashashke.

4. Nitak untuklo momakma, nitak pokoli ushta, micha ninak pokoli ushta hō yakni paknaka ya on umbr̄che la chī hoke; micha nan okchaya puta ikbi li tuk vt yakni paknaka ya a mosholichi la chī hoke, im achi tok.

5. Mihma Chihowah yvt im apesa tuk mak o Noah hv̄t mominchit yvmihchi tok.

6. Mihma Noah hv̄t afv̄mmi tahlepa hannali hō oka falama vt yakni paknaka ya onvtola tok.

7. Mihma oka falama yvt aya chī pulla kak o, Noah hv̄t ushi vhleha, micha tekchi, micha ushi vhleha h̄a tekchi vhleha aiena kv̄t apiha hō peni chito ya chukowa tok.

8. Nampoa kashofa, micha nampoa kashofa keyu, micha hushi puta, micha nana hosh yakni paknaka ya om balvlli chatuk moma mv̄t,

9. Chitokaka yvt Noah ya im apesa tuk mak o, tuklo aiyukali hosh nakni, micha tek ita tuklo hosh Noah ya im onvt peni chito ya chukowa tok.

10. Atuk o yakohmi tok, nitak untuklo ha ya, oka falama yvt yakni paknaka ya onvtoyula tok.

11. Noah hv̄t vtta tok a afv̄mmi tahlepa ishit hannali hosh hv̄shi atukla, hv̄shi yash nitak ont isht auah untuklo, mih nitak fehna hō oka hofobi chito oka akohcha puta kv̄t momv̄t mitahli tok, mikma vba shutik okhissushi puta kv̄t tiwa tok.

12. Mihma nitak pokoli ushta, micha ninak pokoli ushta ho yakni paknaka ya ai on umba tok.

13. Nitak yvmma fehna akinli ho Noah, micha Shem, micha Ham, micha Chafelh Noah ushi vhleha hash, micha Noah tekchi, micha ushi vhleha tekchi tuchina aiena kv̄t apiha ho, peni chito yash chukowa tok.

14. Yvmma, micha nampoa puta ilap ai achvfa aiyukali, micha nan vhlpoa moma ilap ai achvfa aiyukali, micha nana balvlli puta yakni paknaka om balvlli ilap ai achvfa aiyukali, micha hushi puta ilap ai achvfa aiyukali, hushi chipinta ai il aiyukali puta aiena tok.

15. Micha nanipi asha puta kv̄t ilhfiopak okchaya mvt atakali hatuk vt momvt tuklo bieka hosh Noah ya im onvt, peni chito yash ibachukowa tok.

16. Micha chukowa kv̄t, Chihowah yvt im apesa tuk mak o, nanipi asha puta moma ai achvfa vt nakni, micha tek aiena kv̄t chukowa tok: mihma Chihowah yvt im okhishta tok.

17. Mihma oka falama yvt nitak pokoli ushta ho yakni paknaka ya onvtoyula tok: mihma oka yvt i shahlit mahaya mvt, peni chito yash shalit wakeli na yakni ya ai vba takali tok.

18. Mihma oka yvt yakni paknaka ya okchito kv̄t i shahlit mahaya fehna tok; mihma peni chito vt oka paknaka ya takalit aya tok.

19. Mihma oka yvt yakni paknaka ya okchito atampa fehna tok; mihma nv̄nih chaha moma, shutik, nutaka moma aiasha tuk vt ompoholmo tok.

20. Oka chito isht i shahlit vba ia kv̄t kubit auah tahlapi ho isht vbanvbli tok; mihma nv̄nih chaha puta kv̄t ompoholmo tok.

21. Mihma nana nipi moma yakni paknaka ya ai itvnova tuk, hushi, micha nanvhlpoa, micha nampoa, micha nana balvlli puta yakni paknaka om balvlli tuk, mikmvt hatak puta aiena kv̄t illi tok:

22. Ilhfiopak okchaya vt ibishakni ya foyuka hatuk moma yakni shila aiasha tuk vt momvt illi tok.

23. Micha nan okchaya moma yakni paknaka ya aiasha tuk, hatak, micha nan vlhpoa, micha nana balvlli puta, micha hushi vba itvnowa aiena kvt illit taha tok; yvmmak osh yakni paknaka ya ai illit taha tok: mihma Noah, micha apihvt peni chito ya aiasha tuk ak illa hosh okchaya tok.

24. Mihma oka yvt yakni paknaka ya ai okchito kvt onvto-yula na nitak tahlepa achvfa cha pokoli tahlapi tok.

CHAPTA VIII.

MIHMA Chitokaka yvt Noah ya, micha nan okchaya moma, micha nampo moma apihvt peni chito ya alhto tuk ash ithaiyana tok: mihma Chitokaka yvt yakni paknaka ya mahli hlopullich ma, oka yvt halata tok.

2. Mihma oka hofobi chito oka akohcha puta, micha shutik okhissushi puta aiena kvt vlhkuma ma, umba chito vba minti kvt oktpa tok.

3. Mihma oka yvt yakni paknaka ya a falamvt yanahanli na bilia tok: atuk osh nitak tahlepa achvfa cha pokoli tahlapi kvt ont taha ha ya oka yvt shipa tok.

4. Mihma hvshi isht untuklo, hvshi yvmmvt nitak ont isht auah untuklo kak o, peni chito yvt nvni chaha Alalat paknaka ya ontvla tek.

5. Mihma oka yvt tahvt mahaya na hvshi ont ishit pokoli tok: hvshi ont ishit pokoli hvshi yvmmvt nitak vmmo-na ma, nvni chaha puta paknaka yvt haiaka tok.

6. Atuk o yakohmi tok, nitak pokoli ushta kvt ont taha ma, Noah hvvt peni chito ikbi tok ash okhissushi ya tiwi tok:

7. Micha fvla chito yo kohchechi na, kohcha mvt il afalamahowa na, yakni paknaka ya oka yvt a shipvt taha tok.

8. Micha oka yvt yakni paknaka ya a shipvt tahakma, nana tukma akostinincha chi hosh pvchi yoshuba ak kia kohchechi tok.

9. Yohmi tuk kia pvchi yoshoba yvt iyi yvt ai o hikivt foha hi vt ik ahayucho mvt, falamvt im vla cha, peni chito

yash chukowa tok: oka yvt yakni paknaka moma ka onvto-yula hatuk oka: yohmi ma ibbak a pit weli cha, ishit peni chito et il iba fohki tok.

10. Atuk osh anta na nitak untuklo akinli ma, anonti pvchi yoshuba yash peni chito ya kohchechi tok.

11. Atuk o opia ma pvchi yoshuba ash osh falamvt im vla mvt, yakeh! itih ha alif hishi okchaki vt foyuka tok. Yohmi ho yakni paknaka ya oka yvt a shipvt taha tuk a Noah hvt akostininchi tok.

12. Atuk osh anonti nitak untuklo ho anta tuk osh, pvchi yoshuba yash a kohchechi tok: mihma yvmmak osh himakma falamvt ik im alo tok.

13. Atuk o yakohmi tok, afvmmi tahlepa hannali cha achvft aiena, hvshi vmmona, micha hvshi yvmmt nitak vmmona ma, oka yvt yakni paknaka ya a shipvt taha tok: mihma Noah hvt peni chito isht ompoholmo ash kanvllichi cha, hopokoyo ma, yakeh! yakni paknaka yvt shila atok.

14. Atuk osh hvshi atukla, hvshi yvmmt nitak ont ishit pokoli tuklo akucha untuklo ma, yakni vt shilvt taha tok.

15. Mihma Chitokaka yvt Noah a im anumpulit,

16. Chishno, micha chi tekchi, micha chiso vhleha, micha chiso vhleha tekchi puta aiena ka pehliechit peni chito ya ish a kohchashke.

17. Nan okchaya nipi il aiyukali puta moma chi apehvt maya tuk, hushi, micha nan vlhpoa, micha nana balvlli yakni paknaka om balvlli aiena ka pehliechit ish kohchashke; yohmi na yakni paknaka ya alauachi fehvt chelashke, micha yakni paknaka ya a wayvt apaknashke, achi tok.

18. Mihma Noah hvt ushi vhleha, micha tekchi, micha ushi vhleha tekchi puta itvpehvt kohcha tok.

19. Nan okchaya puta, nana balvlli puta, micha hushi puta, micha nana hosh yakni paknaka om balvlli, ilap aiachvfa aiyukali momvt peni chito ya kocha wiha tok.

20. Mihma Noah hvt Chihowah ya alta im ikbi cha, nan vlhpoa kashofa puta, micha hushi kashofa puta ai ishi cha, alta yash onochit hukmit isht aiokpvchi ya im issa tok.

21. Mihma Chihowah yvt na balama achukma ka huwa tok; micha Chihowah yvt ilap chukvsh akinli ka, Hatak atuk pulla mak o himakma anonti yakni ya kalakshichi la he keyu hoke; hatak chukvsh im anukfila hvv vlla tomba makinli ho ik achukmo hoka: micha yvmihchi li tuk a anonti himakma chohmichit nan okchaya moma ka issot kanchi la he keyu hoke.

22. Yakni vt talaia moma ka, nahokchi nitak, micha nawayo vmo, micha kapvssa, micha lvshpa, micha toffa, micha hushtula, micha nitak, micha ninak aiena kvv hokofa he keyu hoke, achi tok.

CHAPTER IX.

MIHMUT Chitokaka yvt Noah ya micha ushi vhleha aiena ka yukpalit, Hvsh wayvt apakna cha, yakni paknaka ya hvsh alotowashke.

2. Yohmikma isht a hvchi nukshopa, micha isht a hvchi komota aiena kvv nampoa puta yakni paknaka aiasha ka moma, micha hushi puta vba itvnowa moma, micha nana hosh yakni paknaka aya moma, micha nvn okhvta aiasha ka moma onvtoyula hi oke; hvch ibbak a fohka hoke.

3. Nan okchaya itvnowa moma kvv hvchim ilhpak achi hoke: haiyukpulo okchaki atok akinli ho ai itilauechit nan okluha ka hvchim issa li hoke.

4. Amba nipi vt isht okchaya yvmmv im issish ak oka aieninchit hvsh pa na,

5. Atukma hvchim ilhfipak hvchim issish ak o a hoyo li pulla hi oke: nan okchaya moma ka im a hoyo likmv, hatak ibbak a a hoyo la hi oke; hatak a itibapishi puta hatukma ibbak a hatak im ilhfipak a a hoyo la hi oke.

6. Kvna hosh hatak im issish a hlatvblikma, ilap im issish ma hatak osh hlatvbla hi oke: Chitokaka ya holba ho hatak a ikbi tok oka.

7. Yohmi ka hvchishno vt wayvt hvsh apaknashke; yakni paknaka ya a waya fehvvt ai apakvvt hvsh aiashashke, im achi tok.

8. Micha Chitokaka yvt Noah, micha ushi vhleha aiena ka im anumpulit,

9. Uno, yakeh! vno vt hvchishno, micha hvchim ishtatika chi akaiya aiena,

10. Micha nan okchaya puta hvch ibafoyuka ka, hushi, nan vlhpoa, micha nampoa puta yakni paknaka aiasha hvch iba foyuka kv̄t peni chito yash kohcha tuk, nampoa puta yakni paknaka aiasha ka kv̄llochit nana itim apesa lishke.

11. Micha kv̄llochit nana hvchitim apesa la chi hoke: mikma himakma nanipi moma kv̄t oka falama isht illit taha he keyu hoke; micha himakma oka falama vt aya cha, yakni ya okpv̄na he keyu hoke, achi tok.

12. Micha Chitokaka yvt, Ilvppak osh vno, micha hvchishno ya micha nan okchaya moma hvchi apeha ka ai itishali bilia ka nana itim apesa itim ikbi li ka isht atokowa yoke.

13. Uno vt a hinakbitepuli ya hoshonti anukaka ya takalichi li hoke; mikma yvmmak osh vno vt yakni ya nana itim apesa li tuk isht atokowa yosh talaia achi hoke.

14. Atukma yakohma hi oke, hoshonti ha yakni paknaka isht aya likma, hinakbitepuli hv̄t hoshonti ha takalit haiaka hi oke.

15. Mikma vno, micha hvchishno, micha nanokchaya nipi asha moma aiena ka nana itim apesa vt a pitin takla takali ka ithaiyana la hi oke; mikma himakma oka yvt oka falama toba cha, nana nipi asha moma ka oka tv̄mola he keyu ka hi oke.

16. Mikma hinakbitepuli hv̄t hoshonti ha takala hi oke; mikma nana itim apesa ont ataha iksho vt Chitokaka, micha nan okchaya nipi asha moma yakni paknaka aiasha aiena kv̄t im ai itin takla takali ka ithaiyana la chi kv̄t pihisa la hi oke, achi tok.

17. Micha Chitokaka yvt Noah ya, Ilvppak osh nana itim apesa vno vt nan okchaya nipi asha moma yakni paknaka aiasha ka kv̄llochit itim apesa li tuk a isht atokowa yoke, im achi tok.

18. Mihma Noah ushi vhleha peni chito ya asht kocha

wiha kv̄t Shem, micha Ham, micha Chafelh ak atok : atuk o Ham ak osh Kenan a iki atok.

19. Ilvppak osh Noah ushi v̄hleha tuchina mak oke ; atuk o yvmmak atok ak o yakni moma ka ai ita fimimpa tok.

20. Mihma Noah hv̄t yakni a toksv̄lit wakaya cha, osa-pushi pakv̄pi ahollokchi ya ikbi tok.

21. Atuk osh oka pak̄i ya ishko cha haksi tok ; mihmvt i shahbi hosh im v̄lhtipo anukaka ya itonla tok.

22. Mihma Kenan iki Ham vt iki vt nipi bano ka pisa mvt, itibapishi tuklo kocha ashwa tuk a im anoli tok.

23. Mihma Shem, micha Chafelh ita tuklo kak osh anchi yo ishi cha, tahchi ha onochit bika cha, olv̄lh-pelv̄t ia hosh iki nipi bano tuk a ont ompohomo tok : micha nashuka vt i filv̄mmi hatuk osh iki nipi bano ka ik pesot okla tok.

24. Atuk o Noah hv̄t oka pak̄i ishkot haksi tuk vt kostini mvt, ushi nakfish ak osh nana im akaniohmi tuk a akostininchi tok.

25. Micha, Kenan vt kalakshashke ; tishu v̄hleha in tishu hosh itibapishi v̄hleha ha i nutaka hosh aiasha hi oke, achi tok.

26. Mihmvt Shem in Chitokaka Chihowah yvt holitopashke : mikma Kenan vt in tishu ha hi oke.

27. Chitokaka yvt Chafelh a im auatv̄chikma, Shem im v̄lhtipo puta ka v̄ttvt aya hi oke ; mikma Kenan vt in tishu ha hi oke, achi tok.

28. Atuk osh Noah hv̄t, oka falama vt aya ha ya okcha-yvt ahanta na, afv̄mmi tahlepa tuchina cha, pokoli tahlapi tok.

29. Mihma Noah hv̄t nitak moma ahanta kv̄t afv̄mmi tahlepa chakkali cha, pokoli tahlapi tok : atuk osh illi tok.

CHAPTA X.

ILUPPAK osh Noah ushi v̄hleha, Shem, Ham, micha Chafelh aiena ka isht annoa holisso hoke : yohmi ka

yummak okvt oka falama vt aya ha yak o ushi vt im aiasha tok.

2. Chafelh ushi vhleha hvt, Kome, micha Makok, micha Matai, micha Chafan, micha Tubal, micha Meshek, micha Tilas ak atok.

3. Mikma Kome ushi vhleha hvt, Ashkenas, micha Lifalh, micha Tokamah ak atok.

4. Mikma Chafan ushi vhleha hvt, Elishah, micha Tashish, Kittim, micha Totanim ak atok.

5. Yakohmi kak osh i yakni Chentail i yakni tashaiyi puta ka ilap aiokla achvfa im anumpa achvfa cha, in chuka achvfa ishtatiaka aiyyukalit ita kvshkoa tok.

6. Mikma Ham ushi vhleha hvt Kush, micha Mislaim, micha Fut, micha Kenan ak atok.

7. Mikma Kush ushi vhleha hvt Seba, micha Hafilah, micha Sabtah, micha Laamah, micha Sabteka ak atok : mikma Laamah ushi vhleha hvt Sheba micha Tetan ak atok.

8. Mihma Kush vt Nimlot a tobachi tok : atok o yummak osh hatak palvmmi tobtv ishit mahaya tok.

9. Chihowah itikba ya hatak owvta fehna yosh ahanta tok : yohmi tok mak o hatak owvta fehna mak osh Chihowah itikba hikia Nimlot atok mak o chohmi hoke, achi beka tok.

10. Yohmi ka im apehlichika ishtia vmmona kvv Shina yakni taloha Babel, micha Elek, micha Akkat, micha Kalneh ak atok.

11. Yakni yummak o Asha vt kohchvt ia hosh Ninefeh, micha tmaha holihta Lehobolh, micha Kalah ya ikbi cha,

12. Ninefeh, micha Kalah iti takla ak o Lesen a ai ikbi tok : mih mak osh tmaha holihta chito atok.

13. Mihma Mislaim vt Lutim, micha Ananim, micha Lehabim, micha Naftuhim,

14. Michah Pahlusim, micha Kasluhim (yummak o Filistim okla hvt a kohcha tok,) micha Kaftolim aiena ka tobachi tok.

15. Mikma Kenan vt ushi akni fehna Siton, micha Helh,

16. Michah Chebusait, micha Amolait, micha Kikasait,

17. Micha Hifait, micha Akait, micha Sinait,

18. Micha Afatait, micha Semalait, micha Hamahlait aiena ka tobachi tok: atuk o i himmakma Kenanait okla in chuka achvfa vhleha hvt ita fimimpa tok.

19. Micha Kenanait okla im aivhli vt Siton a vttvt ia hosh Kela isht ona ka maya hosh Kasa ya ona tok: Sotom, micha Komolloh, micha Atmah, micha Seboim ish ia ka maya hosh Lasha ya ont vhli tok.

20. Ilvppa puta kak osh Ham ushi vhleha ilap in chuka achvfa ishtatiaka aiyukali, anumpa aiachvfa, okla talohvt ilap i yakni aiyukali aiasha mak oke.

21. Mihma Ebe im vlla vhleha moma ka iki, akni Chafelh a itibapishi Shem ak kia vlla vt im aiasha tok.

22. Shem im vlla vhleha hvt Elam, micha Asshu, micha Afaksat, micha Lut, micha Alam ak atok.

23. Mikma Alam im vlla vhleha hvt Us, micha Hul, micha Kehle, micha Mash ak atok.

24. Mihma Afaksat vt Salah ya tobachi tok: mihma Salah hvt Ebe ya tobachi tok.

25. Atuk o Ebe vt ushi tuklo hosh im ashwa tok: achvfa kvv hohchifo kvv Pelek atok: yvmma i nitak ak o yakni vt itakvshkoa tok: mikma itibapishi hohchifo kvv Choktan atok.

26. Mihmvt Choktan vt Almotat, micha Shelef, micha Hasamafelh, micha Chelah,

27. Micha Hatolam, micha Usal, micha Tiklah,

28. Micha Obal, micha Abimael, micha Sheba,

29. Micha Ofa, micha Hafilah, micha Chobab aiena ka tobachi tok: ilvppa puta kak osh momvt Choktan a ushi vhleha hatok.

30. Mihmvt abinili kvv Mesha ak o aivhlit ia hosh, hvshi akochaka nvnih Sefa ak o ont ai vhli tok.

31. Ilvppa puta kak osh Shem ushi vhleha ilap in chuka achvfa ishtatiaka aiyukali, anumpa aiachvfa okla talohvt ilap i yakni aiyukali aiasha mak oke.

32. Ilvppa puta kak osh Noah im vlla vhleha in chuka achvfa puta ilap ishtatiaka aiyukali okla taloha mak oke:

micha oka falama vt aya ha ya iluppa puta tok ak o oklushi puta kv̄t yakni ya itakvshkoa tok.

CHAPTA XI.

MIHMA yakni moma kv̄t itih, micha anumpa aiena kv̄t achvfa tok.

2. Atuk o yakohmi tok, hvshi akochaka imma ya ashvt itvnowvt mihinti mvt, yakni patali vt Shina yakni ya talaya na, ant ahayuchi tok: mihmvt yvmmak o okla aiasha tok.

3. Mihmvt, Inta! lukfi nuna kiloh ikb́i, micha achukma-lit eho hukmashke, itim achi tok. Mihmvt tvli a hetuk a lukfi nuna yokma, anonti isht v̄lhp̄olosa ya na shinvshbi yosh okla im aiasha tok.

4. Mihmvt, Inta! hv̄pimmi hach̄i ka tv̄maha holihta micha chuka chaha ai atoni paknaka yvt shutik a ona ho iloh ikbashke; micha pi hohchifo iloh ikbashke; keyukmvt ita fimimpvt yakni paknaka moma ka il itv̄nowa yoba ná, okla achi tok.

5. Mihma Chihowah vt hatak im v̄lla v̄hleha hv̄t tv̄maha holihta, micha chuka chaha ai atoni ikbi ka pisa ch̄i hosh akowvt v̄la tok.

6. Micha Chihowah vt, Yakeh! okla hv̄t achvfa, micha moma kv̄t im anumpa hv̄t achvfvshke: atuk osh iluppa yvmihchit isht ivshke: yohmi ka himak a yvmihcha ch̄i im anukfila tuk a nana hosh im ai ataklv̄mma hi vt ik-shoshke.

7. Inta! pit kil akowa cha, im anumpa ha kil im it aio-komi na, ilap b̄ika yvt im anumpa ha ik itim akostinincho, kashke, achi tok.

8. Yvmohmi ho Chihowah vt yvmma a kanv̄llichit yak-ni paknaka moma ka ita fimibli tok: mihma tv̄maha holihta ikbi tuk vt issa tok.

9. Yvmohmi hatuk o yvmmv̄t Babel hohchifo tok: yvmmak o Chihowah vt yakni moma im anumpa ha ai it-

im aiokomi tok oka: micha yvmma Chihowah vt akanvlichit yakni paknaka moma ka ita fimibli tok.

10. Ilvppa puta kak osh Shem isht ai unchololi hoke: Shem vt afvmmi tahlepa achvfa hosh oka falama vt aya ha ya afvmmi tuklo ma, Afaksat a tobachi tok.

11. Atuk osh Shem vt Afaksat a tobachi ha yvt afvmmi tahlepa tahlapi ho okchayvt ahanta cha, ushi vhleha, micha ushetik vhleha ha tobachi tok.

12. Atuk o Afaksat vt okchayvt ahanta tok afvmmi pokoli tuchina akucha tahlapi hosh Salah ya tobachi tok.

13. Atuk osh Afaksat vt Salah ya tobachi ha yvt afvmmi tahlepa ushta cha tuchina ho okchayvt ahanta cha, ushi vhleha, micha ushetik vhleha ha tobachi tok.

14. Atuk o Salah vt okchayvt ahanta tok afvmmi pokoli tuchina hosh Ebe ya tobachi tok.

15. Atuk osh Salah vt Ebe ya tobachi ha yvt afvmmi tahlepa ushta cha tuchina ho okchayvt ahanta cha ushi vhleha, micha ushetik vhleha ha tobachi tok.

16. Atuk o Ebe yvt okchayvt ahanta tok afvmmi pokoli tuchina akucha ushta hosh Pelek a tobachi tok.

17. Atuk osh Ebe yvt Pelek a tobachi ha yvt afvmmi tahlepa ushta cha, pokoli tuchina ho okchayvt ahanta cha ushi vhleha, micha ushetik vhleha ha tobachi tok.

18. Atuk o Pelek vt okchayvt ahanta tok afvmmi pokoli tuchina hosh Leu ya tobachi tok.

19. Atuk osh Pelek vt Leu ya tobachi ha yvt afvmmi tahlepa tuklo cha chakkali ho okchayvt ahanta cha, ushi vhleha, micha ushetik vhleha ha tobachi tok.

20. Atuk o Leu vt okchayvt ahanta tok afvmmi pokoli tuchina akucha tuklo hosh Seluk a tobachi tok.

21. Atuk osh Leu vt Seluk a tobachi ha yvt afvmmi tahlepa tuklo cha, untuklo ho okchayvt ahanta cha, ushi vhleha, micha ushetik vhleha ha tobachi tok.

22. Atuk o Seluk vt okchayvt ahanta tok afvmmi pokoli tuchina hosh Naho ya tobachi tok.

23. Atuk osh Seluk vt Naho ya tobachi ha yvt afvmmi

tahlepa tuklo ho okchayvt ahanta cha, ushi vhleha, micha ushetik vhleha ha tobachi tok.

24. Atuk o Naho vt okchayvt ahanta tok afvmmi pokoli tuklo akucha chakkali hosh Telah ya tobachi tok.

25. Atuk osh Naho vt Telah ya tobachi ha yvt afvmmi tahlepa achvfa cha ahbichakkali ho okchayvt ahanta cha, ushi vhleha, micha ushetik vhleha ha tobachi tok.

26. Atuk o Telah vt okchayvt ahanta tok afvmmi pokoli untuklo ho Eblam, Naho, micha Halan aiena ka tobachi tok.

27. Yohmi ka ilvppa puta kak osh Telah isht aiunchololi hoke: Telah vt Eblam, Naho, micha Halan aiena ka tobachi tok: atuk o Halan vt Lot a tobachi tok.

28. Mihmvt Halan vt iki Telah ya tikba, yakni aivtta tok Kaltea talaia Uh ai illi tok.

29. Atuk o Eblam, micha Naho ita tuklo kvt ohoyo itauwayvt okla tok: Eblam tekchi hohchifo kvt Salai atok; mikma Naho tekchi hohchifo kvt Milkah atok, Milkah ya iki, micha Iskah ya iki Halan a ushetik atok.

30. Yohmi kia Salai vt ushi iksho yatuk osh vlla ik im iksho tok.

31. Mihma Telah vt ushi Eblam, micha Halan ushi Lot, ilap ushi akinli ushi, micha ushi Eblam tekchi ipok Salai aiena ka pehlichu cha Kenan yakni ya ona chi hosh Kaltea yakni talaia Uh ha kohchvt ia tok: atuk osh Halan a ona cha, yvmmak o aiasha tok.

32. Mihma Telah i nitak puta kvt afvmmi tahlepa tuklo cha tahlapi tok; atuk osh Telah vt Halan ak o ai illi tok.

CHAPTA XII.

YOHMI ka Chihowah vt Eblam a, Chi yakni chi kanomi vhleha micha chiki in chuka achvfa aiena ka i filvmmi a kohchvt ayvt yakni chi pesvchi la chi ka ish onashke:

2. Mikma okla chito fehna a chikbi la he, mikmvt chi

yukpali likmvt, anonti chi hohchifo ha holitoblichī la hī oke; mikma ishit na chi yukpa yachi hoke.

3. Atukma k̄vna hosh anumpa yukpali chi onochikma yukpali la hī oke; mikmvt k̄vna hosh anumpa kalakshichi chi onochikma, kalakshichi la hī oke: mikma chuka achvfa puta yakni paknaka aiasha kv̄t chi aiyukpa hī oke, achi tuk atok.

4. Yohmi ma Chihowah yvt im achi tuk mak o, Eblam vt ia tok, mihma Lot vt awant ia tok: mihma Eblam vt Halan a kohchvt ia mvt, afvmmi pokoli untuklo akucha tahlapi tok.

5. Micha Eblam vt tekchi Salai, micha itibapishi ushi Lot, micha i nanvlhpoa ahayuchi tuk vt moma, micha Halan a tishu okla ai ahayuchi tuk vt pehlichī cha, Kenan yakni ya okla ona chi hosh kohchvt ia tok; atuk osh Kenan yakni ya okla ona tok.

6. Mihma Eblam vt yakni yash hlopullit ayvt Moleh i baiyi hielī Sikem a ona tok. Yohmi ma Kenan okla hv̄t yakni ya aiasha hatok.

7. Mihma Chihowah yvt Eblam a i haiaka cha, Yakni ilvppa chim ishtatiaka ya ima la hī oke, im achi tok: mihma yvmmak o Chihowah yvt i haiaka tuk ash alta ya im ikbi tok.

8. Atuk osh yvmma vttvt kanvllit ia mvt, Behlel i hvshi akochaka imma nv̄nih chaha hak o ona cha, Behlel vt hvshi ai okatula pilla talaya ho, micha Hai vt hvshi akochaka pilla ma, talaya ho im vlhtipo ya hilechi tok: mihmvt yvmmakma Chihowah ya alta im ikbi cha, Chihowah ya hochifot i pahaya tok.

9. Mihmvt, Eblam vt iv̄t oka mahli pilla ho mahaya tuk vt moma hosh aya tok.

10. Atuk o yakni yash hohchvfo hv̄t asha tok: mihma Eblam vt Echip yvmmak o anta chi hosh ia tok; yakni yash hohchvfo kv̄t palvmmi fehna hatuk oka.

11. Atuk osh yakohmi tok, Echip a chukowa chi mak osh bilikasi ona mvt, tekchi Salai ya, Pisa ka ohoyo chi aiokli ka himak a ithana lishke:

12. Yvmohmi hoka yakohma chi hoke, Echip okla hvt chi pisakmvt, Ilvppak osh tekchi oke, acha chi hoke; mikmvt vno ya svbi cha, chishno yano chi okchalinya chi hoke.

13. Chishno vt, In tek sia hoke, ish achashke, chim asilhha lishke: yvmohmi ho chishno ak atuk pulla mak o nana isht vm achukmashke: micha chishno atuk pulla mak o vmi shilombish vt okchayashke, im achi tok.

14. Atuk o yakohmi tok, Eblam vt Echip a ont chukowa ma, Echip okla hvt ohoyo hvt aiokli fehna ho pisa tok.

15. Falaoh i holitopa vhleha hak kia pisa mvt ahnichit Falaoh itikba ya anohonli tok; mihma ohoyo hash ilauelit. Falaoh in chuka ya isht ona tok.

16. Mihma yummak atuk pulla mak o Falaoh vt Eblam a i kana fehna tok: mihma chukfulhpoa, micha wak, micha issuba nashoba nakni, micha hatak tishu vhleha, micha ohoyo tishu vhleha, micha issuba nashoba tek, micha kamel puta aiena kv̄t im asha hatok.

17. Mihma Chihowah yvt Eblam tekchi Salai ak atuk pulla mak o Falaoh micha in chuka achufa aiena ka napavmmi chinto ka onochi tok.

18. Mihma Falaoh vt Eblam a hoyo cha, Ilvppak osh nanta mak o is sa yvmihchi tuk oh cho? nanta katiohmi ho chi tekchi atuk a chik sv̄m anolo tuk oh cho?

19. Nanta katiohmi ho, Ilvppvt an tek oke, ish achi tuk o? yohmi na, ishit sa tekchi ikbit itauwaya la he tuk oka; yohmi hoka chi tekchi ya ish ilauei cha, ish iashke, achi tok.

20. Michā Falaoh vt in tvshka vhleha ha yummak ash nana ish, i miha na, yummak ash micha tekchi, micha nana im asha tuk moma aiena ka ik iá, okla im ahni tok.

CHAPTA XIII.

MIHMA Eblam vt ilap, micha tekchi, micha nana im asha tuk moma aiena kv̄t Echip a kohchvt mintit, micha Lot vt ibafohka ho oka mahli ka ai vla tok.

2. Micha Eblam vt nanvlhpoa, micha tvli hvta, micha tvli lakna aiena kv̄t in laua fehna hatok.

3. Atuk osh oka mahli ya vttvt falamvt mintit Behlel, yummvt Behlel micha Hai iti takla yakni talaia ho vmmona ka im vlhtipo vt a hikia tok atok;

4. Ummona ka alta ai ikbi tok yakni talaia yo vla tok: micha yummak o Eblam vt Chihowah ya hochifot ai i pa-haya tok.

5. Mihma Eblam a awant ia tuk vt Lot ak kia nanvlhpoa chipinta, micha nan vlhpoa hochito, micha vlhtipo puta aiena kv̄t im asha hatok.

6. Mihma yakni vt ik im ono hatuk osh, itupehvt ahashwa he keyu tok: imilayak chinto hatuk okvt, itupehvt ahashwa he keyu tok.

7. Atuk o Eblam i nan vlhpoa apistikeli vhleha, micha Lot i nanvlhpoa apistikeli vhleha aiena kv̄t itachowa tok: micha mihmvno Kenanait okla, micha Pelissait okla aiena kv̄t yakni ymma asha hatok.

8. Mihma Eblam vt Lot a Ūno, micha chishno piti takla, micha a nan vlhpoa apesvchi vhleha, micha chi nan vlhpoa apesvchi vhleha aiena iti takla ya itachowa kv̄t iksho kashke; chim asilhha lishke, itibapishi vhleha pia hokvt.

9. Yakni vt moma hosh chi tikba itoyula keyu cho? Is sa filvmmashke, chim asilhha lishke: vlhfvbek imma hak o ish ia hokma, ishtimpak imma hak o ia lashke; keyukmvt ishtimpak imma hak o ish ia hokma, vlhfvbek imma hak o ia lashke, im achi tok.

10. Mihma Lot vt akachakali mvt, Chatan yakni patali moma kv̄t kanima moma kia oka laua achukma kv̄t asha; Chihowah yvt Sotom, micha Komollah ya okpvnit ik tahlo kisha ma, Chihowah im osapushi ak o chohmi cha, Soa ish chukowa Echip yakni ak o chiyuhmi tok a pihisa tok.

11. Yohmi mvt Lot vt Chatan yakni patali moma ilap immi achi hosh atokoli mvt, Lot vt hvshi akochaka pilla ho ia tok: yohmi ma iti filvmmmit okla tok.

12. Eblam vt Kenan yakni ak o ai ahanta tok; mikma

Lot vt yakni patali tumaha holihta taloha kak o ai vttā cha, Sotom pilla hak o im vlhtipo ya hilechi tok.

13. Yohmi kia Sotom hatak vhleha hv̄t haksi fehna cha, Chihowah itikba ya nanashv̄chi atampa fehna tok.

14. Atuk o Chihowah yvt Eblam a Lot vt i filimmi ha ya, Himak a akachakali cha, ish aivtta ka hikivt falvmmi imma, micha oka mahli imma, micha hv̄shi akochaka imma, micha hv̄shi ai okatula imma aiena ka pit ish hopokoyashke :

15. Yakni ish pisa ka mominchit chishno, micha chim isht aiunchololi aiena ka immi bilia he mak o ima la chi hoke.

16. Mikma chim isht aiunchololi ya lukfi pushi yakni paknaka aiasha kak o chiyuhmichi la hi oke : yohmikma hatak nana hosh lukfi pushi yakni paknaka aiasha ka hotihv̄t tahla hinla hok mak o, chim isht aiunchololi ak kia holhtina hi oke.

17. Wakaya cha yakni afalaiaka, micha apvthaka nowvt hlopulli, chima la chi hoka, im achi tok.

18. Yohmi ma Eblam vt im vlhtipo ya kanv̄lichit Mamli i baiyi Heblon yakni talaia hielī ka ont ai vttā tok : micha yv̄mma Chihowah ya alta im ikbi tok.

CHAPTA XIV.

ATUK o yakohmi tok, Shina i miko Amlafel, Ellasa i miko Aliok, Elam i miko Chetolaoma, micha oklushi puta i miko Tital aiena kv̄t aiasha nitak ma ;

2. Ilvppa puta kv̄t Sotom i miko Bela, micha Komollah i miko Besha, Atmah i miko Shinab, micha Seboim i miko Shemebe, micha Bela yv̄mmvt Soa ya i miko aiena ka in tanampi tok.

3. Ilvppa moma kak osh okfa Sittim, yv̄mmvt hv̄pi okhv̄ta ha ai itahobvt aiasha tok.

4. Afv̄mmi auah tuklo ho Chetolaoma ya i nutaka tok ; atuk osh afv̄mmi ont isht auah tuchina ho i filv̄mmi i sanali tok.

5. Atuk o afvmmi ont isht auah ushta ma, Chetolaoma yvt, micha miko vhleha yvmma apeha kash aiena kv̄t vla cha, Lefaim okla Ashteloh Kanaim aiasha, micha Susim okla Ham aiasha, micha Emim okla Shafeh Kiliahlaim aiasha tuk aiena kā issot kanchi mvt,

6. Micha Holim okla i nvnih Sei aiasha tuk aiena kā ai issot kanchit El-palan yvmmvt yakni chukushmi bilika talaia kā ont vhl̄ichi tok.

7. Mihmvt falamvt En-mishpat, yvmmvt Katesh ā ai vla cha, Amalek okla i yakni moma kā, micha Amolait vhleha yvmmvt Haseson-tama āsha tuk ā issot kanchi tok.

8. Mihma Sotom i miko, micha Komollah i miko, micha Atmah i miko, micha Seboim i miko, micha Bela yvmmvt Soa yā i miko aiena kv̄t kohchvt ilhkoli mvt Sittim okfa hā ont ai itafamvt,

9. Elam i miko Chetolaoma, micha oklushi puta i miko Tital, micha Shina i miko Amlafel, micha Ellasa i miko Aliok aiena kash itiba chi kv̄t il atahli tok: miko ushta hosh tahlapi hō itafama tok.

10. Mihma Sittim okfa hv̄t bitumen aiasha yakni mitahli yosh alotowa tok: atuk o Sotom i miko, micha Komollah i miko vt tihlaya tuk osh yvmmak o ai akakoha tok: mihma hlakoffi tuk vt yihleptv̄t nvnih chaha yā ona tok.

11. Mihma Sotom, micha Komollah i na chukushpa, micha im ilhpak moma kā ishi cha ilhkoli tok.

12. Micha Eblam itibapishi ushi Sotom v̄tta hatuk Lot, micha im v̄lhpoyak aiena kā ishi cha ilhkoli tok.

13. Atuk o hlakoffi tuk achvfa kv̄t Heblu hatak Eblam ā ont im anoli tok: Eshkol itibapishi, micha Ane itibapishi, Amolait hatak Mamli i baiyi hiel̄i kā bilika yā v̄tta yatuk oka: micha yvmmvt Eblam ā anumpa itibai achvfv̄t itapela hatok.

14. Mihma Eblam vt itibapishi hā yukachit ishi tuk o haklo mvt, ilap in chuka akinli hō ai v̄ttvt, nan im v̄lvchit hofantit aiasha yā tahlepa tuchina cha auah untuchina hō nahalupa im atahlit pehlich̄i cha, hliolit Tan ā ona tok.

15. Mihma ilap, micha in tishu vhleha aiena kv̄t itakvsh-

koa cha, ninak o issot kanchi mvt, hliolit isht ayvt Tamaskvs im vlhfubekimma talaia Hobah ya ona tok.

16. Micha vlhpoyak moma ka falvmmichit isht vla mvt, anonti itibapishi Lot ash kia, micha im vlhpoyak aiena, mikmvt ohoyo puta, micha okla hash aiena ka falvmmichit isht vla tok.

17. Mihma (Eblam vt Chetolaoma micha apehvt aya tok, miko vhleha ha vbi cha, falamvt aya ha ma) Sotom i miko vt Shafeh yvmmvt miko im okfa ha aiafama chi hosh kohchvt ia tok.

18. Mihma Salem i miko Melkisetek vt pvska, micha oka paki aieninchit i kohchechi tok; micha yvmmvt vba chaha moma i shahli Chitokaka ya naholitompa isht im vtta yatok.

19. Micha anumpa yukpali Eblam a onochit, Uba chaha moma i shahli, vba, micha yakni aiena ikbi Chitokaka ya Eblam vt i holitopashke.

20. Mikma vba chaha moma i shahli Chitokaka, yvmmak osh chin tvnvp vhleha ha chibbak fohki tuk vt holitopashke, achi tok. Mihma moma ka ishit pokoli aiyukali ho ai ishit Melkisetek ash ima tok.

21. Mihma Sotom i miko vt Eblam a, Hatak-vhleha hano vno ak o is sama cha, nachukushpa ya chishno akinli hosh ish ishashke, im achi tok.

22. Mihma Eblam vt Sotom i miko ya, Chihowah vba chaha moma i shahli Chitokaka, vba, micha yakni aiena ka ikbi ya svbbak a vba pit i weli li kv,vt,

23. Ponola honnula achvfa kia, shulush isht talakchi peh nana kia ishi la he keyu, micha nana hosh chimmi atuk a ishi la he keyu, miha li tuk oke; yvmmak keyukma Eblam a vno ak osh nan in laua ikbi lishke, ish acha hinla hoke.

24. Peh hatak himithoa hvvt vpa tuk ak illa, micha hatak si apehvt aya tuk ai isha he vlhpesa kak illa Ane, Eshkol, micha Mamli aiena kak osh ai isha he vlhpesa kv,vt ishashke, achi tok.

CAPTA XV.

ILUPPA puta kv̄t yvmohmi ha ya, Eblam vt na pisa hō Chihowah im anumpa hv̄t im aya cha, Chi nukshopa ná, Eblam ma, chin telihpa, micha nan isht chim vlhtoba chito atampa fehna sia hoke, im achi tok.

2. Mihma Eblam vt, Nanta hō is s̄ma chī cho? Chihowah Chitokaka ma, vlla ik im iksho yosh aya li hoka, mikma an chuka achvfa apesvchi vt Tamaskvs hatak Eliese ilvppak oke, achi tok.

3. Mihmvt Eblam vt, Yakeh, vno ya vlla nana kia chik samoshke: yohmi k̄a an chuka ai v̄tta tuk achvfa hosh vmmi hash ai isha he vlhpesa kak oke, achi tok.

4. Mihma yakeh, Chihowah im anumpa hv̄t im aya mvt, Ilvppvto chimmi h̄a ai isha he vlhpesa ya he keyu; amba chikfoka akinli a kohcha he ak osh chimmi h̄a ai isha he vlhpesa ya hi oke.

5. Mihmvt ilauelit kocha isht ona mvt, Ūba pilla h̄a pit ish hopokoyo cha, fochik puta k̄a ish hotihna hinlakmvt, ish anolashke, achi tok: Chim isht aiunchololi hv̄t yvmmak o chiyuhma hi oke, im achi tok.

6. Mihma Chihowah ya i yimmi tok: mihma yvmmvt aivlhpiesa im ai itilauechi tok.

7. Mihma, Ūno ak osh yakni ilvppvt chimmi hachī mak o, chima la chī kv̄t, Kaltea yakni talaia Uh h̄a ai ishit chi kohchi li tok vt Chihowah sia hoke, im achi tok.

8. Mihma, Chihowah Chitokaka ma, yvmma ishi la hi vt nanta hō isht ithana la chī cho? achi tok.

9. Mihma, Wak tek afvmmi tuchina, micha issi kosoma tek afvmmi tuchina, micha chukfulhpoa nakni afvmmi tuchina, micha pv̄chi yoshuba achvfa, micha pv̄chi himita achvfa aiena k̄a is s̄a hoyashke, im achi tok.

10. Mihma ilvppa moma kash ishit im ona cha, iklv̄nna ita pahlv̄lli mvt, pahlata aiyukali k̄a iti chablit kahpuli tok: yohmi kia hushi ano ik ita pahlalo tok.

11. Atuk o hushi puta kv̄t nipi yash ant o fohopa ma, Eblam vt helih̄inchi tok.

12. Atuk o hv̄shi vt okatulvt ishtia ma, nusi kv̄llo kv̄t Eblam a onvtola tok; mihma yakeh, okhlili chito nukshob-lichī fehna hosh onvtola tók.

13. Mihma Eblam a, Chim ishtatiaka yvt okla inla yosh i yakni keyu k̄a aiasha cha, i yuka hosh ah̄ashwa he ya ish ithana pullashke: mikma afv̄mmi tahlepa ushta h̄o ilbv̄sha-hancha hi oke.

14. Atukma i yuka hosh ah̄ashwa he oklushi yv̄mma nana im apesa la hi oke: atukma i himmakma v̄lhpoyak chito fehna h̄o isht kohcha hi oke.

15. Micha chishno yokv̄to nuktaiyalvt chiki v̄hleha hash o ish im ona hi oke: chi sipoknit taiyaha hosh chi hollohpa hi oke.

16. Yohmi kia aiitishali ont aiusha kv̄to anonti ilv̄ppa ai v̄la hi oke: Amolait okla nan ai ashah̄anchi kv̄t ik aloto k̄isha hoka, im achi tok.

17. Atuk o yakohmi tok, hv̄shi vt okatula na okhlili ma, yakeh, shuti shobulli, micha p̄la libbi aiena kv̄t nipi pahlahli, kanohmi kash iti takla ya ant ia tok.

18. Mih nitak fehna Chihowah yvt Eblam a nana itim apesvt, Echip okhina yak o aiv̄hlit ia hosh okhina chito Euflates okhina ont v̄hli;

19. Kenait okla, micha Kenissait okla, micha Katmonait okla,

20. Micha Hittait okla, micha Pelissait okla, micha Le-faim okla,

21. Micha Amolait okla, micha Kenanait okla, micha Ki-kashait okla, micha Chebusait okla aputa aiasha yakni ilv̄ppa chim ishtatiaka ya ima lashke; achi tok.

CHAPTA XVI.

YOHMI ma Eblam tekchi Salai vt v̄lla ik im esho tok: mihmvt Echip ohoyo, tishu ohoyo hosh hohchifo kv̄t Haka yosh im anta tok.

2. Atuk osh Salai vt Eblam a, Yakeh himak a Chihowah yvt vno vlla eshi la he tuk a vm oktrblishke : an tishu ohoyo ak o ish iba chukowashke, chim asilhha lishke ; yummak o vlla isht vm aiasha hinla yoba ká, im achi tok. Mihma Eblam vt Salai im anumpa ha i haponaklo tok.

3. Mihma Eblam vt Kenan yakni ya ahanta tok afvmmi pokoli ma, Eblam tekchi Salai vt in tishu ohoyo Echip ohoyo Haka yash eshi cha i hatak Eblam a tekchi ya chi ho i bohli tok.

4. Mihma Haka ya ibachukowa ma, chakali tok ; micha chakali hatuk vt akostininchi mvt, i nahullo ohoyo yash kanimanchi tok.

5. Mihma Salai vt Eblam a, Nana ik svm achukmo kvv chishno ak atuk pulla kak o yvmohmishke : an tishu ohoyo hatuk a chi shakba fohki li tuk oke : atuk o chakali kvv il akostininchi mvt, sa kanimanchishke ; Chihowah yvt vno, micha chishno pim itin takla nana ai apesashke, im achi tok.

6. Yohmi kia Eblam vt Salai ya, Yakeh, chin tishu ohoyo hvv chibbak a foka hoke ; nana hosh chim vlvpesakmvt, ish yvmihchashke, im achi tok. Atuk o Salai vt i kvv ma itikba ya i maleli tok.

7. Atuk o chukushmi foka oka kvv, Shu hina oka kvv hikia ka asha na, Chihowah im enchel vt ahayuchi tok.

8. Micha Haka Salai in tishu ohoyo ma, katima ish minti cho ? micha katima ish ia chi cho ? achi tok. Mihma A nahullo ohoyo Salai itikba yak o i maleli hosh aya lishke, achi tok.

9. Mihma Chihowah im enchel ash osh, Falamvt chi nahullo ohoyo ha ish im ona cha, im antia achukma hosh ibbak nutaka ma ish ahantashke im achi tok.

10. Micha Chihowah im enchel ash osh chisht aiunchololi ka apaknvchit atamblichhi la hi oke, yohmi na apakna kvv a holhtina hi vt iksho ka hi oke, im achi tok.

11. Micha Chihowah im enchel ash osh, Yakeh, chi chakalishke, yohmi kvv vlla nakni yo ish esha hi oke : micha chilbvsha ka Chihowah yvt haklo tuk oka, hochifo ha Ishmael ish hochifa hi oke.

12. Atukma hatak kostina he keyu ya hi oke: ibbak vt hatak moma ka i sanalikma, hatak moma ibbak vt i sanala hi oke; mikma itibapishi vhleha moma ka itin takla yo ahanta hi oke, im achi tok.

13. Mihma Chihowah yvt im anumpohonli tuk ash hochifot Chitokaka chia hvt is sa pihisa yoke, achi tok: mihmvt, Ŭno vt ilvppa pisa li ha yak kia hopokoyo li ha cha? achi tok.

14. Yohmi hatuk o kvli hofobi yash osh Bee-lahai-loi hohchifo tok; Yakeh Katesh, micha Belet iti takla ya hikia hoke.

15. Atuk o Haka vt Eblam a vlla nakni yo im eshi tok: mihma Eblam vt ushi, Haka vt im eshi tuk ash hohchifo ha Ishmael hohchifo tok.

16. Mihma Eblam vt afvmmi pokoli untuchina akucha hannali ho, Eblam a Haka vt Ishmael a im eshi tok.

CHAPTA XVII.

ATUK o Eblam vt afvmmi pokoli chakkali akucha chak-kali ma, Chihowah yvt Eblam a i haiaka cha, Chitokaka Nan isht im aiahli ataha iksho sia hoke: sa tikba ya ish anohowa cha, ish aiahlashke.

2. Mikma vno vt chishno ya nana chitim apesa li pul-lashke; micha chi apaknvchit atambliche lashke, im achi tok.

3. Mihma Eblam vt hlipiut itoyula tok; yohmi ma Chitokaka yvt im anumpulit,

4. Ŭno yokuto yakeh, nana chitim apesa li vt itoyulvshke; yohmi ka oklushi lava ho iki chia ha chi hoke.

5. Michā himak pilla hoka chi hohchifo hvt Eblam ah he keyu, amba chi hohchifo hvt Eblaham ah hi oke: oklushi lava ho iki ya chi ho chikbi li hoka.

6. Michā chi wayachi li fehnvt, oklushi puta chi ai ikbi likma, miko puta kvv chi akohoncha hi oke.

7. Michā vno vt chishno, micha chim ishtatiaka et chi-

akaiya aiena kvt ai itishalit mihinti ka nana itim apesa bilia mak o, kullochit chitim apesa lish, chishno, micha chim ishtatiaka et chiakaiya aiena ka in Chitokaka sia ha chi hoke.

8. Mikmvt Kenan yakni vt moma, okla inla yosh ish ai ahanta yakni ya chishno, micha chim ishtatiaka et chiakaiya aiena kvt hvchi yakni bilia chi ho hvch ima la chi hoke: mikmvt in Chitokaka sia ha hi oke, achi tok.

9. Micha Chitokaka yvt Eblaham a, Yvmohmi hoka a nan itim apesa ya chishno, micha chim ishtatiaka et chiakaiyvt ai iti shalit mihinti aiena kvt hvsh holitoblashke.

10. Chishno, micha chim ishtatiaka et chiakaiya aiena kvt hvsh holitobla he a nan itim apesa pitin takla takali kvt ilvppak oke: Ulla nakni yosh hvch iti takla aiasha kvt momvt hakshup tvpashke.

11. Micha hvchi tikba hakshup nipi ya hvsh tvblashke; mikma yummak osh nan itim apesa yash osh vno, micha hvchishno hvpitin takla ya itoyula ka isht atokowa ya hi oke.

12. Mikma hvchim ai itishali puta ka vlla nakni yosh nitak untuchina ho hvchitin takla ya aiasha kvt momvt hakshup tvpashke; chuka ai vtta tuk, keyukmvt okla inla, chim ishtatiaka keyu puta ho chin tvli holisso ha isht vlhtoba tuk.

13. Chin chuka ai vtta tuk, micha chin tvli holisso ha isht vlhtoba tuk aiena kvt hakshup tupa pullashke: mikma a nan itim apesa yvt hvchi nipi ya nana itim apesa bilia mak o foyuka hi oke.

14. Atukma vlla nakni hakshup ik tapo, tikba hakshup nipi vt ik tapokmvt, shilombish yummvt im okla achvfa ai iti takla ya, fiopa vt tupa hi oke: a nan itim apesa ya kobuffi hoke, im achi tok.

15. Mikma Chitokaka yvt Eblaham a, Chi tekchi Salai ak okvno Salai ish hochifa he keyu, amba hohchifo hv Salah yashke.

16. Mikmvt yukpali la chi hoke, micha yummak kia vlla nakni yo a chima la hi oke: ahli yukpali la chi hoke; mik-

ma oklushi laua hō ishki ya chī hoke: okla i miko puta kvt a tohomba hi oke, im achi tok.

17. Yohmi ma Eblaham vt hlipia cha, yukpa mvt, chukvsh anukaka, Afummi tahlepa achvfa kvt vlla im asha chī cho? mikma Salah vt afummi pokoli chakkali kvt vlla esha chī cho? achi tok.

18. Micha Eblaham vt, Chitokaka ya Ishmael vt chi tikba ya okchayvt ahantakbano, im achi tok.

19. Mihma Chitokaka yvt, Chi tekchi Salah vt vlla nakni yō chim eshi pulla chī hoke; mikma Aisak ish hochifa chī hoke: mikma nan itim apesa bilia mak o yvmma, micha im ishtatiaka et iakaiya aiena ka kvllochit nan itim apesa la hi oke.

20. Ishmael ak okvno chī haponaklo lishke: yakeh, yukpali lishke, wayvchit apaknvchi kvt atamblichī la chī hoke; miko auah tuklo hō tobacha chī hoke; micha oklushi chito hō ikbi la chī hoke.

21. Yohmi kia Aisak yvmmak oka afummi inla nitak vlhpisa vt ont vlhpesa himak a chohmikma, chi tekchi Salah vt chim esha he ak o, kvllochit nan itim apesa la hi oke, achi tok.

22. Mihmvt im anumpuli kvt issa cha, Chitokaka yvt Eblaham a i filvmmi ia tok.

23. Mihma Eblaham vt ushi Ishmael ishi cha, in chuka achvfa ai vtta tuk moma, micha in tuli holisso isht vlhtoba tuk moma, micha Eblaham in chuka achvfa hatak nakni puta moma, Chitokaka yvt miha tuk mak o, mih nitak akinli hō tikba hakshup nipi ya in tvptuli tok.

24. Micha Eblaham vt afummi pokoli chakkali akucha chakkali mvt, tikba hakshup nipi vt in tupa tok.

25. Mihma ushi Ishmael vt afummi auah tuchina mvt, tikba hakshup nipi vt in tupa tok.

26. Mih nitak akinli hō, Eblaham vt tikba hakshup tupa ma, ushi Ishmael vt yohmi tok;

27. In chuka achvfa hatak puta moma chuka ai vtta tuk, micha okla inla ai achvfa tuli holisso isht vlhtoba tuk aiena kvt tikba hakshup tupa tok.

CAPTA XVIII.

ATUK o Chihowah yut baiyi vt Mamli a hielī k_a ai i haiaka tok: mihmvt nitak lvshpvt taha h_o vlhtipo okhissa y_a bininli tok.

2. Atuk osh akachakali cha, hopokoyo ma, yakeh, hatak tuchina kv̄t bilika hielī tok: atuk o pisa mvt, vlhtipo okhissa yash hiki_vt malelit ont afama cha, aka pit hlipia mvt,

3. A shahli ma, himak a holhponayo hanta h_a chi tikba ai ahayuchi likma, chin tishu h_a i filvmm̄it chik aiyo kashke, chim asilhha lishke:

4. Oka kanomosi k_a isht v_a na, hvch iyi y_a hvsh achifa cha, iti nuta y_a chieyvt hvsh fohashke, hvchim asilhha lishke:

5. Mikma pvska vpa achvfa isht v_a likma, hvchi chukvsh a hvsh fihoblashke; yohmi ha yosh hvsh ayashke: yvmohma chi kak o, hvchin tishu h_a hvsh im v_a tuk okvt, achi tok. Mihma, Ish achi tuk mak osh ish yvmohmashke, okla achi tok.

6. Mihma Eblaham vt tushpvt vlhtipo y_a ont chukowvt, Salah y_a im ona cha, Tushpvt atahlit bota tohbi lepihbi vlhpisa tuchina h_o yamv̄sli cha, luak ituksita pvska lumboa y_a ai apushli, achi tok.

7. Mihmvt Eblaham vt malelit wak aiasha k_a ona cha, wak ushi nipi ik kv̄llo achukma h_o ont isht v_a cha, hatak himita y_o ima tok; mihma tushpvt atahli tok.

8. Mihmvt pishukchi nia, micha pishukchi, micha wak ushi atahli kash aiena k_a ishi cha, itikba talohli tok: micha bilika iti nuta y_a hikia ma, okla impa tok.

9. Mihmvt, Chi tekchi Salah mv̄to? okla im achi tok. Mihma, Yakeh, vlhtipo y_a ashvshke, achi tok.

10. Mihma, Aiokchaya he nitak vt takanlik mak o falamvt chim aya li pulla hi oke; mikma yakeh, Salah chi tekchi vt vlla nakni y_o esha hi oke, achi tok. Mihma vlhtipo okhissa vt im ashaka yatuk o, Salah vt anukaka y_a asha hosh haklo tok.

11. Yohmi ka Eblaham, micha Salah vt sipoknit nitak in lauvt taiyaha hatok; mikma Salah vt ohoyo nana im a kani-ohmi vt issa tok atok.

12. Yumohmi hatuk osh Salah vt ilap inlit yukpvt, Sa sipokni hay vt vm achukma hinla? a shahli hvt sipokni akinli ka, achi tok.

13. Mihma Chihowah yvt Eblaham a, Nanta katiohmi ho Salah vt, Sa sipokni kv̄t vlla eshi li pulla chi ho, achit yukpa cho?

14. Nana kia Chihowah ya i kullo kv̄t im atampa hinla cho? Nitak v̄lhpisa yvt ont ai v̄lhpiesa ka aiokchaya he nitak vt takanlikmak o falamvt chim aya li pulla hi oke, mikma Salah vt vlla nakni yo esha hi oke, im achi tok.

15. Yohmi ma Salah vt holabit, Yukpa li tuk keyu, achi tok; nukshopa hatuk okvt. Mihma, Aha, yohmi kia ish yukpa tuk oke, achi tok.

16. Mihma hatak ash osh ymma chieya tuk vt wakaya mvt, Sotom pilla ho pit hopokoyo tok: mihma Eblaham vt hina fohkit pila chi hosh awant ia tok.

17. Mihma Chihowah yvt, Nana yvmihchi la chi kv̄t Eblaham a in luhmi la chi cho?

18. Eblaham vt oklushi chito, micha kullo hosh toba pullakma, oklushi puta moma yakni paknaka aiasha kv̄t ymmak o a yukpa hi oka.

19. Ymmak ash osh im vlla v̄hleha ha, micha in chuka achvfa et iakaiya ka im apihisakma, Chihowah i hina ya holitoblit aiv̄lhpiesa ai atokowa kak o yvmihcha hi ya ithana lishke; yumohmi ho Chihowah yvt Eblaham a isht anum-puli tuk vt im aiahliche hi oke, achi tok.

20. Mihmvt Chihowah yvt Sotom, micha Komollah ya ishit pahaya kv̄t chito, micha i nanashvchi vt weki fehna hatuk o.

21. Himak a akowa lish, ishit pahaya na vm ahanla tuk mak osh ahli bieka yomohmi tuk okma pisa lashke; amba keyu hokma ithvna lashke, achi tok.

22. Mihma hatak ash osh ymma hielit nashuka ya filimmi mvt, Sotom pilla ha itiachi tok: amba Eblaham vt Chihowah itikba ya hikia moma tok.

23. Mihmvt Eblaham vt bilika ona cha, Aivlhpiesa ak kia hatak haksi aieninchit ishit ish kancha chi cho?

24. Tvmaha holihta anukaka ya aivlhpiesa vt pokoli tahlapi hosh asha yoba hokmvno; aivlhpiesa pokoli tahlapi kv yvmma asha pulla kak o, tvmaha holihta ya chik apoancho hosh ishit ish kanchi hak inla hinla cho?

25. Aivlhpiesa ya hatak haksi aieninchit vbi, yvmma chohmi ka chi ahalaia he keyu hoke; micha aivlhpiesa vt hatak haksi ya itilaua he, yvmmak okvt chi ahalaia he keyushke: yakni moma Nan im apesa yvt aivlhpiesa kak o yvmihcha he keyu cho? achi tok.

26. Mihma Chihowah yvt Sotom a tvmacha holihta anukaka ya hatak aivlhpiesa pokoli tahlapi ho ai ahayuchi likmvt, yvmmak atuk pulla mak o tvmaha holihta ya mominchit apoanchi la chi hoke, achi tok.

27. Mihma Eblaham vt afalamichit, Yakeh, himak a lukfi pushi, micha hituk chubbi ak o sia hakinli kia Chihowah ya im anumpulit pisa lishke:

28. Aivlhpiesa pokoli tahlapi kash tahlapi hosh isht ik ono yoba hokmvno, tahlapi hosh ik ono ma, tvmaha holihta ya mominchit okpvnit ish kancha hinla cho? achi tok. Mikma Pokoli ushta akucha tahlapi ho yvmma ai ahayuchi likmvt, okpvnit kanchi la he keyushke, achi tok.

29. Mihma anonti im anumpulit, Pokoli ushta hosh yvmma asha yoba hokmvno, achi tok. Mihma, Pokoli ushta hatuk pulla mak o yvmihchi la he keyu hoke, achi tok.

30. Ikikkeh, Chitokaka yvt ik a nukhobelo kashke, mikma anumpuli lashke: Pokoli tuchina hosh yvmma asha yoba hokmvno, achi tok. Mihma, Pokoli tuchina ho yvmma ai ahayuchi likmvt, yvmihchi la he keyu hoke, achi tok.

31. Mihma, Yakeh, himak a Chihowah ya im anumpulit pisa lishke: Pokoli tuklo hosh yvmma asha yoba hokmvno, achi tok. Mihma, Pokoli tuklo hatuk pulla mak o okpvnit kanchi la he keyushke, achi tok.

32. Mihma, Ikikkeh, Chitokaka yvt ik a nukhobelo kashke, mikma himakma himonna illa ho anumpuli lashke: Pokoli

hosh yvmma asha yoba hokmvno, achi tok. Mihma, Pokoli hatuk pulla mak o okpvnit kanchi la he keyushke, achi tok.

33. Mihmvt Chihowah yvt Eblaham a itim anumpulit issa mvt ia tok: mihma Eblaham vt falamvt aivtta ya ona tok.

CHAPTA XIX.

ATUK o opia ma, enchel tuklo kash osh Sotom a ona tok; mihma Lot vt Sotom holihta okhissa ya bininli tok; mihmvt Lot vt pisa mvt, wakayvt afamvt ia tok: micha nashuka ya isht akachunolit aka hlipia tok.

2. Mihmvt, Yakeh, a shahli ma! himak a fullotvt hvchin tishu im aboha ya hvsh chukowa cha, hvsh ashwa na onnashke; micha hvch iyi ya hvsh achefashke; atuk mvt onnahinli fehna hvsh wakaya cha, hvchi hina ya hvsh ayashke, achi tok. Mihma, Ahá, amba aiitvnowa ak o il ashwa na onna chi hoke, achit okla tok.

3. Mihma im achunanchi fehna tok: mihma im a fullota cha, im aboha ya chukowa tok; mihma impvchi im ikbi cha, pvska ik shatvmmo i nunachi ma, impvt okla tok.

4. Yohmi kia okla ik tvshko kisha ho, tmaha holihta hatak vhleha, Sotom hatak vhleha fehna kvv sipokni, micha himita aiena okla moma kanima moma ka minti hosh aboha yash apakfoyubli tok.

5. Micha Lot a i howa mvt, Himak ninak a hatak vt chim vla tuk mvto? kohchit isht ish pim vla na, il ithvnashke, okla im achi tok.

6. Mihma Lot vt okhissa ya kohchvt im ona cha, okhissa isht vlhkuma yash okhishvtv kohcha mvt,

7. Itibapishi li vhleha ma! nanashvchi ilvppa chohmi ka hvch ik yvmohmo kashke, hvchim asilhha lishke.

8. Yakeh, himak a svso tek tuklo kvv hatak haleli keyu hosh vm ashvrvshke; hvchim asilhha lishke, isht ak hvchi kohchi na, kaniohmi kak osh hvchim vlhpiesakmvt hvsh yv-mihchashke: peh hatak ilvppak okvno nana hvchik kanioh-

mecho kashke; yvmohmi kak o vm aboha ishitholmo a hoshonti ka nuta ya vla hatuk oka, achi tok.

9. Mihma, Misha hikiá, okla achi tok. Micha anonti, Hatak achvfa ilvppvt cheki itintakla pi takla anta chi hosh vla tuk vt nanapesa ya chi hotuma? Himak a chishno ak o yvmma e yvmihcha hetuk i shahlichí hosh e chi yvmihcha chi hoke, okla achi tok. Mihmvt hatak Lot ash okla i kvlllo fehna tok; micha okhissa ya tivbla chi hosh bilika ai vla tok.

10. Yohmi tuk kia hatak ash osh ilap ibbak a pit weli cha, Lot a halvllit aboha ya fohki cha, okhissa yash okhishta tok.

11. Micha hatak okhissa aiasha kash hochito, micha chipunta moma ka nishkin a lvblichit okla tok: yohmi ho okhissa ya ahayuchi bvnvt okla ile tikambichi tok.

12. Mihma hatak ash osh Lot a, Ilvppa inla kvvt chim asha moma cho? chiyup, micha chiso vhleha, micha chisotek vhleha, micha nana hosh tmaha holihta ya chim ashakmvt, ilvppa isht ish kohchashke.

13. Ishit pahaya kvvt Chihowah itikba ya chito fehnvt taha hatuk o, tmaha holihta ilvppa okpvnit e kancha chi hoke; mikma okpvnit e kancha chi ho, Chihowah yvt et pi pila tuk oke, im achi tok.

14. Mihma Lot vt kohchvt ia cha, iyup vhleha hvvt ushetik vhleha ha itauwaya tuk a ont im anumpulit, Ho wakayá, ilvppa hvsh kohchashke; Chihowah yvt tmaha holihta ilvppa okpvnit tahla chi hoke, achi tok: yohmi kia yopula nana ho iyup vhleha hvvt im itilauí tok.

15. Atuk o onvt minti ma, enchel ash osh Lot a tushpa-lechit, Wakaya cha, chi tekchi, micha chisotek tuklo ilvppa ashwa hokvno pehlichí, yohmi hosh tmaha holihta nana-shvchika iba takla luvt ik hvchi tamoo kashke, achi okla tok.

16. Atuk o svlaha ma, hatak ash osh ibbak a halvlli mvt, tekchi ibbak a halvlli mvt, ushetik tuklo ibbak a halvllit okla tok: Chihowa yvt i nukhaklo hatuk o; micha tmaha holihta ya ishit kohchit hilechit okla tok.

17. Atuk o kocha ya isht ona ma yakohmi tok, Malelit chi okchayashke: chim ashaka ya filemvt ish pisa ná, micha

yakni patali kanima chik anto kashke; malelit nvniha ish onashke, luvt chi taha ná, achi tok.

18. Mihma Lot vt, Ikikkeh, ik yohmo kashke, an Chitokaka ma!

19. Yakeh, himak a chin tishu hv́t chi tikba ya chi holhponayo hanta ai ahayuchishke, micha vm ilhfiopak a ish okchalínchi, yvmma ish yvmihchi kv́t nan ish i nukhaklo vt ish chitolichishke: atuk o malelit nvniha ona la he keyushke, nan ik achukmo kia si onvtola cha, sv́lli yoba na.

20. Himak a yakeh, tmaha holihta ilvppvt olanlosi, malelit ona hinla hoke; micha iskitinesishke: ikikkeh, yvmak o malelit ona lashke, (iskitinesi keyu cho?) mikma vmi shilombish vt okchaya chi hoke, im achi tok.

21. Mihma, Yakeh, nana ilvppa chim aiokpanchi li ak inli hokvt, isht ish anumpuli tuk tmaha holihta ilvppa okpv́nit ak kancho ka chi hoke.

22. Tushpá, malelit yvmmak o ish onashke: yvmma chik on o kisha ka nana kaniohmichi la he keyu hoka, im achi tok: yvmohmi hoka tmaha holihta yvmmv́t Soa hohchifo tok.

23. Lot vt Soa ya ont chukowa ma, hv́shi vt kohchvt yakni ya on tomni tuk atok.

24. Yohmi ma Chihowah yvt hituk lakna micha luak Chihowah ya a minti Sotom micha Komollah aiena ka vba et ai on umbuchi tok.

25. Michá tmaha holihta yvmma puta kash, micha yakni patali moma, micha tmaha holihta yvmma puta kash okla moma, micha yakni ai offo aiena ka okpv́nit kanchi tok.

26. Amba tekchi vto im ashaka av́vt olbul pit hopokoyo cha, hv́pi hikia tobt hikia tok.

27. Mihma Eblaham vt onnahinli fehna ho wakaya cha, Chihowah itikba ya hikia tuk ash osh ona tok.

28. Mihmv́t Sotom pilla, micha Komollah pilla, yakni patali moma pilla ka pit hopokoyvt pisa ma, yakeh, yakni yash shobulli kv́t tv́li abila shobulli chiyuhmit vba mahaya tok.

29. Atuk o yakohmi tok, Chitokaka yvt yakni patali tmaha holihta puta ka okpv́nit tahli mv́t, Eblaham ajithaiyana tok; micha tmaha holihta puta Lot vt ai vtta yash ok-

pvnit tahli mvt, nana okpulot taha kash im itin takla ya ai ishit Lot a kohchi tok.

30. Mihma Lot vt Soa ya kohchvt ushetik tuklo ka pehlinchit nvnih ha ont ai vtta tok: Soa ya vtta kvv nukshopa hatuk okvt; micha ushetik tuklo kash aienvt hichukbi yo asha tok.

31. Atuk o akni ash osh nakfish a, Piki vt sipoknishke, mikma yakni moma a yvmohmi chatuk a yvmohmit piba tvshka hi vt hatak nana kia yakni paknaka ya ikshoske.

32. Inta piki ya oka paki il ipeta cha, il iba tvshkashke, yvmohmi hosh piki im ishtatiaka ya il apoanchashke, im achi tok.

33. Micha mih ninak a iki ya oka paki ipetvt okla tok; micha akni hvv iki ya iba chukowa cha, iba tvshki tok; mihma itola tuk osh tani ka ik akostinincho tok.

34. Atuk o ont onna ma yakohmi tok, akni hvv nakfish a, Yakeh, pilashash okhlili ma aki ya iba tvshki li tuk oke: himak ninak ak kia oka paki il ipetashke; mikma ish iba chukowa cha, ish iba tvshkashke, yvmohmi hosh piki im ishtatiaka ya il apoanchashke, im achi tok.

35. Micha ninak yvmmak kia iki ya oka paki ipetvt okla tok; mihma nakfish ash osh wakayvt ont iba tvshki tok; mihma itola tuk osh tani ka ik akostinincho tok.

36. Yakohmi hosh Lot ushetik ita tuklo kvv iki ya vlla i shalit okla tok.

37. Atuk osh akni hvv vlla nakni yo sholi cha, hohchifo ka Moab achi tok: mihi yosh Moabait okla ha iki yosh himak nitak a ant ai vhli hoke.

38. Mihma nakfish yvmmak kia vlla nakni yo sholi cha, hohchifo ka Ben-ammi achi tok: yvmmak osh Ammon im vlla vhleha ha iki yosh himak nitak a ant vhli hoke.

CHAPTA XX.

MIHMA Eblaham vt yvmma vttvt apoyua cha toshowvt oka mahli pilla yakni yo ia mvt, Katesh micha Shu

itin takla ak o vttvt, cheki itin takla Kela ak o ai vtta tok.

2. Mihmvt Eblaham vt tekchi Salah ya, An tek oke, achi tok. Mihma Kela i miko Abimelek vt Salah ya pit hoyo cha, ishi tok.

3. Yohmi tuk kia Abimelek vt ninak a holhpokuna ho, Chitokaka yvt im ona cha, Yakeh! ohoyo yvmma ish ishi tuk pulla kak osh hatak illi chia hoke: hatak tekchi yoka, im achi tok.

4. Yohmi kia Abimelek vt i bilika ik ono ke tuk atok: mihmvt Chitokaka ma, oklushi aivlhpiesa yak kia ish ba chi cho?

5. An tek oke, vm achi tuk keyu cho? mihma ilap fehna ak kia, A nakfi oke, achi tuk oke; sa chukvsh vt aivlhpiesa hosh, micha subbak vt nana okpvi keyu hosh ilvppa yvmihchi li tuk oke, achi tok.

6. Mihma Chitokaka yvt holhpokuna ho, Ahli, chi chukvsh vt aivlhpiesa hosh ish yvmihchi tuk a ithana lishke; chik sa yoshubo ka chi ka, vno ak kia chi halanli li tuk oka: yvmohmi kak o ik potoli, ak chim ahno tuk oke.

7. Yvmohmi hoka himak a hatak ash tekchi ya ish i falvmnichashke; hopaii yoka, mikma anumpa ilbvsha ishit chi anumpulikma, chi okchayashke; atuk o chik i falvmmechokmvt, chishno, micha nana hosh chimmi moma ka aienvt chilli pulla chi kvv ish ithaiyanashke, im achi tok.

8. Yvmohmi na Abimelek vt onnahunli fehna ho wakaya cha, in tishu vhleha moma ka hoyo cha, nana ilvppa moma ka im anolit haklochi tok: mihma hatak vhleha hash osh nukshopa fehna tok.

9. Yohmi ma Abimelek vt Eblaham a hoyo cha, Nanta mak o ish pi yvmihchi tuk oh cho? micha nanta ho chim ashvchi li tuk o, vno, micha vm avehlichika ya nanashvchi chinto ish pi onochi tuk oh cho? nana kvv a yvmohma he vlvpesa keyu ho is si yvmihchishke, im achi tok.

10. Michi Abimelek vt Eblaham a, Nanta ho ish pisa hosh nana ilvppa ish yvmihchi tuk oh cho? im achi tok.

11. Mihma Eblaham vt, Yakni ilvppa Chitokaka ya i

nukwia kvt iksho pullvshke; micha sa tekchi pulla kak o sv ba chi hoke, ahni li kak atuk oke.

12. Atuk o yohmi kia an tek o mvhlishke; aki yo ushetik, yohmi kia hvshki ya ushetik keyu hoke: atuk osh sa tekchi toba tok.

13. Atuk o yakohmi tok, Chitokaka yvt aki in chuka ya issvchit fullohlihinchit susht aya ma, Ilvppak o is sa kana kvt ish otvnichashke; yakni moma kanima yo il onakma, vno ya, A nakfi yoke, is si achashke, im achi li tuk oke, achi tok.

14. Mihma Abimelek vt chukfulhpoa micha wak, micha hatak tishu, micha ohoyo tishu aiena ka ishi cha, Eblaham a ima mvt tekchi Salah ya i falvmmichi tok.

15. Micha Abimelek vt, Yakeh, a yakni vt chi tikba itoyvshke: kanima yo chim vllhpiesakmvt, ish ai ahantashke, achi tok.

16. Micha Salah ya, Yakeh! chi nakfi ya tvli hvta tushahli tahlepa sipokni achvfa ho ima lishke: yakeh, chi apeha moma, micha inla aiena moma ka yvmmt nishkin ishit chim ompoholmo ya chi hoke, im achi tok: yvmihchi ho Salah vt nan ashvchi tuk vt nukfohka tok.

17. Yvmohmi ma Eblaham vt Chitokaka ya im ilbvshvt isht anumpuli tok: mihma Chitokaka yvt Abimelek, micha tekchi, micha in tishu ohoyo moma ka hlakofichi tok: mihma vlla okla eshi tok.

18. Chihowah yvt Eblaham tekchi ak atuk pulla kak o Abimelek in chuka achvfa im oshvto moma ka katalichit im okshita tuk oka.

CHAPTA XXI.

ATUK o Chihowah yvt achi tuk mak osh Salah ya i nowa tok: micha Chihowah yvt anumpuli tuk mak osh Salah ya i yvmihchi tok.

2. Eblaham vt sipoknit taiyaha ho nitak vllhpisa Chihowah yvt im anoli tuk a ont vllhpiesa ma, Salah vt chakali cha, vlla nakni yo im eshi tok oka.

3. Mihma Eblaham vt vlla nakni im vtta kash Salah vt im eshi kash hohchifo ha Aisak achi tok.

4. Mihmut Eblaham vt, Chitokaka yvt i miha tuk mak o, ushi Aisak vt nitak untuchina ho hakshup in tvbli tok.

5. Yohmi ka Eblaham vt afummi tahlepa achvfa ho, ushi Aisak vt im vtta tok.

6. Mihma Salah vt, Chitokaka yvt sai yukprchi tuk oke; yohmi ka kva hosh haklo moma kut svbai yukpa chi hoke, achi tok.

7. Micha, Kvta hosh Eblaham a Salah vt vlla pishecha chi hoke, im acha hinla tuk oh cho! sipoknit taiyaha ho vlla nakni yo im eshi li hoka, achi tok.

8. Mihma vlla yash osh hofantit ivt, pishit issa tok: atuk o pishi ka issvchi nitak makinli ma Eblaham vt imprchi chito ikbi tok.

9. Atuk o Echip ohoyo Haka ushi Eblaham im eshi tok vt ishit yopulvt anta na Salah vt pisa tok.

10. Yohmi kak o Eblaham a, Ohoyo yuka ilvppa, micha ushi itatuklo ka ish kampilashke: ohoyo yuka ilvppa ushi vt aiisha he vlhpesa ya svso Aisak fehna ka ibai isha he ke-yu hoke, achi tok.

11. Mihma ushi ak atuk pulla mak o nana ka Eblaham vt ik im vlhpeso fehna tok.

12. Mihma Chitokaka yvt Eblaham a, Vlla ak atuk pulla mak o, micha chi yuka ohoyo ak atuk pulla mak o isht ik chim vlhpeso kashke: Salah vt nana chim achi tuk mak o moma ka im anumpa ha ish i haponaklashke: Aisak ak o chim ai unchololi hvt iba holhtinvt hohchifa hi oka.

13. Mikma ohoyo yuka ushi ak kia chim ai unchololi yoka, oklushi ikbi la hi oke, im achi tok.

14. Atuk o Eblaham vt onnahinli fehna ho wakaya cha, ilhpak, micha oka kotoba alhto ho Haka ya imvt tahchi ya abanvli hosh vlla yash ima cha, chvffichi tok: mihma Haka vt ia tuk osh Bee-sheba yakni haiaka ya fullokahanchi tok.

15. Atuk osh oka kotoba alhto tuk vt taha ma, vlla yash itvpushi achvfa ho nuta pila tok.

16. Micha ivt mishema oski naki a pila hotuk ohmi ho

ona cha, et ichapaka y_o binili tok: vlla yvt illi k_a ak peso kashke, achi hatuk okvt. Mihmvt et ichapaka y_a binili cha chitolit yaiya tok.

17. Mihma Chitokaka yvt vlla ilbvshvt paya k_a haklo tok: mihma Chitokaka im enchel vt Haka y_a vba et ai i howvt, Nanta chi katiohmi cho? Haka ma, Ik chi komunto kashke; Chitokaka yvt vlla yvt ai itolvt ilbvshvt paya k_a haklo hoka.

18. Wakayá, vlla yash wakayachi cha, chibbak a isht ish ieshashke; oklushi chinto ikbi la hi oka, im achi tok.

19. Micha Chitokaka yvt nishkin i fatummi na, kvli hofobi oka y_a pisa tok: mihmvt ivt kotoba yash oka alotoli cha, vlla yash ishkochechi tok.

20. Mihma Chitokaka yvt vlla y_a iba foyuka tok; atuk o hofantit taha mvt, yakni haiaka vtta cha, ititanampo eshi imponna toba tok.

21. Micha Palan yakni haiaka ak o vtta tok: mihma ishki vt Echip yakni ak o ohoyo h_a ai ishit ima tok.

22. Atuk o nitak yvmma foka ma yakohmi tok, Abimelek, micha Fikol in tvshka chipota pehlich i ita tuklo kvt Eblaham a im anumpulit, Nana h_o ish a kaniohmi moma k_a Chitokaka yvt chiba foyuka hoke;

23. Yvmohmi hoka himak a Chitokaka hochifot anumpa kvllo a mihvt vno, micha svso, micha svso h_a ushi aiena k_a nana kia haksichit chik pi yvmihcho kashke; amba chi k_a na hosh chi yvmihich li tok a choyuhmit vno, micha okla inla yosh yakni ish ai ahanta tuk vt i yvmihcha he osh (achit) is svv il onochashke, achit okla tok.

24. Mihma Eblaham vt, Anumpa kvllo il onochi lashke, achi tok.

25. Mihma Eblaham vt Abimelek in tishu vhleha hvvt kvli hofobi y_a afvt im ishi tuk ak o, Abimelek a nukfohkichi tok.

26. Mihma Abimelek vt Kvna hosh nana ilvppa yvmihchi tuk a ithana li tuk keyu: micha is svv anoli tuk keyu h_o himak nitak illa h_o haklo lishke, achi tok.

27. Mihma Eblaham vt chukfulhpoa, micha wak aiena k_a

ishi cha, Abimelek a ima tok: mihma ita tuklo kv̄t nan it-im apesa tok.

28. Mihma Eblaham vt chukfulhpoa ya ai ishit chukfulhpoa ushi tek untuklo hō ila hiohlich̄i tok.

29. Mihma Abimelek vt Eblaham a, Chukfulhpoa ushi tek untuklo ilvppak o nanta hō ish miha hosh ila ish hiohlich̄i cho? achi tok.

30. Mihma, Chukfulhpoa ushi tek untuklo ilvppa subbak ish ai isha ch̄i hoke; yvmohmi hō kv̄li hofobi ilvppa kulli li tuk a nan isht vm atokowa ya ch̄i hoke, achi tok.

31. Yvmohmi hatuk o yakni yvmma Bee-sheba hochifo tok; yvmmak o ita tuklo kv̄t anumpa kv̄llo ai il onochi tuk okvt.

32. Yakohmi hosh Bee-sheba ya nana ai itim apesvt okla tok: yohmi ma Abimelek, micha in tushka chipota pehlich̄i Fikol ash ita tuklo kv̄t wakaya cha, falamvt Filistin okla i yakni ya onvt okla tok.

33. Mihma Eblaham vt Bee-sheba ak o iti lokoli hilechi cha, yvmmak o Chihowah Chitokaka bilia hohchifo ha ai i pahaya tok.

34. Mihmvt Eblaham vt Filistin okla i yakni ya okla inla yosh ahanta na nitak laua tok.

CHAPTA XXII.

ATUK o ilvppa puta kv̄t yvmohmi ha ya yakohmi tok, Chitokaka yvt Eblaham a imomaka pisvt, Eblaham ma, achi tok. Mihma, Yakeh, yak asha lishke, achi tok.

2. Mihma, Himak a chiso hash, chiso yvmmak bieka Aisak ash ish holitobli chatuk vt ishi cha, Moliah yakni ya ish onashke; micha nv̄nih achvfalit chim anoli la ch̄i ka paknaka ya hukmit im issa mak o ikbit ont ai is sum issashke, achi tok.

3. Mihma Eblaham vt onnahinli fehna hō wakaya cha, im issuba haksobish falaia ya umpatali mvt, hatak himithoa im asha tuk ash tuklo hō, micha ushi Aisak aiena ka pehlich̄i

cha, ishit hukmit im issa iti ya pvhli mvt, wakaya cha Chitokaka vt im anoli tuk mak o ai ona tok.

4. Yvmohmi tuk osh nitak ont atuchina ma Eblaham vt akachakalit hopokoyo mvt, ushi ai im issa chi nvni hvt hopaki ho et hikia na pisa tok.

5. Mihmvt Eblaham vt hatak himithoa yash, Ilvppa issuba haksobish falaia ya awant hvsh ai ashwa na vno, micha vlla ya il ita tuklo kvv yvmma ont il ai aiokpvchi cha, anonti e hvchim vlashke, im achi tok.

6. Mihmvt Eblaham vt ishit hukmit im issa iti ya ishi cha, ushi Aisak a shalichi tok; mihmvt luak, micha bvshpo aiena ka ilap ibbak a isht ai ishi cha, itatuklot ia tok.

7. Mihma Aisak vt iki Eblaham a im anumpulit, Aki, achi tok. Mihma, Yak aya lishke, svso ma, achi tok. Mihma, Yakeh! luak, micha iti okvto yak ashvshke, amba hukmit im issa ckukfvlhpoa ushi mvto? achi tok.

8. Mihma Eblaham vt, Svso ma, Chitokaka yvt ilap akinli hosh hukmit isht aiokpvchi chukfvlhpoa ushi ya ahayucha chi hoke, achi tok: yohmi ma ita tuklot ia tok.

9. Atuk osh Chitokaka yvt im anoli tuk nvni ha onvt okla tok: mihma Eblaham vt yvmmak o alta ikbi cha, iti ya achukmalit bohli tahli tok; mihmvt ushi Aisak a takchi cha, alta paknaka iti on asha tuk a onochi tok.

10. Mihmvt Eblaham vt ushi ya vba chi hosh ibbak a pit welit bvshpo a ishi tok.

11. Mihma Chihowah im enchel vt vba ya et i howvt, Eblaham ma! Eblaham ma! ahanchi tok. Mihma, Yak hikia lishke, achi tok.

12. Mihma, Chibbak a vlla nakni yash ish onochi na, micha nana kia chik i kaniohmecho kashke: himak a chiso hash, chiso yvmmak illa kash chik svv i halvillo hokvt, Chitokaka ya ish i nukshohompa ka ithana li hoka, achi tok.

13. Mihma Eblaham vt akachakalit hopokoyo ma, yakeh, im ashaka ya chukfvlhpoa nakni vt abohli ho lapish isht talakchi hosh hikia tok: mihmvt Eblaham vt ivt chukfvlhpoa nakni ash ont ishi cha, ushi ya atobbichit hukmit isht aiokpvchi mak o im issa tok.

14. Mihma Eblaham vt yvmma Chihowah-chileh hochifo tok: yvmmak atuk mak o, Chihowah i nvniha na nana kvta avlhtaiya hoke, himak nitak a achi moma hoke.

15. Mihma Chihowah im enchel vt atukla ma, Eblaham a vba et ai i howa tok.

16. Micha Chihowah vt, Uno ak o vno akinli ho hochifot anumpa kvllo il onochit, Nana ilvppa ish yvmihchi hatuk oka, micha chiso hash, chiso yvmmak illa kash chik svm i halvlo hatuk oka;

17. Nayukpahanlit chi yukpali la hi oke, micha chim ish-tatiaka ya apaknvchi hokvno apaknahanchit vba fochik a choyuhmichi likmt, okhvt a vhli shinuk aiasha kak o choyuhmichi la hi oke; mikma chim ishtatiaka yvt in tvnvp i holihta okhissa ya iesha hi oke.

18. Mikma vm anumpa ha ish im antia hoka, chim ishtatiaka ak o oklushi moma yakni paknaka aiasha kvta nan isht aiyukpa hi oke, achi li tuk oke, achi tok.

19. Yohmi ma Eblaham vt hatak himithoa im aiasha kash osh falamt im ona tok; micha okla wakaya mvt itapehvt Bee-sheba ya ona tok: mihma Eblaham vt Bee-sheba ak o vta tok.

20. Atuk o ilvppa puta kvta yvmohmi ha ya yakohmi tok, Eblaham a im anolit, Yakeh! Milkah yvmmak kia chitibapishi Naho ya vlla im ehishishke;

21. Ushi vta ahpi Hus, micha itibapishi Bus, micha Alam iki Kemuel,

22. Micha Cheset, micha Haso, micha Piltash, micha Chitlaf, micha Behluel.

23. Micha Behluel vt Lebekah ya tobachi tok: untuchina ilvppak o Milkah vt Eblaham itibapishi Naho ya im eshi tok.

24. Mihma im itaiena yvt yvmma hohchifo kvta Leumah atuk osh yvmmak kia Tebah, micha Kaham, micha Hlahash, micha Maakah aiena ka im eshi tok, achi tok.

CHAPTA XXIII.

MIHMA Salah vt afvmmi tahlepa achvfa cha pokoli tuklo akucha unfuklo tok: ilvppak osh Salah vt okchayvt ahanta tok afvmmi holhtina hoke.

2. Atuk osh Salah vt Kichalh-alba ak o ai illi tok; yvmvt Kenan yakni talaia Heblon mak oke. Atuk o Eblaham vt Salah ya ishit nukhaklot yaiyvt aya hosh vla tok.

3. Mihmvt Eblaham vt wakayvt im illi yash i filvmmiit hikia cha, Helh ushi vhleha ha im anumpulit,

4. Okla inla micha himo wihvt aya sia hosh hvchi takla ahanta lishke: hvchi itin takla ya ahollohpi yakni yosh an talaia chi ho micha vm illi ya a hohpit sa tikba ya a luhmi la chi ka hvs svmashke, achi tok.

5. Mihma Helh im vlla vhleha hv Eblaham a im afalaminchit,

6. Ish pi haponaklashke, a shahli ma, Chitokaka i holitopa yosh pi takla ahanta chia hoke: pim ahollohpi achukma i shahli kak o chim illi ya ish a hohpashke: e kanima kia pim ahollohpi ya e chi halvlla he keyu hoke, yohmi na chim illi ya chik a hohpo ka he keyu hoke, im achi tok.

7. Mihma Eblaham vt wakayvt hikia cha, yakni yash okla ha, Helh im vlla vhleha kash im akachunolit aka hlipia tok.

8. Mihmvt itim anumpulit, Um illi ya hohpit sa tikba ya a luhmi la hi ya hvsh ahnikmvt, hvs sa haponaklo cha, Soha ushi Eflon a hvs svm ai im asilhashke.

9. Yohmi na Makpelah hichukbi, yvmvt im osapa ont vhli in talaia kv vmashke; hvchitin takla ya ahollohpi yakni yosh an talaia chi ho tvli holisso ho aivlli vhpiesakma vmashke, achi tok.

10. Yohmi ka Eflon vt Helh im vlla vhleha takla vta hatok. Mihmvt Eflon Hittait hatak ash osh Eblaham a im afalaminchit, Helh im vlla vhleha, in tvamaha holihta okhissa ya ont chukowa moma kv haklo ho,

11. Aha, a shahli ma, is sa haponaklashke: osapa ya chima li hoke, micha hichukbi vt anukaka talaia ka chima li

hoke: vm okla ha ushi vhleha itikba ya a chima lishke: chim illi ya ish a hohpashke, achi tok.

12. Mihma Eblaham vt yakni yash okla itikba ya akachunolit aka hlipia tok.

13. Micha yakni yash okla vhleha hvt haklo ho, Eflon a im anumpulit, Yohmi kia is suma chi hokmvt, is sa haponaklashke, chim asilhha lishke: osapa ya tvli holisso ya chima lashke: is svm ishikma, vm illi ya a hohpi lashke, achi tok.

14. Mihma Eflon vt Eblaham a im afalaminchit.

15. A shahli ma, is sa haponaklashke; yakni vt tvli hvt shekel tahlepa ushta ai iti vlli vlhpesvshke; yvmmt pim itin takla ya nanta hoh cho? chim illi ya ish a hohpashke, im achi tok.

16. Mihma Eblaham vt Eflon a i haponaklo tok; micha Helh ushi vhleha hvt haklo ho, Eflon vt miha tuk mak o, Eblaham vt tvli hvt ya i wekichi tok, nan itatoba vhleha hvt itim ishi chatuk mak osh tvli hvt shekel tahlepa ushta hatok.

17. Mihma Eflon im osapa yvmmt Makpelah ya talaia Mamle itikba talaia kash osapa, micha anukaka hichukbi talaia aiena ka, micha iti moma osapa ya hiohmaya tuk, micha aivhli fullota ka hiohmaya tuk o,

18. Eblaham i yakni ya chi ho Helh im vlla vhleha itikba ya, micha in tvmaha holihta chukowa moma ka itikba ya ai im aiahlichi tok.

19. Mihma i himmak ak o Eblaham vt Mamle ya itikba talaia Makpelah osapa hichukbi hikia ak o tekchi Salah ya a hohpi tok: yvmmt Heblon Kenan yakni talaia kak oke.

20. Mihma osapa, micha hichukbi anukaka talaia kvt ahollohpi yakni ya chi ho, Helh ushi vhleha hvt Eblaham a im aiahlichi tok.

CHAPTA XXIV.

ATUK o Eblaham vt sipoknit nitak lauvt in taiyaha hatok: mihma Chihowah yvt Eblaham a nana moma ka isht yukpali tok.

2. Atuk o Eblaham vt in chuka achvfa tishu sipokni i shahli, yummvt nana im asha tuk moma ka pehlichy yo, Chibbak a saiyubi nuta ya isht ish potolashke, chim asilhha lishke:

3. Mikma Kenan okla takla ahanta li ka ushetik vhleha ha ohoyo ai ishit svso ha chik emo ka he ya, Chihowah, vba in Chitokaka, micha yakni in Chitokaka ya hochifot anum-pa kullo chil onochечи lashke.

4. Amba a yakni ya, a kanomi i yakni ya ish ona cha, ohoyo ha ai ishit svso Aisak a ish imashke, im achi tok.

5. Mihma tishu hash osh, Ohoyo hvt yakni ilvppa si awant vla he keyu hokmuno, chiso ha yakni aivttvt ish minti tok a anonti isht ona la hi pulla hoh cho? im achi tok.

6. Mihma Eblaham vt, Ahah, ish ahni cha, svso ha yvma isht chik ono kashke,

7. Chihowah, vba in Chitokaka yvt, yummak osh aki in chuka, micha a kanomi i yakni ya a svshi tok vt, yummak osh vm anumpuli cha, anumpa kullo vm ilonochit, Chim ish-tatiaka ya yakni ilvppa ima la hi oke, vm achi tuk vt yvmmak osh im enchel a et pila na, chi tikba ayakma, yummak o ohoyo ha ai ishit svso ha ish ima hi oke.

8. Atuk o ohoyo hvt chi awant minta he keyukma, anum-pa kullo ilvppak ash ish i mokofa hi oke; peh svso ha anon-ti yvma isht chik ono kashke, im achi tok.

9. Mihma tishu hash osh i shahli Eblaham iyubi nuta ya ibbak ishit potoli cha, nana yvma isht anum-pa kullo im il onochit anum-puli tok.

10. Micha tishu hash osh i shahli hvt kamel im aiasha kash kamel pokoli ho ishi cha ia tok: (i shahli imilayak mo-ma kvtt ibbak ak o foyuka hatuk okvt;) micha wakaya mvtt, Mesopotamia yakni ya onvt, Naho in tmaha holihta ya ona tok.

11. Atuk osh opivtt taha ma, ohoyo hvt kohchvt oka ochi chatuk vt ont ai vlhpesa ma kvli hofobi tmaha holihta ko-cha ya i kamel a hvchukbilhkvchi tok.

12. Mihmvtt, Chihowah, a shahli Eblaham in Chitokaka

ma, nana ahni li ka himak nitak a is sum aiahlichi cha, a shahli Eblaham a ish i kanashke, chim asilhha lishke.

13. Yakeh, oka kvli hofobi bilika ilvppa hikia lishke; micha tumaha holihta hatak a ushetik vhleha hvt oka ocha chi hosh et kohchvshke:

14. Atukma yakohmashke, ohoyo himita nana ho, Chim isht ochi ya akvchi na, ak ishkó, chim asilhha lishke, achi likma, Ishkó, micha chi kamel ak kia oka ya ipeta lashke, achikmvt, yummak osh chin tishu Aisak a ish im atokoli tuk mak ashke; mikma yummak o a shahli ha ish i kana tuk a isht ithvna lashke, achi tok.

15. Atuk o yakohmi tok, anumpulit ont ik tahlo moma ho, yakeh, Lebekah vt, yummvt Eblaham itibapishi Naho tekchi Milkah ya ushi Behluel im vtta tok vt im isht-ochi vt tahchi ha on talaia ho kohcha tok.

16. Michā ohoyo himita yvt hatak haleli keyu, hatak nana kia ithana tok keyu yosh pisaka aiokli fehna hatok: atuk osh kvli ya ona cha im isht-ochi yash alotoli cha, vla tok.

17. Mihma tishu hash osh malelit ont afama cha, Oka chim isht-ochi alhto ka kanomosi ka ak ai ishkó, chim asilhha lishke, achi tok.

18. Mihma, ohoyo himita yash osh, Ishkó, a shahli ma, achi tok: mihmvt tushpvt im isht-ochi ya akvchit ibbak isht ishi cha, oka ya ipeta tok.

19. Atuk osh oka ya ipetvt tahli mvt, Chi kamel ak kia oka ochit ipeta li, ishkot im vlpesashke, achi tok.

20. Mihmvt tushpvt im isht-ochi ya tosholit oka aiipeta peni ya pit vni cha, oka ocha chi hosh anonti malelit kvli hofobi ya ona cha, i kamel moma ka oka im ochi tok.

21. Mihma hatak ash osh ohoyo himita yash aiokchifelit pisa mvt, nana ahnit aya li tuk a Chihowah vt vm aiahlichikmá, keyukmá, nanta tuk oh chishba? ahnit ithvna bvnna mvt, nana ik acho tok.

22. Atuk osh yakohmi tok, kamel vt oka ishkot issa ma hatak ash osh tvli lakna ibichilu takali weki kvv shekel ik-

luna ho, micha ibbak vlbeha tuklo kv̄t weki kv̄t tv̄li lakna shekel pokoli ho ishi tok.

23. Micha, Kv̄ta ushetik chia hoh cho? vm̄ anol̄i, chim asilhha lishke: ch̄iki in chuka ya il anusi vt̄ āsha cho? achi tok.

24. Mihma, Milkah ushi yv̄mmak oka Naho im eshi tok Behluel ushetik sia hoke, im achi tok.

25. Micha achakalinchi mvt, Onush vpi, micha nanvlhpoa vpa aiena kv̄t pin laua achukma, micha anusi vt̄ āsha hoke, im achi tok.

26. Mihma hatak ash osh akachunoli cha, aka hlipiv̄t Chihowah ya aiokpv̄chi tok.

27. Chihowah a shahli Eblaham a in Chitokaka yvt̄ a shahli hā isht̄ i nukhāklo, micha im anumpa āhli yā ik im ai esho kv̄t holitopashke: hina āya li ma, Chihowah yvt̄ sv̄sht̄ āyvt̄ a shahli itibapishi v̄hleha hā in chuka yā sv̄sht̄ v̄lvshke, achi tok.

28. Mihma ohoyo himita yash osh malelit nana ilv̄ppa puta kā ishki in chuka ai achv̄fa yā ont im anoli tok.

29. Yohmi kā Lebekah vt̄ i nakfi vt̄ anta cha, hohchifo kv̄t Laban atok: mihma Laban vt̄ kohchvt̄ malelit hatak ash osh kv̄li hofobi yā bil̄ika hikia kā ona tok.

30. Atuk o yakohmi tok, ibichilu takali, micha ibbak vlbeha aiena kv̄t in tek ibbak a v̄lb̄iha na pisa mvt, micha in tek Lebekah im anumpa, Hatak vt̄ yak vm̄ achishke, achi na haklo mvt, hatak ash im ona tok; mihma yakeh, kamel vt̄ kv̄li hofobi aiasha na, hatak ash osh bil̄ika hikia tok.

31. Atuk osh, Ant chukowá, Chihowah i holitopa chia ma! nanta katiohmi hō kocha ish hikia cho? aboha yā atahli li, micha kamel a aiasha im atahli li hoka, achi tok.

32. Mihma hatak ash osh chuka yā ont chukowa tok: mihma i kamel ash ikfoka isht̄ asheha yā shoeli cha, onush vpi, micha nanvlhpoa vpa aiena kā ipeta mvt, iyi, micha hatak apchvt̄ āya tuk iyi aiena kā isht̄ achifa ch̄i kā oka yā ima tok.

33. Mihma vpa ch̄i kā ilhpak vt̄ itikba taloha tok: yohmi tuk kia, Nana aiahnit̄ āya li tuk vt̄ ak anolo k̄isha kv̄t

impa la he keyu hoke, achi tok. Mihma, Anumpuli', achi tok.

34. Mihma, Eblaham in tishu sia hoke.

35. Atuk o Chihowah yvt a shahli ha nayukpali fehna, na holitopa fehnvt tahvshke: micha nanvlhpoa chipinta, micha nanvlhpoa hochito, micha tvli hvta, micha tvli lakna, micha hatak tishu, micha ohoyo tishu, micha kamel, micha issuba haksobish falaia aiena ka ima tuk oke.

36. Mihma a shahli ha tekchi Salah vt sipoknit taiyaha hosh a shahli ha vlla nakni yo im eshi tok oke: atuk o yummak o nana im asha tuk vt mominchit ima tuk oke.

37. Atuk osh a shahli hv anumpa kvllo si ilonochechit Kenan okla i yakni ahanta li tuk a ushetik vhleha ha ai ishit svso ha ohoyo ish ima he keyu:

38. Amba ivt aki in chuka, micha a kanomi i yakni ya ish ona cha, ohoyo ai ishit svso ha ish imashke, vm achi tuk oke.

39. Mihma a shahli ha, Ohoyo hv siakaiya he keyu yoba hokmvno, im achi li tuk oke.

40. Mihma, Chihowah yummak o itikba nohowa li cha-tuk vt im enchel a chi apehvchit pila cha, nana ahnit ish aya ka chim aiahlichia hi oke; mikma a kanomi yo, micha aki in chuka achvfa yo ai ishit svso ha ohoyo ish ima hi oke.

41. Yohmikma a kanomi ya ish im onakmvt, vm anumpa kvllo ilvppa ish i mokofa hi oke; atuk o achvfa ka ik chemokma, vm anumpa kvllo ilvppa ish i mokofa hi oke, vm achi tuk oke.

42. Atuk o himak nitak a kvli hofobi ya vla li mvt, Chihowah, a shahli in Chitokaka ma, himak a nana ahnit aya li tuk a is svm aiahlichia hokma:

43. Yakeh, oka kvli hofobi bilika hikia lishke; atuk o yakohmashke, ohoyo himita hatak haleli keyu yosh et kohchvt oka ochi na, Oka chim isht-ochi alhto ka kanomosi ka ak ai ishkó, chim asilhha lishke, achi likma,

44. Yohmikma, Ishkó, mikma chi kamel ak kia im ochi lashke; vm achikmvt, Yohmikmvt ohoyo yummak o Chi-

howah yvt a shahli ushi ya im atokoli tuk mak ashke, achi li tuk oke.

45. Atuk o sa chukvsh anukaka anumpuli li kv̄t ont ak tahlo k̄sha hō, yakeh, Lebekah vt im isht-ochi yvt tahchi h̄a on talaia hō et kohcha tuk oke; micha kv̄li hofobi ya okvtaha cha, oka ochi tuk oke; mihma, Ak ishkó, chim asilhha lishke im achi li tuk oke.

46. Mihma tushpvt im isht-ochi yvt tahchi h̄a on talaia kō akv̄chi mvt, Ishkó, mikma ch̄i kamel ak kia oka ipeta lashke, achi tuk oke: yohmi na ishko li ma, kamel ak kia oka ipeta tuk oke.

47. Mihma ī ponaklot, Kv̄ta ushetik chia hoh cho? achi li ma, Naho ushi yvmmak oka Milkah vt im eshi tok Behluel ushetik sia hoke, achi tuk oke: mihma ibichilu takali ibichilu ya takalichi li mvt, ibbak vlbeha aiena k̄a ibbak abehli li tuk oke.

48. Mihmvt akachunolit aka hlipīvt Chihowah ya aiokpv̄chi li tuk oke; micha Chihowah a shahli Eblaham in Chitokaka, yvmmak osh a shahli Eblaham itibapishi ushetik o ishit ushi ya ima la ch̄i hō hina aivlhpiesa k̄a vs̄st aya tuk a holitoblich̄i li tuk oke.

49. Yohmi k̄a himak a a shahli h̄a ī kanvt hv̄sh im aiahla ch̄i hokmvt, hv̄s sv̄m anolashke: keyukmvt hv̄s sv̄m anolashke: yvmohmi hō ishtimpak imma, keyukmvt v̄lhfv̄bekimma pit fullota lashke, achi tok.

50. Yohmi ma Laban, micha Behluel vt afalaminchit, Nana k̄a Chihowah ak osh ahni tuk pullv̄shke: okpulo hokma, achukma hokma nana kia e ch̄i miha he keyushke.

51. Yakeh, Lebekah vt chi tikba ashv̄shke, ishi cha iá, mikma Chihowah yvt anumpuli tuk mak o ch̄i shahli ushi ya tekchi yashke, achit okla tok.

52. Atuk o yakohmi tok, Eblaham in tishu hv̄t im anumpa h̄a haklo mvt, aka hlipia cha, Chihowah ya aiokpv̄chi tok.

53. Mihmvt tishu hash osh tv̄li hv̄ta ishit shema, micha tv̄li lakna ishit shema, micha nafohka ishit kohchi cha, Lebekah ya ima tok. Michā Lebekah ī nakfi, micha ishki itatuklo k̄a naholitopa puta k̄a ima tok.

54. Mihma yummak ash, micha hatak apehvt aya tuk aiena kv̄t okla impvt nan ishko tok, micha aśha na onna tok : atuk osh ont onna ma wakaya tok : mihma tishu hash osh A shahli h̄a pit hvs sa pelashke, achi tok.

55. Mihma ī nakfi, micha ishki yash osh, Ohoyo himita vt nitak holhtina, peh nitak pokoli hokvno pi takla ahan-tashke ; yohmi ha yosh iashke, achit okla tok.

56. Mihma, Hvs sv̄m ataklv̄mmi ná, nana ahnit aya li tuk a Chihowah yvt vm aiahlich̄i hatuk oka : hvs sa pila na a shahli h̄a im ona lashke, im achi tok.

57. Mihma, Ohoyo himita ako e hoyo cha, ilap itih akinli h̄o ai il im aponaklashke, achit okla tok.

58. Mihma Lebekah yā hoyot okla cha, Hatak ilvppa awant ish ia ch̄i cho ? im achi ma, Ia la ch̄i hoke, achi tok.

59. Mihma in tek Lebekah, micha ilauei yatok, micha Eblaham in tishu, micha hatak apehvt aya tuk aiena kash okla pila tok.

60. Micha Lebekah yā nayukpalit, Pin tek chia hvt ; mil-yvn tahlepa sipokni puta hoh kia ishki chia hashke ; mikma chim ishtatiaka yvt ī nukkilli puta ī holihta okhissa yā ieshashke, im achi tok.

61. Mihma Lebekah, micha ohoyo himita im aśha aiena kv̄t wakaya cha, kamel ash on chieya mvt, hatak ash iakai-ya tok : mihma tishu hash osh Lebekah yā ishi cha, ia tok.

62. Mihma Aisak vt kv̄li hofobi Lahai-loi pilla h̄a minti tok : oka mahli yakni ak o vtta hatuk okvt.

63. Atuk osh opiv̄t taha ma, Aisak vt osapa yā nan anuk-fillit hikik̄ia ch̄i hosh kohchvt ia tok : atuk osh akachakali cha pisa ma, yakeh, kamel ash osh minti na pisa tok.

64. Mihma Lebekah vt akachakali cha, Aisak a pisa mvt, kamel a om binili tuk vt akowa tok :

65. Tishu hash, Hatak ilvppvt kv̄ta hosh osapa noh̄owvt pi afamvt minti cho ? im achi na tishu hash osh, A shahli yoke, achi tuk atuk oka ; yvmohmi ma nashuka isht ompoholmo ishi cha il ompohomo tok.

66. Mihma tishu hash osh nana kaniohmi tuk vt moma Aisak a im anoli tok.

67. Mihma Aisak vt ishki Selah im vlhtipo ak o isht ona tok, micha Lebekah ya ishi na tekchi toba tok: mihma hohlitobli tok: micha Aisak vt ishki illi tuk a hopohla tok.

CHAPTA XXV.

YUMOHHMI tuk o anonti Eblaham vt ohoyo ishi tok; mihma hohchifo hvt Ketulah atok.

2. Mihmvt Simlam, micha Chokshan, micha Metan, micha Mitian, micha Ishbak, micha Shuah aiena kak o im eshi tok.

3. Atuk o Chokshan vt Sheba, micha Tetan a tobachi tok. Mihma Tetan ushi vhleha hvt Ashulim, micha Letushim, micha Leummim aiena kak atok.

4. Mikma Mitian ushi vhleha hvt Efah, micha Efe, micha Hanok, micha Abitah, micha Eltaah aiena kak atok. Ilvpa puta kak osh Ketulah im vlla vhleha hatok.

5. Mihma Eblaham vt nana im asha tuk vt moma Aisak ak o ima tok.

6. Amba im itaiena ushi vhleha ha Eblaham vt im asha tuk vt Eblaham vt nahvlbina ima cha, okchaya moma kak osh ushi Aisak a i filvmmichit hvshi akochaka pilla, hvshi akochaka yakni ak o pila tok.

7. Atuk o Eblaham vt okchayvt ahanta afvmmi puta ya nitak puta okchayvt ahanta kvv ilvppak oke, afvmmi tahlepa achvfa cha pokoli untuklo akucha tahlapi tok.

8. Yohmi mvt Eblaham vt fiopissa tok, micha sipokni achukma hatak sipokni, micha afvmmi laua hosh illi tok; micha im okla ha iba holhtina tok.

9. Mihma ushi Aisak, micha Ishmael vt Hittait hatak Soha ushi Eflon im osapa hikia hichukbi Makpelah, yvmvt Mamle itikba ya hikia kak o a hohpi tok.

10. Osapa ya Eblaham vt Helh ushi vhleha ha in chumpa tok ak atok: yvmmak o Eblaham micha tekchi Salah vt a hollohpi tok.

11. Atuk o yakohmi tok, Eblaham vt illi ha ya, ushi Ai-

sak a Chitokaka yvt yukpali tok : mihma Aisak vt kvli hofobi Lahai-loi ak o ai vttta tok.

12. Yohmi ka ilvppa puta kak osh Echip ohoyo, Salah in tishu ohoyo Haka vt Eblaham a im eshi tok, Ishmael Eblaham ushi a im ishtatiaka yoke.

13. Ilvppa puta kak osh Ishmael ushi vhleha hohchifo hosh in chuka achvfa puta kvv vlhpisvt hohchifo hoke : Ishmael a im vttahpi Nebayolh : micha Keta, micha Atbeel, micha Mibsam,

14. Micha Mishma, micha Tumah, micha Massa,

15. Hata, micha Tema, Chetu, Nafish, micha Ketemah :

16. Ilvppa puta kak osh Ishmael ushi vhleha hoke, micha ilvppa puta kak osh in tumaha vlhpisvt, micha i holihta vlhpisvt hohchifo hoke ; apehlichy vlhpisvt pehlichy auah tuklo hoke.

17. Atuk o ilvppa puta kak osh Ishmael vt okchayvt ahanta afvmmi puta kvv afvmmi tahlepa achvfa cha, pokoli tuchina akucha untuklo tok : atok osh fiopissvt illi cha, im okla ha ibaholhtina tok.

18. Mihma Hafilah ya vttvt ia hosh Assilia pilla ish ia ka Shu Echip itikba talaia kak o okla aiasha tok : mihma itibapishi moma itikba ya Ishmael vt ai illi tok.

19. Mihma ilvppak osh Eblaham ushi Aisak a in chuka achvfa anoli holisso hoke : Eblaham vt ushi Aisak a tobachi tok :

20. Mihma Aisak vt afvmmi pokoli ushta hosh Silian hatak Patan-alam vttta Behluel ushetik, Silian hatak Laban in tek Lebekah ya ishit itauwaya tok.

21. Atuk osh tekchi vt vlla ik im iksho yatuk o, tekchi ya isht anumpulit Chihowah ya im asihihla tok : mihma Chihowah yvt vlhpesa im ahni na, tekchi Lebekah vt chakali tok.

22. Atuk o vlla yash osh ikfoka alhto kvv itvboa tok : mihma, Yohmi hokma, nanta katiohmi ho si yakohmi cho? achi mvt, Chihowah ya ont im a ponaklo tok.

23. Mihma Chihowah yvt, Oklushi tuklo hosh chim osh vtto ya alhto hoke ; micha okla nana a kaniohmi kvv tuklo hosh chikfoka ya a kohcha chi hoke : mikma okla achvfa

kvt kullo kvt okla achvfa ya i shahla hi oke, mikma akni ak osh nakfish a i nutaka hi oke; im achi tok.

24. Atuk o vlla esha he vlhpesa nitak vt vla ma, yakeh, haiyup vt im oshvto ya alhto tuk atok.

25. Atuk o tikba kohcha kvt hummvt nipi moma kvt nafohka hishi asha chohmi tok: mihma Esau, okla hochifo tok.

26. Atuk o i himmak o itibapishi mvt kohcha mvt, Esau iyikatoba ya ibbak ishit hoklit ieshi tok: mihma hochifo kvt Chekob achi tok: mihma yvmma Lebekah vt eshi ma, Aisak vt afvmmi pokoli hannali hatok.

27. Mihma vlla yash osh hofantit taha tok; atuk osh Esau vt ovvta imponna, kowi aya hatak atok: micha Chekob vt hatak aivlhpiesa yosh vlhtipo ahanta tok.

28. Mihma Aisak vt Esau im issi nipi vpa kak osh holi-tobli tok: amba Lebekah vt Chekob a holitobli tok.

29. Mihma Chekob vt tubi ya honi tok: atuk o Esau vt kowi aya tuk osh vla mvt, hoyvbli tok.

30. Mihma Esau vt Chekob a, Chim asilhha lishke, nahonni humma yvmma fehna ka svpetá, sa hoyvbli hoka, im achi tok: yvmohmi kak o hochifo kvt Etom achi tok.

31. Mihma Chekob vt, Himak nitak a vttahpi ish ai isha he vlhpesa ya is sa kanchashke, achi tok.

32. Mihma Esau vt, Yakeh, vlla hosishke, mikma vttahpi ai isha he vlhpesa ilvppvt nanta isht vm achukma hinla cho? achi tok.

33. Mihma Chekob vt Himak nitak a, anumpa kullo il onochit a mihá, achi tok: mihma anumpa kullo im il onochit miha tok: mihmvt vttahpi ai isha he vlhpesa yash Chekob a i kanchi tok.

34. Yohmi ma Chekob vt Esau ya pvaska, micha tubi honni aiena ka ima tok; mihma impa cha, ishkot issa mvt, wakaya cha ia tok: yakohmit Esau vt vttahpi ai isha he vlhpesa ya shitilema tok.

CHAPTA XXVI.

ATUK o yakni ya Eblaham ahanta nitak ma, hohchvfo chito vmmona tok vt asha na, anonti hohchvfo chito tok. Mihma Aisak vt Filistin okla i miko Abimelek im onvt, Kela ya ona tok.

2. Mihma Chihowah yvt i haiaka cha, Echip a chik aiyo kashke: yakni chim anoli la chi kak o ish ahantashke.

3. Yakni ilvppak o nowvt aya yosh ish ahantashke, mikma chibafoyuka lish, chi yukpali lashke; chishno, micha chi aiunchololi yak o yakni ilvppa moma ka ima la chi hoka, micha anumpa kullo ymma anumpulit chiki Eblaham a im il onochi li tok vt aiahlichi la chi hoke.

4. Michi chim ishtatiaka ya apaknvchit vba fochik choyuhmichi la chi hoke; mikmvt yakni ilvppa moma ka chim ishtatiaka ya ima la chi hoke: mikma chim ishtatiaka yak o oklushi moma yakni paknaka aiasa kv ai yukpa hi oke.

5. Eblaham vt vm anumpa ha im antivt, atokolit i miha li, micha vm anumpa vhlpisa, micha a nanvlhpisa a puta aiena ka holitobli tok oka, achi tok.

6. Mihma Aisak vt Kela ya ahanta tok.

7. Atuk o yakni ymma hatak vhleha hv tekchi ya im a ponaklo tok; mihma, An tek oke, achi tok: Sa tekchi yoke, achi kv nukshopa hokvt; yakni yash hatak vhleha hv Lebekah ak atuk pulla mak o svbi yoba na, achi hatok; pisa aiokli hatuk oka.

8. Atuk o yakohmi tok, ymma ahanta tuk a hopakit taiyaha ma, Filistin okla i miko Abimelek vt okhissushi pit a hopokoyot pisa ma, yakeh, Aisak vt tekchi Lebekah ya itiba ihlauvli hosh ashwa na pisa tok.

9. Mihma Abimelek vt Aisak a hoyo cha, Yakeh, chi tekchi pullvshke: yohmi hokak o nanta katiohmi ho, An tek oke, ish achi tuk oh cho? achi tok. Mihma Aisak vt, Ishit svlli yoba na, achi li hatuk oke, im achi tok.

10. Mihma Abimelek vt, Ilvppak osh nanta ho ish pi yvmihchi cho? okla hash achvfa kv chi tekchi ya ymmak

fokalichit iba tvshka hinla tuk oke; yohmi tuk ma nan-ashvchi ish pi onocha hetuk oke, achi tok.

11. Mihmut Abimelek vt im okla moma ka atokolit i mihvt, Kena hosh hatak ilvppa, keyukmut tekchi ya potolikmut, illi pullashke, achi tok.

12. Yohmi ma Aisak vt yakni yvmma a hokchi cha, afvmmi mih makinli ka inlohmi tahlepa achvfa ho ishi tok: mihma Chihowah yvt yukpali tok.

13. Mihma hatak ash osh holitopa cha, tikba mahayvt holitopa kvt i shahlit mahaya cha, holitopa fehnvt taha tok.

14. Imilayak vhlpoa chipinta, micha imilayak vhlpoba hochito, micha tishu laua fehna aiena kvt im aiasha tok: mihma Filistin vhleha hvv isht i potvno tok.

15. Iki Eblaham ahanta nitak a iki in tishu vhleha hvv kvli hofobi moma ka kulli tok a Filistin vhleha hvv i kamalit lukfi a isht alotoli tok oka.

16. Mihma Abimelek vt Aisak a Ish pi filvmmashke: kvlllo kvv ish pi shahli fehna hokvt, im achi tok.

17. Mihma Aisak vt yvmma vttvt ia mvt, Kelaokfa ak o vlvhtipo ha hilechi cha, yvmmak o ahanta tok.

18. Mich a iki Eblaham vt ahanta nitak mvt, kvli hofobi oka okla kulli tok ash Aisak vt anonti kulli tok: Eblaham vt illi ha ya Filistin vhleha hvv i kamali tok oka: micha hohchifo ha iki vt hochifo tok akinli ho ita hochifo tok.

19. Atuk o Aisak in tishu vhleha hvv okfa ha a kulli mvt oka tobohonli kvli ho ahayuchi tok.

20. Atuk o Kela ya nan vhlpoa apistikeli vhleha hvv Aisak i nan vhlpoa apistikeli vhleha ha im afvvt, Oka vt pimmi hoke, achi tok: mihma kvli hofobi yash hohchifo ha Esek achi tok; im afoa tuk ak atok.

21. Atuk o kvli hofobi inla ho okla kulli tok; atuk o yvmmak kia afoa tok: mihma hohchifo ha Sitnah achi tok.

22. Mihma yvmma vtta tuk vt kanvlli cha, kvli hofobi inla ho kulli tok; mihma yvmmvno ik im afowo tok: mihma hohchifo ha Lehobolh achi tok: micha, Himak ano Chihowah yvt aiasha pin chitoli hoke; yohmi ho yakni ya waya achukmut il aiasha chi hoke, achi tok.

23. Atuk osh yvmma vttā tuk vt ivt Bee-sheba yā ona tok.

24. Atuk o mih nitak akinli k_a Chihowah yvt i haiaka cha, Chiki Eblaham a in Chitokaka sia hoke: chi nukshopa ná, an tishu Eblaham ak atuk pulla kak o chibafoyuka lish chi yukpalit chim ishtatiaka yā apaknvchi la ch_i hoke, achi tok.

25. Mihma yvmma alta ai ikbi cha, Chihowah hochifvt i pahaya tok; micha yvmmak o im vlhtipo yā a hilechi tok: mihma yvmmak o Aisak in tishu vhleha hv_t kvli hofobi yā a kulli tok.

26. Atuk o Abimelek, micha i kana vhleha h_a achvfa Ahus-salh, micha in tvshka chipota i kvpitvni chito Fikol aiena kv_t Kela a_{sh}a tuk vt Aisak a im ona tok.

27. Mihma Aisak vt, Hvs sa nukkilli cha, hvchi filvmmi-chit hvs sa chvffichi tuk okvt, nanta katiohmi h_o hvs sv_m vla cho? im achi tok.

28. Mihma Chihowah yvt chibafoyuka pulla k_a e pisa tuk oke: mihmvt himak a anumpa kv_llo vt pitin takla itonlashke, pishno, micha chishno pulla k_a pitin takla itonlashke; yohmi kv_t chishno yā nan e chitim apesashke.

29. Yvmohmi h_o nana e ch_i kaniohmichi tuk keyu k_a, micha nana kv_t achukma bieka h_o e ch_i yumihchi tuk, micha achukma h_o ayashke, e chim ai ahni tuk o_ka, chiyuhmit chik pi hotopalo kashke: himak a Chihowah yvt yukpali chia hoke, okla achi tok.

30. Mihma Aisak vt impvchi im ikbi na, impvt nan ishkot okla aiasha tok.

31. Atuk osh onnahinli fehna h_o okla wakaya cha, anum-pa kv_llo itim il onochi tok: mihma Aisak vt ik iá ahni na, i filvmmi_t iti kana achukma hosh ilhkoli tok.

32. Atuk o mih nitak akinli k_a yakohmi tok, Aisak in tishu vhleha hv_t kvli hofobi kulli tuk vt ant im anolit, Oka il ahayuchishke, achi tok.

33. Mihma Sheba hochifo tok: yvmohmi tok o himak nitak a tv_maha holihta yvt hohchifo kv_t Bee-sheba moma hoke.

34. Atuk o Esau vt afvmmi pokoli ushta hosh Hittait ha-

tak Beeli ushetik Chutilh a, micha Hittait hatak Elon ushetik Bashemalh a itauwaya tok.

35. Yummak oka Aisak micha Lebekah vt ishit nukhaklo beka tok.

CHAPTA XXVII.

ATUK o yakohmi tok, Aisak vt sipoknit taiyaha cha, nish kin vt illi tok; yohmi cha, pisa he keyu mut, ushi ak ni fehna Esau ya i howa cha, Svso ma, im achi tok; mihma, Yakeh, yak hikia lishke, im achi tok.

2. Mihma, Yakeh, sa sipoknit taiyahushke, nitak a sulla he vt ithana li keyushke:

3. Yvmohmi hoka himak a chi nan owttvt ishtaya, chim oski naki aivlhto, micha chim ititanampo aiena ka ishi cha, kowi haiaka ya ivt issi nipi hoyot isht is svv vlashke,

4. Michā nipi champuli an champuli chatuk a chohmi ho is svv ikbi cha, isht is svv vla na vpa lashke: yohmikma ik svllo kisha kak o vmi shilombish vt chi yukpalashke, im achi tok.

5. Atuk o Aisak vt ushi Esau ya im anumpuli ma, Lebekah vt haklo tok: mihma Esau vt issi nipi hoyot isht vla chi hosh kowi haiaka ya ia tok.

6. Mihma Lebekah vt ushi Chekob a im anumpulit, Yakeh, chiki vt chitibapishi Esau ya im anumpulit,

7. Issi nipi isht vm vla cha, nipi champuli vm ikbi na ak pá, micha ik svllo kisha kak osh Chihowah itikba ya chi yukpali lashke, achi ho haklo li tuk oke,

8. Yvmohmi hoka himak a svso ma, vm anumpa nana chi miha li ka is svv antiashke.

9. Himak a nan vlhpoa chipinta aiasha ka ia cha, issi kosoma ushi achukma tuklo ho ont ai ishit vm vlá; mikma chiki ya nipi champuli in champuli chatuk a chohmi ho im ikbi lashke;

10. Mikma chiki ya isht ish im ona na vpashke, micha ik illo kisha kak osh chi yukpalashke, im achi tok.

11. Mihma Chekob vt ishki Lebekah ya Yakeh, itibapi-

shi li Esau vt hatuk hishi chito yokma, vno vt hatak hishi iksho sia hoke:

12. Aki vt sa pashohli yoba hokmvno, yohmikma nahak-sichi im i chohmi la chi hoke; yohmikma ishit kalakshi ak o isht il onochi la chi hoke, micha nan isht aiyukpa achi keyu ka chi hoke, im achi tok.

13. Mihma ishki vt, Uno ak o nan ishit chi kalakshi vt si onvtoyulashke, svso ma, peh vm anumpa hak o ish im antia cha, yvmma ont isht is svm vlashke, im achi tok.

14. Mihma ivt ont hokli cha, ishki ya isht im vla tok: mihma ishki vt nipi champuli, iki in champuli chatuk a chohmi ho ikbi tok.

15. Michā Lebekah vt ushi akni fehna Esau i nafohka ho-litopa yosh Lebekah vt aboha im asha tuk a ishi cha, ushi Chekob nakfish ak o fohkvchi tok:

16. Mihmut issi kosoma ushi yash hakshup a ibbak a isht ompohomo mut, micha ikunla, hishi ik ai iksho aiena ka isht ompohomo tok.

17. Mihmut nipi champuli, micha pvska atahli tuk vt ushi Chekob a imvt ibbak fohki tok.

18. Mihma iki ya im ona cha, Aki ma, achi tok. Mihma, Yak asha lishke; kuta chia hoh cho? svso ma, achi tok.

19. Mihma Chekob vt iki ya, Chim vttahpi Esau sia hoke; is sa miha tuk mak o yvmihchi lishke: chim asilhha lishke, ish wakaya cha, binilit vm issi nipi ya ish pashke, yvmohmi hosh chimi shilombish vt si yukpalashke, im achi tok.

20. Mihma Aisak vt ushi yash, Nanta katiohmi ho chekosi ish ahayuchi tuk oh cho? svso ma, im achi tok. Mihma, Chihowah chin Chitokaka ak osh isht vm vla tuk oke, achi tok.

21. Mihma Aisak vt Chekob a, Bilika minti, chim asilhha lishke, svso ma, chi pashohli lashke, svso Esau chia fehna hokmá, keyukmá, nana hokmá, achi tok.

22. Mihma Chekob vt iki Aisak a bilika ona tok; mihma pashohlit pisa mut, Anumpa hvto Chekob im anumpa, amba ibbak vto Esau ibbak oke, achi tok.

23. Mihmvt ibbak vt hishi chito itibapishi Esau ibbak chohmi hatuk o ik ithano tok: yohmi mvt yukpali tok.

24. Mihmvt, Svso Esau fehna chia hoh cho? achi tok. Mihma, Mih sia hoke, achi tok.

25. Mihma, A bilika isht ish lashke, mikma svso im iss nipi ya vpa lish, vmi shilombish vt chi yukpalashke, achi tok. Mihma i bilika isht ona na vpa tok: mihmvt oka paki ya isht im ona na ishko tok.

26. Mihmvt iki Aisak vt, Inta, bilika minti, micha is sa suksowashke, svso ma, im achi tok.

27. Mihma bilika ona cha, i suksowa tok: mihma i nai fohka balama ka huwa mvt, yukpalit, Yakeh, svso balama kvv osapa yo Chihowah yvt achukmali tuk a balama kak o chohmishke.

28. Yvmohmi hoka Chitokaka yvt vba fichak, micha yakni a nia, micha onush, micha oka paki aiena laua ho chimashke.

29. Okla hvv chim antiashke, micha oklushi puta kvv chim akachunolit aka hlipkaiyachashke: chitibapishi vhleha ha ish ishahlashke: mikma chishki ushi vhleha hvv chim akachunolit aka hlipkaiyachashke: kvna hosh chi kalakshichikmvt kalakshashke, mikma kvna hosh chi yukpalikmvt na yukpashke, achi tok.

30. Atuk o yakohmi tok, Aisak vt Chekob a yukpali kvv ont tahli makinli ho, atuk o Chekob vt iki Aisak itikba ya i filvmmitt peh kohcha makinli ho, itibapishi Esau vt ovtvtv aya tuk vt vla tok.

31. Michayvmmak kia nipi champuli ikbi tuk atok; atuk osh iki ya isht im vla cha, iki yash, Aki vt ik wakaya cha, ushi im issi nipi ya ik pa, micha chimi shilombish vt sa yukpalashke, im achi tok.

32. Mihma iki Aisak vt, Kvta chia hoh cho? im achi tok. Mihma, Chim vttahpi Esau, chiso sia hoke, achi tok.

33. Mihma Aisak vt wvnihinchi kvv atampa fehna tok; micha, Kvta hosh himak a chik lo kisha ma, issi nipi ishit vmm vla na moma ka ai ishit apa lish, yukpali li tuk mvto? ahli, yohmi na nayukpa hi oke, achi tok.

34. Mihma Esau vt iki im anumpa ha haklo mvt, yaiya ilbrsha atampa fehna ho yaiya tok; micha iki ya, Is sa yukpalashke, vno ak kia, aki ma, im achi tok.

35. Mihma, Chitibapishi hvt sa haksichit vla cha, nan isht chi yukpa ya ishi tuk oke, achi tok.

36. Mihma, Aivlhpiesa ho Chekob hohchifo keyu cho? ilvppvt ont atukla mak o sa haksichi hokvt: vttahpi ai isha he vlhpesa ya vm ishi tok; atuk osh himak a, yakeh, nan ishit sai yukpa ya vm ishishke, achi tok. Mihmvt, Nan ishit yukpali ya chik svm ilatombo tuk oh cho? achi tok.

37. Mihma Aisak vt afalaminchit Esau ya, Yakeh, chi shahli ikbi li tuk oke, micha itibapishi vhleha moma kvv in tishu vhleha ha chi ho ima li tuk oke; micha onush, micha oka paki yo ishit hlampkochi lishke: yohmi ka svso ma, himak a nanta ho chi katiohmichi la hinla cho? im achi tok.

38. Mihma Esau vt iki ya, Aki ma, nan isht yukpali vt chim achvfa illa cho? is sa yukpalashke, vno ak kia, aki ma, im achi tok. Mihmvt Esau vt chitoli hosh yaiya tok.

39. Mihma iki Aisak vt afalaminchit, Yakeh, ish aiahanta yvt yakni a nia, micha vba fichak vba a minti ak ahi oke.

40. Micha chi bvshpo falaia ak o ish ieshi kak osh ish ahanta cha, chitibapishi ha ish i nutaka hi oke: atukma yakohma hi oke, ish imaiyakmvt, im ikunla abana chikunla abana tuk a ish kobvffa hi oke, im achi tok.

41. Mihma nan ishit yukpali iki vt ishit yukpali tuk ak o, Esau vt Chekob a i nukkilli tok: mihmvt Esau vt chukvsh anukaka, Aki ishit yaiya nitak vt vla hosishke, yohmikma itibapishi li Chekob a vbe la hi oke, achi tok.

42. Mihma ushi akni Esau im anumpa ilvppa puta kvv Lebekah ya im annoa tok: mihma ushi nakfish Chekob a pit hoyot i howa cha, Yakeh, chitibapishi Esau vt chishno ya chiba chi ka ahni cha, ile nuktalalit ahantvshke.

43. Yvmohmi hoka inta, svso ma, vm anumpa ha ish im antiashke; micha wakayvt malelit a nakfi Laban a im onvt, Halan a ish onashke.

44. Micha nitak ik lauo h_o y_ummak o takla ish ahanta na, chitibapishi nukhobela k_ut nuktula ha yashke :

45. Chitibapishi nukhobela tuk vt issa cha, nana ish i kaniohmichi tuk a imahaksi ha yashke : yohmikma pit chi hoyo lish, ont a chisht vla la hi oke. Nanta katiohmi h_o hvchishno ak kia nitak achufa h_o itatuklot hrs san tamoa hinla cho? im achi tok.

46. Mihma Lebekah vt Aisak a, Helh ushetik vhleha pulla kak o a nitak a isht an takobit tahvshke : Chekob vt ilvppakinli chohmi yakni ya ushetik vhleha, Helh ushetik vhleha h_o ohoyo ai ishikma, a nitak a nanta h_o isht vm achukma hinla cho? im achi tok.

CHAPTA XXVIII.

MIHMA Aisak vt Chekob a hoyo cha, yukpali mvt, atokolit i mihvt, Kenan okla ushetik vhleha h_o ohoyo ha ish ai isha he keyu hoke.

2. Wakaya cha, Patan-alam a onvt, chishki iki Behluel in chuka ya ish onashke ; micha chishki ya itibapishi Laban ushetik vhleha y_ummak o ohoyo ha ont ish ai isha hi oke.

3. Mikma Chitokaka Nan isht im aiahli ataha iksho hv_t chi yukpalashke ; micha chi wayvchit chi apaknvchashke, yvmohmi h_o okla laua chia hashke ;

4. Micha Eblaham isht-aiyukpa ya chishno, micha chi aiunchololi aiena ka chimashke : yvmohmi h_o yakni ya Chitokaka yvt Eblaham ima tok a okla inla chia hosh ish ai ahanta k_ut ish ishashke, im achi tok.

5. Micha Aisak vt Chekob a pila tok : mihma Patan-alam a onvt, Silian hatak Behluel ushi Chekob micha Esau ya ishki Lebekah ya i nakfi Laban a im ona tok.

6. Aisak vt Chekob a yukpali cha, Patan-alam y_ummak o ohoyo ont ai isha chi h_o pila hatok, micha yukpali mvt, atokolit i mihvt, Kena ushetik vhleha ha ohoyo ish ai isha he keyu, achi tuk ;

7. Mihma Chekob vt iki, micha ishki ya im antia cha, Patan-alam a ia tuk a Esau vt pisa tok.

8. Micha Kenan ushetik vhleha ha iki Aisak vt vhpesa ik ahno ho Esau vt pisa mvt;

9. Yohmi mvt Esau vt Ishmael a im ona cha, Eblaham ushi Ishmael ushetik, Nebayolh in tek Mahalalh a tekchi ya chi ho tekchi im ashwa kash ibafohkit ishi tok.

10. Mihma Chekob vt Bee-sheba ya akohchvt Halan pilla ho ia tok.

11. Atuk osh yakni kaniohmi ho ona cha, hvshi vt okatula hatuk o, itonla na onna tok: micha tvli ya yvmma ai ishi cha, vhpisha chi hosh bohli mvt, yvmmak o tvshkit nusi tok.

12. Atuk osh holhpokna tok, mihma yakeh, atuya yvt yakni ya o hikia mvt, paknaka yvt shutik a ont bikeli tok: mihma yakeh, Chitokaka im enchel vhleha hv ai atuhuyvt, micha ai akohowa tok.

13. Mihma yakeh, Chihowah yvt paknaka ya hikia cha, Chiki Eblaham in Chitokaka Chihowah sia hoke, micha Aisak in Chitokaka sia hoke: yakni ish ai on itoyula ka chishno, micha chim ishtatiaka ya ima la hi oke.

14. Mikma chim ishtatiaka yvt yakni lukfi pushi ak o choyuhma hi oke; micha fimimpa cha, hvshi ai okatula, micha hvshi akochaka, micha falvmmi, micha oka mahli aiena ka pit ish pataiya chi hoke: mikma chishno, micha chim ishtatiaka pulla kak o chuka achvfa puta moma yakni paknaka aiasha kv ai yukpa hi oke.

15. Micha yakeh, chibafoyuka lishke, micha kanima moma ish onakma, chi halvlli la chi hoke, atuk osh anonti yakni ilvppa chisht vla la hi oke: anumpuli li tuk vt ak yvm-iho kisha kv chissa la he keyu hokvt, achi tok.

16. Mihma Chekob vt nusi tuk vt okcha tok; mihmvt, Chihowah yvt ilvppa anta pulla ho ak ithano ke tushke, achi tok.

17. Micha nukshopa tok; mihmvt, Ilvppvt yakni holitopa hatushke; ilvppvt inla keyu, amba Chitokaka in chuka, micha ilvppvt vba yakni holihta okhissa yoke, achi tok.

18. Atuk osh onnahinli fehna h_o Chekob vt wakaya cha, tvli v_lhpishi bohli kash ishi cha, nan-isht-ithana he a hilechi mvt, paknaka ya bila on hlatvbli tok.

19. Mihma vt yakni yvmma Behlel hochifo tok: yohmi kia v_mmona ka tvmaha holihta yvmma hohchifo kv_t Lus atok.

20. Mihma Chekob vt anumpa il onochit, Chitokaka yvt svbafoyukvt ilvppa pilla ia li ka sa halvlli cha, vpa la chi ka pvska, micha fohka la chi ka nafohka vma,

21. Yvmohmi h_o achukmakvt a_ki in chuka ya anonti v_la li hokma, yohmikma Chihowah ak osh an Chitokaka yashke.

22. Mikma tvli ilvppa nan isht-ithana mak o hilechi li tuk vt Chitokaka in chuka ya hi oke: micha nana is svma moma ishit pokoli ka chima li pulla hi oke, achi tok.

CHAPTA XXIX.

YUMOHMI mvt Chekob vt nowvt aya tuk vt ia tok; atuk osh hvshi akochaka okla i yakni ya ona tok.

2. Atuk osh hopokoyo ma, yakeh, osapa ya kvli hofobi vt hikia na yakeh, chukfulhpoa aya tuchina kv_t bilika kahvt aiasha tok: kvli hofobi yvmmak o nan v_lhpoa chipinta ya oka ai ipeta chatuk oka: mihma tvli chito yosh kvli hofobi paknaka ya onvtoyula tok.

3. Micha yvmmak o nanv_lhpoa moma ka ai itvnahli chatuk atok: mikmvt kvli hofobi paknaka ya tvli chito vt onvtonla kash tonolichit kanvllichi cha chukfulhpoa ya oka ipeta mvt, anonti tvli yash ai itola kvli hofobi paknaka ya onochi chatuk atok.

4. Atuk o Chekob vt, Itibapishi li v_hleha ma, katima hvsh minti cho? im achi tok. Mihma Halan minti pia hoke, achi tok.

5. Mihma, Naho ushi Laban a hvsh ithana cho? im achi tok. Mihma, Il ithanvshke, achi tok.

6. Mihma Chekob vt, Im achukmaka cho? im achi tok.

Mihma, Im achukmakvshke; atuk o yakeh, ushetik Lechel vt chukfulhpoa pehlichit mintishke, achi tok.

7. Mihma Chekob vt, Yakeh, hvshi vt chaha moma, micha nanvlhpoa yvt itahoba he ai ona keyushke: chukfulhpoa ya oka hvsh ipeta cha, pehlichit ont hvsh impvchashke, achi tok.

8. Mihma, Nanvlhpoa chipinta moma kvv itahobvt taha na kvli hofobi paknaka ya tvli vt itonla ka tonolichit ik kanvllichio kisha ka e yvmihcha he keyu hoke; yohmikmak o chukfulhpoa ya oka il ipeta chatuk oke, achi tok.

9. Atuk o im anumpulit isht anta moma ho, Lechel vt iki in chukfulhpoa pehliechit vla tok: yvmmak osh pehliechi yatuk okvt.

10. Atuk o yakohmi tok, Chekob vt ishki i nakfi Laban ushetik Lechel a, micha ishki i nakfi Laban in chukfulhpoa aiena ka pisa mvt, Chekob vt bilika onvt, kvli hofobi paknaka ya tvli vt onvtonla kash tonolichit kanvllichit ishki i nakfi Laban i nanvlhpoa chipinta ya oka ipeta tok.

11. Micha Chekob vt Lechel a i suksowa mvt, chitoli hosh yaiya tok.

12. Micha Chekob vt Lechel a iki ya itibapishi, micha Lebekah ya ushi yatuk vt-im anoli tok; mihma Lechel vt malelit ivt iki ya ont im anoli tok.

13. Atuk o yakohmi tok, Laban vt in tek ushi Chekob a anoli ka haklo mvt, malelit ivt afama cha, shakba ont afohomi mvt, i suksowa cha, in chuka isht ona tok. Mihma nana ilvppa puta ka Laban a im anoli tok.

14. Mihma Laban vt, Sa foni, micha sa nipi chia pullvshke im achi tok: mihma hvshi achvfa ho Chekob vt takla ahanta tok.

15. Mihma Laban vt Chekob a, Svtibapishi chia hatuk ak osh peh pilla ho is san toksula hetuk oh cho? chim vltoba kvv nanta chi cho? vm anoli, im achi tok.

16. Mihma Laban vt ushetik tuklo hosh im ashwa tok: akni hohchifo kvv Leah yokma, nakfish hohchifo kvv Lechel atok.

17. Leah vt nishkin okwilonli yokma, Lechel vto aiokli, miche nipi pisa achukma tok.

18. Mihma Chekob vt Lechel ak o anushkunna tok; mihmvt, Chiso tek nakfish Lechel ak o afvmmi untuklo ho chin toksvli lashke, achi tok.

19. Mihma Laban vt, Chishno ak o chima li kak osh achukma kv̄t hatak inla ima la hetuk a i shahlishke: sa takla ish ahantashke, achi tok.

20. Mihma Chekob vt Lechel ak atuk pulla mak o, afvmmi untuklo ho toksvli tok: mihmvt anushkunna fehna hatak osh peh nitak kanomosi in chohmi tok.

21. Mihmvt Chekob vt Laban a, Sa tekchi ya vma, (nitak a holhtina tuk vt taha hoka,) yohmi na iba chukowa lashke, im achi tok.

22. Mihma Laban vt chuka alokoli yvmma hatak vhleha moma ka hoyot itvnahli cha, imv̄vchi ikbi tok.

23. Atuk osh yakohmi tok, opiv̄t taha ma, ushetik Leah ak o ilauelet isht im ona tok: mihma iba chukowa tok.

24. Mihma Laban vt ushetik Leah in tishu ha chi ho in tishu ohoyo Silpah ya ima tok.

25. Atuk o yakohmi tok onnahinli ma, yakeh, Leah ak atuk atok: mihma Laban a, Nanta mak o ilvppa is si yvmihchi cho? Lechel ak achi ho chiba toksvli li tuk keyu cho? yvmohmi hokak o nanta katiohmi ho is sa haksichi cho? im achi tok.

26. Mihma Laban vt, Nakfish ak o akni ha tikba hatak i bohli kv̄t pi yakni ya a yvmohma he vhlpesa keyu hoke.

27. Leah i nitak untuklo ka ish onachashke: mikma afvmmi untuklo inla ka is san toksvla chi kak o ilvppak kia e chimashke, achi tok.

28. Mihma Chekob vt yvmohmi cha, i nitak untuklo ka onachi tok: mihma tekchi yachi ho ushetik Lechel ak kia ima tok.

29. Micha Laban vt ushetik Lechel a in tishu ha chi ho in tishu ohoyo Bilhah ya ima tok.

30. Mihma Lechel ak kia iba chukowa tok; miche Le-

chel a i hullo kv̄t Leah ya i shahlich̄i tok; mihmvt afv̄m̄mi untuklo inla hō iba toksv̄li tok.

31. Atuk o Leah ano ik ahn̄incho hō Chihowah yvt pisa mvt, im oshv̄tto ya i wakv̄mmichechi tok: amba Lechel v̄to v̄lla ik im iksho atok.

32. Mihma Leah vt chakali tok; atuk osh v̄lla nakni yō eshi cha, Luben hochifo tok: Sv̄lv̄sha k̄a Chihowah yvt sa pisa tuk pullv̄shke; himak ano a hatak vt a hulla ch̄ishke, achi tuk okvt.

33. Atuk osh anonti chakali cha, v̄lla nakni yō eshi mvt, Ik si ahn̄incho k̄a Chihowah yvt haklo tuk; atuk osh v̄lla nakni ilv̄ppak kia vmv̄shke, achi tok: mihmvt Simeon hochifo tok.

34. Atuk osh anonti chakali cha, v̄lla nakni yō eshi mvt, Himak ano a hatak vt si asitia ch̄i hoke, v̄lla nakni tuchina hō im eshi li tuk oka; yvmohmi hatuk osh Lefai hochifo tok.

35. Atuk osh anonti chakali cha, v̄lla nakni yō eshi tok: mihmvt, Himak a Chihowah ya aiokpv̄chi lashke: yvmohmi hatuk osh Chutah hochifo tok; mihmvt v̄lla eshit issa tok.

CHAPTA XXX.

ATUK o Lechel vt Chekob a v̄lla ik im esho kv̄t pisa mvt, Lechel vt akni hash i potv̄nno tok; micha Chekob a, V̄lla vm̄a, keyukma sv̄lla ch̄i hoke, im achi tok.

2. Mihma Chekob vt Lechel a i sanalit isht im ai i nuk-killi vt libbit, Chitokaka vlhtobvt hikia li cho? yvmmak osh chim oshv̄tto atoba ka ch̄i katv̄bli tuk oke, achi tok.

3. Mihma, Yakeh, an tishu ohoyo Bilhah ya ish iba chukowashke; yohmi na v̄lla vm̄ eshit saiyikalaha paknaka ya bohlashke: yohmi na v̄no ak kia yvmmak a tuk ak o v̄lla yvt vm̄ ashashke, achi tok.

4. Mihmvt tekchi ya ch̄i hō in tishu ohoyo Bilhah ya ima tok: mihma Chekob vt iba chukowa tok.

5. Atuk o Bilhah hv̄t chakali cha, Chekob a v̄lla nakni yō im eshi tok.

6. Mihma Lechel vt, Chitokaka yvt si apehpovshke, mi-cha vm anumpa ha haklo cha, vlla nakni yo vmvshke, achi tok: yvmohmi hatuk osh Tan hochifo tok.

7. Atuk osh Lechel in tishu ohoyo Bilhah hvt anonti chakali cha, atukla ma Chekob a vlla nakni yo im eshi tok.

8. Mihma Lechel vt, Ŭm̄vni ya iti kullo fehv̄t iti kullo li hosh imaiya lishke achi tok: mihmv̄t Naftali hochifo tok.

9. Atuk o Leah vt vlla eshit issa tuk vt pisa mv̄t, in tishu ohoyo Silpah ya ishi cha, tekchi ya chi ho Chekob a ima tok.

10. Atuk o Leah in tishu ohoyo Silpah vt Chekob a vlla nakni yo im eshi tok.

11. Mihma Leah vt, Laua hosh mintishke, achi tok: mihmv̄t hohchifo ha Kat achi tok.

12. Atuk o Leah in tishu ohoyo Silpah vt Chekob a atukla ma vlla nakni yo im eshi tok.

13. Mihma Leah vt Sai yukpvshke, ohoyo vhleha hvt nayukpa si acha chi hoke: achi tok, mihmv̄t hohchifo ha Ashe achi tok.

14. Atuk o onush vmo nitak o Luben vt osapa ya ia tuk osh okchak holba ahayuchi cha, ishki Leah ya isht im ona tok. Mihma Lechel vt Leah ya, Chiso im okchak holba kaniohmi ka is sv̄mashke, chim asilhha lishke, im achi tok.

15. Mihma, A hatak a is sv̄m ishi ka nan ik ahobo cho? yohmi mv̄t sv̄so im okchak holba ak kia ish isha chi cho? im achi tok. Mihma Lechel vt, Yvmohmi hoka chiso im okchak holba atuk mak o himak ninak a chiba nusashke, achi tok.

16. Atuk o Chekob vt opia ma osapa vttvt minti ma, Leah hvt kohchvt ivt afama cha, Is sv̄ba nusashke: sv̄so im okchak holba ishit chi tohno li tuk vt ahli hoka, achi tok. Atuk o mih ninak ma iba nusi tok.

17. Atuk o Chitokaka yvt Leah ya i haponaklo na chakali cha, vlla nakni ishit tahlapi ka Chekob a im eshi tok.

18. Mihmv̄t Leah vt, Ŭm̄ vlhtoba ya Chitokaka yvt vmvshke, an tishu ohoyo yash a hatak a ima li tuk oka, achi tok: mihmv̄t hohchifo ha Issaka achi tok.

19. Atuk osh Leah vt anonti chakali cha vlla nakni ishit hannali ka Chekob a im eshi tok.

20. Micha Leah vt, Nahvlbina achukma ho Chitokaka yvt sa habenvchishke; himak ano a hatak vt sa takla ahanta chi hoke, vlla nakni hannali ho im eshi li hoka, achi tok: mihmut hohchifo ha Sebulun achi tok.

21. Atuk osh i himmakma ushetik o eshi cha, hohchifo ha Tinah achi tok.

22. Mihma Chitokaka yvt Lechel a anukfilli cha i haponaklo mut, im oshvtto ya i wakvmmichechi tok.

23. Mihma chakali cha, vlla nakni yo eshi tok; micha, Chitokaka yvt nan ishit sa hofahya ya ishit a kanchishke, achi tok.

24. Micha hohchifo ha Chosef achi tok: mihmut, Chihowah yvt vlla nakni inla ya vm ibafohka chi hoke, achi tok.

25. Atuk o yakohmi tok, Lechel vt Chosef a eshi ma, Chekob vt Laban a, Ik ia is sum ahni na aivtta li, micha a yakni ya ona lashke.

26. Sa tekchi vhleha, micha vm vlla vhleha yvmmak oka chin toksuli li tuk a is suma na ia lashke; natoksuli chim atahli li tuk a ish ithana hokvt, im achi tok.

27. Mihma Laban vt, Holhponayo hanta ya chi tikba ai ahayuchi li tuk okma, ish antashke, chim asilhha lishke: chishno ak atuk pulla kak o Chihowah yvt sai yukpali hoka, akostininchi lishke, im achi tok.

28. Micha, Chim vlhtoba ya is sum apesashke, mikma chima lashke, achi tok.

29. Mihma Chekob vt, Kaniohmit chin toksahanli li tuk, micha chi nanvlhpoa vt kaniohmit si apehvt aiasha tuk a ish ithanvshke.

30. Ak lo kisha kano kanomosi hosh chim aiasha tuk osh himak ano wayvt apakvnt taha hoka: mihma Chihowah yvt vla li tuk takla ka chi yukpalishke: yohmi ka himak a katiohmik mak o an chuka achvfa yak kia nan im atahlit ahanta la chi cho? im achi tok.

31. Mihma Laban vt, Nanta ho chima la chi cho? achi tok. Mihma Chekob vt, Nana is suma he keyu: ilvppak o

is sa yvmihchikma, anonti chi nanvlhpoa chipinta ya pehliechit impvchi lashke.

32. Himak nitak a chi nanvlhpoa chipinta moma ka iba chukowvt, ahlopullit chikchiki moma, micha bakowa moma ka ila filvmmichit, micha lusbi moma chukfulhpoa ya ibalhto ka, micha chikchiki, micha bakowa issi kosoma ibalhto ka ila filvmmichi lashke: mikma yvmma chohmi kak osh vm vlhtoba yashke.

33. Yohmi ho nitak inla minti ka asitubi li tuk vt hoyo likmvt, aivlhpiesa ho yvmihchi li tuk vt chi tikba si ai atokolashke: chikchiki, micha bakowa keyu yosh issi kosoma ya ibafoka, micha lusbi keyu yosh chukfulhpoa ya ibafokak mvt, moyuma kut hukopa li tuk osh vm anta vlhpisashke, achi tok.

34. Mihma Laban vt, yakeh, chim anumpa hatuk mak o yvmohmik bano ahni lishke, achi tok.

35. Mihmvt nitak yvmmak inli ka issi kosoma nakni tohbit afohoma, micha bakowa, micha issi kosoma tek chikchiki, micha bakowa, moma micha tohbi kaniohmi kut laponli, moma micha lusbi yosh chukfulhpoa ya ibafoka moma ka ila filvmmichit ushi vhleha ha ibbak fohki tok.

36. Michā ilap, micha Chekob itatuklo ka iti filvmmichit nitak tuchina anowa yo ashachi tok: mihma Laban i nanvlhpoa inla ka Chekob vt pehliechit impvchi tok.

37. Michā Chekob vt sipsi okchaki, michā hasel, micha oti vpi tvptua aiena ka ishi cha hlohli bvsolichit tohbichi cha, iti tvptua atohbi kash haiakvchi tok.

38. Michā nanvlhpoa chipinta yvt ushi shala chi ho iti tvptua hlohli kash osh nan vlhpoa chipinta yvt ishka chi hosh vlak ma itikba oka a yanvlli, micha oka ai ipeta peni ya a hiohlichi tok.

39. Atuk o nanvlhpoa chipinta yvt iti tvptua yash itikba ya ushi a shali beka tok; micha tohbit afohoma, chikchiki micha bakowa aiena ka cheli tok.

40. Mihma Chekob vt chukfulhpoa ushi yash ila filvmmichi mvt, nanvlhpoa chipinta nashuka ya Laban i nanvlhpoa chipinta yash tohbit afohoma, micha lusbi moma aiena

ka pit apissulechi beka tok; mihmvt ilap i nanvlhpoa chipinta ya ila ashachi cha, Laban i nanvlhpoa chipinta yano ik ibafohko tok.

41. Atuk o yakohmi tok, nanvlhpoa kullo i shahli vt ushi shalikma no Chekob vt iti tuptua ai itin takla ya ushi shala chi ho nanvlhpoa nishkin itikba oka ayanvlli ya iti tuptua yash ashachi tok.

42. Amba nanvlhpoa hliposhikmuno, ik ashacho beka tok: yvmohmi ho hliposhi ak osh Laban immi hokma, kullo i shahli yak osh Chekob immi hatok.

43. Micha hatak ash osh i shahlit mahaya fehna cha, nanvlhpoa, micha ohoyo tishu, micha hatak tishu, micha kamel, micha issuba haksobish falaia puta aiena kv in laua fehna hatok.

CHAPTA XXXI.

ATUK osh Laban ushi vhleha hv anumpulit, Chekob vt piki nana immi hatuk a ishit tahlshke; micha, piki immi hatuk a nan-isht-holitopa ilvppa moma ai ishishke, achi na haklo tok.

2. Atuk osh Chekob vt Laban nashuka ya pisa ma, yakeh, tikba chatuk a in chohmi keyu tok.

3. Mihma Chihowah yvt Chekob a, Falamvt chiki vhleha i yakni onvt, micha chi kanomi vhleha ish im onashke; mikma chibafoyuka lashke, im achi tok.

4. Mihma Chekob vt Lechel, micha Leah ya hoyot i nanvlhpoa aiasha yakni haiaka ya isht ona cha,

5. Hvch iki nashuka yvt tikba chatuk vt an chohmi keyu ka pisa lishke: yohmi kia aki in Chitokaka yvt subafoyuka hoke.

6. Micha nan isht aiahlika vm aiokluha hosh hvch iki ya in toksuli li tuk a hvsh ithanvshke.

7. Mihma hvch iki vt sa haksichi cha, nan isht vm vlhtoba ya pokoli ha vm inlvchi tuk oke: yohmi kia Chitokaka yvt ik hotopali, ik ahno tuk oke.

8. Yakohmikma, Chikchiki ak osh ishit chim vlhtobash-

ke, achi tuk ma, yohmikma nanvlhpoa moma kvt chikchiki y_o cheli chatuk: mihma, Tohbit afohoma ak osh isht chim vlhtobashke, achi tuk ma, yohmikma nanvlhpoa moma kvt tohbit afohoma h_o cheli chatuk oke.

9. Yakohmichi hosh Chitokaka yvt hvch i_{ki} i_i nanvlhpoa ya im ishi cha, vma tuk oke.

10. Atuk o yakohmi tok, nanvlhpoa yvt ushi shali nitak a sa holhpokna cha, hopokoyot pisa li ma, yakeh, nakni vt nanvlhpoa ya oiya kvt tohbit afohoma, chikchiki, micha bakowa aiena tok.

11. Mihma Chitokaka im enchel vt, sa holhpokna h_o vm anumpulit, Chekob ma, vm achi tok: mihma, Yak itonla lishke, achi li tok.

12. Mihma, Akachakali cha pisá, nakni moma kvt nanvlhpoa ya oiya kvt tohbit afohoma, chikchiki, micha bakowa aiena hoke: Laban vt nana moma chi kaniohmichi ka pisa li tuk oka.

13. Behlel yvmma nan isht-ithana tvli ya nan ish ahvm-mi tok, micha yvmma anumpa kullo is svm il ai onochi tok a in Chitokaka sia hoke: yvmohmi hoka himak a wakaya cha, yakni ilvppa ish kohchashke, micha falamvt ch_i kanomi i_i yakni ya ish onashke, vm achi tuk oke, im achi tok.

14. Mihma Lechel, micha Leah vt afalaminchit, P_iki in chuka achvfa ya akashapa, keyukmvt il ai isha he vlhpesa yvt asha moma cho?

15. Okla inla yak o yvmmvt pit apesa keyu cho? pi kanchi tok osh pin tvli holisso ak kia tahli tuk oka.

16. Imilayak moma Chitokaka yvt p_iki ya im ishi tuk vt pimmi, micha pim vlla vhleha aiena kak o immi hoka: yvmohmi hoka himak a Chitokaka yvt nana h_o ch_i mihakma, ish yvmihchashke, im achit okla tok.

17. Yohmi ma Chekob vt wakaya mvt, ushi vhleha, micha tekchi vhleha aiena ka kamel a om binohlichi tok.

18. Mihmvt i_{ki} Aisak aivtta Kenan yakni ya ia ch_i hosh nanvlhpoa moma, micha vlhpoyak ahayuchi tuk vt moma, Patan-alam a nanvlhpoa ya ai ahayuchi tuk vt isht ia tok.

19. Mihma Laban vt in chukfulhpoa hishi vmot ia tuk

atok: mihma Lechel vt iki i naholbut toba ya i hukopa tok atok.

20. Atuk o Chekob vt kvnia mvt, ik im anolo hatuk osh Silian hatak Laban a haksichi tok.

21. Yohmi hosh nana moma im asha tuk vt ishi cha kvnia tok: micha wakaya cha okhina ya tanvblit, nvni Kileat pilla ha nashuka ya pit talali tok.

22. Atuk o nitak ont atuchina kak o Chekob vt kvnia tuk a Laban a im anoli tok.

23. Mihma Laban vt itibapishi vhleha pehlichy cha, hliolit, nitak untuklo anowa yo ona tok; micha nvni Kileat ak o ont a sakki tok.

24. Atuk o Silian hatak Laban vt ninak ma holhpokna na Chitokaka yvt im vlt, Ahah, ish ahni cha, Chekob a achukma hokma, okpulo hokma nana kia chik im anumpulo kashke, im achi tok.

25. Yohmi ma Laban vt Chekob a sakki tok. Yohmi ma Chekob vt nvni ak o im vlhtipo ya a hilechi tok: atuk o Laban vt itibapishi vhleha aiena kv Kileat nvni ak o a binachi tok.

26. Atuk osh Laban vt Chekob a, Nanta mak o ish yvmihchi cho? is sa haksichi cha, bvshpo falaia ishit yukachi tuk chohmichit svstok vhleha ha pehlichit ish kvnia tuk oke.

27. Nanta katiohmi ho lumvt malelit is sa haksichi cha chik sv anolo na nayukpa, micha ilhtvlwak, micha vhlepa, micha hap aiena olahanchi hosh ik ia ak chim ahno tuk oh cho?

28. Michasvso vhleha, micha svstok vhleha aiena ka ik i suksowa, chik sv ahno tuk oh cho? himak a im anukfila iksho chohmit ish yvmihchi tuk oke.

29. Chi hotopali la hi vt svbbak a foyuka hoke: yohmi kia chiki ya in Chitokaka yvt pilashash ninak a vm anumpulit, Ahah, ish ahni cha achukma hokma, okpulo hokma nana kia Chekob a chik im anumpulo kashke, vm achi tuk oke.

30. Atuk o himak a ia hosh ish ayvshke, chiki in chuka

ya ish i palata fehna hokvt: yohmi kia nanta katiohmi ho a naholbvt toba ya is sa hukopa tuk oh cho? im achi tok.

31. Mihma Chekob vt afalaminchit Laban a, Sa nukshopa hatuk oke: Chisotek vhleha ha afvt is sum isha hinla yoba ka, achi li tuk oke.

32. Yvmohmi hoka kva hosh chi naholbvt toba ya ishi ka ish ahayuchikma, yvmvt ik okchayo kashke: piti-bapishi vhleha itikba nana hosh chimmi hosh svbafoyuka tukma, ish ithana cha, ish ishashke im achi tok: Lechel vt hukopa tuk a Chekob vt ik ithano tuk okvt.

33. Mihma Laban vt Chekob im vlhtipo ya ont chukowa mvt, Leah im vlhtipo ma ont chukowa cha, tishu ohoyo tuklo im vlhtipo ya ont chukowa tok: yohmi kia ik ahayucho tok. Yohmi mvt Leah im vlhtipo ya a kohcha mvt, Lechel im vlhtipo ya ont chukowa tok.

34. Yohmi ka naholbvt toba ya Lechel ak osh ishi tuk osh kamel i nachukushpa ibafohki cha, om binili tuk atok. Mihma Laban vt vlhtipo ya a mominchit hoyo kia, ik ahayucho tok.

35. Mihma Lechel vt iki ya, chi tikba ya ak wakayo ka a shahli hvt ik nuklibisho kashke; ohoyo nana im akaniohmi vt si onvtonla hoka, im achi tok. Mihma hoyo kia naholbvt toba ya ik ahayucho tok.

36. Mihma Chekob vt nukhobela cha, Laban a itachowa tok: micha Chekob vt afalaminchit Laban a, Nanta ho vbanvbli li tuk oh cho? micha nanashvchi li vt nanta hatuk o achunanchit is sa hlioli kvv chi yvmohmi tuk oh cho?

37. A nachukushpa ya moma ish a hoyo hokvt nana achvfa nanta ho chin chuka achvfa nachukushpa yatuk a ish ahayuchi cho? svtibapishi vhleha, micha chitibapishi vhleha aiena itikba ilvppa talali, yohmi na pim itin takla ya nana a pim apesashke.

38. Afvmmi pokoli tuklo ilvppa chi takla ahanta li chatuk; chin chukfulhpoa tek, micha chim issi kosoma tek aiena kvv ushi im avma chatuk keyu; micha chi nanvlhpoa ya ai ishit chukfulhpoa nakni ya vpa li chatuk keyu hoke.

39. Nampoa okpulo yosh vbi tuk a ishit chim ona li chatuk keyu; vno ak osh a kvnia chatuk; nitak o hukopa tuk okmá, keyukmvt ninak o hukopa tuk okmá nana kia subbak ak o is sa hoyo chatuk oke.

40. Si yakohmi chatuk oke; nitak ma lushpa, micha ninak ma hotonti hosh sa tahli chatuk oke; mihma nusi hvt sa nishkin a i filvmmi chatuk oke.

41. Yakohmi hosh afvmmi pokoli tuklo ho chin chuka ahanta li tuk oke: chisotek tuklo ka afvmmi auah ushta ho chin toksvli li tuk oke, micha chi nanvlhpoa ya afvmmi hannali ho chin toksvli li tuk oke: micha nan isht vm vlh-toba ya pokoli ha is svm inlvchi tuk oke.

42. Aki in Chitokaka, Eblaham in Chitokaka, micha Aisak vt I nukshopa vt subafoyuka hatuk keyukma, nana iksho ho is sa chvffichi pulla hetuk oke. Chitokaka yvt a sylvsha, micha subbak toksahanli ka pisa tuk osh pilashash ninak ma na chi miha tuk oke, im achi tek.

43. Mihma Laban vt afalaminchit Chekob a, ushetik ilvppvt svstotek vhleha hoke, mikma vlla vhleha ilvppvt vm vlla vhleha hoke, micha nanvlhpoa ilvppvt a nanvlhpoa yoke, micha nana ish pisa moma kvv vmmi hoke; yohmi ka himak nitak a svstotek vhleha ilvppa, micha eshi tok vlla vhleha ha nanta ho katiohmichi la hinla cho?

44. Yvmohmi hoka himak a inta, vno, micha chishno il ita tuklo kvv nan il itim apesashke: mikma nan atokoli yosh pim itin takla ya hikiashke, im achi tok.

45. Mihma Chekob vt tvli ishi cha, nan-isht-ithana ikbit hilechi tok.

46. Mihmvt Chekob vt itibapishi vhleha ha, Tvli oh aiowá, im achi tok; mihma tvli aiowa cha, itvnahli tok: mihmvt itvnaha ya paknaka okla ai impa tok.

47. Mihma Laban vt, Cheka-sahatuhla hochifo ma, amba Chekob vt Kaleet hochifo tok.

48. Mihma Laban vt, Itvnaha ilvppvt himak nitak a vno micha chishno nan atokoli yosh pim itin takla ya hikia hoke, achi tok. Yvmohmi hatuk o hohchifo ha Kaleet; achi tok.

49. Micha Mispēh achi tok: Il itifilummit il ayakma, Chihowah yvt pim itin takla ya a pi apesahanchashke.

50. Svsotek vhleha ha ish ilbvshalikma, keyukmvt svsotek vhleha ha aieninchit ohoyo inla ho ish ishikma, hatak nana hosh piba fokvt pi pisa keyushke: Chitokaka ak osh vno, micha chishno, pim itin takla ya pim atokoli yosh hikia hoke, achi hatuk okvt.

51. Micha Laban vt Chekob a, Yakeh, itvnaha ilvppa, micha yakeh, nan isht-ithana ilvppa vno, micha chishno pim itintakla ya hilechi lishke.

52. Itvnaha ilvppvt, micha nan isht-ithana ilvppvt nan okpulo aiahnit, itvnahahchi ilvppa ant ivt ak chim ono ka he, mikma itvnahahchi ilvppa, micha nan isht-ithana ilvppa ant ivt chik sum ono ka he atokoli yashke.

53. Eblaham in Chitokaka, micha Naho in Chitokaka, iki ya in Chitokaka yak osh pim itin takla ya nana ai apesashke, im achi tok. Mihma Chekob vt iki Aisak vt I nukshopa ak o hochifot anumpa kvllō il onochi tok.

54. Yohmi mvt Chekob vt i nanvlhpoa ya ai ishit nvni hash ai vbi cha, pvskā vpa chi ho itibapishi vhleha ha hoyo tok: mihma pvskā okla vpa cha, nvni ha asha na onna tok.

55. Atuk o onna kvv onnahinli fehna ho Laban vt waka-ya cha, ushi vhleha, micha ushetik vhleha ha i suksowa mvt, anumpa yukpali onochi tok: micha Laban vt falamvt ivt aivtta ya ona tok.

CHAPTA XXXII.

MIHMA Chekob vt aya tok; atuk o Chitokaka im en-chel vhleha hvt afama tok.

2. Atuk o Chekob vt pisa mvt, Ilvppvt Chitokaka im vl-bina hoke achi tok: micha yakni yvma hochifo ha Mahanaim achi tok.

3. Mihmvt Chekob vt anumpa shali tikba tihlelit, Sei yakni, Etom apēlichika, itibapishi Esau aiasha ya pit im pila tok.

4. Micha i miha mvt, Yakohmichi hosh a shahli Esau ya hvsh im anumpulashke; Chin tishu Chekob vt yak achishke, Nowvt aya yosh Laban ak o takla ahanta li chatuk, micha yummak o ahanta li himak a hoke:

5. Micha wak, micha issuba haksobish falaia, micha nanvlhpoa chipinta, micha hatak tishu vhleha, micha ohoyo tishu vhleha aiena ka pehliechi lishke: atuk osh a shahli ha pit im anolit, holhponayo hanta ya chi tikba ai ahayuchi la chi hosh pit chi pila lishke, achishke, hvsh im achashke, achi tok.

6. Atuk o anumpa shali ash osh falamvt, Chekob a im vla mvt, Ish itibapishi Esau ya il im ona tuk oke; mihma chi afamvt minti akinlishke, mihma hatak tahlepa ushta hosh apiha hoke, achi tok.

7. Mihma Chekob vt nukshopa cha komota fehna tok: mihmvt okla apehvt aya tuk a, micha nanvlhpoa chipinta, micha nanvlhpoa hochito, micha kamel puta aiena ka ita kvshkolit aya tuklochi tok.

8. Micha Esau vt aya achvfa ka ant afama cha, issot kanchikma, yohmikma aya achvfa kuto yihlept hlakoffashke, achi tok.

9. Mihmvt Chekob vt, Aki Eblaham a in Chitokaka, micha aki Aisak a in Chitokaka, Chihowah, Falamvt chi yakni, micha chi kanomi ya ish im onashke, mikma achukma ho chi yvmihchi lashke, is svm ahanchi tuk chia ma,

10. Nan isht ish i nukhaklo moma ik lauwo ka, micha chim anumpa ahli moma chin tishu ha ish pisachi chatuk a si ahalaia he vlhpesa keyushke: an twbi ya ieshi hosh Chatan ilvppa hlopulli li tok osh, himak ano aya tuklo toba li hokvt.

11. Itibapishi li ibbak, Esau ibbak a im ai ishit is sa hlakofichashke, chim asilhha lishke, i sa nukshopa hoka: vlt issot sa kanchikmvt, ishki, micha vlla vhleha ma issot kanchi yoba na.

12. Achukma ho chi yvmihchi li pulla chi hoke; micha chim ishtatiaka ya laua kv holhtina he keyu, shinuk okhvta aiasha kak o choyuhmichi la hi oke, ish achi tuk oke, achi tok.

13. Micha mih ninak ma yummak inli anta tok; micha itibapishi Esau ya habenvcha chi kvt nana hosh ibbak ant fohkakmt, ishi tok.

14. Issi kosoma tek tahlepa tuklo, micha issi kosoma nakni pokoli tuklo, chukfulhpoa tek tahlepa tuklo, micha chukfulhpoa nakni pokoli tuklo,

15. Kamel i bishahchi pokoli tuchina, ushi aiena, wak tek pokoli ushta, micha wak nakni pokoli, issuba hak-sobish falaia tek pokoli tuklo, micha ushi pokoli aiena hatok.

16. Micha ilap aya achvfa aiyukali ho in tishu vhleha ibbak fohki tok: micha in tishu vhleha ha, Sa tikba hvsh tanvbli cha, aya achvfa aiyukali kvt iti mishemanchi hosh hvsh ayashke, im achi tok.

17. Micha tikba fehna aya ka, Itibapishi li Esau vt afama cha chi ponaklot, Kvt a immi chia hoh cho? micha katima ish ia cho? micha chi tikba aya ilvppvt kvt a immi hoh cho? achikma:

18. Yohmikma, Chin tishu Chekob a immi hoke: nahvlbina yo a shahli Esau ya et i pila tuk: atuk o yakeh, olbul minti akinli hoke, ish achashke, achit i miha tok.

19. Micha yvmihchi hosh atukla, micha atuchina, micha aya kaniohmi hosh pit iakaiya moma ka i mihvt, Yakohmichi hosh Esau ya hvsh pisakmt, hvsh im anumpulashke, ahanchi tok.

20. Micha achakalinchit, Yakeh, chin tishu Chekob vt olbul minti akinlishke, hvsh achashke, achi tok. Nahvlbina sa tikba ia kak o ishik nuktalali lashke; yohmi ha yosh nashuka ya pisa lashke: a kanvt vm aiokpvcha hinla yoba ka, achi hatuk okvt.

21. Yohmi ma nahvlbina yvt tikba ia tok; mihma ilap vto mih ninak a abinanchi ya anta tok.

22. Atuk osh mih ninak a wakaya mvt, tekchi tuklo, micha in tishu ohoyo tuklo, micha ushi auah achvfa aiena ka ishi cha, Chabbok okhina kohcha ya pit hlopulli tok.

23. Mihmvt ishi cha, okhina yash pit hlopullichit mvt, moma ishi tuk vt pit hlopullichit tok.

24. Micha ilap bano hosh anta tok; atuk o hatak osh ont itihishi na onnvt minti tok.

25. Atuk osh imaiya he keyu kv̄t pisa mvt, Chekob iyubi itachosholi kolukbi ya potoli tok: mihma itishi mvt, Chekob vt iyubi ai itachasholi vt shufa tok.

26. Mihma, Onnvt minti hoka, ak iá, achi tok. Mihma, Chik sai yukpalokma, ik iá, chim ahni la he keyu, achi tok.

27. Mihma, Chi hohchifo hv̄t nanta hoh cho? im achi ma, Chekob sia hoke, achi tok.

28. Mihma, Himak pilla ma chi hohchifo ha Chekob acha he keyu, amba Israel ahi oke: hatak holitopa chia hosh Chitokaka ya ish i kv̄llo hokvt, hatak v̄hleha ha ish imaiya chi hoke, achi tok.

29. Mihma Chekob vt i ponaklot, Chi hohchifo ha vm anolí, chim asilhha lishke, achi tok: mihma Nanta katiohmi ho sa hohchifo ha ish ponaklo cho? achi tok. Mihmvt yvmmak o a yukpali tok.

30. Mihma Chekob vt yakni yvmma hohchifo ha Penuel achi tok: Chitokaka ya nashuka iti sanalit pisa lish si okchaya moma hokvt, achi hatok.

31. Atuk osh Penuel a hlopullit ia ma, hvshi vt kohchvt on tom̄mi tok; mihma iyubi ya ishit shaiiksheli hosh nowa tok.

32. Yvmohmi kak o Israel im vlla v̄hleha hv̄t akshish yvmmvt iyubi itachosholi kolukbi o hikia kv̄t shulla tok ak o ik po chatuk osh himak nitak a moma hoke: Chekob iyubi itachosholi kolukbi ya potoli na akshish vt shulla tuk atok.

CHAPTA XXXIII.

ATUK osh Chekob vt akachakalit pisa ma, yakeh, Esau vt hatak tahlepa ushta hosh apiha ho minti tok. Mihmvt vlla v̄hleha ha ila hiohlichit Leah, micha Lechel, micha tishu ohoyo tuklo aiena ka ima tok.

2. Micha tishu ohoyo tuklo, micha im vlla v̄hleha aiena kak o tikba fehna hiohlichi mvt, Leah micha im vlla v̄hleha

aiena ka iakaiyvchi mvt, Lechel micha Chosef a olbul fehna hilechi tok.

3. Mihmvt tikba ia tok; micha untuklo ha akachunolit aka hlipvt mahaya mvt, itibapishi ha bilika ona tok.

4. Mihma Esau vt malelit ont afama mvt, shoyulit ikunla ya on hlipia cha, i suksowa tok: mihma yaiyvt okla tok.

5. Atuk osh akachakali cha, ohoyo, micha vlla vhleha aiena ka pisa mvt, Yummvt kvta hosh chi apiha cho? achi tok. Mihma, Chin tishu ha Chitokaka yvt i nukhaklot ima tuk vlla vhleha hoke, achi tok.

6. Yohmi ma tishu ohoyo tuklo, im vlla vhleha aiena kvv bilika vlt akachunolit aka hlipkvchi tok.

7. Mihma Leah ak kia im vlla vhleha aiena kvv bilika vlt akachunolit aka hlipkvchi tok: mihma iakaiya kvv Chosef, micha ishki itatuklo kvv bilika vlt akachunolit aka hlipkvchi tok.

8. Mihma, Pehlichit isht aya na afama li tuk moma ilvppak osh nanta chi katiohmi hoh cho? achi tok. Mihma, A shahli itikba ya holhponayo hanta ya ai ahayuchi la chintuk mak oke, achi tok.

9. Mihma Esau vt, Um vlhpesa akinli hoke, itibapishi li ma, nana ish ishi tuk vt ish ieshashke, achi tok.

10. Mihma Chekob vt, Aha, himak a holhponayo hanta ya chi tikba ai ahayuchi li hokma, a nahvlbina svbbak foyuka ka ish ishashke, chim asilhha lishke: yvmohma he ak o chi nashuka ya Chitokaka i nashuka chohmi ho pisa li ma, is sa hvlpasha hoka.

11. Nan ishit yukpali li ishit chim vla tuk a ishi, chim asilhha lishke; Chitokaka yvt a kana tuk oka, micha vm vlhpesa tuk oka, achi tok: mihmvt im achiba ma, ishi tok.

12. Mihmvt, Wakayvt il iashke, mikma chi tikba ia lashke, achi tok.

13. Mihma, Vlla vhleha hvv ik kvvlo, micha nanvlhpoa chipinta, micha nanvlhpoa hochito vt ushi pehlichu hosh si apihvshke; atuk o hatak vt nitak achvfa ho atablit tihlelikma, nanvlhpoa moma kvv illit taha hinla ka a shahli hvv it-hanvshke.

14. A shahli hvt in tishu ha itikba iashke, chim asilhha lishke: mikma nanvlhpoa yvt sa tikba aya kak osh kaniohmit ayakma, micha vlla vhleha hak osh kaniohmit ayakma, lumvt mahaya li tuk osh a shahli hvt Sei ai vtta ka im ona lashke, im achi tok.

15. Mihma Esau vt, Yohmi ka hatak kaniohmi ka si apiha ka ak chim ashachi, achi tok: mihma, Nanta katiohma chi ho? A shahli itikba ya holhponayo hanta ya ai ahayuchi lashke, achi tok.

16. Yohmi ho mih nitak a Esau vt falamvt i hina fohkvt Sei pilla ha ia tok.

17. Mihmvt Chekob vt aya mvt, Sukkolh a ona cha, in chuka ikbi cha, i nanvlhpoa ya hoshontika im ikbi tok: yvmohmi kak o yakni yvmma hohchifo ha Sukkolh achi tok.

18. Atuk o Chekob vt Patan-alam vttvt vla mvt, Shalem, yvmvt Shekem in tmaha holihta yosh Kenan yakni talaia ka vla tok: micha tmaha holihta itikba ak o im vlhtipo ya hilechi tok.

19. Micha im vlhtipo a a hilechi tuk vt Shekem iki Hamo ya im vlla vhleha ha tvli hvta tushahli tahlepa achufa ho osapa kashapa yo chumpa tok.

20. Micha yvmma alta hilechi cha, El-elohe-Israel hochofo tok.

CHAPTA XXXIV.

MIHMA Leah ushetik Tinah Chekob a im eshi tok vt yakni yvmma ohoyo vhleha ha kohchvt pisvt ia tok.

2. Atuk o yakni yvmma i miko Hifait Hamo ya ushi Shekem vt pisa mvt, hokli cha iba tvshkit litehli tok.

3. Atuk osh Chekob ushetik Tinah ya chukvsh vt asitia tok; micha ohoyo himita ya anushkunna mvt, ohoyo himita yash i kanvt im anumpuli tok.

4. Micha Shekem vt iki Hamo ya im anumpulit, Ohoyo himita ilvppa sa tekchi ya chi ho ishit is sv mashke, achi tok.

5. Atuk o Chekob vt, ushetik Tinah ya litehli tuk a haklo tok: (yohmi ka ushi vhleha hvt i nanvlhpoa pehlichit

yakni haiaka ya asha tok: mihmvt ik lo kisha ka, Chekob vt nana ik acho tok.)

6. Mihma Shekem iki Hamo vt kohchvt ivt Chekob a ont itim anumpuli tok.

7. Atuk o Chekob ushi vhleha hvvt haklo mvt, yakni haiaka ya kohchvt vla tok: micha Chekob ushetik a iba tvshkit, Ishael a nana ik achukmo, yummvt yvmohma he vllhpesa keyu ho yvmohmi tuk ak o, hatak vhleha hash osh nukhak-lo mvt, okla nukhobela fehna tok.

8. Mihma Hamo vt itim anumpulit, Svso Shekem chukvsh vt hvch isotek a ahni fehnvshke: tekchi ya chi ho hvsh i bohlashke, hvchim asilhha lishke.

9. Micha hvsh pim itauwaya cha, hvch isotek vhleha ha hvsh pimakmvt, pisotek vhleha ha hvsh ishashke.

10. Micha pi takla hvsh aiashashke: mikma yakni vt hvchi tikba talaia chi hoke; ai itatobvt hvsh aiasha cha, hvch imilayak a hvsh ai ikbashke, achi tok.

11. Mikma Shekem vt ohoyo himita hash iki ya, micha i nakfi vhleha ha, Isht i kana ya hvchi tikba ya ai ahayuchi lashke; mikma nana ho hvsh sa mihakma, bohli lashke.

12. Ohoyo isht vlhtoba, micha nahvlbina laua kvv kaniohmi kia hvsh svsm apesashke; mikma nana ho hvsh sa mihakma bohli lashke: ik kaniohmi kia satekchi ya chi ho ohoyo himita yash hvsh svsmashke, im achi tok.

13. Mihma Chekob ushi vhleha hvvt, in tek Tinah ya litikli tuk ak o, Shekem, micha iki Hamo itatuklo ka haksichi hosh afalaminchit,

14. Nana ilvppa e yvmihcha he keyu, kvna hosh hakshup tupa keyu ka pin tek a il ima he keyu hoke: yvmmak okvt ishik pi hofahya hinla hoka.

15. Amba ilvppak okmvno vllhpesa e chim ahna hinla; Pishno akinli chohmit, nakni hvchia moma kvv hakshup hvchi tupa hokma,

16. Yohmikma pisotek vhleha ha e hvch ima cha, hvch isotek vhleha ha il isha hi oke; yohmi kvv hvchi takla il ai asha cha, okla achvfa eho tobashke.

17. Amba hvchi tupa hi vt hvsh pi haponakla he keyuk-

ma, yohmikma pisotek a il ishikmut, il ia chi hoke, im achi tok.

18. Mihma im anumpa ha Hamo, micha Hamo ushi Shekem itatuklo kut im aiokpanchi tok.

19. Mihma hatak himita yash osh Chekob ushetik a anushkunna hatuk osh nana ka ik ahchibalo hosh yvmihchi tok: micha holitopa kut iki in chuka achvfa ya moma i shahli hatok.

20. Mihma Hamo, micha ushi Shekem itatuklo kut in tumaha holihta okhissa ya ona cha, in tumaha holihta hatak vhleha ha itim anumpulit,

21. Hatak ilvppa puta kut pit i kana achukmvshke; yvmohmi hokvt yakni ya aiasha cha, ai itatobashke; yakeh, yakni vt chito kut im vlpesa hoka: ushetik vhleha ha ishit il itauwayakmut, pisotek vhleha ha il imashke.

22. Peh yvmvt hakshup tupa ka chohmit nakni hvpi moma iloh aiasha kut hakshup hvpi tupa hok mak o, ilvp-pak okmvno hatak vhleha hash osh vlpesa pim ahni cha, pi takla aiasha na okla achvfa eho toba hinla hoke.

23. I nanvlhpoa chipinta, micha imilayak, micha i nanvlhpoa hochito puta moma kut pimmi ha chi keyu cho? peh vlpesa il im ahni hok mak o, pi takla aiasha hinla hoke, achit okla tok.

24. Mihma in tumaha holihta kohchvt ia puta moma kut Hamo, micha Hamo ushi Shekem a i haponaklo tok: micha in tumaha holihta ya kohchvt ia moma nakni puta moma kut hakshup tupa tok.

25. Atuk o nitak ont atuchina ma yakohmi tok, hotopvt taha ma, Chekob ushi tuklo, Simeon micha Lefai, Tinah i nakfi vt nukshopa iksho hosh i bvshpo falaia ieshi bika cha, tumaha holihta ya vla cha, nakni moma ka vbit tahlit okla tok.

26. Michu Hamo, micha Hamo ushi Shekem itatuklo ka bvshpo falaia halupa isht vbi tok; mihmut Tinah ya Shekem in chuka ai ishit kohchi cha, kohchvt ia tok.

27. In tek a litehli tuk ak o, Chekob ushi vhleha hv illi aiasha ka ont iba chukowa cha, tumaha holihta ya wehpuli tok.

28. In chukfulhpoa, micha i wak, micha im issuba hakso-bish falaia, micha nana tumaha holihta ya asha tuk, micha osapa ya asha tuk a ishi tok.

29. Michā imilayak moma ka ishi cha, im vlla chipunta moma, micha ohoyo vhleha aiena ka yukachit ishi tok: micha aboha nana aiasha tuk aiena ka wehpuli tok.

30. Mihma Chekob vt Simeon micha Lefai ya, Hvs si ataklvmmi cha, yakni ya okla Kenanait, micha Pelissait a im itin takla ya hvs sa shuwrchishke: holhtina kv̄t ik sa lau-wo hatuk o, iti hoyot itvnaha cha, a sanali cha, sv̄ba chi hoke, mikma vno, micha an chuka achvfa aiena kv̄t illit sv̄taha chi hoke, im achi tok.

31. Mihma, Pin tek a ohoyo haui yo chohmicha hinla cho? achi tok.

CHAPTA XXXV.

ATUK o Chitokaka yvt Chekob a, Wakayvt Behlel a ish ona cha, yvmmak o ish vttashke: micha yvmmak o chitibapishi Esau itikba ya ish maleli ma: Chitokaka yvt a chi haiaka tok a alta ya ish im ai ikbashke, im achi tok.

2. Yohmi ma Chekob vt in chuka achvfa ya, micha apiha tuk moma ka, Naholbvt toba puta hvch itin takla asha ka hvsh kanchashke; micha hvchi kashofa cha, nafohka inla ishit hvsh fohkashke.

3. Michā wakayvt Behlel ak o il iashke; mikma yvmmak o Chitokaka ya yvmmak osh a svlvvsha nitak ma a haponak-lo tok, micha kanima aya li ma svbafoyuka tuk a alta im ai ikbi lashke, im achi tok.

4. Mihma naholbvt toba puta ibbak foka tuk vt, micha haksobish takali haksobish in takohmaya tuk vt Chekob a okla ima tok: mihma Chekob vt baiyi vt Shekem bilika hikia tuk o nutaka luhmi tok.

5. Michā bina ha kanvllichi cha ilhkoli tok: mihma tumaha holihta apakfoyupvt aiasha ka Chitokaka i nukshopa kv̄t onvtonla hatuk o, Chekob ushi vhleha ha ik hliolo tok.

6. Micha Chekob, micha okla moma apehvt aya tuk vt Lus, (yummvt Behlel) Kenan yakni talaia ka ona tok.

7. Micha yumma alta ai ikbi mvt, yumma El-behlel hochifo tok: itibapishi Esau itikba ya i maleli ma, Chitokaka yvt yummak o ai i haiaka tok oka.

8. Atuk o Lebekah ya sholi atok Tebolah vt illi cha, Behlel nutaka baiyi hikia ho nutaka yo hollohpi tok: mihma hohchifo ha Baiyi a yaiya, achi tok.

9. Atuk o Chekob vt Patan-alam a kohchvt minti ha ma, Chitokaka yvt anonti i haiaka cha, yukpali tok.

10. Micha Chitokaka yvt, Chi hohchifo hvt, Chekob oke; himak pilla ma chi hohchifo ha Chekob acha he keyu, amba Israel chi hohchifa hi oke, im achi tok; micha hohchifo ha Israel, achi tok.

11. Micha Chitokaka yvt, Uno ak osh Chitokaka Nan isht im aialli im ataha he iksho sia hoke: wayvt ish apaknashke; oklushi, micha oklushi kanohmi kia chi atoba hi oke, micha miko puta kvv chi haknip a a kohcha hi oke.

12. Micha yakni ya Eblaham micha Aisak ima li tok vt chishno ak o chima la chi hoke; micha chim isht atiaka et chiakaiya kak o yakni ya ima la hi oke, im achi tok.

13. Mihmvt Chitokaka yvt ai im anumpulit hikia tuk vt ai i filvmmitt vba ia tok.

14. Mihma Chekob vt ai im anumpuli tuk a nan isht-ithana, nan isht-ithana tuli yo hilechi tok: micha nan-ishko im issa yo on hlatvbli mvt, bila yo on hlatvbli tok.

15. Micha Chitokaka yvt ai im anumpuli tuk yumma hohchifo ha Chekob vt Behlel, achi tok.

16. Mihma Behlel a ashvt bina ha kanvllichi cha, ilhkoli tok: atuk o Eflalh a ona chi ka ik hopako tok; atuk o Lechel vt vlla esha chi hosh nukhvmmi cha i palvmmi fehna tok.

17. Atuk osh yakohmi tok vlla esha chi hosh i palvmmi fehna ma, vlleshi ka apelvchi ohoyo hvt, Chi nukshopa ná, ilvppak kia vlla nakni yo ish esha chi hoke, im achi tok.

18. Atuk osh yakohmi tok im ilhfiopak vt kohchvt ia

mut, (illi tok okvt,) hohchifo ha Benoni achi tok: yohmi kia iki vto Benchamin hochifo tok.

19. Mihma Lechel vt illi cha, Eflalh hina takla, yummvt Behlehem ak o a hollohpi tok.

20. Mihma Chekob vt im ahollohpi paknaka ya nan ishtithana hilechi tok: yummvt Lechel im ahollohpi nan ishtithana atok osh himak nitak a hikia hoke.

21. Mihma Israel vt bina ha kanvlichich cha, aya mut Eta holihta chaha ai atoni ya misha yo im vlhtipo ya ont a hilechi tok.

22. Atuk o yakohmi tok, Israel vt yakni ymma anta ma, Luben vt ia cha, iki im itaiena Bilhah ya iba nusi tok: atuk o Israel vt haklo tok. Yohmi ka Chekob ushi vhleha hvt auhtuklo tok.

23. Leah ushi vhleha hvt Luben Chekob ushi vttahpi, micha Simeon, micha Lefai, micha Chutah, micha Issaka, micha Sebulun ak atok:

24. Lechel ushi vhleha hvt Chosef, micha Benchamin ak atok.

25. Mikma Lechel in tishu ohoyo Bilhah ya ushi tuklo kvv Tan, micha Naftali ak atok.

26. Mikma Leah in tishu ohoyo Silpah ya ushi tuklo kvv Kat, micha Ashe ak atok. Ilvppa puta kak osh Chekob ushi vhleha hosh Patan-alam a ai im asha tok.

27. Mihma Chekob vt iki Aisak vt aivtta Mamle, tmaha holihta Abah (yummvt Heblon oke,) yummak o Eblaham, micha Aisak vt ai ashwa yatuk o ona tok.

28. Mihma Aisak i nitak puta kvv afummi tahlepa achvfa cha pokoli untuchina tok.

29. Atuk o Aisak vt sipokni, micha nitak lava hosh fio-pissvt illi cha, im okla ha iba holhtina tok: mihma ushi Esau, micha Chekob vt hohpit okla tok.

CHAPTA XXXVI.

YOHMI ka ilvppak osh Esau, yummvt Etom in chuka achvfa ya anoli holisso yoke.

2. Esau vt Kenan ushetik vhleha hō ohoyo hā ai ishi tok: Hittait hatak Elon ushetik Atah, micha Hifait hatak Sibeon ushetik Anah yā ushetik Aholibamah;

3. Micha Ishmael ushetik, Nebacholh in tek Bashemalh ak atok.

4. Mihma Atah vt Elifas a Esau im eshi tok; mihma Bashemalh vt Luel a im eshi tok.

5. Mikma Aholibamah vt Cheush, micha Chaalam, micha Kolah yā eshi tok: ilvppa puta kak osh Esau ushi vhleha hosh Kenan yakni yā im aiasha tok.

6. Atuk o Esau vt tekchi vhleha, micha ushi vhleha, micha ushetik vhleha, micha nana hosh in chuka achvfa aiasha tuk moma, micha i nanvlhpoa chipinta, micha i nanvlhpoa hochito, micha imilayak moma Kenan yakni ai ahayuchi tuk vt ishi cha, itibapishi Chekob itikba yā i filvmmmit yakni inla yā ia tok.

7. Imilayak laua kak osh itibai ashwa he keyu hokvt: micha i nanvlhpoa pulla kak o okla inla yosh yakni ai ahashwa tuk vt ai impa yvt taha hinla kak atok.

8. Yvmohmi hō Esau vt Sei nvnih hak o ahanta tok: Esau vt Etom oke.

9. Micha ilvppa puta kak osh Etomait vhleha hā iki Esau yā in chuka achvfa yosh Sei nvnih hā aiasha tok a holisso anoli hoke,

10. Hohchifo ilvppa puta kak osh Esau ushi vhleha hohchifo hoke: Esau tekchi Atah yā ushi Elifas: Esau tekchi Bashemalh a ushi Luel ak atok.

11. Mikma Elifas ushi vhleha hvt Teman, Oma, Sefo, Katam, micha Kenas ak atok.

12. Mihma Timna vt Esau ushi Elifas a im itaiena atok: atuk osh Elifas a Amalek im eshi tok: ilvppa puta kak osh Esau tekchi Atah yā ushi vhleha hatok.

13. Mikma ilvppa puta kak osh Luel a ushi vhleha hatok: Nahalh, micha Selah, Shammah, micha Missah: ilvppa puta kak osh Esau tekchi Bashemalh a ushi vhleha hatok.

14. Mikma ilvppa puta kak osh Sibeon ushetik Anah yā ushetik Esau tekchi Aholibamah yā ushi vhleha hatok: mi-

cha Esau ya Cheush, micha Chaalam, micha Kolah aiena ka im eshi tok.

15. Ilvppa puta kak osh Esau ushi hatak pehlichy vhleha hatok: Esau ushi vttahpi Elifas a ushi vhleha hvt hatak pehlichy Teman, hatak pehlichy Oma, hatak pehlichy Sefo, hatak pehlichy Kenas.

16. Hatak pehlichy Kolah, hatak pehlichy Katam, micha hatak pehlichy Amalek ak atok; ilvppa puta kak osh hatak pehlichy vhleha hosh Elifas a akohcha tok osh Etom yakni ya aiasha tok: ilvppa puta kak osh Atah ya ushi vhleha hatok.

17. Mikma ilvppa puta kak osh Esau ushi Leuel a ushi vhleha hatok: hatak pehlichy Nahalh, hatak pehlichy Selah, hatak pehlichy Shammah, hatak pehlichy Missah, ak atok: ilvppa puta kak osh hatak pehlichy vhleha hosh Leuel a akohcha tuk osh Etom yakni ya aiasha tok: ilvppa puta kak osh Esau tekchi Bashemalh a ushi vhleha hatok.

18. Mikma ilvppa puta kak osh Esau tekchi Aholibamah ya ushi vhleha hatok; hatak pehlichy Cheush, hatak pehlichy Chaalam, hatak pehlichy Kolah ak atok: ilvppa puta kak osh hatak pehlichy vhleha hosh Anah ushetik Esau tekchi Aholibamah ya akohcha tok.

19. Ilvppa puta kak osh Esau (yummvt Etom oka) ushi vhleha hatok: micha ilvppa puta kak osh i hatak pehlichy vhleha hatok.

20. Ilvppa puta kak osh Holait hatak Sei ya ushi vhleha hosh yakni ymma asha tok: Lotan, micha Shobal, micha Sibeon, micha Anah,

21. Michu Tishon, micha Ese, micha Tishan: ilvppa puta kak osh Holait okla hatak pehlichy vhleha hosh Sei im vlla vhleha hosh Etom yakni ya aiasha tok.

22. Mikma Lotan im vlla vhleha hvt Holi, micha Heman ak atok: mikma Lotan in tek vt Timna ak atok.

23. Mikma Shobal im vlla vhleha hvt ilvppa puta kak atok: Alfau, micha Manahalh, micha Ebal, Shefo, micha Onam ak atok.

24. Mikma ilvppa puta kak osh Sibeon im vlla vhleha

hatok: Akah, micha Anah itatuklo tok: Anah ilvppak osh iki Sibeon im issuba haksobish falaia impvchi hosh yakni haiaka anta mvt, kvli lvshpa ka ai ahayuchi tok.

25. Mikma Anah im vlla vhleha hvt ilvppa puta kak atok: Tishon, micha Anah ushetik Aholibamah ak atok.

26. Mikma ilvppa puta kak osh Tishon im vlla vhleha hatok; Hemtan, micha Eshban, micha Ilhlan, micha Chelan ak atok.

27. Ese im vlla vhleha hvt ilvppa puta kak atok: Bilhan, micha Saafan, micha Akan ak atok.

28. Tishan im vlla vhleha hvt ilvppa puta kak atok: Us, micha Alan ak atok.

29. Hatak pehlichy ilvppa puta kak osh Holait okla a kohcha tok; hatak pehlichy Lotan, hatak pehlichy Shobal, hatak pehlichy Sibeon, micha hatak pehlichy Anah.

30. Hatak pehlichy Tishon, hatak pehlichy Ese, hatak pehlichy Tishan: ilvppa puta kak osh hatak pehlichy vhleha hvt Holi ya a kohchvt, hatak i pehlichy vhleha ha iba holhtina yosh Sei yakni ya aiasha tok.

31. Miko ilvppa puta kak osh, Israel ushi vhleha ha i miko vt ik i miko kisha ma, Etom yakni ya a miko tok.

32. Mikma Beo ushi Bela vt Etom a a miko tok: micha in tmaha holihta hohchifo hvt Tinhabah atok.

33. Atuk osh Bela vt illi tok; mihma Boslah vta Selah ushi Chobab ak osh vlhtobvt miko tok.

34. Atuk osh Chobab vt illi tok: mihma Temani yakni aivta Husham ak osh vlhtobvt miko tok.

35. Atuk osh Husham vt illi tok; mihma Betat ushi Hatat (yummak osh Mitian okla ha Moab i yakni ya ai issot kanchi tok ak osh,) vlhtobvt miko tok: micha in tmaha holihta hohchifo hvt Afilh atok.

36. Atuk osh Hatat vt illi tok: mihma Maslekeh aivta Samlah ak osh vlhtobvt miko tok.

37. Atuk osh Samlah vt illi tok; mihma okhina bilika talaia Lehobolh aivta Sal ak osh vlhtobvt miko tok.

38. Atuk osh Sal vt illi tok: mihma Akbo ushi Baal-hanan ak osh vlhtobvt miko tok.

39. Atuk osh Akbo ushi Baal-hanan vt illi tok; mihma Hatat ak osh vlhtobvt miko tok: micha in tmaha holihta hohchifo hv̄t Pau atok; micha tekchi hohchifo kv̄t Meheta-bel osh Matlet ushetik a Mesahab ushetik atok.

40. Mikma hohchifo ilvppa puta kak osh hatak pehlichi vhleha Esau a kohcha tok vt in chuka achvfa vlhpisvt, i yakni ya vlhpisvt hohchifo hatok; hatak pehlichi Timnah, hatak pehlichi Alfah, hatak pehlichi Chehlelo,

41. Hatak pehlichi Aholibamah, hatak pehlichi Elah, hatak pehlichi Pinon,

42. Hatak pehlichi Kenas, hatak pehlichi Teman, hatak pehlichi Mibsa,

43. Hatak pehlichi Maktiel, hatak pehlichi Ilam, ilvppa puta kak osh i yakni aiyukali aiasha kv̄t vlhpisa hosh hatak pehlichi vhleha hosh Etom a aiasha tok: yummvt Esau Eto-mait vhleha ha i iki atok.

CHAPTA XXXVII.

MIKMA iki vt okla inla yosh yakni aiahanta tok; Kenan yakni ak o Chekob vt ai ahanta tok.

2. Ilvppak osh Chekob in chuka achvfa ya anoli holisso yoke: Chosef vt afvmmi auah untuklo hosh itibapishi vhleha ha takla nanvlhpoa chipinta impvchi hosh ahanta tok, micha vlla yvt i tekchi vhleha Bilhah ushi vhleha micha Silpah ushi vhleha hak o takla ahanta tok; atuk osh Chosef vt nana ik achukmo yvmohmi tuk a i ya ont im anoli tok.

3. Sipoknit taiyaha hosh ushi im v̄tta tok, atuk osh Islael vt Chosef a holitobli kv̄t im vlla vhleha moma ka i shahlichi tok: micha nafohka pisa il aiyukali yo im ikbi tok.

4. Atuk o i vt itibapishi vhleha moma ka i shahlichit holitobli na itibapishi vhleha hv̄t pisa mv̄t, okla i nukkilli cha, i kanvt im anumpula he keyu tok.

5. Atuk o Chosef vt naholhpokna ho holhpokna cha, itibapishi vhleha ha im anoli tok: mihma i shahlichit i nukkilli tok.

6. Micha, Naholhpokna ilvppa sa holhpokna tuk a ho hakló, hvchim asilhha lishke.

7. Yakeh, osapa anukaka ya onush takchi hosh il asha tuk o, yakeh, a sita hvt wakaya cha apissvt hikia tuk oke; mihma yakeh, hvchi sita hvt a sita ha hiohlit apakfoyupa cha, im akachunoli tuk oke, im achi tok.

8. Mihma itibapishi vhleha hvt, Ish pi mika chi ho mvhli cho? micha ish pi shahla chi ho mvhli cho? im achi tok: micha holhpokna, micha im anumpa aiena atuk pulla kak o i shahlichit i nukkilli tok.

9. Atuk osh himakma naholhpokna ho holhpokna cha, itibapishi ha im anolit, Yakeh, himak a naholhpokna ho sa holhpoknvshke: mihma yakeh, hvshi, micha hvshi ninak aya, micha fochik auahachvfa hash osh vm akachunoli tuk oke, achi tok.

10. Mihmvt iki, micha itibapishi vhleha ha im anoli tok: mihma iki vt im alvmmmit, Ilvppak osh holhpokna nanta mak o chi holhpokna tuk oh cho? Uno, micha chishki, micha chitibapishi vhleha il aiena kvv ant akachunolit aka pit e chin hlipkvcha chi ho mvhli cho? im achi tok.

11. Mihma itibapishi vhleha hvt i potvno tok: amba iki vto anumpa ha ithaiyanvt aya tok.

12. Atuk o itibapishi vhleha hvt iki i nanvlhpoa chipinta ya impvcha chi hosh Shekem a ilhkoli tok.

13. Mihma Israel vt Chosef a, Chitibapishi vhleha hvt Shekem a nanvlhpoa chipinta ya ai impvchi keyu cho? Inta, pit i chi chvffichi lashke, im achi tok. Mihma, yak hikia lishke, im achi tok.

14. Mihma, Iá, chim asilhha lishke, chitibapishi vhleha hvt achukma hosh ashakma, micha nanvlhpoa chipinta vt achukma hosh ashakmá, nanakmá, ont pisa cha, anonti anumpa isht is sum vlashke, im achi tok. Yohmi mvt Heblon okfa ha a chvffichi na, Shekem a ona tok.

15. Atuk o hatak osh ahayuchi ma, Yakeh, yakni haiaka ya fullokahanchi tok: mihma hatak ash osh i ponaklot, Nanta ish hoyo cho? achi tok.

16. Mihma Itibapishi li vhleha ha hoyo li hoke: kanima

yo i nanvlhpoa ya ai impvchikma vm anoli, chim asilhha lishke, achi tok.

17. Mihma hatak ash osh, Ilvppa asha tuk vt ilhkoli tuk oke: Tohlan ak o kiloh ia, achi ho haklo li tuk oka, achi tok. Mihma Chosef vt iakaiyvt ia tuk osh itibapishi vhleha ha Tohlan a ont ai ahayuchi tok.

18. Atuk o hopaki ho minti na, bilika ik lo kisha ho pisa mvt, haksichi hosh vba chi kvv itim apesa tok.

19. Micha ilap bika, itim anumpulit, Yakeh, ilvppvt holhpokna shahli ash osh mintishke.

20. Yvmohmi hoka inta, himak a iloh vbashke, micha hichukbi kanima pit eho kanchashke: micha, Nampoa okpulo hosh vbit vvvv tahli tuk oke, iloh achashke; mikma holhpokna tuk vt kaniohmi na eho pisashke itim achi tok.

21. Mihma Luben vt haklo cha, ibbak a a kohchit hlakofichi tok; micha kiloh abo kashke, achi tok.

22. Micha Luben vt, Issish a hvch ik hlatablo kashke, amba yakni haiaka hichukbi hikia ilvppak o pit hvsh kanchi cha, hvch ibbak hvch ik onochi kashke, im achi tok, ibbak a a kohchit hlakofichi cha, anonti iki ya falaminchit pit ima chi hosh yvmohmi tok.

23. Atuk o yakohmi tok, Chosef vt itibapishi vhleha ha im ona ma, Chosef a i nafohka, i nafohka pisa ilaiyukali fohka kash i shufi tok.

24. Micha okla ishi cha, hichukbi yo pit fohki tok: mihma hichukbi ya nana iksho, oka vt iksho tok.

25. Micha okla binilit pvska vpa tok; atuk osh akachakalit hopokoyo ma, yakeh, Ishmaelait hatak kanohmi kvv Kileat minti hosh i kamel vt nabalama, micha balsam, micha hlitili mvh shali ho, Echip isht ona chi hosh aya tok.

26. Mihma Chutah vt itibapishi vhleha ha, Pitibapishi ha e bi cha, im issish a e luhmi kak osh nanta ho ishit pim ai achukma hinla cho?

27. Inta, Ishmaelait vhleha hak o iloh i kanchi cha, pibbak vt ik onvtoyulo kashke; pitibapishi, micha pi nipi yoka, im achi tok: mihma itibapishi vhleha hvv vlvpesa, ahni tok.

28. Yohmi ma Mitianait nan-itatoba vhleha hv̄t ant aya tok; mihma Chosef a halvllit vba takalichit, hichukbi ya a kohchi cha, Chosef a tvli hv̄ta tushahli pokoli tuklo hō Ish-maelait hatak vhleha hash i kanchi tok: mihma Chosef a Echip a isht ona tok.

29. Atuk o Luben vt falamvt hichukbi ya ona tok: mihma yakeh, Chosef vt hichukbi ya iksho tok: mihma i nafohka ya hlilvffi tok.

30. Mihmvt itibapishi vhleha ha falamvt im ona cha, Ulla yash osh ikshoshke: yohmi ka vno vto katima yak o ia la chi cho? achi tok.

31. Atuk o Chosef i nafohka yash ishi cha, issi kosomushi ya vbi mvt, nafohka yash issish a okvchi tok.

32. Mihmvt nafohka pisa ilaiyukali yash okla pila na iki ya isht im ona tok; micha, Ilvppa il ahayuchi tuk oke: yohmi hoka chiso i nafohka yokmá, keyukmá nanakmá himak a ish ithvnashke, achi tok.

33. Mihma ithana cha, Svso i nafohka yoke; nampoia okpulo vt vpv̄t tahli tuk oke: Chosef vt niput taha pullvshke, achi tok.

34. Mihmvt Chekob vt i nafohka ya hlilvffi cha, na hishi tv̄nna isht uskofvchi mvt, nitak laua hō ushi ya ishit yahaya tok.

35. Mihma ushi vhleha moma, micha ushetik vhleha moma aiena kv̄t wakayvt hopohluli bv̄nna tok: yohmi kia hopohla ik bv̄nno tok; micha, Yahayvt ahollohpi ya sv̄s o hash im ona la chi hokvt, achi tok. Yvmohmit iki vt ishit yahaya tok.

36. Mihma Mitianait vhleha hash osh Echip a isht ona cha, Falaoh in tishu, micha nan atoni i kv̄pitvni Potifa ya i kanchi tok.

CHAPTA XXXVIII.

ATUK o nitak yv̄mma yakohmi tok, Chutah vt itibapishi vhleha ha i filv̄mmit Atullamait hatak osh hohchifo kv̄t Hilah ya i fullotvt ont iba chukowa tok.

2. Micha Chutah vt yumma Kenanait hatak, yumma hohchifo kv̄t Shuah ushetik ȳ pisa tok; mihmvt ishi cha, iba chukowa tok.

3. Mihma chakali cha, vlla nakni yȳ eshi tok; mihma hohchifo hȳ El achi tok.

4. Atuk ȳ anonti chakali cha, vlla nakni yȳ eshi tok; micha hohchifo hȳ Onan achi tok.

5. Atuk osh himakma anonti chakali cha, vlla nakni yȳ eshi tok; micha hohchifo hȳ Shelah achi tok: mihmvt eshi ma, Chutah vt Chesib ak ȳ anta tok.

6. Atuk osh Chutah vt ushi vttahpi El a tekchi ya chȳ hȳ ohoyo yumma hohchifo kv̄t Tama yȳ isht ima tok.

7. Atuk ȳ El Chutah im vttahpi hv̄t Chihowah itikba ya haksi hatuk ȳ Chihowah vt vbi tok.

8. Atuk ȳ Chutah vt Onan a, Chitibapishi tekchi ya iba chukowvt ish itauwaya cha, chitibapishi hȳ aiunchololi a ish i hilechashke, im achi tok.

9. Mihma Onan vt ishtatiaka yvt immi ha he keyu kv̄t ithana tok: atuk osh yakohmi tok, itibapishi tekchi ya iba chukowa mvt, itibapishi ishtatiaka ik emo ka chȳ kv̄t yakni a on hlatv̄bli tok.

10. Nana yvmihchi tuk vt Chihowah ya ik im v̄lhpesacho tok: yohmi hatuk ȳ yummak kia vbi tok.

11. Yohmi ma Chutah vt ipok Tama ya, Ohoyo i hatak illi yosh chȳki in chuka ish ahanta tuk ȳ, sv̄so Shelah vt hofantit tahak mak ashke, im achi tok: (yummak kia itibapishi v̄hleha hakinli chohmit illi yoba ná achi hatuk okv̄t:) mihma Tama yvt iki in chuka ont ahanta tok.

12. Atuk ȳ nitak hopakit taha ma, Shuah ushetik Chutah tekchi vt illi tok; atuk osh Chutah vt hopohla cha, in chukf̄v̄lhpoa hishi v̄mo puta kv̄t Timnalh a asha tuk ȳ i kana Atullamait hatak Hilah yvt apiha hȳ im ona tok..

13. Atuk ȳ Tama ya im anolit, Yakeh; chimv̄fo vt in chukf̄v̄lhpoa hishi v̄mot Timnalh a ivshke, achi tok.

14. Mihma ohoyo i hatak illi i nafohka ya shufi mvt, nashuka isht ompoholmo ya isht il ompohomo cha, il apakf̄ohli mvt, ahikia yummvt Timnalh hina kv̄li tuklo ai ia yȳ

binili tok: Shelah vt hofantit taha hokak o ishit tekchi ya chi ho ik i bohlo ka, pisa hokvt.

15. Chutah vt pisa mvt, ohoyo haui yoke, ahni tok: nashuka ya ompohomo hatuk oka,

16. Atuk o hina bilika binili ka i fullotvt, Inta, ak chiba chukowa, chim asilhha lishke, achi tok: ipok atuk a ik ithano hatuk okvt: mihma, Is suba chukowa chi kv̄t nanta ho is suma hinla cho? achi tok.

17. Issi kosoma ushi yo nanvlhpoa chipinta ya ai ishit et chi pila lashke, achi tok: mihma, Isht is sum aiahlich̄i ya is suma tuk osh et is sa pila hinla cho? achi tok.

18. Mihma, Isht-aiāhlich̄i nanta ho chima la hinla cho? achi ma, Chibbak ushi fohka nanisht in chunli, micha napvna chi shakba vlbeha, micha chin tvbi chibbak fok̄a aienaka, achi tok: mihma ima cha, iba chukowa tok; atuk o vlla in chakali tok.

19. Micha wakaya cha, ia mvt, nashuka isht ompoholmo ya shufit kanima bohli cha, ohoyo i hatak illi i nafohka ya ishit fohka tok.

20. Atuk o Chutah vt i kana Atullamait hatak a issi kosoma ushi yash ibbak fohki cha, i nan-isht aiāhlich̄i yash ohoyo hash ibbak fohka tuk a im ai isha chi hosh pit i pila tok, yohmi tuk kia ik ahayucho tok.

21. Mihmvt okla yv̄mma asha kash i ponaklot, Ohoyo haui vt haiakvt hina lapalika kv̄li tuklo ai ia ya asha tuk mv̄to? achi tok. Mihma, Ilvppa haui vt iksho ke uk oke, okla achi tok.

22. Mihma falamvt Chutah ya im ona cha, Ahayuchi la he keyushke; micha yv̄mma hatak v̄hleha hv̄t, Ilvppa haui vt iksho ke tuk, achi akinli tuk oke, achi tok.

23. Mihma Chutah vt, ohoyo hash osh ik ish̄i, ishit pi hofahya yoba ná; Yakeh, issi kosoma ilvppa pit i pila li tuk o, chik ahayuchoshke, achi tok.

24. Atuk o yakohmi tok, i himmak hv̄shi tuchina foka ma, Chutah ya im anolit, Chipok Tama vt haui tobv̄shke; micha yakeh, hauit chakalishke, achi tok. Mihma Chutah vt, Kocha isht hv̄sh ona na luashke, achi tok.

25. Atuk o kocha isht ona ma, imvfo ya pit i pilvt, Ilvpvt immi, hatak yvmmak o vlla i shali lishke: micha ibbak ushi fohka nan isht in chunli, micha napvna shakba vlbeha, micha tvi vt kva immi hokma ithvná, chim asilhha lishke, achi tok.

26. Mihma Chutah vt ithana mvt, Aivlhpiesa kv vno ya a shahlishe; svso Shelah ya ak i bohlo tuk okvt, achi tok: micha himmakma anonti ik ithano tok.

27. Atuk o yakohmi tok, vlla esha chi hosh nukhvmmi itanitak ma, yakeh, haiyup osh im oshvtto ya alhto tok.

28. Atuk osh vlla esha chi hosh nukhvmmi ma, yakeh, achvfa kv ibbak kocha pit weli tok: mihma vlleshi ka apelvchi ohoyo hv ponola tishepa ishi cha, ibbak a ishit ita takchi cha, Ilvppak osh tikba kohcha hoke, achi tok.

29. Atuk o ibbak a falvmminchit ishi ma, yakeh, itibapishi hv kohcha tok; mihma, Nanta Katiohmi ho tivblit ish kohcha cho? tivbli ilvppvt chishno akinli hosh chi onv-tonlashke, achi tok: yvmohmi hatuk o hohchifo ha Fales, achi tok.

30. Atuk o yohmi ha yak o itibapishi ibbak ponola tishepa ishit talakchi yash osh kohcha tok; mihma hohchifo ka Salah achi tok.

CHAPTA XXXIX.

ATUK o Chosef a Echip a okla isht ona tok: micha Echip hatak, Falaoh in tishu, nan atoni i kvpitvni, Potifa ak osh yvmmaisht ona tuk; Ishmaelait hatak vhleha hash in chumpvt im ishi tok.

2. Atuk o Chihowah yvt Chosef a ibafoyuka na hatak nana amosholit, im aiahli achukma atok: mihma i shahli Echip hatak in chuka ya ahanta tok.

3. Mihma Chihowah yvt ibafoyuka, micha nana moma ka ibbak isht ieshikma, Chihowah yvt im aiahlichi ka i shahli hv pisa tok.

4. Mihma Chosef vt itikba ya holhponayo hanta ya ai ahayuchi cha, in toksvli tok; mihma in chuka achvfa ya

apesvchi ikbi mvt, nana im asha tuk vt moma ibbak fohki tok.

5. Atuk o yakohmi tok, in chuka achvfa, micha nana moma im asha tuk vt apesvchi ikbi tok nitak itin takla ma, Chihowah yvt Chosef ak atuk pulla mak o, Echip hatak ash in chuka achvfa ya yukpali tok: micha Chihowah nan ishit yukpali vt nana moma chuka aiasha, micha osapa aiasha ka onvtoyula tok.

6. Mihma nana im asha tuk moma kv̄t Chosef ibbak a fohki tok: nana im asha tuk vt achvfa kia ithana keyu, amba pvska vpa ak illa beka tok: mihma Chosef vt hatak aiokli nipi pisa achukma atok.

7. Atuk o ilvppa puta kash i himmakma yakohmi tok, i shahli ha tekchi vt Chosef a nishkin a onochi tok; micha, Svba tvshkí, achi tok.

8. Yohmi kia vlhpesa ik ahno tok; micha i shahli tekchi ya, Yakeh a shahli hv̄t svbbak foyuka tuk osh chuka nana aiasha ka ithana keyu, micha nana im aiasha tuk vt moma svbbak fohki tuk oke.

9. Chuka ilvppa achvfa kia vno ya a shahli kv̄t ikshoshke: micha nana kia a halanli tuk keyu, amba chishno ak illa tuk, tekchi chia hoka, yohmi ka nanta katiohmi ho nana ik achukmo chinto ilvppa yvmihchit Chitokakaya i yoshuba la hinla cho? im achi tok.

10. Atuk o yakohmi tok, onna hosh onnak ma Chosef a im anumpuli kia, ik i haponaklot iba tvshka he keyu, micha iba takla ahanta he keyu tok.

11. Atuk o nitak ymma foka ma Chosef vt im atoksuli isht v̄tta chi hosh chuka ya chukowa tok; mihma chuka ymma hatak asha chatuk achvfa kia anukaka iksho tok.

12. Mihma ymmak o i nafohka ya hoklit ai ishi cha, Svba tvshkí, achi tok: mihma i nafohka vt ibbak foka na kanchi cha, malelit kohcha tok.

13. Atuk o yakohmi tok, i nafohka yvt ibbak foka na kanchi cha, malelit kohcha na pisa mvt,

14. In chuka hatak v̄hleha ha hoyo cha, im anumpulit, Heblu hatak vt ishit pi yopula chi ho ishit pim vla tuk a ho

pesá; svba tvshka chi hosh svba chukowa ma, chitoli hosh paya li tuk oke.

15. Atuk osh yakohmi tuk oke, chitoli hosh paya li ka haklo mvt, i nafohka yvt an tonla na, kanchi cha malelit kohcha tuk oke achi tok.

16. Mihma i nafohka yash achukmalit bohli na, itonla tuk o i shahli hvt in chuka ya vla tok oke.

17. Mihmvt anumpa ilvppa chohmi kak o im anumpulit, Heblu tishu isht ish pim vla tuk vt ishit si yopoma chi hosh svba chukowa tuk oke.

18. Atuk osh yakohmi tuk oke, chitoli hosh paya li ma, i nafohka yvt an tonla na, kanchi cha malelit kohcha tuk oke, achi tok.

19. Atuk o yakohmi tok, i shahli hash osh tekchi im anumpa ha im anumpulit, Chin tishu hvt si yakohmichi tuk oke, achi na haklo mvt, im ai i nukkilli vt libbi tok.

20. Mihma Chosef a i shahli yash osh ishi cha, aboha kullo, miko i yuka hvt talakhit aiasha ya fohki tok: mihma aboha kullo yummak o foyuka tok.

21. Yohmi kia Chihowah yvt Chosef a iba foyukt i nukhaklo cha, aboha kullo apistikeli yvt i kana hi ya nukfohoki tok.

22. Mihma aboha kullo apistikeli vt yuka aboha kullo aiasha moma ka Chosef ibbak a fohki tok: mihma nana hosh yumma a yvmohmikma, yummak osh yvmihchi atok.

23. Nana hosh yumma ibbak foyukak ma, aboha kullo apistikeli vt ik apesacho tok: Chihowah yvt ibafoyuka hatuk oka, micha nana yvmihchikma, Chihowah yvt im aiahlich chi beka tok.

CHAPTA XL.

ATUK o ilvppa puta kvv yvmohmi ha ya yakohmi tok, Echip i miko aiishko sholi, micha pvska ikbi itatuklo kvv i shahli Echip i miko ya nan im ashvchi tok.

2. Atuk o Falaoh vt in tishu tuklo, aiishko sholi i shahli, micha pvska ikbi i shahli ya i nukhobela tok.

3. Micha aboha kvllo yā, nan atoni i kvpitvni in chuka, aboha kvllo Chosef vt a talakchi tuk a apitta tok.

4. Mihma nan atoni i kvpitvni vt Chosef ibbak fohki na, apesvchit nana hoyot ima tok : mihma nitak hopaki hō aboha kvllo yā ai alhto tok.

5. Atuk o itatuklot naholhpokna hō holhpokna mvt, hatak achvfa ila bika ninak achvfa holhpokna tok ; Echip i miko aiishko i sholi, micha pvska im ikbi talakchit aboha kvllo alhto tuk vt naholhpokna toshowa inla bika hō holhpokna tok.

6. Atuk o Chosef vt onnahinli ma ont iba chukowa cha, pisa ma, Yakeh, ilapissa tok.

7. Mihma Falaoh in tishu tuklo kvv i shahli in chuka aboha kvllo yā apehvt asha tuk a i ponaklot, Nanta katiohmi hō himak nitak a hvsh ilapissa cho? achi tok.

8. Naholhpokna hō pi holhpokna tuk o, tosholi vt ikshoshke, im achit okla tok. Mihma Chosef vt, Tosholi kvv Chitokaka ak osh immi keyu cho? Ūm anoli, hvchim asilhha lishke, im achi tok.

9. Mihma miko aiishko sholi i shahli vt holhpokna tuk vt Chosef a im anoli mvt, Sa holhpokna ma pakvpi vt sa tikba yā hikia tuk oke.

10. Mihma pakvpi yā naksish tuchina hosh hielu tuk oke : micha bokubli ahoba mvt, pakanlit kohcha tuk oke : mihmvt lukussa yash osh paki nuna yo toba tuk oke.

11. Mihma Falaoh im isht-ishko vt subbak foka tuk osh paki yash ishi li mvt, bushlit Falaoh im isht-ishko yā vni li mvt, isht-ishko yash Falaoh ibbak a fohki li tuk oke, im achi tok.

12. Mihma Chosef vt, Tshowa kvv ilvppak oke : Naksish tuchina kvv nitak tuchina hoke :

13. Nitak tuchina takla ma Falaoh vt chi noshkobo ha akachakalichi cha, ish ahikia yā falvmminchit chi hilecha chi hoke : mikma Falaoh im isht-ishko yā aiishko sholi chia moma mvt, ish yvmihchi beka tok vt chohmit Falaoh ibbak a ish fohka chi hoke.

14. Yohmi kia chim achukmakmvt, is svthanvt is sa ka-

nashke, chim asilhha lishke; mīcha Falaoh ya is si anoli cha, aboha kvllo ilvppa is sa kohchichashke;

15. Heblu yakni ya a hukopvt svsht vla tok o mvhli hoka: mīcha ilvppak kia nana ho yvmihchi li tuk o aboha kvllo ilvppa sa fohka he vlhpesa kv̄t iksho akinli hoke, im achi tok.

16. Mihma pvska ikbi i shahli hv̄t toshowa kv̄t achukma na pisa mvt, Chosef a, Ŭno ak kia sa holhpokna tuk oke; mihma yakeh, sa noshkobo ha tvpak yauwahvt tv̄nna tuchina hosh on taloha tuk oke.

17. Mihma tvpak paknaka fehna talaia ka napalvska ilai-yukali hosh Falaoh im alhto tuk oke: mihma hushi puta kv̄t tvpak vt sa noshkobo on talaia ka ai vpa tuk oke, im achi tok.

18. Mihma Chosef vt afalaminchit, Tshowa kv̄t ilvppak oke: Tvpak tuchina kv̄t nitak tuchina hoke:

19. Nitak tuchina taklakma, Falaoh vt chi noshkobo ha akachakalichit chim ai ishi cha, iti yo on chi takalicha chi hoke: mikma hushi puta kv̄t chi nipi ya chim ai ishit vpa chi hoke, achi tok.

20. Atuk o nitak ont atuchina, yvm̄vt Falaoh vt aiv̄tta tok nitak atuk o yakohmi tok, in tishu vhleha moma ka impvchi im ikbi tok: mihm̄vt aiishko sholi i shahli, mīcha pvska ikbi i shahli ya noshkobo ha akachakalichit in tishu vhleha takla hiohlich̄i tok.

21. Mīcha aiishko sholi i shahli yash falv̄mminchit aiishko sholi ya anonti hilechi tok: mihma isht-ishko ya Falaoh ibbak a fohki beka tok.

22. Amba Chosef vt in tosholi tuk mak o, pvska ikbi i shahli ya iti yo on takalichi tok oke.

23. Yohmi tuk kia aiishko sholi i shahli hv̄t Chosef a ik ithano hosh, amba im ahaksi tok.

CHAPTA XLI.

ATUK o yakohmi tok, afv̄m̄mi tuklo vlhpiesa kv̄t ont ta-ha ma, Falaoh vt holhpokna tok: mihm̄vt yakeh, okhina ontalaka hikia tok.

2. Mihma yakeh, wak tek pisa achukma, micha nipi nia achukma untuklo hosh okhina et kohcha tok; micha okhina ontalaka ya ai impa tok.

3. Atuk o yakeh, wak tek inla pisa ik achukmo, micha nipi chunna untuklo hosh et iakaiyvt okhina ya et kohcha tok: micha wak tek inla yash bilika okhina ontalaka ya hiel tok.

4. Mihmvt wak tek pisa ik achukmo; micha nipi chunna yash osh wak tek pisa achukma, micha nipi nia achukma yash vput tahli tok. Yohmi ma Falaoh vt okcha tok.

5. Atuk osh nusi mvt, atukla ma holhpokna tok: mihma yakeh, onush vpi achufa ka noshkobo untuklo hochito, micha achukma hosh kohcha tok.

6. Mihma yakeh, noshkobo chipinta, hvshi akochaka mahli ishit bvshshi untuklo hosh et iakaiyvt kohcha tok.

7. Mihmvt noshkobo chipinta untuklo kash osh noshkobo hochito alota achukma untuklo kash nanvblit tahli tok. Mihma Falaoh vt okcha tok; mihma yakeh, holhpokna hatuk atok.

8. Atuk osh onnahinli ma yakohmi tok, chukvsh vt ik im vlpeso fehna tok; mihmvt natosholi vhleha moma micha hatak hopoyuksa vhleha moma Echip aiasha ka pit hoyo tok: micha Falaoh vt holhpokna tuk vt im anoli tok; yohmi kia achufa kia Falaoh ya in toshola hinla kvv iksho tok.

9. Yohmi ma aiishko sholi i shahli hvv Falaoh ha im anumpulit, Nana ashvchi li tuk vt himak nitak fehna ithaiyana lishke:

10. Falaoh hvv in tishu ha i nukhobela cha, ai atoni, nan atoni i kvpitvni in chuka hikia ka, vno, micha pvska ikbi i shahli ya il itatuklo ka pi fohki tok.

11. Atuk o ninak achufa ho vno, micha yvmma il itatuklot naholhpokna yo pi holhpokna tok: na holhpokna toshowa kvv ila bika ho pi holhpokna tok.

12. Mihma Heblu hatak himita vt nanatoni i kvpitvni in tishu hosh pibafohka tok; atuk o il im anoli ma, pi holhpokna tuk a pin tosholi tok: ila pi holhpokna bika tuk mak o tosholi tok.

13. Atuk o yakohmi tok, pin tosholi tuk mak o yvmohmi tok: vno ano ahikia li ya falvmminchit sa hilechi mvt, yvmvno vba takalechi tok, achi tok.

14. Yohmi ma Falaoh hvt Chosef a pit hoyo tok; mihma tushpvt aboha kullo ya okla kohchit isht-vla tok: mihma ile shafi mvt, nafohka inla ishit fohka cha, Falaoh ha ont iba chukowa tok.

15. Mihma Falaoh hvt Chosef a, Naholhpokna sa holhpokna tuk o kva hosh an toshola hinla kvv ikshoshke: atuk o chishno ak osh naholhpokna ha ithanvt ish toshola hinla achi ho chi haklo li tuk oke, im achi tok.

16. Mihma Chosef vt Falaoh ha im afalaminchit, Vno ak keyu hoke, Chitokaka ak osh Falaoh ha anumpa falama achukma ho ima chi hoke, achi tok.

17. Mihma Falaoh hvt Chosef a, Sa holhpokna mvt, yakeh, okhina ontalaka hikia li tuk oke.

18. Mihma yakeh, wak tek untuklo nipi nia achukma, micha pisa achukma hosh okhina et kohcha tuk: micha okhina ontalaka ai impa tuk oke.

19. Mihma yakeh, wak tek inla untuklo hliposhi, pisa ik achukmo, nipi chunna hosh okpulo kvv yvma chohmi ka Echip yakni moma ka pisa li chatuk keyu ho et iakaiyvt kohcha tuk oke.

20. Mihmvt wak tek chunna, pisa ik achukmo yash osh wak tek nia achukma untuklo vmmona kash vvtv tahli tuk oke.

21. Atuk osh vvtv tahli mvt vvtv tahli tuk a akostinincha he keyu tuk; amba pisa ik achukmo kvv vmmona tuk vt imoma tuk oke. Yohmi ho sai okcha tuk oke.

22. Atuk osh sa holhpokna cha, pisa li ma, yakeh, vpi achvfa ka noshkobo untuklo hosh alota, micha achukma hosh kohcha tuk oke.

23. Mihma yakeh, noshkobo untuklo hosh shila, chipinta, micha hvshi akochaka mahli ishit bvshshi yosh iakaiyvt kohcha tuk oke.

24. Mihma noshkobo chipinta yash osh noshkobo achukma untuklo kash nanvblit tahli tuk oke: atuk o natosholi

vhleha ha im anoli li tuk ak o, achvfa kia vm anola he ke-yushke, im achi tok.

25. Mihma Chosef vt Falaoh ha, Falaoh holhpokna tuk vt achvfa hoke: Chitokaka yvt nana kaniohma chi kvf Falaoh ha im otrnichi hoke.

26. Wak tek achukma untuklo kash osh afvmmi untuklo hoke: micha onush noshkobo achukma untuklo kash osh afvmmi untuklo hoke: naholhpokna hvt achvfa hoke.

27. Mikma wak tek untuklo chunna, micha pisa ik achukmo hosh et iakaiyvt kohcha tuk ash osh afvmmi untuklo hoke; mikma onush noshkoho chipinta, micha hvshi akochaka mahli ishit bvshshi untuklo kash osh afvmmi untuklo hohchvfo ha chi hoke.

28. Nana Ilvppak o Falaoh ha im anumpuli li tuk oke; Chitokaka yvt nana kaniohma chi kvf Falaoh ha im otrnichi hoke.

29. Yakeh, Echip yakni moma ka nana waya chinto fehna afvmmi untuklo hosh minti hoke.

30. Atukma afvmmi untuklo hohchvfo hosh et iakaiya chi hoke: mikma nawaya laua achukma tuk moma ka Echip yakni ya ai im ahaksa chi hoke: mikma hohchvfo kvf yakni ya tahla chi hoke.

31. Hohchvfo yvmmvt et iakaiya kak o nawaya laua achukma tuk a yakni yvmma ai ithana chi keyu hoke: palvmmi fehna chi hoka.

32. Micha hitukla ha Falaoh ha naholhpokna in tuklochi tuk vt Chitokaka yvt nana ka kvloochit apesa cha chekosikma Chitokaka yvt aiahlichia chi kak atuk oke.

33. Yvmohmi hoka himak a Falaoh hvt hatak vt nana ka ahah, ahni cha hopoyuksa yo hoyot ik ahayuchi cha, Echip yakni ya pehlichia ya chi ho hilechashke.

34. Falaoh hvt ilvppak o ik yvmihchi, micha yakni ya apesvchi vhleha atokolit hilechi cha, Echip yakni ya afvmmi untuklo nawaya laua achukmakma ishit tahlapi ka okla ishashke.

35. Mikma afvmmi achukma yvmmvt vlakma, ilhpak moma ka itvnahlashke, mikmvt Falaoh ha ibbak fohkit bohli cha, tvmaha holihta puta ka ilhpak ashachit ieshashke.

36. Mikma ilhpak yvmmvt afvmmi untuklo hohchvfo vt Echip yakni ya asha chi takla ka yakni ya im ilhpak osh aiashashke; yvmohmi ho yakni vt hohchvfo kak o ik mosholo kashke, im achi tok.

37. Mihma nana ka Falaoh micha in tishu vhleha moma aiena kv̄t achukma, ahni tok.

38. Mihmvt Falaoh hv̄t in tishu vhleha ha, Chitokaka imi shilombish vt ibafoyuka hatak ilvppa chohmi ka il ahayucha hinla cho? im achi tok.

39. Micha Falaoh vt Chosef a, Chitokaka yvt ilvppa moma ka chim otv̄nichi tuk oka, achvfa kia nana ka ahah, ahni, micha hopoyuksa kv̄t chishno chohmi kv̄t ikshoshke:

40. An chuka achvfa ya ish pehliecha chi hoke: micha chim anumpa pulla ho vm okla moma kv̄t iakaiya chi hoke: miko im aiombinili holitompa ak illa ho chi shahli la chi hoke, im achi tok.

41. Micha Falaoh hv̄t Chosef a, Yakeh, Echip yakni moma ka pehlichy ya chi ho chi atokoli lishke, im achi tok.

42. Micha Falaoh hv̄t ibbak ushi fohka ya shufi cha, Chosef ibbak a fohki mvt, linen tapvski nafohkv̄chi mvt, tv̄li lakna itatakv̄li ikunla afohommi tok.

43. Micha itichanv̄lli atukla i hikia tuk vt ombinilichy tok: mihma tikba okla payvt ayvt, Hvsh hv̄chukbihlepashke, ahanchy tok: micha Echip yakni moma ka pehlichy ikbi tok.

44. Micha Falaoh hv̄t Chosef a, Falaoh sia hoke, chishno ak o keyu ka Echip yakni moma ka hatak nana kia ibbak okmá, iyi yokmá, nana ka vba wiela he keyushke, im achi tok.

45. Micha Falaoh hv̄t Chosef hohchifo ha Safnalh-paaneah achi tok; micha naholitompa isht v̄tta On v̄tta Poti-felah ya ushetik Asenalh, tekchy ya chi ho ima tok: mihma Chosef vt Echip yakni moma ka hlopullit aya tok.

46. Micha Chosef vt Echip i miko ya itikba hikia mvt, afvmmi pokoli tuchina tok: mihmvt Chosef vt Falaoh itikba hikia tuk vt kohcha mvt, Echip yakni moma ka hlopullit aya tok.

47. Atuk o afummi untuklo nana waya achukma yvt vla na, yakni vt ibbak alota ho waya tok.

48. Mihma afummi untuklo ilhpak moma Echip yakni aiasha tuk a itvnahli cha, tmaha holihta puta ilhpak a ai ashachi tok: tmaha holihta puta apakfoyupa ka ilhpak osapa aiasha tuk a mih makinli ho ai ashachi tok.

49. Micha Chosef vt onush itvnahli ka laua fehna kvt okhvt sha shujuk aiasha kak o choyumichit hotihna kvt issa tok: a holhtina iksho hatuk oka.

50. Afummi hohchvfo vt ik lo kisha ho Chosef vt ushi tuklot asha tok: yvma On naholitompa isht vttta ushetik Asenalh vt im eshi tuk atok.

51. Mihma Chosef vt vttahpi hohchifo ha Manasseh achi tok; nan-isht-svlbvsha moma, micha aki in chuka achvfa moma ka Chitokaka yvt vmi haksichi hoka, achi tok.

52. Micha atukla hohchifo ha Effaim achi tok: yakni a svlbvsha ya Chitokaka yvt sa wayvchi hoka, achi tok.

53. Atuk o Echip yakni ya afummi untuklo nawaya laua yvt ont taha tok.

54. Mihma Chosef vt achi tok mak o afummi untuklo hohchvfo vlt ishtia tok: micha hohchvfo kvt yakni moma tok: yohmi kia Echip yakni moma ka pvska vt asha tok.

55. Atuk o Echip yakni moma ka hohchvfo mvt, okla hvt Falaoh ha pvska im asilhha ma, Falaoh hvt Echip okla moma ka Chosef ak o oh im oná; nana ho hvchim achikma, hvsh yvmohmashke, im achi tok.

56. Mihma hohchvfo kvt yakni paknaka moma ka palvmmi fehna tok: mihma Chosef vt ilhpak ai itola moma ka tiwi cha, Echip okla ha i kanchi tok: mihma Echip yakni ya hohchvfo palvmmi kvt i shahlit mahaya tok.

57. Mihma yakni inla moma kvt onush chumpa chi hosh Echip a onvt Chosef a im ona beka tok: yakni moma ka hohchvfo kvt palvmmi hatuk oka.

CAPTA XLII.

ATUK o Echip a onush vt asha ho Chekob vt akostinin-chi mvt, Chekob vt ushi vhleha ha, Nanta katiohmi ho filemvt hvsh iti pisa cho? im achi tok.

2. Micha yakeh, Echip o onush vt asha ho baklolishke : yummak o hvsh ona cha, yummak o ont hvsh pim a chumpashke ; yvmohmi ho pi okchaya cha, ik pillo ka chi hoke, achi tok.

3. Mihma Chosef itibapishi pokoli kvv Echip a onush a chumpa chi hosh ilhkoli tok.

4. Amba Chosef itibapishi Benchamin ano Chekob vt, Nan ik achukmo nana kia onvtola yoba ná, achi hatuk osh itibapishi vhleha takla ik pelo tok.

5. Israel ushi vhleha hvv onush chumpvt ai ona ka takla ona tok : Kenan yakni ya hohchvfo kvv asha hatuk oka.

6. Mihma Chosef vt yakni ya pehlichí atok ; micha yummak osh yakni yvmma okla moma ka i kanchi tok : atuk o Chosef itibapishi vhleha hvv ona mvt, itikba ya im akachunolit aka hlipkvchi tok.

7. Mihma Chosef vt itibapishi vhleha ha pisa mvt ithana tok ; yohmi kia inla im il ahobit, ilhpash ikshot im anum-puli tok ; micha, Katima hvsh minti cho? im achi tok. Mihma Kenan yakni e minti hosh ilhpak chumpvt il aya hoke, okla achi tok.

8. Mihma Chosef vt itibapishi vhleha ha ithana tok, yohmi kia Chosef ano okla ik ithano tok.

9. Mihma Chosef vt naholhpokna ishít holhpokna tok vt ithaiyana tok ; micha, Yakni pisvt aya hvchia hoke ; yakni vt ashaiyahbi ka pisvt hvsh aya hoke, im achi tok.

10. Mihma, Keyú, a shahli ma, peh ilhpak chumpvt aya hosh chin tishu vhleha hvv vla hoke.

11. E moma kvv hatak achvfa ushi vhleha pia hoke : hatak aiahli vhleha pia hoke ; chin tishu vhleha hvv yakni pisvt aya keyu hoke, okla im achi tok.

12. Mihma, Keyú, peh yakni vt ashaiyahbi ka pisut aya hosh hvsh la hoke, im achi tok.

13. Mihma, Hatak achvfa Kenan yakni ya vtta ho ushi vhleha hosh chin tishu vhleha hv^t itibapishi auah^tuklo hoke: atuk o yakeh, nakfish ishtaiyopi vt himak nitak a piki takla ahantakma, achvfa kv^t iksho hoke, achi tok.

14. Mihma Chosef vt, Yakni pisut aya hvchia hoke, anumpulit achi li tuk vt yvmmak oke.

15. Ilvppak o isht hvsh otvna chi hoke: Falaoh hv^t okchaya pulla ka hvchi nakfish ishtaiyopi vt ilvppa ik lo ka ilvppa kohchvt hvsh ilhkola he keyu hoke.

16. Hvsh achvfa kanima ka hvsh pila na hvch itibapishi ha ont ishtv^tlashke, mikma talakchit aboha kv^tllo hvsh aiashashke, yohmi ho nana kia hvsh ahlikma hvch im anumpa hv^t isht otvnashke: keyukmvt Falaoh hv^t okchaya pulla ka yakni pisut aya hvchia hoke, im achi tok.

17. Mihmvt mominchit itiba fohkit nitak tuchina ho aboha kv^tllo apitta tok.

18. Mihmvt Chosef vt nitak ont atuchina ma, Ilvppak o hvsh yvmihchi cha, hvsh okchayashke: Chitokaka ya i sa nukshopa hoka.

19. Hatak aiahli hvchia hokma, hvch itibapishi achvfa hosh talakchit hvchim aboha kv^tllo yash f^okashke: mikma i^vt hvchin chuka achvfa hohchvfo ka onush isht hvsh im onashke.

20. Yohmi kia hvchi nakfish ishtaiyopi ya ont ishit hv^svm v^tlashke; yohmi ho hvchim anumpa hv^t ahla chi hoke, mikma ik hvch illo ka chi hoke, im achi tok. Mihma okla yvmohmi tok.

21. Mihmvt ilap bika, Pitibapishi pulla ka chukvsh komunta ka e pisa, micha pim ilbvsha ma e hakla he keyu kv^t nana il im ashvchi fehna tok vt pi onvtoyula mvhli hoke: yvmohmi kak o nan ik achukmo ilvppvt pi onvtola hoka, itim achit hielⁱ tok.

22. Mihma Luben vt afalaminchit, Hvchim anumpulit, Ulla ya hvsh i yoshuba ná, achi li tok keyu cho? mihma hvsh haponakla he keyu tok: yvmohmi tok ak o yakeh, im issish a pi a hoyo akinlishke, im achi tok.

23. Micha Chosef vt haklo ka okla ik ithano tok: anum-pa tosholi yo isht itim anumpuli hatuk oka.

24. Mihmvt i filummi cha, nishkin okchi mihinti tok; atuk osh anonti falamvt im ona cha, itim anumpuli mvt, Si-meon a im ishi cha, okla pisa ho takchi tok.

25. Yohmi mvt i bahta ya onush alotoli cha, hatak in tvli holisso aiyukali falumminchit i bahta ya apittakmvt, hina takla pinak ima chi ka Chosef vt apesa tok: micha yummak o yumihchi tok.

26. Mihma im issuba haksobish falaia ya onush ash sha-polichi mvt, ilhkoli tok.

27. Atuk o anusi aboha ya okla ona ma, achufa kvt im issuba haksobish falaia ya nanupa ipeta chi hosh i bahta ya hotofi mvt in tvli holisso ya pisa tok: yakeh, i bahta ya fo-ka tuk oka.

28. Mihma itibapishi vhleha ha, An tvli holisso hvt a fa-lamushke; micha yakeh, a bahta fehna ka fokushke, im achi tok: mihma chukush kunia cha, nukshopvt okla wunihinchit mvt, Iluppak osh nanta mak o Chitokaka yvt pi yumihchi cho? itim achi tok.

29. Atuk osh Kenan yakni ya onvt, iki Chekob a im ona mvt, nana im a kaniohmi tuk vt moma im anolit,

30. Hatak vt yakni yumma i shahli yosh ahanta kvt ilh-pash ikshot pim anumpuli cha, yakni pisvt aya pi ahni tuk oke.

31. Mihma, Hatak aiahli pia hoke: yakni pisvt aya pia keyu hoke.

32. Hatak achufa piki ushi vhleha pia hosh itibapishi au-ahtuklo pia hoke: achufa kvt iksho, mikma nakfish ishtai-yopi vt himak nitak a piki takla Kenan yakni ya anta hoke, il im achi tuk oke.

33. Mihma hatak yakni yumma i shahli yash osh, Iluppak o hatak aiahli huchia ka isht ithuna la chi hoke: huch itibapishi achufa ka hus sa kanchi cha, huchin chuka achufa hohchufo aiasha ka ilhpak oh im ishi cha oh ilhkoli:

34. Micha huchi nakfish ishtaiyopi ya ishit hus sum vlashke: yohmikmak o yakni pisvt aya keyu, amba hatak

aiahli hvchia ka ithvna la chi hoke: yohmikma hvch itibapishi ha hvch ima likma, yakni ya hvsh ai itatobashke, pim achi tuk oke, im ahanchi tok.

35. Atuk o yakohmi tok, i bahta ya okla tosholi ma, yakeh, in tvli holisso bonunta aiyukali kut i bahta ya foka bano tok: mihma yvmmvt micha iki aiena kut tvli holisso bonunta ya okla pisa mvt, nukshopa tok.

36. Mihma iki Chekob vt, Uno ya vlla hvs sa wehpulishke: Chosef vt iksho, Simeon vt iksho, mihma Benchamin a ishit hvsh ia chishke: ilvppa puta kut si onvtonla hoke, im achi tok.

37. Mihma Luben vt iki ya im anumpulit, Ishit ak chim vlokma, svso tuklo ka ish bashke: svbbak a ish fohki tukma, anonti ishit chim vla la chi hoke, achi tok.

38. Mihma, Svso hvt hvchi awant ia he keyu; itibapishi hvt illi tok o, ilap bano hosh anta hoke: hina yvmma hvsh ia ka nana ik achukmo kia onvtolakma, yohmikma sa pashi tohbi ya ilbvshalit ahollohpi ya hvs svst on a chi hoke, achi tok.

CHAPTA XLIII.

ATUK o yakni ya hohchvfo kut palvmmi tok.

2. Atuk o yakohmi tok, onush a Echip a ont ai ishtvla tuk vt vput tahli ma, iki vt, Anonti hvsh ia cha, ilhpak kanomosi ka ont hvsh pin chumpashke, im achi tok.

3. Mikma Chutah vt im anumpulit, Hatak vt anumpa kvllo il onochit, Hvch itibapishi hvt hvchi awant aya keyukma, sa nashuka ya hvsh pisa he keyu, pim achi tok.

4. Pitibapishi ha pi takla ish pila hokmvno, il ia cha, ilhpak a ont e chin chumpashke;

5. Amba ish pila he keyu hokmvno, il ia he keyu hoke: Hvch itibapishi hvt hvchi awant aya keyukma, sa nashuka ya hvsh pisa he keyu, hatak ash osh pim achi tuk oka, achi tok.

6. Mihma Israel vt, Nanta katiohmi ho nan ik achukmo ka si yvmihchit, himakma hvch itibapishi hvt anta ka, hvsh im anoli tuk oh cho? achi tok.

7. Mihma, Hatak ash osh kaniohmit il aiasha chatuk a, micha pi kanomi aiena ka atokolit pim a ponaklot, Hvch iki vt okchaya moma ho? hvch itibapishi inla yvt anta ho? achi tok; mihma anumpa ilvppa chohmi kak o il im anoli tok: Hvch itibapishi ha ont isht oh vla, acha hinla ka il it-hana hinla pulla tuk o? achi tok.

8. Mihma Chutah vt iki Israel a, Ulla ya vno ak o subbak fohkit ish pilakma, e wakaya cha, il iashke, yvmohmi ho pishno, micha chishno, micha pim vlla vhleha aiena kut pi okchaya cha, ik pillo kashke.

9. Uno ak osh aiahlichi sia hashke; subbak ak o ish a hoyashke: ishit chim vlvut chi tikba ak hilechokmvt, vno ak osh anumpa si onvtoyula na biliashke.

10. Kil ahchibalo tuk mvt, himak o atukla mak o, ont falamvt e la he tuk pulla hoka, im achi tok.

11. Mihma iki Israel vt, Himak a yvmohma he vlhpesakma, ilvppak o hvsh yvmihchashke: yakni ilvppa nawaya achukma i shahli chim aivlhto fohkit hvsh ishi cha, hatak ash, hlitili balsam kanomosi, micha foibila kanomosi, nabalama, micha hlitili mvh, tiak holba vni, micha almont aiena kut i na hvlbina chi ho ishit hvsh im onashke.

12. Micha tvli holisso yash inlohmi tuklo ho chibbak a hvsh ieshashke; micha tvli holisso vt hvchi bahta foka na anonti ishit hvsh la tuk a ishit hvsh iashke; yohmi, ik ahno ketuk yoba ka:

13. Micha hvch itibapishi ha hvsh ishi cha, wakayvt anonti hatak ash hvsh im onashke:

14. Mikma Chitokaka Nan isht im aiahli ataha iksho vt hatak ash itikba ya a hvchi nukhaklo na, hvch itibapishi achvfa, micha Benchamin a et pilashke: vlla yvt sa wehpoa hokmvt, sa wehpoa hoke, im achi tok.

15. Mihma hatak vhleha hash osh nahvlbina yvmmak ash, micha tvli holisso yash inlohmi tuklo ho, ibbak foka micha Benchamin a ishi tok; micha wakaya mvt, Echip a ilhkoli tuk osh Chosef itikba ya ont hiel tok.

16. Atuk o Chosef vt Benchamin vt takla aya na pisa mvt, in chuka achvfa pehlichi ya, Hatak vhleha ilvppa chuka

isht ish ona cha, nan vbit atahli; hatak vhleha ilvppvt tvbokolikma, svbaiimpa chi hoke, im achi tok.

17. Mihma Chosef vt miha tuk mak o hatak ash osh yvmihchi tok: micha hatak ash osh hatak vhleha hash o Chosef in chuka isht ona tok.

18. Mihma hatak vhleha hash osh, Chosef in chuka isht ona kak o, okla nukshopa tok; micha, Ummona ka tvli holisso vt pi bahta fokvt falama tok ak o nana isht a mihvt pishicha, yuka pikbi mvt, pim issuba haksobish falaia aiena ka isha chi hosh pisht vla hoke, okla achi tok.

19. Mihmvt Chosef in chuka achvfa apesvchi yash bilika ona cha, aboha okhissa ya ai itim anumpuli tok.

20. Mihmvt, Ikikkeh, a shahli ma, ummona ka ilhpak chumpvt il aya tok vt ahli hoke.

21. Atuk o yakohmi tok, aboha anusi ya il ona mvt, pi bahta ya e hotofi ma, yakeh, pin tvli holisso yash osh pin tvli holisso weki hatuk vt moma hosh pi bahta aiyukali ka foka tuk oke: atuk o anonti pibbak foka ho ishit e lvshke.

22. Michā ilhpak isht e chumpa chi kv̄t tvli holisso inla pibbak foka ha ishit e lvshke: kv̄na hosh pin tvli holisso ya pi bahta fohki tuk a kil ithanoshke, achi tok.

23. Mihma, Hvchi nuktaiyalashke, ik hvchi nukshopo kashke: hvchin Chitokaka, micha hvch iki in Chitokaka ak osh tvli holisso hvch imvt, hvchi bahta ya fohki tuk oke: hvchin tvli holisso ya ishi li tuk oke, achi tok. Mihmvt Simeon a kohchit isht im ona tok.

24. Mihmvt hatak ash osh hatak vhleha hash o Chosef in chuka isht ona cha, oka ima na iyi ya okla achifa tok; mihma im issuba haksobish falaia ya nanvpa ipeta tok.

25. Mihma Chosef vt tvbokolikma vla chi itin takla ka nahvlbina yash atahli tok: yvmmak o okla ai impa chi kv̄t haklo tuk okvt.

26. Atuk o Chosef vt chuka vla ma, nahvlbina ishit vla tuk vt aboha okla isht im vla cha, im akachunolit aka pit hlipkv̄chi tok.

27. Mihma im achukmaka ka i ponaklot, Hvch iki, hatak

sipokni hvs svm anoli chash osh im achukmaka cho? okchaya moma cho? achi tok.

28. Mihma afalaminchit, Chin tishu piki vt im achukmakvshke, okchaya momvshke; achi tok: mihmvt akachunoli cha, aka pit hlipkvchi tok.

29. Mihma akachakali cha, ishki ya ushi itibapishi Benchamin a pisa mvt, Ilvppak osh hvchi nakfish ishtaiyopi hvs svm anoli tuk mak oh cho? achi tok. Mihmvt, Svso ma, Chitokaka yvt chi kanashke, achi tok.

30. Mihmvt Chosef vt itibapishi ha chukvsh ishit nukhaklo hatuk osh tushpvt a yaiya chi kvt hoyo tok: mihmvt in chuka anukaka ont chukowa cha, a yaiya tok.

31. Atuk osh okami cha, kohcha mvt il oktambli cha, Pvska ho talali, achi tok.

32. Mihma Chosef a ila in talali, anonti yvmma ila in talali mvt, Echip okla hvt takla impa ka ila in talali tok: Echip okla hvt Heblu okla ha itibai impa he keyu chatuk; yvmmvt Echip okla hvt nan isht im ayuwala yatuk oka.

33. Mihma vttahpi yvt ai isha he vlhpesa yak o vlhpisa hosh, micha ont ishtaiyopi yano himita kak o vlhpisa hosh itikba okla binohli tok: mihmvt hatak vhleha hash osh okokko, it ahni tok.

34. Mihma ilap itikba ai ishi cha, kvshkoa ho pit i pila tok: yohmi kia Benchamin a i kvshkoa hvto inla ka immi ha inlohmi tahlapi tok. Mihma okla nanishko cha, ibai yukpa tok.

CHAPTA XLIV.

ATUK o Chosef vt in chuka achvfa pehlichy ya i mihvt, Isht aya he vlhpesa ho hatak vhleha hash i bahta ya ilhpak hvsh aluli cha, hatak moma ka in tuli holisso aiyukali ka i bahta ya hvsh apittashke.

2. Micha vm ishtishko, ishtishko tuli hvta ya, micha im onush aiilli tuli holisso ya nakfish ishtaiyopi i bahta ya ish fohkashke achi tok: mihma anumpa Chosef vt anumpuli tuk mak o yvmihchi tok.

3. Onnahinli kv̄t tohwikeli makinli hō hatak vhleha hash, micha im issuba haksobish falaia aiena k̄a pit tihleli tok.

4. Atuk osh tvmaha holihta yā kohchvt ik hopakecho k̄isha hō Chosef vt in chuka achvfa pehlichy yā, Wakayá, hatak vhleha hash hliolí; atuk osh ont ish sakkikmvt, Nanta katiohmi hō nan achukma k̄a nan ik achukmo hō hvsh atob-bi cho?

5. A shahli hv̄t ai ishko chatuk, micha nan isht ithvna chatuk mv̄hli ilvppak keyu cho? ilvppa hvsh yvmihchi kv̄t ik achukmo hō hvsh yvmihchishke, ish im achashke, im achi tok.

6. Atuk o ont sakki cha, anumpa ilvppak inli hō im anumpuli tok.

7. Mihma, Nanta katiohmi hō anumpa ilvppa a shahli hv̄t achi cho? chin tishu vhleha hv̄t nana ilvppa chohmi k̄a yvmihchi k̄a Chitokaka yvt im olvbashke.

8. Yakeh, tv̄li holisso hv̄t p̄i bahta yā fōka na il ahayuchi tuk vto anonti Kenan yakni yā ai isht e la tuk oke: yohmi tuk vt katiohmi kak o tv̄li hv̄ta, keyukmvt tv̄li holisso lak-na. kia hukopvt a shahli in chuka yā isht e kohcha hinla cho?

9. Chin tishu vhleha kanima kak osh īshi tuk o haiakak-ma, yvm̄mvt illashke, mikma pishno ak̄ kia a shahli hā ī yu-ka vhleha pia hashke, im achi tok.

10. Mihma, Himak akinli k̄a hv̄chim anumpa pulla hatuk mak o yvmohmashke: kv̄na hosh īshi tuk o haiakma, yvm-mak osh an tishu ha chī hoke; mikma hv̄chishno vto nana ik hv̄chī kaniohmo ka chī hoke, achi tok.

11. Yohmi ma tushpvt hatak ī bahta aiyukali kv̄t akv̄chit aka bohli tok: micha hatak ī bahta aiyukali kv̄t hotofi tok.

12. Mihma hoyo tok, micha akni fehna ak o vttvt ai isht-ia hosh nakfish ishtaiyopi yā isht ona tok: mihma isht ishko vt Benchamin ī bahta ak o fōkv̄t haiaka tok.

13. Yohmi ma ī nafohka yā okla hlilvffi cha, hatak im issuba haksobish falaia aiyukali kv̄t shapolechi mvt, falamvt tvmaha holihta yash ona tok.

14. Mihma Chutah, micha itibapishi vhleha aiena kv̄t

Chosef in chuka ya ona tok; (yumma anta moma hatuk oka,) micha itikba ya okla hlipkvchi tok.

15. Mihma Chosef vt, Ilvppvt nanta mak o hvsh yvmih-chi tuk oh cho? hatak vno chohmi kvv nan ithvna la hinla pulla ka hvch ik ithano tuk oh cho? im achi tok.

16. Mihma Chutah vt, A shahli ha nanta ho il im acha chi cho? nanta ho il im anumpula chi cho? e katiohmi kak osh il il aivlhpiesscha chi cho? Chitokaka yvt chin tishu vhleha nanashvchi yo ahayuchishke: yakeh, a shahli in tishu vhleha pia hoke, pishno, micha isht ishko ya ishi tuk o haia-ka tuk aiena kvv, achi tok.

17. Mihma, Yohmi la he ya Chitokaka yvt olvbashke: amba isht ishko vt ibbak fokv haiaka tuk hatak yummak osh an tishu ha chi hoke: amba hvchishno vto hvch iki ya achukmakv hvsh im onashke, achi tok.

18. Yohmi ma Chutah vt i bilika ona cha, A shahli ma! chim asilhha lishke, a shahli hvv haklo ho, chin tishu hvv anumpa achvfa anumpuli lashke; mikma chim ai i nukkilli hvv chin tishu ha i sanalit ik libbo kashke: Falaoh hak o ish chohmi hokv.

19. A shahli hvv in tishu vhleha ha i ponaklot, Hvch iki vt asha? keyukmv hvch itibapishi hvv anta hoh cho? achi tok.

20. Mihma a shahli ha, Piki vt anta, hatak sipokni, micha sipoknit taha ho vlla im vta tok osh, iskitini yosh anta: mikma itibapishi hvv illi tok, ishki achvfa yvt yummak illa hosh okchaya ho, iki vt holitobli hoke, il im achi tok oke.

21. Mihma chin tishu vhleha ha, Isht hvv svv vla na a holhponayo onochit pisa lashke, ish im achi tok oke.

22. Mihma pishno vt a shahli ha, Ulla yvt iki a i filvmit aya he keyu; iki a i filvmit aya hokma, iki vt illa hi oka il im achi tok oke.

23. Mihma chin tishu vhleha ha, Hvchi nakfish ishtaiyopi vt hvchi awant vla keyukma, himakma sa nashuka ya hvsh pisa chi keyu hoke, ish im achi tok oke.

24. Atuk o yakchmi tok, piki chin tishu ha il im ona mvv, a shahli im anumpa ha il im anoli tok oke.

25. Atuk o piki vt, Anonti hvsh ia cha, ilhpak kanomosi ont hvsh pin chumpashke, achi tuk oke.

26. Mihma, Il ia he keyu hoke; pi nakfish ishtaiyopi vt pi takla ia hokmvno, il ia hinla hoke: pi nakfish ishtaiyopi vt pi takla aya keyukma, hatak ash nashuka ya e pisa he keyu hokvt, il achi tuk oke.

27. Mihma chin tishu piki vt, Sa tekchi vt vlla nakni tuklo ho vm eshi tok a hvsh ithanvshke:

28. Atuk o achvfa kv̄t a filvmm̄it kohchvt ia tuk o, Nipvt taha tuk pullvshke, achi li tok; yvmmak atok itin takla ma ak peso chatuk oke.

29. Atuk o ilvppak kia isht hvsh ia tuk o; nana ik achukmo kia onvtolakma, sa pashi tohbi ya ilbvshalit ahollohpi ya hvsh sv̄sht ona chi hoke, pim achi tuk oke.

30. Yvmohmi hoka himak a chin tishu aki ya im ona likma, vlla yvt ik piba fokokma, (im ilhf̄iopak vt vlla im ilhf̄iopak ak o ita talakchi hatuk okvt;)

31. Yakohma chi hoke; vlla yvt pi takla ik ayo ho pi-sakmvt, illa chi hoke: mikma piki pashi tohbi ya hvchin tishu pia hv̄t ilbvshalit ahollohpi ya isht il ona chi hoke.

32. Chin tishu hv̄t vlla yash iki ya isht im ona la hi vt aiahlich̄i tobt̄, Isht ak chim vlokma, aki vt anumpa si onochi na biliashke, achi li tuk oke.

33. Yvmohmi hoka himak a chin tishu hak osh vlla yash vlhtobvt a shahli ha i yuka tobt̄ antashke, chim asilhha lishke: mikma vlla yvt itibapishi vhleha ha takla iashke.

34. Katiohmi kak osh vlla yvt sa takla aya keyu ka aki ya im ona la hinla cho? keyukma nana ik achukmo kv̄t aki ya onvtola chi ka pisa la chi yoba ka, achi tok.

CHAPTA XLV.

YOHMI ma Chosef vt bilika hieli tuk ash moma itikba ya il oktambla he keyu tok; mihmvt chitoli hosh, Hatak moma ka a filvmm̄ichit hvsh koche weh̄lashke, achi tok:

mihma Chosef vt itibapishi vhleha im il anoli takla ka hatak nana kia apehvt hinli kv̄t iksho tok.

2. Mihma Chosef vt chitolit yaiya tok; mihma Echip okla, micha Falaoh in chuka achvfa aiena kv̄t haklo tok.

3. Mihma Chosef vt itibapishi vhleha ha, Chosef sia hoke; aki vt okchaya moma cho? im achi tok. Mihma itibapishi vhleha hv̄t im afalamicha he keyu tok; nashuka pisa kv̄t nukhlakancha hatuk okvt.

4. Mihma Chosef vt itibapishi vhleha ha, A bilika ho minti, hv̄chim asilhha lishke, im achi tok: mihma bilika okla ona tok: Mihma, Hv̄ch itibapishi Echip et hv̄sh kanchi tok Chosef sia hoke, achi tok.

5. Yvmohmi hoka himak a ilvppa et hv̄s sa kanchi tok vt ik hv̄chi nukhaklo cha, hv̄ch ik il i nukkillo kashke: Chitokaka ak osh hatak okchalinchī la chī ho hv̄chi tikba et sa pila tok oka.

6. Ilvppvt afv̄m̄mi tuklo mak o hohchvfo yvt yakni ya itoyula tuk oke: mikma yohmi hokak o afv̄m̄mi tahlapi moma ho yakni patvffi, micha nan vmo nana kia iksho ka chī hoke.

7. Yohmi ka hv̄chim ishtatiaka okchalinchī li, yakni paknaka aiasha chī ho, micha ahlakofi chinto ho isht hv̄chi okchalinchī la chī ho, hv̄ch itikba Chitokaka yvt sa pila tuk oke.

8. Yohmi ka hv̄chishno ak osh ilvppa et hv̄s sa pila tuk keyu, amba Chitokaka ak atok oke: micha Falaoh ha iki, micha in chuka achvfa ya i shahli, micha Echip yakni moma ka pehlichī ya sa hilechi tuk oke.

9. Hv̄sh tushpashke, micha aki ya hv̄sh im ona cha, Chiso Chosef vt yak achishke, Chitokaka yvt Echip moma ka i shahli ha sa hilechi tuk oke: is sv̄m vlashke, ish sv̄laha ná;

10. Michā Keshen yakni ak o, is sa bilika chī, chishno, micha chim vlla vhleha, micha chim vlla vhleha ha im vlla vhleha, micha chī nanvlhpoa chipinta, micha chī nanvlhpoa hochito, micha nana chim asha moma kv̄t ish aiashashke.

11. Mikma yvm̄mak o a hv̄chi ipeta la chī hoke, (hoh-

chvfo hvt afummi tahlapi kv̄t asha moma hoka;) yohmi ho chishno, micha chin chuka achvfa, micha nana chim asha moma kv̄t hohchvot chi taha yoba ná, achishke, hvsh im achashke;

12. Micha hvchi nishkin, micha itibapishi li Benchamin nishkin vt p̄sa ka sv̄tih hak osh hvchim anumpulelishke.

13. Micha Echip a nana sa holitopa moma, micha nana hvsh p̄sa tuk a mominchit hvsh im anolashke: micha tush-pvt aki ya ilvppa isht hvsh lashke, im achi tok.

14. Micha itibapishi Benchamin ikunla ya on hlipia cha yahaya tok: mihma Benchamin vt yumma ikunla ya on hlipia cha yahaya tok.

15. Micha itibapishi vhleha moma ka i suksowa cha, on hlipivt yahaya tok: mihma yohmi ha yak o, itibapishi vhleha hvt itim anumpuli tok.

16. Atuk o Chosef itibapishi vhleha hvt vlushke, achi na annoa ka Falaoh in chuka achvfa yvt haklo tok: mihma Falaoh, micha in tishu vhleha aiena kv̄t im achukma fehna tok.

17. Micha Falaoh hvt Chosef a, Chitibapishi vhleha ha ilvppa ish im achashke, Ilvppak o hvsh yvmihchashke; hvchim issuba haksobish falaia ya hvsh shapolechi cha, ivt Kenan yakni ya hvsh onashke;

18. Micha hvch iki, micha hvchin chuka achvfa ya hvsh ishi cha, hvs sv̄m vlashke: mikma Echip yakni ai achukma kak o hvch ima likmā, yakni nia kak o hvsh ai vpashke, ish im achashke.

19. Himak a chi miha lishke, ilvppak o hvsh yvmoh-mashke; hvchim vlla vhleha, micha hvchi tekchi vhleha aiena kv̄t ai vlbeha chi ka, Echip yakni ya itichanvlli puta ai ishit hvsh ona cha, hvch iki ya isht hvsh minti cha, hvsh lashke.

20. Micha hvchi nachukushpa ya hvch ik anukfillo kashke: Echip yakni ai achukma moma kv̄t hvch immi hokvt, im achi tok.

21. Mihma Israel im vlla vhleha hvt yvmihchi tok: mihma Falaoh hvt miha tuk mak o, Chosef vt itichanvlli puta ima cha, hina takla pinak aiena ka ima tok.

22. Moma ka nafohka fohka tuklo aiyukali ho ima tok: amba Benchamin ano tvli hvta tushahli tahlepa tuchina ho, micha nafohka fohka tahlapi ho ima tok.

23. Micha iki ya yummak inli chohmi ho pit i pila tok; micha issuba haksobish falaia yvt Echip nana achukma puta shali pokoli, micha issuba haksobish falaia tek pokoli hosh, hina takla iki vt vpa chi ho onush, micha pvska, micha pinak shali ho pila tok.

24. Yohmi mvt itibapishi vhleha ha pila na ilhkoli tok: mihma, Ahah, hvsh ahni cha, hina takla hvch ik itim okpulo kashke, im achi tok.

25. Mihma Echip a kohchvt ia mvt, Kenan yakni ya onvt, iki Chekob a im ona tok;

26. Micha im anolit, Chosef vt okchaya moma cha, Echip yakni moma ka pehlichy yoke, achi tok. Mihma Chekob chukvsh vt shimoha tok, ik yimmo hatuk okvt.

27. Mihma Chosef im anumpa nana im achi tuk a moma im anoli tok: micha fohkit ishtia chi ka itichanvlli puta Chosef vt et i pila tuk a pisa mvt, iki Chekob imi shilombish vt okchvt taha tok:

28. Mihma Israel vt, Vlhpesvshke, svso Chosef vt okchaya momvshke; ik svllo takla kak osh ivt ont pisa lashke, achi tok.

CHAPTA XLVI.

MIHMA Israel vt nana im asha tuk vt moma ishi cha ia mvt Bee-sheba ona cha iki Aisak in Chitokaka ya nanvbit isht aiokpvchit im issa tok.

2. Atuk o ninak a Israel vt na pisa ho, Chitokaka yvt (Israel a) il im otv nichit im anumpuli cha, Chekob ma, Chekob ma, ahanchi tok. Mihma, Yak itonla lishke, achi tok.

3. Mihma, Vno vt Chitokaka, chiki in Chitokaka sia hoke: Echip ia ka ik chi nukshopo kashke; yummak o okla chito a chihikbi la chi hoka.

4. Chi awant Echip a ona la chi hoke: atuk osh anonti

ishit chi kohchi li pulla hi oke; mikma Chosef vt chi nishkin a ibbak isht umbitepa hi oke, achi tok.

5. Mihma Chekob vt Bee-sheba ya vttvt wakaya tok: mihma Israel ushi vhleha hvt iki Chekob, micha im vlla vhleha, micha tekchi vhleha ai vlbeha chi ho itichanvlli puta Falaoh hvt i pila tuk a apitta cha, ishtia tok.

6. Michā i nanvlhpoa, micha im ilayak puta Kenan yakni ai ahayuchi tuk vt ishi cha, Chekob, micha im aiunchololi moma kv̄t apiha ho Echip a ona tok.

7. Ushi vhleha, micha ushi vhleha ha ushi vhleha hvt apiha ho, micha ushetik vhleha, micha ushi vhleha ha ushetik vhleha hvt apiha ho, im aiunchololi moma ka pehliechit Echip a isht ona tok.

8. Hohchifo ilvppa puta kak osh Israel im vlla vhleha, Chekob, micha ushi vhleha aiena hosh Echip a ona tok: Chekob ushi vttahpi Luben ak atok.

9. Mihma Luben ushi vhleha hvt Hanok micha Fallu, micha Heslon, micha Kami ak atok.

10. Mikma Simeon ushi vhleha hvt Chemuel, micha Chamin, micha Ohat, micha Chakin, micha Soha, micha Kenan ohoyo ho ushi Shaul aiena kak atok.

11. Mikma Lefai ushi vhleha hvt Keshon Kohalh, micha Melali ak atok.

12. Mikma Chutah ushi vhleha hvt El, micha Onan, micha Shelah, micha Fales, micha Salah ak atok: yohmi kia El, micha Onan itatuklo kv̄t Kenan yakni ya ai illi tok. Mihma Fales ushi vhleha hvt Heslon, micha Hamul ak atok.

13. Mikma Issaka ushi vhleha hvt, Tola, micha Fufah, micha Chob, micha Shimlon ak atok.

14. Mikma Sebulun ushi vhleha hvt Selet, micha Elon, micha Chahleel ak atok.

15. Ilvppa puta kak osh Leah ushi vhleha ha yvmma, micha ushetik Tinah aiena ka Chekob a Patan-alam a ai im eshi tok: ushi vhleha, micha ushetik vhleha imi shilombish moma kv̄t pokoli tuchina akucha tuchina tok.

16. Mikma Kat ushi vhleha hvt Sifion, micha Hakki, Shuni, micha Esbon, Eli, micha Aloti, micha Aleli ak atok.

17. Mikma Asha ushi vhleha hv̄t Chimnah, micha Ishuah, micha Isui, micha Beliah, micha in tek Selah ak atok. Mikma Beliah ushi vhleha hv̄t Hebe, micha Malkiel ak atok.

18. Ilvppa puta kak osh Laban vt ushetik Leah ima tok Silpah ya ushi vhleha hatok: mihma ilvppa puta kak o Chekob a im eshi tok, shilombish auahhannali hatok.

19. Chekob tekchi Lechel ushi vhleha hv̄t Chosef, micha Benchamin ak atok.

20. Mikma Chosef a On a naholitompa isht v̄tta Potifelah ushetik Asenalh im eshi tok a Manasseh, micha Eflaim ak osh Echip yakni ya im ai ashwa tok.

21. Mikma Benchamin ushi vhleha hv̄t Belah, micha Beke, micha Ashbel, Kela, micha Naaman, Ehi, micha Losh, Muppim, micha Huppim, micha Alt ak atok.

22. Ilvppa puta kak osh Lechel a ushi vhleha hosh Chekob a im ashwa tok, shilombish moma kv̄t auah ushtahatok.

23. Mikma Tan ushi vhleha hv̄t Hushim ak atok.

24. Mikma Naftali ushi vhleha hv̄t Chaseel, micha Kuni, micha Chese, micha Shillim ak atok.

25. Ilvppa puta kak osh Laban vt ushetik Lechel ima tok Bilhah ya ushi vhleha hatok; micha ilvppa puta kak o Chekob a im eshi tok: shilombish moma kv̄t untuklo tok.

26. Chekob ushi vhleha ha tekchi vhleha hv̄to asha na haknip a toba tok shilombish moma hosh, Chekob a apih̄vt Echip a ona kv̄t, shilombish moma kv̄t pokoli hannali aku-cha hannali tok.

27. Mikma Chosef ushi vhleha Echip a im ai ashwa tok vt shilombish tuklo tok: Chekob in chuka achv̄fa shilombish moma kv̄t Echip a ona tok vt pokoli untuklo tok.

28. Mihma Chosef vt Koshen ak o apissalit ont ai afama chi ho, Chutah ya itikba pit i pila tok: mihmvt Koshen yakni ya okla ona tok.

29. Mihma Chosef vt im itichanv̄lli ya atahli cha, iki Is-lael a Koshen a ai afamvt ia tuk osh itikba ont im ile haia-kv̄chi tok: micha ikunla on hlipia cha, ikunla ya onvtoyulvt yahaya na hopaki tok.

30. Mihma Islael vt Chosef a, Inta, ik svlli, chi nashuka ya pisa li hokvt, chi okchaya moma hoka, im achi tok.

31. Mihma Chosef vt itibapishi vhleha, micha iki in chuka achvfa ya, Ia lish, Falaoh ha ont im anolit, Itibapishi li vhleha, micha aki in chuka achvfa Kenan yakni aiasha tuk vt vm vlvshke:

32. Michā hatak okvt nanvlhpoa apesvchi vhleha hoke, nan isht aiasha yvt nanvlhpoa impvchi ak oh chatuk okvt: atuk osh i nanvlhpoa chipinta, micha i nanvlhpoa hochito, micha nana im asha tuk vt moma isht vlvshke, im achi lashke.

33. Atukma yakohma chi hoke, Falaoh hvt hvchi hoyo cha, Nanta ho ishit hvshai asha chatuk oh cho? achikma,

34. Yohmikma, Chin tishu vhleha nan isht aiasha yvt vlla pi moma hakinli tok osh himak a ant vhli kv, pishno, micha piki vhleha aiena kv nanvlhpoa apesvchi ak oh chatuk oke, hvsh achashke: yohmi hosh Koshen yakni ak o hvsh aiashashke; nanvlhpoa apesvchi vt Echip okla hvt nana isht ayuwala yoka, im achi tok.

CHAPTA XLVII.

YOHMI mvt Chosef vt ivt Falaoh ha ont im anolit, Aki, micha itibapishi li vhleha, micha i nanvlhpoa chipinta, micha i nanvlhpoa hochito, micha nana im asha tuk moma kv Kenan yakni ya kohchvt vlvshke; atuk osh yakeh, Koshen yakni ya aiashvshke, achi tok.

2. Mihmvt itibapishi kanimi, hatak tahlapi ho ishi cha Falaoh itikba ya hilechi tok.

3. Mihma itibapishi vhleha ha Falaoh hvt, Nanta ho ishit hvsh asha chatuk o? im achi tok. Mihma Falaoh ha, Pishno, micha piki vhleha il aiena, chin tishu vhleha hvt nanvlhpoa apesvchi pia hoke, im achi tok.

4. Michā Falaoh ha, Cheki itin takla ya yakni ya il aiasha chi hosh e la hoke: Kenan yakni ya hohchvfo hvt palvmmi fehna hatuk o chin tishu vhleha hvt i nanvlhpoa ai impa yvt

ik im iksho hoka: yvmohmi hoka inta, chin tishu vhleha hvt Koshen yakni ak o aiashashke, e chim asilhhvshke, im achi tok.

5. Mihma Falaoh hvt Chosef a im anumpulit, Chiki, micha chitibapishi vhleha hvt chim vlvshke:

6. Echip yakni vt chi tikba talavshke; yakni ai achukma i shahli kak o chiki, micha chitibapishi vhleha ha ish a binohlehashke, Koshen yakni ak o aiashashke; mikma hatak kvna hosh tushpa achukma kvt iba foka ho ish ithanakmt, a nanvlhpoa pehlichy ish hiohlehashke, im achi tok.

7. Mihma Chosef vt iki Chekob a ishit chukowa cha, Falaoh itikba ya hilechi tok; mihma Chekob vt Falaoh ha yukpali tok.

8. Mihma Falaoh hvt Chekob a, Nitak okchayvt ish ahanta afvmmi moma kvt katohmi cho? im achi tok.

9. Mihma Chekob vt Falaoh ha, Nitak okchayvt ahanta li tuk vt afvmmi tahlepa achvfa cha pokoli tuchina hoke: nitak okchayvt ahanta li afvmmi puta kvt kanomosi cha, ik achukmo tuk oke; micha aki vhleha hvt nitak okchayvt ahanta tok afvmmi puta ka ik ono hoke, im achi tok.

10. Mihma Chekob vt Falaoh ha yukpali cha, Falaoh itikba ya vttvt kohchvt ia tok.

11. Mihma Chosef vt iki, micha itibapishi vhleha aiena ka Echip yakni binohlechi cha, Falaoh hvt miha tuk mak o, yakni ai achukma i shahli Lameses yakni ya aiasha chi ho ima tok.

12. Micha Chosef vt iki ya, micha itibapishi vhleha ha, micha iki in chuka achvfa moma ka chuka achvfa vlhpisa ho pvska ipeta tok.

13. Mihma yakni yvmma moma ka pvska vt iksho tok: hohchvfo hvt palvmmi hatuk oka; yohmi ma Echip yakni, micha Kenan yakni moma kvt hohchvfo kak osh kotvt taha tok.

14. Atuk o Chosef vt onush ishit chumpa ka Echip yakni, micha Kenan yakni ya teli holisso vt asha tuk a moma itvnahtit ishit tahli tok: mihma Chosef vt teli holisso yash Falaoh ha in chuka ya isht ona tok.

15. Atuk o Echip yakni, micha Kenan yakni aiena ka tvli holisso vt taha ma, Echip okla moma kv̄t Chosef a im ona cha, Pvska pi ipetá; nanta katiohmi hō chi tikba a pilla chī cho? tvli holisso vt taha hoka, achi tok.

16. Mihma Chosef vt, Hvchi nanvlhpoa ak o hvsh imashke; micha tvli holisso hv̄t taha hokma, nanvlhpoa yak okm̄vno hvch ima la chī hoke, achi tok.

17. Mihma Echip okla hv̄t i nanvlhpoa ya Chosef a isht im ona tok: mihma Chosef vt issuba, micha nanvlhpoa chipinta, micha nanvlhpoa hochito, micha issuba haksobish falaia aiena a puta kak o itatobvt pvska ima tok; micha afummi yv̄mma i nanvlhpoa moma ak atuk mak o pvska ipeta tok.

18. Afummi yv̄mmvt ont taha ma, afummi atukla ka im onvt, Pin tvli holisso hv̄t taha ka a shahli ha il in luhma he keyu hoke; a shahli hv̄t pi nanvlhpoa hochito ya ishi akinli hoke: a shahli itikba ya nana hlakofi kv̄t ikshoshke, amba pi haknip, micha pi yakni ak illvshke.

19. Nanta katiohmi hō chi tikba ya pishno, micha pi yakni aiena kv̄t pilla chī cho? pishno, micha pi yakni aiena ka pvska isht ish pi chumpashke, mikma pishno, micha pi yakni aiena kv̄t Falaoh ha in tishu v̄hleha pia hashke: micha pehna ya ish pima na pi okchaya cha, ik pillo kashke, yvmohmi hō yakni vt ik chukilisso kashke, im achi tok.

20. Mihma Chosef vt Echip yakni moma ka Falaoh ha im in chumpa tok; Echip okla hv̄t hohchv̄fo kv̄t i palv̄mmi hatuk o im osapa aiyukali ka kanchi tok: yohmi hō yakni vt Falaoh immi toba tok.

21. Mihma okla hano Echip aivhli v̄ttvt ia hosh in tv̄nv̄p fullota ont v̄hli ka kanv̄llichit tv̄maha holihta inla puta ka ai ashachi tok.

22. Naholitompa isht asha i yakni ak illa hō ik chumpo tok; naholitompa isht asha hano Falaoh hak osh kv̄shkoa im apesa na, Falaoh hv̄t ima tuk mak o i kv̄shkoa ya v̄pa hatuk oka; yvmohmi hatuk osh i yakni ya ik kanchi tok.

23. Yohmi ma Chosef vt okla ha, Yakeh, himak nitak a Falaoh ha hv̄chishno, micha hv̄chi yakni aiena ka i hv̄chi

chumpa lishke: yakeh, pehna hvt yak hvchim aiashvshke; yohmi ka yakni ya hvsh a hokchashke.

24. Atukma yakohma hi oke, wayakma kvshkoa ishit tahlapi kak o Falaoh ha hvsh imashke, mikma kvshkoa ushta kak osh hvch immi ya chi hoke, micha osapa a hollokcha chi pehna, micha hvchishno, micha hvchin chuka achvfa im ilhpak, micha im vlla vhleha im ilhpak achi hoke, im achi tok.

25. Mihma, Ish pi okchalinchi tuk oke: a shahli itikba ya holhponayo hanta ya il ai ahayuchashke; mikma Falaoh in tishu vhleha pia hashke, okla achi tok.

26. Yvmohmi ho Chosef vt Echip yakni ya nana im ape-sa ka, Falaoh hvt kvshkoa ishit tahlapi kak o isha hi atok osh himak nitak a yvmohmi hoke; amba naholitompa isht asha i yakni ak illa hosh Falaoh immi ik tobo tok.

27. Mikma Israel vt Echip yakni, Koshen yakni ak o ahanta tok; micha yvmma osapa, micha im ilayak vt im aishcha, okla apakna kv atampa fehna tok.

28. Mihma Chekob vt afvmmi auahuntuklo ho Echip yakni ya ahanta tok: yvmohmi hokvt Chekob vt okchayvt ahanta nitak puta moma kv afvmmi tahlepa achvfa cha, pokoli ushta akucha untuklo tok.

29. Atuk o Israel vt ai illa he nitak vllpisa kv atikonofvt mihinti tok: mihmvt ushi Chosef a hoyo cha, Himak a chi tikba holhponayo hanta ya ai ahayuchi likma, saiyubi nuta ya chibbak isht ish potolashke, chim asilhha lishke; micha a kana cha, is svm ahli achukmashke: Echip a chik si a hoh-pokashke, chim asilhha lishke:

30. Amba aki vhleha hak o takla itoyula la hi oke: yohmi ka Echip a svshit ish kohcha cha, im ahollohpi ak o ont is sa hohpa hi oke, im achi tok. Mihma, Ish achi tuk mak o yvmihchi la hi oke, im achi tok.

31. Mihma Israel vt, Anumpa kvllo vm il onochi, achi tok: mihma anumpa kvllo im il onochi tok: Mihma Israel vt in topa noshkobo ya on hlipia cha, Chihowa ya aiokpu-chi tok.

CHAPTA XLVIII.

ATUK osh ilvppa i himmakma yakohmi tok, Chosef a im anolit, Yakeh, chiki vt abekvshke, achi tok: mihma ushi tuklo Manasseh, micha Eflaim a pehliechi cha ia tok.

2. Atuk o Chekob a im anolit, Yakeh, chiso Chosef vt chim vlvshke, achi tok: mihma Islael vt ile hlampkochi cha, topa paknaka om binili tok.

3. Mihma Chekob vt Chosef a, Chitokaka, Nan isht im aiahli ataha iksho hvv Kenan yakni Lus a vm a haiaka cha, sai yukpali tok,

4. Micha, Yakeh, chi wayvchit apaknvchi lish, okla laua chikbi la chi hoke; micha yakni ilvppvt immi bilia chi ho, chim isht atiaka chiakaiya ka ima la hi oke, vm achi tok.

5. Yohmi ka himak a chiso tuklo Eflaim, micha Manasseh itatuklo Echip yakni ya chim vlvv, Echip a ak lo kisha ma chim ashwa tok vt vmmi hoke: Luben, micha Simeon ak o chohmit vmmi ha chi hoke.

6. Atukma chim isht atiaka i himmak a ish tobachi ak osh chimmi cha, itibapishi vhleha hohchifo hak o a hohchifot yakni ya ibai isha hi oke.

7. Uno ak okvto Patan a vttvt minti li ma, hina takla Kenan yakni ya Eflalh ona chi ka ik hopako moma ho, Lechel vt vm ai illi tok; mihma Eflalh hina takla ya a hohpi li tok, yvmmvt Behlehem mak oke, im achi tok.

8. Atuk osh Islael vt Chosef ushi tuklo ka pisa mvt, Ilvppvt kvta ho? achi tok.

9. Mihma Chosef vt iki ya, Svso tuklo ka Chitokaka yvt ilvppa ai vma tok oke, im achi tok. Mihma, A bilika isht ish mintashke, chim asilhha lishke, mikma yukpali lashke, achi tok.

10. (Yohmi ka Islael nishkin vt sipokni kak osh elli cha, nana pisa he keyu tok:) mihma Chosef vt i bilika isht ona ma, i suksowa cha shoyuli tok.

11. Mihmvt Islael vt Chosef a, Chi nashuka ya pisa la he

ak ahno tok: atuk ak o yakeh, Chitokaka yvt chim isht atiaka yak kia sa pisachishke, im achi tok.

12. Mihma Chosef vt iki im iyikalaha ititakla ya a koh-chit kanvlichei tok; mihmvt akachunolit aka hlipia tok.

13. Mihmvt Chosef vt ita tuklonchit ishi mvt, Eflaim vt ibbak isht impak imma ak o fohka ho Israel ibbak vlfvubek-imma ak o pit apissullechi tok, micha Manasseh vt ibbak vlfvubek imma ak o fohka ho Israel ibbak ishtimpak imma ak o apissullechi cha, bilika isht im ona tok.

14. Mihma Israel vt ibbak ishtimpak imma pit weli mvt, Eflaim, yvmmak osh nakfish atuk o, noshkobo ha onochi mvt, ibbak vlfvubekimma ya Manasseh noshkobo ha onochi tok, ithana hosh ibbak a itai opitvmmichi tok; Manasseh ak osh akni hatuk oka.

15. Mihmvt Chosef a yukpalit, Chitokaka yvmmak o aki vhleha Eblaham, micha Aisak vt itikba a nohowa tok, Chitokaka yvmmak osh si okchaya takla ka svpihintana, himak nitak a ant vhli chatuk vt,

16. Enchel yvmmak osh nana ik achukmo moma ka a sa hlakofichi chatuk vt vlla nakni ash yukpalashke; mikma sa hohchifo hv, micha aki vhleha Eblaham, micha Aisak hohchifo hv onvtoyulashke: micha yakni paknaka iklvna ya a wayvt apakna tobashke, achi tok.

17. Atuk o iki vt ibbak ishtimpak imma ya Eflaim noshkobo ha onochi na Chosef vt pisa mvt, ik im vlpeso tok: micha Eflaim noshkobo ha ishit kanvlichit Manasseh noshkobo ha onocha chi hosh, iki ibbak a wakeli tok.

18. Michi Chosef vt iki ya, Yvmmak keyu, aki ma, ilvpak osh vttahpi hoka; chibbak ishtimpak imma ya ilvppa noshkobo hak o ish onochashke, im achi tok.

19. Mihma iki vt vlpesa ik ahno hosh, Ithana li, svso ma, ithana li, yvmmak kia okla toba chi hoke, micha yvmmak kia chitot holitopa chi hoke: yohmi kia nakfish ak osh okla chito kv yvma i shahla chi hoke, micha im ishtatia-ka yvt oklushi apakna puta toba hi oke, achi tok.

20. Michi nitak yvma yukpalit, Israel vt yukpali cha, Chi hohchifot, Chitokaka yvt Eflaim, michi Manasseh chi

chohmichashke, acha hi oke, achi tok: mihmvt Eflaim a Manasseh itikba hilechi tok.

21. Mieha Israel vt Chosef a, Yakeh, slla chishke; yohmi kia Chitokaka yvt chiba foyuka cha, anonti hvch iki vhleha i yakni ya chisht ona hi oke.

22. Micha kvshkoa achvfa chitibapishi vhleha ha i shahlichit, ymma a bvshpo falaia, micha vm ititanampo ak o Amolait hatak ibbak a a kohchit isht im ishi li tok vt chima lishke, im achi tok.

CHAPTA XLIX.

MIHMUT Chekob vt ushi vhleha ha hoyo cha, Hvsh itvnaha na, nitak himmak a pilakma nana hvchim a kaniohma hi ya hvchim anoli lashke.

2. Hvsh itvnaha cha, hvsh haklashke, Chekob ushi vhleha hvchia ma, micha Israel hvch iki ya hvsh i haponaklashke, achi tok.

3. Luben ma, vm vttahpi, a sa kvllo, micha nan isht anhlampko vmmona ka atoba holitopa i shahli, micha nan isht aiahli i shahli chia hoke;

4. Abikeli iksho oka ak o chohmit ish imaiya chi keyu hoke; chiki in topa ha ish oiya tok okvt; yohmi mvt ish litehli tok oke: an topa ha oiya tok.

5. Simeon, micha Lefai vt itibapishi hoke; i bvshpo falaia puta kvv nan isht ilbvshali yoke.

6. Umi shilombish ma, lumvt itim anumpulit a chieya ka, chik iba chukowo kashke; ishit sa holitopa hvv itvnahvt chieya ka ik ibafoyuko kashke: nokowa mvt hatak vbi tok oka; micha ilapunla hosh tmaha holihta chaha ya kullit akvchi tok oke.

7. Nokowa kvv libbi tok okvt, micha im ai i nukkilli vt ilbvshali tok okvt kalakshashke: Chekob a ai ita kvshkoli la hi oke, micha Israel a ai ita fimibli la hi oke.

8. Chutah ma, chishno ak o chitibapishi vhleha hvv holi-toblichia he chia mak oke; chibbak vt chin tvnvp vhleha

ikunla ya onvtoyula hi oke: chiki im vlla vhleha hvt chi tikba ya akachunolit aka hlipkaiyvcha hi oke.

9. Chutah vt koi chito ushi yoke; svso ma, niblit vbit ish oiyvshke: bikotushke, koi chito micha koi chito sipokni yo chohmit hlipivshke: kvta hosh wakayvcha hinla cho?

10. Shiloh hvt ik lo kisha ka, Chutah ya miko in tvbi vt micha nanapesa yvt iyi itin takla ya i filvmmmit ia he keyu hoke: mikma okla im antia kvv yummak a hi oke.

11. Im issuba haksobish falaia himita ya pakvpi yo, micha im issuba haksobish falaia ushi ya pakvpi achukma i shahli yo a takchechi hoke; i nafohka ya oka paki ya ai achefa, micha i nafohka ya paki issish o ai achefa hoke:

12. Nishkin vt okapaki yo ishit humma hi oke, micha noti vt pishukchi yo ishit tohba hi oke.

13. Sebulun vto okhvta vhli ya, micha peni ai ataiya yo ai ahanta hi oke: micha im ai vhli vt Siton ak a hi oke.

14. Issaka vto issuba haksobish falaia kvllo yosh shapoh tuklo ititakla a hlipia hoke.

15. Atuk osh afoha hvt achukma ho, micha yakni vt achukma ho pisa mvt, shala chi hosh tahchi ya akachunolichi cha, tishu tobrt noshkobo atobbi tok.

16. Tan vto Israel apehlichi achvfa chohmit im okla ha nan im apesa hi oke.

17. Tan vt sinti yosh hina takla itonla hi oke, sinti lapish asha yosh hina takla itonla tuk osh issuba iyi ya kopoli na om binili tuk vt obvlhpilvt ivt ont itula hi oke.

18. Chim aiokchaya ya hoyo lishke, Chihowah ma.

19. Kat ano nahalupa im vlhtaha okla hvt imaiya hi oke: yohmi tuk kia ont isht aiyopikma imaiya hi oke.

20. Asha yano a kohcha kvv i pvaska yvt nia hi oke, micha miko im ilhpak kvshaha ya waya hi oke.

21. Naftali vto issi holba yosh i hotofa hoke: anumpa achukma yo anumpuli hoke.

22. Chosef vto naksish waya achukma yoke, naksish waya achukma yosh kvli hofobi bilika hikia cha, naksish ash filamohlichi kvv holihta chaha om balvlli yoke.

23. Ititanampo ieshi yvt nukhaklochi fehna tuk oke, micha hysa tok oke, micha i nukkilli tok oke.

24. Yohmi kia im ititanampo vt kvllo kvv moma tok oke ; micha Chekob in Chitokaka kvllo ibbak, micha Israel in Chukfulhpoa apesvchi, Israel in Tuli,

25. Chiki in Chitokaka, yvmmak osh chi apelahancha chi ka, micha Nan im aiahli ataha iksho, yvmmak osh vba nan-isht-aiyukpa, micha ahofobi nan-isht-aiyukpa nutaka aiasha yo, micha ipishik nan-isht-aiyukpa, micha im oshvto nan-isht-aiyukpa ishit chi yukpala chi ka ibbak shakba yvt ishit kvllo tuk oke.

26. Chiki nan-isht-aiyukpa yvt an tikba vhleha nan-isht-aiyukpa ya imaiyvt nvnihi hikia na bilia puta vt ont vhlifehna ka ont vhlishe ; ilvppa puta kak osh Chosef noshkoba ha onvtoyula chi hoke, micha itibapishi vhleha ha i filvmmi tok noshkoba tvbokaka ya onvtoyula chi hoke.

27. Benchamin vto niblit vbi kvv nashoba chohma hi oke ; onnahinlikma nipvt illi ya tahlikmvt, opiakma nipvt illi ya ita kvshkoa hi oke, ahanchi tok.

28. Ilvppa moma kak osh Israel apelihchi auhtuklo hoke : mihma iki vt ilvppak o im anumpuli cha, isht yukpali tok mak oke ; nan-isht-aiyukpa aiyukali ho ishit yukpali tok.

29. Micha atokolit im anumpulit, Um okla ha iba holhtina la chi hoke : aki vhleha ha takla Hittait hatak Eflon im osapa hichukbi talaia kak o,

30. Yakni ahollohi vt in talaia chi hosh Eblaham vt osapa aieninchit Hittait hatak Eflon a in chumpa tok a, yvmvvt Mamle itikba Kenan yakni talaia ka Makpelah osapa ya hichukbi hikia kak o hys si a hohpashke.

31. Yvmmak o Eblaham, micha tekchi Selah ya okla a hohpi tok ; yvmmak o Aisak, micha tekchi Lebekah ya okla a hohpi tok ; mikma yvmmak o Leah ya a hohpi li tok oke.

32. Osapa, micha hichukbi vt anukaka hikia ka in chumpa kvv Helh im vlla vhleha hak atok, achi tok.

33. Atuk osh Chekob vt ushi vhleha ha im anumpuli kvv

ont tahli mvt, iyi ya aiowvt topa pit kahpuli tok; mihmvt fiopissa cha, im okla iba holhtina tok oke.

CHAPTA L.

MIHMA Chosef vt iki nashuka ya on hlipi vt yahaya cha i suksowa tok.

2. Mihmvt Chosef vt in tishu vhleha, alikchi vhleha ha iki Israel a nabalama ahvma chi ka im apesa tok: mihma alikchi vhleha hvt Israel a nabalama ahvmmi tok.

3. Atuk o i nitak pokoli ushta kut ont taha tok; nabalama ahama kut yohmi hosh i nitak vt ont taha chatuk oka: mihma Echip okla hvt nitak pokoli untuklo ho ishit yahaya tok.

4. Atuk osh ishit yaiya nitak vt ont taha ma, Chosef vt Falaoh in chuka achvfa ya im anumpulit, Himak a hvch itikba ya holhponayo hanta ya ai ahayuchi likmvt, hvchim asilhha lishke, Falaoh ha haklochit hvsh im anumpulit,

5. Aki vt anumpa kullo si il onochechit, Yakeh, svlla chishke, vm ahollohipi Kenan yakni a kulli li tuk ak o is si a hohpashke achi tok. Yvmohmi hoka chim asilhha lishke, ak ia cha, aki ya ont ak hohpi; atuk osh anonti vla lashke, hvsh achashke, achi tok.

6. Mihma Falaoh hvt, Anumpa kullo chi il onochechi tuk mak o ish ia cha, chiki ya ont ish hohpashke, achi tok.

7. Mihma Chosef vt iki ya hohpa chi hosh ia tok; mihma Falaoh in tishu vhleha moma, micha in chuka achvfa im asvnonchi vhleha, micha Echip yakni im asvnonchi vhleha moma,

8. Micha Chosef in chuka achvfa moma, micha itibapishi vhleha, micha iki in chuka achvfa apihvt ia tok: peh im vlla vhleha, micha i nanvlhpoa chipinta, micha i nanvlhpoa hochito aiena kak illa ho Koshen yakni ya ashachi hatok.

9. Mihma itichanvlli puta, micha hatak issuba ombinili puta aiena hosh apihvt ia tok: mihma okla chito fehna hatok.

10. Atuk osh Atat onush anihechi, yummvt Chatan

misha talaia ka ona tok; micha yvmma a yaiya kv̄t yaiya ilbvsha chinto fehna hatok; micha iki ya nitak untuklo ho ishit yaiya tok.

11. Mihma yakni yvmma okla, Kenanait v̄hleha hv̄t Atat anihechi a yaiya na pisa mvt, Echip okla hosh ilvppvt yaiya ilbvsha fehna hoke, achi tok: yvmohmi hatuk o yvmmvt Abel-mislaim hohchifo tok osh, yvmmvt Chatan misha talaia hoke.

12. Micha i miha tuk mak o ushi v̄hleha hv̄t yvmihchi tok.

13. Ushi v̄hleha hv̄t Kenan yakni isht ona cha, hichukbi Makpelah osapa anukaka hikia Mamle itikba talaia ka yvmma yakni ahollohpi ya chi hosh osapa aieninchit Eblaham vt Hittait hatak Eflon a in chumpa tok a a hohpi tok.

14. Mihma Chosef vt iki ya hohpit tahli ha yvt, yvmmvt, micha itibapishi v̄hleha, micha iki ya hohpit ia ma, apihvt ia tuk moma kv̄t falamvt Echip a ona tok.

15. Atuk o Chosef itibapishi v̄hleha hv̄t iki vt illi na pisa mvt, Chosef vt pi nukkillā chi yoba ká; yohmikmvt nana ik achukmo moma e yvmihchi tok a pi falvmmicha chi pulla hoke, achi tok.

16. Micha Chosef a anumpa shali ha pit tihlelit, Chiki vt ik illo kisha hosh apesa mvt,

17. Chosef a yak hv̄sh im achashke, Chim asilhha lishke, himak a chitibapishi v̄hleha v̄banv̄bli, micha nanashv̄chi ya ish i kashofashke, nan ik achukmo ho chi yvmihchi tok oka, achi tok; yvmohmi hoka himak a chi in Chitokaka in tishu v̄hleha v̄banv̄bli ya ish i kashofashke, e chim asilhv̄shke, achi tok. Mihma okla im anumpuli ma, Chosef vt nishkin okchi mihinti tok.

18. Mihma itibapishi v̄hleha yak kia itikba ya ont hlipkv̄chi tok: micha, Yakeh, chin tishu pia hoke, achi tok.

19. Mihma Chosef vt, Ik hv̄chi nukshopo kashke: Chitokaka ya v̄lhtobvt hikia li hoh cho?

20. Amba hv̄chishno yvto ik achukmo ho hv̄s si anukfilli tok; yohmi kia Chitokaka yvto achukma kak o ont aiahli-

chit okla laua hō okchalíncha he ahni tok o himak nitak a yohmi hoke.

21. Yvmohmi hoka himak a ik hvchi nukshopo kashke : hvchishno, micha hvchim vlla vhleha aiena ka hvch ipeta la chī hoke, im achi tok. Micha hopohlvlit i kanvt im anum-puli tok.

22. Mihmvt Chosef vt, micha iki in chuka achvfa aiena kv̄t Echip a aiasha tok : micha Chosef vt afvmmi tahlepa achvfa cha pōkoli hō okchayvt ahanta tok.


23. Micha Chosef vt Eflaim im vlla vhleha aītishali ont atuchina hō pisa tok : micha Manasseh ushi Maki im vlla vhleha aiena ka Chosef vt shoyuli tok.

24. Atuk osh Chosef vt itibapishi vhleha hā, Svlla chīsh-ke ; atukma Chitokaka yvt hvchim aya cha, pehlīchit yakni ilvppa hvchi kohchi cha, anumpa il onochit Eblaham, micha Aisak, micha Chekob a yakni im issa tok vt hvch isht ona pulla hi oke, im achi tok.

25. Micha Chosef vt Israel im vlla vhleha anumpa kv̄llo im il onochēchit, Chitokaka yvt hvchim aya pulla hi oke ; mikma sa foni hā ilvppa ai ishit isht hvsh ia hi oke, im achi tok.

26. Yohmi mvt Chosef vt afvmmi tahlepa achvfa cha pōkoli hosh illi tok : mihma nabalama ahvmmi na, Echip a itombi ya folki tok.

EKSOTUS HOLISSO.



MOSES I HOLISSO ATUKLA KUT

EKSOTUS HOHCHIFO HOKE.

CHAPTA I.

YOHMI ka hohchifo ilvppa puta kak osh Israel im vlla vhleha hosh Echip a vla tok. Hatak puta kut in chuka achvfa aiena kut Chekob a apihvt vla tok,

2. Luben, Simeon, Lefai, micha Chutah,

3. Issaka, Sebulun, micha Benchamin,

4. Tan, micha Naftali, Kat, micha Asha ak a tok.

5. Chekob haknip a a toba tok shilombish moma kut shilombish pokoli untuklo tok: Chosef vt Echip a anta hatok oka.

6. Atuk o Chosef vt micha itibapishi vhleha moma kut, micha aaitishali yvmma moma kut illi tok.

7. Mihma Israel im vlla vhleha hvt waya achukma mvt, isht i shahlit, laurt isht mahayvt, apakna cha, kvllot atampvt mahaya tok; micha yakni ya alota tok.

8. Yohmi tuk o miko himona vt Chosef a ik ithano hosh Echip a mikot hikia tok.

9. Michas im okla ha, Yakeh, Israel im vlla vhleha okla hvt laua, micha kullo kut pi shahli hoke.

10. Inta, iloh i kostinashke, keyukma lauat taiyaha tukmvt, yakohma hi oke, tvnvp nana kia ashakma, pin tvnvp vhleha ha ibvlhto cha pitibikmvt, yakni ya kocha hi oke, im achi tok.

11. Yvmohmi hatuk osh toksvli kullo onochit isht ilbvshala chi ka, toksvli apesvchi vhleha ha im apesa tok. Mihma vllhpoyak aiasha tvmaha holihta Pihlom, micha Lameses a Falaoh a im ikbi tok.

12. Yohmi kia ilbvshali kut i shahlechik mak o, apakna

kvt, isht i shahlit ia tok. Mikma Israel im vlla vhleha hatuk mak o okla komunta tok.

13. Micha Echip okla hvt Israel im vlla vhleha ha toksvlechi kvt i kvlochi tok.

14. Micha yuka kvllo, lukfi yamvsa, micha lukfi nuna, micha osapa natoksvli ilaiyukali moma toksvlechi i nitak a hominchi tok; natoksvli moma toksvlechi kvt i kvlochi ha tok.

15. Mihma Echip i miko vt vlla eshikma apestikeli Heblu ohoyo vhleha ha im anumpulit, (yvmma achvfa hohchifo kvt Shiplah, mikma achvfa hohchifo kvt Puah ya tok.)

16. Vlla eshi apesvchi isht-ai-vtta ya Heblu ohoyo ha hvsh i yvmihchi tuk osh, vlla eshi na, hvsh pisakmvt, vlla nakni yokma hvshbashke, amba vlla tek okmvt okchayashke, achi tok.

17. Yohmi tuk kia ohoyo vlla eshi apesvchi vhleha hvt Chitokaka ya i nukshopa cha, Echip i miko vt im apesa tuk a ik yvmihcho hosh, amba vlla nakni ya okchalinski tok.

18. Mihma Echip i miko vt ohoyo vlla eshi apesvchi vhleha hash hoyo cha, Nanta katiohmi ho ilvppa hvsh yvmihchi cha, vlla nakni yo hvsh okchalinski cho? im achi tok.

19. Mihma vlla eshi ka apesvchi ohoyo hash osh Falaoh ha, Heblu ohoyo vhleha hvt Echip ohoyo vhleha ha chohmi keyu hoka; tushpa hatuk osh vlla eshi ka apesvchi ohoyo vhleha hvt ik im ono kisha ho, vlla eshi hoke, im achi tok.

20. Yvmohmi hoka Chitokaka yvt vlla eshi ka apesvchi ohoyo vhleha hash achukma kak o i yvmihchi tok: mihma okla hvt apakmvt kvllo fehmvt ishit mahaya tok.

21. Atuk o yakohmi tok, vlla eshi ka apesvchi ohoyo vhleha hash osh Chitokaka ya i nukshopa hatuk o, chuka achvfa puta im ikbi tok.

22. Mihma Falaoh hvt im okla moma ka atokolit, Vlla nakni vtta puta ka okhina ya pit hvsh okvchashke; micha vlla tek ano hvsh okchalinchashke, im achi tok.

CHAPTA II.

ATUK o Lefai in chuka achvfa aiachvfa hatak osh ivt, Lefai ushetik o ishi tok.

2. Atuk o ohoyo hash osh chakali tuk osh, vlla nakni yo eshi tok; micha vlla achukma ho pisa mvt, hvshi tuchina ho luhmi tok.

3. Atuk osh himak ano luhma he keyu mvt, hashuk holba kishushi yo eshi cha, nashinvsbi, micha tiak nia aiena ho isht apolusli mvt vlla yash fohki tok; micha okhina lapalika hashuk chaha foka talali tok.

4. Mihma kaniohma chi ka, akostinincha chi hosh, in tek vt hopaki ho hikia tok.

5. Atuk o Falaoh ushetik vt okhina ya a yupa chi hosh ona tok; mihma in tishu ohoyo vhleha hvt okhina lapalika ya itvnohowa tok; atuk o kishushi yash hashuk chaha foka ka pisa mvt, in tishu ohoyo hvt ont isht vla chi ka, pila tok.

6. Atuk osh wakvmmi ma, vlla yash pisa tok, mihma, yakeh, vlla yash osh yaiya tok. Mihma i nukhaklo tok, micha, Ilvppvt Heblu aiachvfa vlla yoke, achi tok.

7. Mihma in tek ash osh Falaoh ushetik a, Ia lish vlla pishechi vt Heblu ohoyo hosh chi pishecha chi ka, hoyo la chi cho? im achi tok.

8. Mihma Falaoh ushetik vt, Ia, im achi tok; mihma ohoyo himita yash osh vlla yash ishki ak o ont hoyo tok.

9. Mihma Falaoh ushetik vt, Ulla ilvppa ishtia cha, a pishechi, mikma chim vlhtoba ya chima lashke, im achi tok: mihma ohoyo hash osh vlla yash ishi cha, pishechi tok.

10. Atuk osh vlla vt hofantit taha ma, Falaoh ushetik a isht im ona na, ushi toba tok, mihma hohchifo ha Moses achi tok: micha oka ya halvllit kohchi li tok okvt, achi tok.

11. Atuk o nitak yvmma yakohmi tok, Moses vt hofantit taha mvt, kohchvt, itibapishi vhleha ha im ona cha, nan isht i weki puta ka pisa tok; mihmvt Echip hatak vt itibapishi vhleha ha ai achvfa Heblu yo isso na, pisa tok.

12. Mihmvt ilvppa imma, micha yvmma imma aiena ka

pit hopokoyo cha, hatak nana kia iksho, pisa mvt, Echip hatak a vbi cha, shinak anukaka ya a luhmi tok.

13. Atuk osh nitak atukla ka kohchvt ia ma, yakeh, Heblu hatak tuklo kv itachowvt ashwa tok; mihma ashvchi tuk a yrmak o, Nantihmi ho chishno bika ya ish isso cho? im achi tok.

14. Mihma, Kvt hosh pi shahli, micha na pim apesa chikbi tuk oh cho? Echip hatak ishbi tuk vt chohmichit svba chi ho ish ahni cho? achi tok. Mihma Moses vt nukshopa cha, Nana ilvppv otvni tuk pullvshke, achi tok.

15. Atuk o Falaoh vt nana ilvppa haklo mvt, Moses a vbi bvna tok. Yohmi kia Moses vt Falaoh itikba ya vttvt maleli cha, Mitian yakni ya ont vtta tok, micha kvli hofobi bilika binili tok.

16. Atuk o naholitompa isht vtta Mitian vtta yvt ushetik untuklo hosh asha tok; atuk osh iki i nanvlhpoa chipunta ya oka ipeta chi hosh vla cha, oka ochit peni puta ka alotoli tok.

17. Atuk o chukfi apesvchi vhleha hvv vla cha, kanima pit tihleli tok. Yohmi tuk kia Moses vt wakayvt hikia cha, apelvchit i nanvlhpoa chipunta ya oka ipeta tok.

18. Atuk o iki. Luel a im ona ma, Nantihmi ho himak nitak ano chekosi hvsh la cho? achi tok.

19. Mihma Echip hatak osh chukfi apesvchi vhleha ibak a apihlakofichi mvt, vlhpesa ho oka ya pim ochi cha, nanvlhpoa chipunta ya oka ipeta tok, achi tok,

20. Mihma ushetik vhleha ha, Atuk osh katima anta cho? nantihmi ho hatak a issvt hvsh minti tuk oh cho? oh im anoli na, pvská ik pá, im achi tok.

21. Mihma Moses vt im vlhpesa cha, hatak a takla ahan-ta tok; mihma ushetik Sippola ya Moses a i bohli tok.

22. Atuk o vlla nakni yo im eshi ma, Moses vt hohchifo ha Keshom achi tok; okla inla sia hosh yakni inla yo aya li hokvt, achi ha tok.

23. Atuk o nitak kaniohmi ma, yakohmi tok. Echip i miko vt illi tok; mihma yuka kak osh Israel im vlla vhleha

hvt kifahaha cha, yahaya tok; micha yuka kak osh yahaya kv̄t Chitokaka ya im ona tok.

24. Mihma kifahaha ka Chitokaka yvt haklo tok: micha Chitokaka yvt Eblaham Aisak micha Chekob aiena ka nana itim apesa tok vt ithana tok.

25. Michā Chitokaka yvt Islael im vlla vhleha ha pihisa tok, micha Chitokaka yvt ithaiyana tok.

CHAPTA III.

YOHMI ka Moses vt ipochi naholitompa isht v̄tta Mitian v̄tta Chehlo i nan vlhpoa chipunta ya im apesvchi tok; atuk osh nan vlhpoa chipinta ya pehlichit isht ayvt, yakni haiaka ya ont ashakah ishtona mvt, Chitokaka in nv̄nih chaha Holeb a ona tok.

2. Mihma Chihowah im enchil vt luak libbi afoyukvt bvfaha iklv̄na et ai i haiaka tok; atuk osh pisa ma, yakeh, bvfaha hvt luak isht lua, mihmvt bvfaha hvt ik taho tok.

3. Mihma Moses vt, Fullota lish na pisa chinto ilv̄ppvt nanihmi h̄o bvfaha hvt ik luokma pisa lashke, achi tok.

4. Atuk osh pisa ch̄i hosh fullota ma, Chihowah yvt pisa mvt, Chitokaka yvt bvfaha iklv̄na et ai i howvt Moses, Moses, achi tok, Mihma yak hikia lishke, achi tok.

5. Mihma, Bilika chik minto kashke, chiyi, shulush isht ish hoyolo kv̄t ish shufashke, ish ahikia yakni vt holitopa hoka, achi tok.

6. Michā achakalinchit, Chiki in Chitokaka, Eblaham in Chitokaka, Aisak in Chitokaka, micha Chekob in Chitokaka sia hoke, achi tok. Mihma Moses vt nashuka ya luhmi tok; Chitokaka ya pisa kv̄t nukshopa tuk okvt.

7. Mihma Chihowah yvt, Ūm okla Echip aiasha ka ilbv̄sha ka pihisa li kv̄t ahl̄ishke, toksuli ka apistikeli pulla kak o yahaya ka hahaklo lishke, nan isht im a nukhaklo ka ithana li hokvt.

8. Atuk osh Echip okla ibbak a kohchit hlakofichit, yakni yv̄mma kohchit, yakni achukma, micha chito, pishuk-

chi, micha foebila aiena kvt ayanahanli, Kananait, micha Hittait, micha Amolait micha Pelissait, micha Hifait, micha Chebusait, aiasha yak o isht ona la chi hosh vla lishke.

9. Yvmohmi hoka himak a yakeh, Israel im vlla vhleha ya aya kvt vm vlvshke; micha Echip okla hvt isht ilbvshali na, ilbvsha aiena ka pihisa le tuk oke.

10. Yvmohmi hoka, inta, himak a Falaoh ya pit in chi pila lashke; yvmohmikma vm okla Israel im vlla vhleha ha pehlichit Echip a isht ish kohchashke, achi tok.

11. Mihma Moses vt Chitokaka ya, Kvt a sia hatuk osh, ivt Falaoh ya im ona la hinla cho? micha Israel im vlla vhleha ha Echip a apehlichit kohchi la hinla cho? im achi tok.

12. Mihma, Chiba foyuka li pulla chi hoke, mikma chi-pila li tuk a ilvppak osh chim isht atokowa ya chi hoke; okla ha pehlichit Echip a ish kohchikmvt, nvnihi paknaka ilvppa Chitokaka hvsh aiokpvcha hi oke, achi tok.

13. Mihma Moses vt Chitokaka ya, Yakeh, Israel im vlla vhleha ha im ona lish, Hvchiki vhleha in Chitokaka yvt et hvchi sa pila tuk oke, im achi likma, mikma, Hohchifo hvt nanta ho? vm achikma, nanta ho im achi la he oh cho? im achi tok.

14. Mihma Chitokaka yvt Moses a, SIA KVT MIH SIA HA CHI HOKE, im achi tok, micha Israel im vlla vhleha ha yak ish im achashke, mih SIA HAKOSH hvchi sa pila tuk vt, ish im achashke, achi tok.

15. Mich a achakalinchit Chitokaka yvt Moses a, Israel im vlla vhleha ha, yak ish im achashke, Hvchiki vhleha in Chitokaka Chihowah, Eblaham in Chitokaka, micha Aisak in Chitokaka, micha Chekob in Chitokaka ak osh et hvchi sa pila tuk oke; ilvppak osh sa hohchifo bilia yoke, mikmvt ilvppak osh himak a pilla aaitishali moma aiasha he vt ishit svthaiyana hi oke.

16. Ia, micha, Israel im asvnonchi vhleha ha ish itvnahli cha, Hvchiki vhleha in Chitokaka Chihowah, Eblaham, micha Aisak, micha Chekob in Chitokaka yvt a haiaka cha,

Hvchim aya li pulla cha, Echip a nana a hvchi kaniohmi-hinchi ka, pihisa le tuk oke.

17. Micha Echip aیلbvsha ka hvchi kohchi lish, Kananait, micha Hittait, micha Amolait, micha Pelissait, micha Hifait, micha Chebusait aiena i yakni, pishukchi, micha foebila a yanahanli yakni a chishtona lashke, achi le tuk oke, achishke, ish im achashke.

18. Mikma chim anumpa ha hakla chi hoke; mikma chishno, micha Israel im asvnonchi vhleha aienvt Echip i miko ya hvsh im ona cha, Heblu in Chitokaka Chihowah yvt pi afama tuk oke; Yohmi ka himak a chim asilhhvshke, yakni haiaka nitak tuchina anowa yo il ona cha, Chihowah pin Chitokaka ya vbit isht aiokpvchi il im issashke, hvsh im achashke.

19. Mikma Echip i miko vt ik ia hvchim ahna chi keyuka ithana lishke, keyushke, ibbak kvlllo mak osh ik onvttoyula hoh kia.

20. Mihma svbbak a wieli lish a nafehna moma im itin takla ya ayvmihchi la chi kv, Echip a isht issot kanchi la chi hoke; atuk o yohmi ha yokmvno ik ia hvchim ahna chi hoke.

21. Mikma okla ilvppvt Echip okla itikba ya holhponayo hanta ya ai ahayucha chi ho ima la chi hoke; atukma yakohma hi oke; hvsh iakmvt nan iksho ho hvsh ia he keyu hoke.

22. Amba ohoyo puta kv chuka abilika ya, micha nowvt aya yosh in chuka ahanta tuk aiena ka, tvli hvta ishtshema, micha tvli lakna ishtshema, micha nafohka aiena ka im a potashke, micha hvchiso, micha hvchiso tek vhleha aiena ka hvsh fohkvchashke; micha Echip okla ha hvsh wehpula chi hoke, hvsh im achashke, achi tok.

CHAPTA IV.

MIHMA Moses vt afalvminchit, Yohmi kia yaki, a yimma he keyu, micha vm anumpa ha hakla he keyu

hoke; Chihowah yvt chi haiaka tuk keyu, acha chi hoke, achi tok.

2. Mihma Chihowah yvt, Yummvt nanta hosh chibbak a foka cho? im achi ma, Tvbi yoke, im achi tok.

3. Mihma, Aka pilah, achi tok; mihma aka pila ma, sinti o toba tok; mihma Moses vt i filvmmmit maleli tok.

4. Mihma Chihowah yvt Moses a, Chibbak a pit weli cha hasimbish a ishih, im achi tok. Mihma ibbak a weli cha, hokli ma, tvbi toba cha, ibbak foka tok.

5. Yvmohmi ho iki vhleha in Chitokaka Chihowah, Eblaham in Chitokaka, Aisak in Chitokaka, micha Chekob in Chitokaka vt chi haiaka tuk a yimmashke, achi tok.

6. Michä Chihowah yvt achakalinchit, Himak a chibbak a chikkishi pit fohkih, im achi tok. Mihma ibbak a ikkishi pit fohki tok; atuk osh kohchi ma, yakeh, ibbak vt leplosi vbit okti chiyuhmi tok.

7. Mihma, Anonti chibbak a chikkishi pit fohki, achi tok mihma ibbak a anonti ikkishi pit fohki tok; atuk osh ikkishi ha kohchi ma, yakeh, falamvt haknip inla ya chohmi tok.

8. Atukma yakohma hi oke, chi yimma he keyu, micha nanisht-atokowa vmmona ka hakla he keyu tukmvt, nanisht-atokowa ishtaioپی yokvno yimma hi oke.

9. Atukma yakohma hi oke, nanishtatokowa tuklo ilvppa ik yimmo micha chim anumpa ha hakla he keyukma, okhina oka ya ish ishi cha, yakni shila ya ish onhlatvblashke, mihma okhina oka ish ai ishi kash osh issish tobvt, yakni shila yash o aiasha hi oke, im achi tok.

10. Mihma Moses vt Chihowah ya, A shahli ma, Anumpuli imponna sia keyu, chashpo ka si yvmohmi chatuk osh, is svm anumpuli taiyakla kia, si yvmohmi keyushke; amba anumpa svlaha, micha isunlvsh svlaha sia hoke, im achi tok.

11. Mihma Chihowah yvt, Kvta hosh hatak itvka ikbi tok oh cho? micha kvta hak osh ik anumpulo, micha ik haponaklo, micha pisa, micha ik hopokoyo ikbi hoh cho? Chihowah sia hoh keyu cho?

12. Yvmohmi hoka inta, iah, mikma chitih ha iba foyuka lish, nana ish acha chi ka chim avche lashke, im achi tok.

13. Mihma Moses vt, A shahli ma, chim asilhha lishke, kvna ho ish ahnikmvt ish tohnashke, achi tok.

14. Mihma Chihowah im ai i nukkilli vt Moses a i sanalit libbi mvt, Lefait Alon vt chitibapishi keyu cho? anumpuli imponna hinla ka ithana li hoke: micha yakeh, chi afamvt minti ak inli hoke. Atuk osh chi pesakmvt, chukvsh yukpa chi hak inli hoke.

15. Mikma ish im anumpuli cha, itih ha anumpa ish fohka chi hoke: mikma Uno vt chitih ha, micha yvmma itih ha iba foyuka la chi hoke; micha nana ish a kaniohma chi ka hvchim avvchi la hi oke.

16. Micha okla im anumpula chi hosh, chim anumpa eshi ya chi hoke, micha yvmmak osh, yvmma fehna kak osh itih ha he tuk, chim vtthobakma, Chitokaka yak a he tuk a chishno ak achi hoke.

17. Micha tvbi ilvppa ish ieshi tuk osh, nan isht atokowa ya isht ish yvmihchashke, achi tok.

18. Mihma Moses vt falamvt ipochi Chehlo ya im ona cha, Chim asilhha lishke, falamvt ak ia cha, itibapishi li vhleha Echip aiasha ka ak im ona cha, okchaya momakma, ont ak pesa, im achi tok, Mihma Chehlo vt Moses a Achukmakvt ish ayashke, im achi tok.

19. Mihma Chihowah yvt Moses a Mitian a, Ivt falamvt Echip a ish onashke, ilhfopak chim ishi bvna tok hatak moma kv illit taha hoke, ai im achi tok.

20. Mihma Moses vt tekchi, micha ushi vhleha aiena ka ishit, issuba nashoba om binilichit pehliechi cha, falamvt Echip yakni ya ona tok. Micha Moses vt Chitokaka in tvbi ya ishit ibbak fohki tok.

21. Mihma Chihowah yvt Moses a, Falamvt ivt Echip a ish onakmvt, yohmi ish ahni cha, nafehna moma chibbak fohki le tuk a, Falaoh itikba ish a yvmihchashke, yohmi kia chukvsh a kvlochi likma, okla ha ik iah, ik ahno ka chi hoke.

22. Micha Falaoh ya Chihowah yvt yak achishke, Israel vt svso hoke, vm vttahpi fehna yoke.

23. Atuk o svso hv ik iah, yvmohmi cha vm antiashke, chim achi lishke, atuk o ik iah chik ahnokma, yakeh, chiso

ha chim vttahpi fehna ka vbe la chi hoke, achishke, ish im achashke, im achi tok.

24. Atuk o yakohmi tok, hina takla chuka afoha ona ma, Chihowah yvt afama cha, vbi bunna tok.

25. Yohmi ma Sippola hvt tvli halupa eshi cha, ushi yash tikba hakshup a in tvbli tok; micha iyi imma pit pila mvt, Issish im vlhpesa a hatak chia ho mvhlishke, achi tok.

26. Yohmi ho ik iah ahni tok: yohmi ma, Hakshup tupa pulla kak o issish im ai vlhpesa a hatak chia hoke, achi tok.

27. Mihma Chihowah yvt Alon a, Yakni haiaka ya Moses afamvt iah, im achi tok. Mihma ia tuk osh, Chitokaka i nvni chaha ya ont ai afama cha, i suksowa tok.

28. Mihma Moses vt Alon a Chihowah yvmmak osh et pila tuk a im anumpa moma, micha nan isht atokowa moma im apesa tuk a, im anoli tok.

29. Mihma Moses, micha Alon vt ia cha, Israel im asvnochi moma ka hoyot itvnahli tok.

30. Mihma anumpa moma Chihowah yvt Moses a im anumpuli tuk a Alon vt anumpuli cha, okla itikba ya nan ishtatokowa ya a yvmihchi tok.

31. Mihma okla hvt yimmi tok; micha Chihowah yvt Israel im vlla vhleha ha im aya tuk, micha ilbvsha ka pisa tuk a haklo mvt, noshkobo ha akachunoli cha, okla aiokpvchi tok.

CHAPTER V.

ATUK osh yohmi ha yak osh, Moses, micha Alon vt iba chukowvt, Falaoh ya im anolit, Israel in Chitokaka Chihowah yvt yak achishke, Um okla hvt ik ia cha, yakni haiaka ya impvchi isht ik svm aiashah, achishke, achi tok.

2. Mihma Falaoh vt Chihowah hak osh Kvta ha tuk o im anumpa ha im antia lish, Israel a ik iah, ahni la hinla cho? Chihowah ya ithana li keyu hoke, micha Israel a ik iah ahni la he keyu hoke, achi tok.

3. Mihma Heblu in Chitokaka yvt pi afama tuk oke; e chim asilhhvshke, ivt nitak tuchina anowa yakni haiaka

ya il ona cha, pin Chitokaka Chihowah ya vbit aiokpuchi il im issashke; ililli okpulo micha hvshpo falaia aiena ishit pi fahama yoba na: achi tok.

4. Mihma Echip i miko yvt, Nantihmi ho Moses, micha Alon hvsh ita tuklo kvv okla toksvli ka hvsh ataklvmmi cho? hvsh a toksvli oh iah, im achi tok.

5. Michā Falaoh vt, Yakeh, himak a okla yakni aiasha kvv laua ho, toksvla he tuk a hvsh fohachishke, achi tok.

6. Mihma Falaoh vt mih nitak akinli ho okla toksvli apesvchi vhleha, micha i nanvlhtoka vhleha ha im apesvt,

7. Himakma chashpo chatuk a chohmit, lukfi nuna ikba chi ka okla ha onush vpi hvsh ima he keyu, ilap ak inli hosh ivt onush vpi a ik aiowa cha.

8. Michā chashpo ka lukfi nuna holhtina kaniohmi ho ikbi chatuk a hvsh im apesashke, achvfa kia hvsh ola taklvcha he keyu hoke, peh okla aiasha hoke; Yohmi kak osh pahayvt, Ki lia cha pin Chitokaka ya vbit isht aiokpuchi il im issashke, achi hoke.

9. Hatak vt toksvli hvv i shahli hosh onvtolashke, yvmohmi cha toksvlashke, micha anumpa ik ahobo ya yohmi, ik ahno kashke, achi tok.

10. Mihma okla toksvli ha apesvchi, micha i nanvlhtoka aiena kvv kohchvt ia mvt, okla ha im anumpulit, Falaoh vt yak achishke, onush vpi ya hvchima la he keyu.

11. Hvchishno ak osh kohchvt oh ia cha, kanima moma ka hvsh ai ahayucha hinlakmvt hvsh aiowashke, yohmi kia hvsh toksvli kvv achvfa kia ola takla he keyu hoke, achi tok.

12. Yohmi ho okla hvv Echip yakni moma ka ita fimimvvt onush vpi ya he tuk a, nanvpi ya aiowvt itvnowa tok.

13. Mihma toksvli apesvchi vt atushpalechit, onush vpi vt asha tok a chohmit ish toksvla he tuk a nitak osh nitakma hvsh atahlashke, achi tok.

14. Atuk o Falaoh ya toksvli im apesvchi vt Israel im vlla vhleha nanvlhtoka atokolit i hiohlichi tuk ash osh boa tok, mihmvt ponaklot, Nantihmi ho chashpo chatuk a chohmit, pilashash lukfi nuna ikbi hvchim vlvvisa tuk vt hvch ik onacho tuk osh himak nitak a yohmi akinli cho? achi tok.

15. Yohmi ma Islael im vlla vhleha ha vlhtoka yvt vlvt, Falaoh ya im ilbvshvt, Nantihmi ho chin tishu vhleha ha ish yakohmichi cho? achi tok.

16. Chin tishu vhleha ha onush vpi ik emoshke, mikmvt, Lukfi nuna oh ikbi, pim achishke, mihma yakeh, chin tishu vhleha hvt bovshke. Yohmi kia ashvchi kvt chim okla ha-tuk oke, achi tok.

17. Yohmi kia, Peh hvsh aiasha hoke, peh hvsh aiasha hoke, yvmohmi kak osh, Il ia cha, Chihowah ya vbit isht aiokpvchi ya il i yvmihchashke, hvsh achi hoke.

18. Yvmohmi hokvt, Oh ia cha, himak a ho toksvli, onush vpi ya hvch ema chi keyu; yohmi kia lukfi nuna holhtina hano hvsh ima chi hoke, achi tok.

19. Mihma Islael im vlla vhleha nanvlhtoka vhleha hvt, Nitak achvfakma hvsh atahla he tuk lukfi nuna achvfa kia, hvsh ola taklvcha he keyu, achi ha ya ik achukmo hosh aiasha ka pisa tok.

20. Atuk osh Falaoh ya i filvmmmit koheha mvt, Moses, micha Alon ita tuklo kvt hina takla hinli tuk o, afama tok.

21. Micha Chihowah yvt hvchi pisa cha, hvchim apesashke; pi balama yash Falaoh itikba, micha in tishu vhleha itikba ya hvsh yuwalvchi; micha ishit piba chi ka bvshpo falaia ibbak a hvsh fohki hoke, im achi tok.

22. Mihma Moses vt falamvt Chihowah ya im ona cha, Chihowah ma, nantihmi ho okla ilvppa nana ik achukmo ka ish yvmihchi cho? nantihmi ho et is sa pila tuk oh cho?

23. Chi hohchifo pulla kak o Falaoh ya im anumpule la chi hosh, vla li tuk takla ka, okla ilvppa ik achukmo ho yvmihinchi hoke; mihma chim okla ha ish hlakofichi keyu kvmohmishke, achi tok.

CHAPTA VI.

YOHMI ma Chihowah yvt Moses a, Himak a Falaoh ya nana i kaniohmichi la chi ka ish pisa chi hoke; ibbak

kvullo hō ik iá, ahna chī micha ibbak kvullo hō isht tihlelit i yakni ya kohcha chī hoke, im achi tok.

2. Mihmvt Chitokaka yvt Moses a im anumpulit, Chihowah sia hoke.

3. Micha Chitokaka nan isht im aiahli ataha iksho hohchifo hosh Eblaham, Aisak, micha Chekob aiena ka i haiaka li tok; amba CHIHOWAH sa hohchifo hokvno, yvmmak ash osh svthana tok keyu hoke.

4. Micha Kenan yakni, yakni aitivnowa atok, okla inla yosh aiasha tok a ima la chī hosh, kvullochit itim apesa li tok.

5. Atuk osh Echip okla hvt Israel im vlla vhleha ha yu-kachit ieshi na, kifahahā ka haklo li akinlishke, micha nana itim apesa li vt ithaiyana lishke.

6. Yvmohmi hoka Israel im vlla vhleha ha, Chihowah sia hoke, micha Echip okla hvt naweki hvchi onochi tuk a a hvchi kohchi la chī hoke, micha hvchi yukachi tuk a hvchi hlakoffichi la chī hoke; micha shakba wieli hosh, micha napalvmmi chinto onochi hosh hvchi kohchit isht hvchi hlakoffichi la chī hoke.

7. Micha vm okla hvchia ha chī hō hvch ishe la chī hoke: micha hvchin Chitokaka sia ha chī hoke: micha vno ak osh Chihowah hvchin Chitokaka sia hosh Echip i naweki nutaka ya hvchi kohchi le tuk a, hvsh ithana chī hoke.

8. Mikma yakni yvmma Eblaham, Aisak, micha Chekob a ima la chī hosh, anumpa kvullo il onochi li tok vt, hvchisht ona la chī hoke; mikma hvsh aiasha he vlhpesa yakni ya chī hō, hvchima la chī hoke; Chihowah sia hoke, im achi tok.

9. Mihma Moses vt Israel im vlla vhleha ha yvmihchit im anumpuli tok; yohmi kia shilombish nukhahvmmmit, micha yukvt ilbvsha kak osh Moses a i haponaklo tok keyu tok.

10. Mihma Chihowah yvt Moses a im anumpulit,

11. Ont chukowa cha, Echip i miko Falaoh ya im anumpuli na, i yakni ya Israel im vlla vhleha hvt kochvt ik ia ik im ahni, im achi tok.

12. Mihma Moses vt Chihowah itikba im anumpulit, Ya-

keh. Israel im vlla vhleha hvt ik sa haponakloshke; yohmi ka Katiohmi kak o itivlbi hakshup ik tapo sia ha Falaoh vt a haponakla hinla cho? achi tok.

13. Mihma Chihowah yvt Moses micha Alon a im anum-pulit, Israel im vlla vhleha ha pehlichit Echip yakni a kohcha chi kv̄t, Israel im vlla vhleha, micha Falaoh ya anumpa ima chi ka atokolit i miha tok.

14. Ilvppa puta kak osh iki vhleha in chuka achvfa puta ka i noshkoboka yoke, Israel a im vttahpi Luben ushi vhleha hvt; Hanok, micha Pallu, Heslon, micha Kami. Ilvppa puta kak osh Luben in chuka achvfa vhleha hoke.

15. Mikma Simeon ushi vhleha hoke, Chemuel, micha Chamin, micha Ohat, micha Chakin, micha Soha, micha Kenan ohoyo ushi Shaul ak atok. Ilvppak osh Simeon in chuka achvfa vhleha hoke.

16. Mikma ilvppa puta kak osh im ai iti shali vlhpisa hosh Lefai ushi vhleha hohchifo ha tok: Keshon, micha Kohalh, micha Melali ak atok. Mihma Lefai vt okchayvt ahanta afvmmi moma kv̄t afvmmi tahlepa achvfa cha, pokoli tuchina akucha untuklo tok.

17. Keshon ushi vhleha hvt in chuka achvfa puta kv̄t vlhpisa hosh Libni, micha Shimi ak atok.

18. Mikma Kohalh ushi vhleha hvt; Amlam, micha Isha, micha Heblon, micha Ussiel ak atok. Mihma Kohalh vt okchayvt ahanta afvmmi moma kv̄t, afvmmi tahlepa achvfa cha pokoli tuchina akucha tuchina tok.

19. Mikma Melali ushi vhleha hvt Mahali, micha Mushi ak atok. Ilvppa puta kak osh im ai iti shali vlhpisa kv̄t Lefai in chuka vhleha hatok.

20. Atuk o Amlam vt iki in tek Chokebet a ishit itauwaya tok; atuk o Alon, micha Moses im eshi tok, Mihma Amlam vt okchayvt ahanta afvmmi moma kv̄t afvmmi tahlepa achvfa cha pokoli tuchina akucha untuklo tok.

21. Mikma Isha ushi vhleha hvt; Kolah, micha Nefek, micha Sikli ak atok.

22. Mikma Ussiel ushi vhleha hvt; Mishael, micha Elsa-fan, micha Sihli ak atok.

23. Mihma Alon vt Aminnitab ushetik Naashon in tek Elishiba ya ishit itauwaya tok; atuk o Natab, micha Abihu, Eliasa, micha Ihlama im eshi tok.

24. Mihma Kolah ushi vhleha hvt Assi, micha Elkanah, micha Abiesaf ak atok. Ilvppa puta kak osh Kolait in chuka achvfa vhleha hoke.

25. Atuk o Alon ushi Eliasa vt Putiel ushetik vhleha achvfa ha eshi cha itauwaya tok; atuk o Finihas a im eshi tok; ilvppa puta kak osh Lefait vhleha hvt in chuka achvfa vlhpisa hosh iki vhleha i noshkoboka a tok.

26. Apehlichy vlhpisa ho Chihowah yvt Alon, micha Moses a ilvppak o Israel im vlla vhleha ha pehlichit Echip yakni ya hvsh kohchashke, im achi tok mak oke.

27. Ilvppak osh Israel im vlla vhleha ha Echip a apehlichit kohcha chi hosh Echip i miko ya im anumpuli tok mak oke: ilvppak osh Moses, micha Alon mak oke.

28. Atuk o yakohmi tok, Chihowah yvt Moses a Echip yakni ya ai im anumpuli nitak vt,

29. Chihowah yvt Moses a im anumpulit, Chihowah sia hoke, Echip i miko Falaoh ya nana chim achi li tuk a moma ish im anumpulashke, im achi tok.

30. Mihma Moses vt Chihowah itikba ya, Yakeh, itivlbi hakshup ik tapo sia hoke: yohmi ka katiohmi kak o Falaoh vt a haponakla hinla cho? achi tok.

CHAPTA VII.

MIHMA Chihowah yvt Moses a, Yakeh, Falaoh ya in Chitokaka chikbi lishke, mikma chitibapishi Alon vt chi hopaii ya chi hoke.

2. Nana chim apesa li tuk a moma ish anumpulashke; mikma chitibapishi Alon vt Falaoh ya im anumpuli na, Israel im vlla vhleha ha i yakni ya kohchashke.

3. Mihma Falaoh chukvsh a kullochi likmvt, Echip yakni ya nan vm isht atokowa, micha a na fehna aiena ka ai apakvche la chi hoke.

4. Yohmi kia Falaoh hvt hvchi haponakla he keyu hoke. Yohmi ho Echip a subbak onochit, napakvmmi chinto yvmihchit, vm apelihchi puta ka, micha vm okla Israel im vlla vhleha ha Echip yakni ya pehlichit kohchi la chi hoke.

5. Mihma subbak a Echip a onochi lish, Israel im vlla vhleha ha im ai itin takla ya apelihchit kohcha likma, Chihowah sia ka Echip okla hvt ithaiyana chi hoke, im achi tok.

6. Mihma Moses, micha Alon vt yvmohmi tok; Chihowah yvt im apesa tuk mak o yvmihchi tok.

7. Mihmvt Falaoh ha im anumpulit okla mvt, Moses vt afvmmi pokoli untuchinakma. Alon vt afvmmi pokoli untuchina akucha tuchina ha tok.

8. Mihma Chihowah yvt Moses, micha Alon a im anumpulit,

9. Falaoh hvt, chishno ak osh, na fehna haiakvchi, hvchim achikma, Alon a Chin tvbi ya eshi cha Falaoh itikba pila, ish im achashke mikma, sinti o toba hi oke, achi tok.

10. Mihma Moses, micha Alon vt Falaoh ya ibachukowa cha, Chihowah yvt im apesa tuk mak o yvmihchi tok; mihma Alon vt in tvbi ya Falaoh itikba, micha in tvshka vhleha itikba aka pit pila ma, sinti toba tok.

11. Yohmi ma Falaoh ak kia hatak hopoyuksa vhleha, micha yushpakvmmi vhleha aiena ka pit hoyo tok; yohmi ma yushpakvmmi vhleha Echip asha yatuk vt nan im isht yushpakvmmi ya yvmma chohmi yvmihchi ak inli tok.

12. In tvbi aiyyukali ka aka pila ma, sinti toba tok oka; yohmi kia Alon in tvbi vt yvmma in tvbi puta kash ishit nanvbli tok.

13. Mihma Chihowah hvt achi tuk mak osh, Falaoh chukvsh a kullochi na, ik i haponaklo tok.

14. Mihma Chihowah yvt Moses a, Falaoh chukvsh vt kullashke, okla ha ik ia; ik ahnoshke.

15. Onnahinlikma Falaoh ya ish im onashke; yakeh oka aiasha ka ia hoke; vla takla ka okhina lapalika ya ish hikiashke, micha sinti toba tuk tvbi yash ish ishashke.

16. Micha Heblu vhleha in Chitokaka Chihowah yvt chi

sa pela cha, Ūm okla hvt ik ia, yakni haiaka ont ashvt ik sv̄m antia, achi tuk oke, atuk o, yakeh chashpo ka chik haponaklo tuk oke.

17. Chihowah yvt yak achishke, Chihowah sia ka ilvppak o isht ish ithaiyana chi hoke, yakeh, okhina oka aiasha ka tvbi ishi li kvt, ishit fahama likma, issish toba chi hoke.

18. Mikma nvni vt okhina aiasha tuk vt illa chi hoke; mikma okhina vt shua chi hoke: mikma Echip okla hvt okhina oka ishko kvt yuwala chi hoke, im achi tok.

19. Mihma Chihowah yvt Moses a im anumpulit, Alon a, Chin tvbi ya eshi cha, Echip oka puta, oka i yanvlli puta, im okhina puta, i haiyip puta, micha im oka taloha moma ka chibbak a ish o wielashke; yvmohmi na, issish tobashke; micha yvmohmi na, Echip yakni moma hlopulli ka, iti nan aivlh̄to, micha tvli nan aivlh̄to a puta kvt issish biekashke, ish im achashke, achi tok.

20. Mihma Moses, micha Alon vt Chihowah im apesa tuk mak o, yvmihchi tok, micha tvbi ya vba weli cha, Falaoh hvt p̄isa h̄o micha in tishu v̄hleha hvt p̄isa h̄o oka okhina asha tuk a isso tok; mihma oka moma okhina asha tuk vt issish toba tok.

21. Mihma nvni okhina aiasha tuk vt illi tok; mihma okhina vt shua na, Echip okla hvt okhina oka ya ishka he keyu tok; mihma Echip yakni moma ka issish vt aiasha tok.

22. Mihma Echip yushpakv̄mmi v̄hleha hvt nan im isht yushpakv̄mmi ya ishit yvmihchi tok; mihma Chihowah yvt achi tuk mak o, Falaoh chukv̄sh vt kullo cha i haponakla he keyu tok.

23. Michā Falaoh hvt falama cha, in chuka ont chukowa cha, ilvppak kia chukv̄sh onochit ik anukfillo tok.

24. Mihma Echip okla moma kvt oka ishka chi kvt, okhina bilika ka kullit j̄itv̄nowa tok; okhina oka ya ishka he keyu hokvt.

25. Atuk o Chihowah yvt okhina ya isso ha ya nitak untuklo kvt ont taha tok.

CAPTA VIII.

MIHMA Chihowah yvt Moses a im anumpulit, Falaoh ha ish im ona cha, Chihowah yvt yak achishke, Ūm okla hvt ik ia cha, ik sum antia, achishke.

2. Atuk o, vhpesa chik sum ahnokma, yakeh, chim aivhli moma ka shukvti yo ishit fahama la chi hoke.

3. Mihma okhina hvt shukvti a lauachit ikbi na, yvm-mvt oiyvt chim aboha, micha ish a nusi aboha iba chukowvt, chin topa oiyvt, chin tishu vhleha im aboha iba chukowvt, chim okla ha atuyvt, micha chim apalvska micha ta pushi chim ayamvska puta ka chukowa chi hoke.

4. Mihma shukvti vt chishno, micha chim okla, micha chin tishu moma aiena ka atuya chi hoke, ish im achashke, achi tok.

5. Michā Chihowah yvt Moses a im anumpulit, Alon a, Chin tibi ya ishit oka yanvlli puta, okhina puta, micha hai-yip puta ka chibbak a ish o wieli cha, shukvti ya kohchichit Echip yakni ya ish onochashke, ish im achashka, achi tok.

6. Mihma Alon vt Echip oka puta ka ibbak a o wieli tok: mihma shukvti vt kohcha cha, Echip yakni ya ompohomo tok.

7. Mihma yushpakvmmi vhleha hvt i nan isht yushpakvmmi ya yvmihchi cha, Echip yakni ya shakvti i kohchi tok.

8. Yohmi ma, Falaoh hvt Moses micha Alon a hoyo cha, Chihowah ya ish im asilhha na, shukvti ya, Ūno, micha vm okla aiena ka i kanvllichit ishit kanchashke: mikma okla ha ik ia ahni li, Chihowah ya vbit isht aiokprchi ya im isashke, achi tok.

9. Mihma Moses vt Falaoh ha, Is sum apesashke; kati-ohmikma chishno, micha chin tishu vhleha, micha chim okla ha isht anumpule li, shukvti ya chishno, micha chin chuka puta kanvllichit ishit kanchi na, okhina ak illa ho-asha chi cho? im achi tok.

10. Mihma onnaha yah achi tok, Mihma chim anumpa hatuk mak o yvmohmashke. Yvmohmi ho pin Chitokaka Chihowah chohmi kvt iksho ka, ish ithaiyanashke.

11. Mikma shukvti vt chishno, micha chin chuka puta, micha chin tishu vhleha, micha chim okla vhleha ha i filvmit ia chi hoke, okhina ak illa ho asha chi hoke, achi tok.

12. Mihma Moses, micha Alon vt Falaoh ha i filvmit ia tok: mihmut Falaoh ya i sanalit shukvti ya kohchi tuk ak o, Moses vt Chihowah ya i paya tok.

13. Mihma Chihowah yvt Moses im anumpa ha tuk mak o yvmihchi tok: mihma shukvti vt chuka puta, micha chuka alokoli, micha osapa a puta ka ai illit taha tok.

14. Mihma hoyot itvnahlit ashachi tok; micha yakni vt shua tok.

15. Yohmi kia ik yvmohmo ho Falaoh, vt pisa mut, Chihowah yvt achi tuk mak o, chukvsh a kullochi cha, ik i haponaklo tok.

16. Mihma Chihowah yvt Moses a, Alon a, Chin tubi ya ish weli cha, yakni pushi ya ish isso na, Echip yakni hlopulli moma ka issvp tobashke, ish im achashke, im achi tok.

17. Mihma yvmihchit okla tok, Alon vt in tubi ya eshi cha, ibbak weli cha, yakni pushi ya isso tok, mihma issvp toba cha, hatak micha nan vhpoba aiena ka a toba tok: mihma Echip yakni moma ka yakni pushi moma kvt issvp toba tok.

18. Mihma yushpakvmmi vhleha hvt issvp kohcha chi hosh im isht yushpakvmmi ya yvmihchi tuk osh kohcha he keyu tok; yvmohmi ho issvp vt hatak, micha nanvhpoba aiena ka on aiasha tok.

19. Mihma yushpakvmmi vhleha hvt Falaoh ya, Ilvppvt Chitokaka ibbak ushi yoke, im achi tok: mihma Chihowah yvt achi tuk mak o, Falaoh chukvsh vt kullo tuk osh ik i haponaklo tok.

20. Atuk o Chihowah yvt Moses a, Onnahinli fehna mak o tani cha, Falaoh ya itikba ish hikiashke, (yakeh oka aiasha ya minti hoke,) micha, Chihowah yvt yak achishke, Um okla hvt ik ia cha, ik svm antiá.

21. Keyukma vm okla ha ik iá ish ahna he keyukma, yakeh, chishno, micha chin tishu vhleha, micha chim okla vhleha, micha chin chuka anukaka puta ka shushi laua ho chi onochi la chi hoke; yohmikma Echip okla in chuka puta, micha oka aiasha aiena kvt shushi laua hosh alota chi hoke.

22. Mikma nitak ymma vm okla aiasha, Koshen yakni ya filvmmichi likma, shushi laua nana kia ymma iksho ka hi oke, yohmi ho yakni ai iklvnnaka vno ak osh Chihowah sia ka ishit ithaiyana chi kak oke.

23. Micha vm okla ha micha chim okla it filvmmichi la chi hoke, onnakma nan isht atokowa ilvppvt asha chi hoke, ish im achashke, im achi tok.

24. Atuk osh Chihowah yvt ymihchi tok, mihma shushi laua ik achukmo fehna hosh vlt, Falaoh in chuka, micha in tishu vhleha in chuka puta micha Echip yakni moma ka iba chukowa tok: shushi laua pulla kak o yakni vt okpulo tok.

25. Mihma Falaoh vt Moses, micha Alon a hoyo cha, Oh ia cha, yakni ilvppak inli ho hvchin Chitokaka ya vbit hvsh ai okpvchashke, achi tok.

26. Mihma Moses vt, Ymohma he vlhpesa keyu hoke, Echip okla nan isht a yuwala yo pin Chitokaka Chihowah ya nan vbit ishit il aiokpvcha hinla hokvt: yakeh, Echip okla itikba ya i nan isht yuwala ya isht il aiokpvcha hinla cho? Yohmikma tvli ishit pi bola hinla keyu cho?

27. Yakni haiaka nitak tuchina anowa yo il ona cha, kanihmichit, pim apesakma, pin Chitokaka Chihowah ya nan vbit isht il aiokpvcha chi hoke, achi tok.

28. Mihma Falaoh hv, Ik ia hvchim ahni li, yakni haiaka ya hvchin Chitokaka Chihowah ya nan vbit isht hvsh aiokpvchashke, peh hopaki fehna ho hvchik aiyo kashke: isht is si anumpulashke, achi tok.

29. Mihma Moses vt, Yakeh, chi filvmmi ia lishke, micha shushi laua vt onnakma, Falaoh ha, micha in tishu vhleha, micha im okla vhleha ha i filvmma chi ho, Chihowah ya im asilhha la chi hoke. Yohmi kia Falaoh hv himakma ik

ahlot, okla hvt ivt Chihowah ya nan vbit ik aiokpvchi, ik ahno tuk vt ik yohmo kashke, achi tok.

30. Mihmvt Moses vt Falaoh ya i filvmmmit kohchvt ia cha, Chihowah ya im asilhha tok.

31 Mihma Chihowah yvt Moses im anumpa hatuk mak o yvmihchi tok: micha shushi laua yash Falaoh, micha in tishu vhleha, micha im okla vhleha aiena ka i filvmmichi tok; achvfa kia iksho tok.

32. Mihma himak ak kia Falaoh hvt chukvsh a kullochi cha, okla ik ia, ik ahno tok.

CHAPTA IX.

YOHMI ma Chihowah yvt Moses a Falaoh ha ont iba chukowa cha, im anolit; Heblu in Chitokaka Chihowah yvt yak achishke, Ūm okla hvt ik ia cha ik sum antiá.

2. Ik iá chik ahno hosh, ish halvlli kvv momkama,

3. Yakeh, Chihowah ibbak vt chi nan vllhpoa osapa aia-sha ka, issuba puta, issuba nashoba puta, kamel puta, wak toksvli puta, micha chukfi vllhpoa puta aiena ka onvtoyula chi hoke; issish ililli okpulo fehna hosh asha chi hoke.

4. Mikma Chihowah yvt Israel i nanvllhpoa, micha Echip okla i nanvllhpoa iti filvmmicha chi hoke; mikma nana Israel im vlla vhleha ha immi hokvto illa chi keyu hoke, ish im achashke, im achi tok.

5. Mihma Chihowah yvt nitak vllhpisa ka apesvt, Onnakma Chihowah yvt yakni ya nana ilvppa a yvmihcha chi hoke, achi tok.

6. Mihmvt onna ma nana ilvppa Chihowah yvt yvmihchi tok; mihma Echip i nanvllhpoa moma kvv illi tok; yohmi kia Israel im vlla vhleha ha i nanvllhpoa vt achvfa kia ik illo tok.

7. Yohmi ka Falaoh hvt pit pila tok: mihma yakeh, Israel vhleha i nanvllhpoa vt achvfona kia illi tok keyu. Mihma Falaoh chukvsh vt kullo cha, okla ha ik iá, ik ahno tok.

8. Mihma Chihowah yvt Moses, micha Alon a, Tvli abi-

la yo hituk chubbi ya ibbak alota ish eshi cha, Falaoh hvt pisa ho Moses vt vba pilla pit fimmashke.

9. Mikma Echip yakni moma ka lukfi pushi chipuntasi toba cha, Echip yakni moma ka hatak, micha nanvlhpoa aiena ka onvtula cha, hichi hlachowa toba chi hoke, im achi tok.

10. Mihma tvli abila ya hituk chubbi ya eshit okla cha, Falaoh ha itikba hielu tok; mihma Moses vt vba pilla pit fimmi tok; mihma hichi hlachowa toba cha, hatak, micha nanvlhpoa aiena ka onvtoyula tok.

11. Mihma yushpakvmmi vhleha hvt hichi ak atuk mak o, Moses itikba ya hielu he keyu tok; hichi vt yushpakvmmi vhleha, micha Echip okla moma ka onvtoyula tok oka.

12. Mihma Chihowah yvt Falaoh chukvsh a kullochi na, Chihowah yvt Moses a im anumpuli tuk mak o; ik i haponaklo tok.

13. Mihma Chihowah yvt Moses a, Onnahinli fehna wakaya cha, Falaoh itikba hikia cha, Heblu in Chitokaka Chihowah yvt yak achishke, Um okla hvt ik²ia cha, ik svu antiá.

14. Himak ano a nanililli okpulo puta ka chi chukvsh, micha chin tishu vhleha, micha chim okla ha onochi la chi hoke; yvmohmi ho yakni moma ka vno chohmi kvu iksho ka ish ithaiyana chi hoke.

15. Himak ano chishno, micha chim okla aiena ka ililli okpulo ishit chi fahama la chi hosh, svbbak a chi o weli lashke; mihna yakni ya ai ishit chi kvnia chi hoke.

16. Michu ilvppak achi ho mvhli fehnak o, nan isht vm aiahli yvt chi ai otvninchi la chi hosh, chi hilechi li tuk oke; micha sa hohchifo hokvt yakni moma ka hlopullit ai annohowa hi oke.

17. Ile chahvchit vm okla ha ish i sanali moma cha, ik iá ish ahna he keyu hoke.

18. Yakeh, onnaha himak a chohmi fokakma, hatafo ik achukmo fehna, Echip vt talaia tok mihintit himak ant vhli ka, a yvmohmi chatuk keyu ho hvchi on umvuche la chi hoke.

19. Yvmohmi hoka himak a chi nanvlhpoa, micha nana

hosh osapa chim aiasha moma ka hoyot ish itvnahlashke ; hatak, micha nanvlhpoa chuka isht ik lo tuk a osapa asha moma hatafo vt onvtola na, illa chin tuk, achishke, ish im achashke, achi tok.

20. Falaoh in tishu vhleha hvt Chihowah im anumpa ha nukwia kvt, in tishu vhleha, micha i nanvlhpoa ya tihlelit aboha ha apitta tok.

21. Mihma Chihowah im anumpa ha ik yimmo ho-kvto in tishu vhleha, micha i nanvlhpoa osapa ya ashachi tok.

22. Mihma Chihowah yvt Moses a chibbak a vba pit ish wielashke, yvmohmi na, hatafo vt Echip yakni moma ka ito-lvt, hatak, micha nanvlhpoa, micha haiyukpulo puta osapa asha ka Echip yakni hlopulli ka onvttoyulashke.

23. Mihma Moses vt in tvi a vba pit wieli tok ; mihma Chihowah yvt hiloha, micha hatafo aiena ka et pila ma, luak vt yakni paknaka ya aya tok : micha Chihowah yvt Echip yakni ya hatafo et on umbrchi tok.

24. Yohmi ho hatafo, micha luak vt hatafo yash itai okoma hosh ik achukmo fehna, Echip vt okla toba tok itin takla yakni moma ka yohmi chatuk keyu ha tok.

25. Mihma hatafo vt Echip yakni moma ka osapa asha tuk moma, hatak, nanvlhpoa aiena ka issot kanchi tok ; micha hatafo vt haiyukpulo puta osapa aiasha issot kanchi mvt, iti puta osapa aiasha ka kobalichit tahli tok.

26. Koshen yakni, Israel im vlla vhleha hvt aiasha ak illa ho hatafo vt iksho tok.

27. Mihma Falaoh hvt Moses, micha Alon a pit hoyo cha, Himak a sa yoshubvshke, Chihowah yvt ai vlpiesakma, vno, micha vm okla aiena kvt yoshoba pia hoke.

28. Vlhpesa hoke, Chihowah ya ish im asilhashke, mihma himakma hiloha, micha hatafo vt iksho kashke ; mikma ik ia hvchim ahni likma, himakma hvchik asho kashke, im achi tok.

29. Mihma Moses vt, Tvmaha holihta ya kohcha li mak-inli hosh, Chihowah ya subbak a pit isht im ashatvpa la chi hoke ; mikma hiloha kvt issa chi hoke, micha himak-

ma hatafo vt asha chi keyu hoke; Yohmi ma yakni vt Chihowah ak o immi ka ish ithaiyana chi hoke.

30. Yohmi kia chishno, micha chin tishu vhleha hvto Chihowah Chitokaka ya hvsh i nukwia chi keyu moma ka ithana lishke.

31. Micha nuchi, micha bali aiena ka issot kanchi tok; bali vt nihi tobakma, micha nuchi vt yushkobolichi hatuk oka.

32. Yohmi kia onush micha onush issuba vpa ano issot ik kanchi tok, chahvt ik taho kisha hatuk oka.

33. Mihma Moses vt Falaoh ha i filvmmmit tvmaha holihta ya kohcha mvt, Chihowah ya ibbak isht im ashatvpa tok; mihma hiloha, micha hatafo aiena kv̄t issa ma, umba kv̄t yakni ya et ik o fohopo tok.

34. Atuk o umba, micha hatafo, micha hiloha aiena kv̄t issa na, Falaoh hv̄t pisa mvt, himakma yoshuba cha, yumma, micha in tishu vhleha aiena kv̄t chukvsh a kv̄llochi tok.

35. Mihma Chihowah yvt Moses a tohnot anumpuli tuk mak o Falaoh chukvsh vt kv̄llo cha, Israel im vlla vhleha ha ik iá, ik ahno tok.

CHAPTA X.

MIHMA Chihowah yvt Moses a, Falaoh ya ish iba chuk-
owashke; nan isht vm atokowa ilvppak o itikba ai
otv̄nichi la chi hosh, chukvsh a micha in tishu vhleha chu-
kvsh a kv̄llochi li tuk oka.

2. Micha Echip a nana ayvmihchi li tok, micha nan isht
vm atokowa ya im itin takla ayvmihchi li tuk a, chiso ha
im anolit, ish haklocha he, mikma chiso hv̄t ushi ya haklo-
cha he ak oke; yvmohmi ka vno ak osh Chihowah sia ka
isht hv̄sh ithana he ak oke.

3. Mihma Moses, micha Alon vt Falaoh ya im ona cha,
Heblu in Chitokaka Chihowah yvt yak achishke, Katiohmi
foka ho sa tikba ya chi chukvsh ish akanlusecha he keyu
cho? Vm okla hv̄t ik ia cha, vm antiashke.

4. Keyukma, vm okla ha ik ia ish ahna he keyukma, ya-
keh, onnakma hawa ya chim aivhli ya isht vla la ch*i* hoke.

5. Mikma yakni paknaka ya ompoholmokma, kuna hosh
yakni ya pisa he keyu ka ch*i* hoke: mikmvt hlakofi tuk osh
asha moma hatafo vt chim ashanchi tuk a vpa ch*i* hoke,
micha iti puta osapa chim ai offo ya vpa ch*i* hoke.

6. Micha chim aboha puta, micha chin tishu vhleha mo-
ma im aboha puta, micha Echip okla moma im aboha puta
ka alota ch*i* hoke, ymma chohmi ka ch*i*ki vhleha, micha
ch*i*ki iki vhleha hvt yakni paknaka ya asha tok nitak a vttvt
minti hosh, himak nitak ant vhli ka pisa chatuk keyu ka
ch*i* hoke, achishke, achi tok: mihmvt fullotvt Falaoh ya
flvmmmit kohcha tok.

7. Mihma Falaoh in tishu vhleha hvt, Katiohmi foka ho
hatak ilvppvt ishit pim ahleka ch*i* cho? ik ia cha, in Chito-
kaka Chihowah ya ik aiokpvchi, Echip vt okpulot taha kah,
chik ithano kisha cho? im achi tok.

8. Mihma Moses, micha Alon a anonti Falaoh itikba isht
ona tok, mihma, Oh ia cha, hvchin Chitokaka Chihowah ya
oh im antia. Yohmi kia kvt hosh ia ch*i* ho? im achi tok.

9. Mihma Moses vt, Pi himithoa, micha pi sipokni, piso
vhleha, micha piso tek vhleha pi nanvlhpoa chipinta, micha
pi nanvlhpoa hochito a puta pehliechit il ia ch*i* hoke: Chi-
howah ya impvchi isht il im asha ch*i* hoke, achi tok.

10. Mihma Falaoh hvt, Ik ia hvchim ahni li ka chohmit
Chihowah yvt hvchishno, micha hvchin chipunta puta ka
hvchiba foyukashke: yohmi hvsh ahnashke, nan ik achuk-
mo kvt hvchi tikba itoyula hoka.

11. Yohma he keyu, himak a hatak hvchia hokvt, Chi-
howah ya hvsh im antiashke, ymmak o hvchi bunna tuk
okvt, im achi tok; mihma Falaoh itikba hielit tuk a tihlelit
kohcha wehli tok.

12. Mihma Chihowah yvt Moses a, Hawa yvt vla ch*i* ka
chibbak a Echip yakni paknaka ya ish o wielashke; ymmoh-
mi na, vlvvt yakni ya onvtoyula cha, hatafo vt ashanchi tuk
moma haiyukpulo puta yakni aiasha ka vpvt tahlashke, im
achi tok.

13. Mihma Moses vt Echip yakni paknaka ya in tubi ya o wieli ma, Chihowah yvt nitak yvmma moma ka, micha ninak yvmma moma ka hvshi akochaka mahli ha isht vlt yakni ya onochi tok: atuk o onnahinli ma, hvshi akochaka, mahli hvt hawa ya isht vla tok.

14. Mihma hawa yvt Echip yakni moma ka ona mvt, Echip im aivhli moma ka aka foha ha tok: ik achukmo fehna ha tok; chashpo ka hawa yvt yohmi chatuk keyu, micha himakma yohma he keyu ha tok.

15. Yakni paknaka moma ka alotowa tok oke. Yohmi hosh yakni ya okhilichi micha yakni ya haiyukpulo puta' micha iti vni puta hatafo vt ashahanchi tuk a vvt tahli tok; micha Echip yakni hlopulli moma ka iti puta ka, micha haiyukpulo osapa aiasha puta ka nana okchaki nana kia iksho tok.

16. Yohmi ma Falaoh hvt tushpvt Moses, micha Alon a hoyo tok; micha, Hvchin Chitokaka Chihowah, micha hvchishno ya hvchi sa yoshobvshke.

17. Yvmohmi hoka himak a himonasi ya ilvppa nan ashvchi li ya hvsa kashofashke, hvchim asilhha lishke, micha hvchin Chitokaka Chihowah ya hvsh im assilhashke; yvmohmi na nan illi ilvppa illa ho isht a kanvlichashke, achi tok.

18. Mihma Falaoh ya i filvmmmit ia cha, Chihowah ya im asilhha tok.

19. Mihma Chihowah yvt hvshi okatula mahli kvllo fehna ho fullolichi na, hawa ya ishtvt okhvta humma ya oka tamoli tok; Echip ai vhli fullota moma ka hawa achvfa kia iksho tok.

20. Yohmi kia Chihowah yvt Falaoh chukvsh a kvllochi na, Israel im vlla vhleha ha ik ia, ik ahno tok.

21. Mihma Chihowah yvt Moses a Chibbak a vba pit ish wielashke; yohmi na okhlili hvt okhlili ha yakohmi, ahna he vhpesa hosh Echip yakni paknaka ya onvtoyulashke, im achi tok.

22. Mihma Moses vt ibbak a vba pit wieli tok; mihma nitak tuchina ho okhlili sukko hosh Echip yakni moma ka onvtoyula tok.

23. Nitak tuchina ka iti pesa keyu, micha aiasha tuk vt ik kanvlo tok. Yohmi kia Israel im vlla vhleha moma im aboha ya atohwekili ha tok.

24. Mihma Falaoh hvt Moses a hoyo cha, Oh ia cha, Chihowah oh aiokpvchi peh hvchi nanvlhpoa chipinta, micha hvchi nanvlhpoa hochito ak illa hosh aiashashke, hvchim vlla vhleha hvt hvchi apihvt iashke, achi tok.

25. Mihma Moses vt, Nanvbit isht aiokpvchi, micha na hukmit isht aiokpvchi aiena ka ish pimashke, Yvmohmi ho pin Chitokaka Chihowah ya nan vbit isht il aiokpvchashke.

26. Pi nanvlhpoa vt pi apehvt ia chi hoke: iyakchush achvfa kia olvvt anta chi keyu hoke: yvma aieshi cha, Chihowah pin Chitokaka ya isht il aiokpvcha chi hoka; micha yvma kil ono kisha kvv nana ho Chihowah isht il im antia chi kvv kil ithano hokvt, achi tok.

27. Yohmi kia Chihowah yvt Falaoh chukvsh a kvvlochi na, ik ia, ik ahno tok.

28. Mihma Falaoh hvt, A filvmmmit ia, ahah ish il ahnashke; himakma sa nashuka ya ish pisa na; nitak nana ho sa nashuka ya ish pisakmvt chilla chi hoke, im achi tok.

29. Mihma Moses vt, Vlhpesa ho ish mihvshke, himakma anonti chi nashuka ya pisa la chi keyu hoke, achi tok.

CHAPTA XI.

MIHMA Chihowah yvt Moses a, Himakma nan ik achukmo achvfa ho Falaoh micha Echip a onochi la chi hoke, Yohmi ha yokmuno ilvppa ashvvt ik ia, hvchim ahna chi hoke; ik ia, hvchim ahnikmvt ahli hosh kocha pit hvchi tobla chi bano hoke.

2. Himak a okla im anumpulit, ish haklochashke, mikma hatak puta kvv in chuka a bilika, mikma ohoyo puta kvv in chuka abilika ya tvli hvta isht ilakshema, micha tvli holisso lakna isht ilakshema i potashke, im achi tok.

3. Mihma Chihowah yvt Echip okla ha okla hash i kanvchi tok. Mich a hatak Moses vt Echip yakni ya Falaoh

in tvshka vhleha itikba, micha okla hash itikba aiena ka holitopa fehna tok.

4. Mihma Moses vt, Chihowah yvt yak achishke, Ninak iklvna fokakma, kohchvt Echip im iti takla ona la chi hoke.

5. Mikma vttahpi moma Echip yakni aiasha kv̄t, Falaoh im vttahpi yosh, im aiombinili holitompa om binili ka vttvt ia hosh, ohoyo tishu im vttahpi yosh afotoha ashaka hikia ka ont vhli kv̄t illa chi hoke; micha nanvhlpoa vttahpi moma chi hoke.

6. Mikma Echip yakni hlopulli moma ka yaiya chinto fehna, yv̄mma chohmi kv̄t iksho, micha himakma yv̄mma chohmi kv̄t iksho ka chi hoke.

7. Amba Israel im vlla vhleha hokv̄no, hatak okmá, keyukmvt nan vhlpoa yokmá, nana ofi vt i sanalit isunlvsh a ilhkolicha he keyu ka chi hoke: yvmohmi ho Chihowah yvt Echip okla, micha Israel a itim inlvchi ka, hv̄sh ithaiyana chi hoke.

8. Mikma chin tishu vhleha ilvppa moma kv̄t vm vlv̄t, vm akachunolit, kohchvt iá, micha okla hv̄chiakaiya moma ká, acha chi hoke; mikma yohmi ha yak o kohchvt ia la chi hoke, achi tok, Mihmvt nokowa fehna hosh Falaoh ha itikba hikivt kohchvt ia tok.

9. Mihma Chihowah yvt Moses a, Falaoh hv̄t hv̄chi haponakla chi keyu hoke; Yohmi na, a na fehna puta ka laua-chi la chi kak oke, im achi tok.

10. Mihma Moses, micha Alon vt na fehna ilvppa moma ka Falaoh itikba ya a yvmihchi tok; mihma Chihowah yvt Falaoh chukv̄sh a kv̄llochi na, i yakni ya a kohchvt Israel im vlla vhleha ha ik ia, ik ahno tok.

CHAPTA XII.

MIHMA Chihowah yvt Moses, micha Alon a Echip yakni ya ai im anumpulit,

2. Hv̄shi ilvppak osh hv̄shi talohvt hv̄chim ishtia v̄mmona

ya chi hoke: afummi ishtia ka huchi hushi ummona chi hoke.

3. Islael okla moma ka im anumpulit, Hushi ilvppa nitak ont ishit pokolikma, hatak moma kvt chukfushi ya iki vhle-
ha in chuka achvfa vlhpisa hosh ishashke, chuka achvfakma chukfushi achvfashke.

4. Atuk o chuka achvfa yvt ik lauwo fehna hatuk o, chukfushi vt atampakma, chuka abilika et apanta ak o ita-
tuklot shilombish holhtina kak o vlhpisa hosh ishashke, hatak moma kvt chukfushi ya vpa vlhpesa ho hush hote-
nashke.

5. Huchin chukfushi vt ik ai ono iksho, nakni yosh afum-
mi ummona hashke, chukfi ha keyukmvt, issi kosoma i flvmmichit hush ishashke.

6. Micha huchim anta na, hushi mih mak inli kvt nitak ont isht auah ushtashke; atukma Islael okla moma hosh opiakma vbashke.

7. Mihmvt issish ishi cha, aboha yvmma anukaka ai vpa chi kvt, okhissa tahlaklaka lapali tuklo ka, micha okhissa paknaka lapali aiena ka isht issashke.

8. Mikmvt ninak yvmma nipi ya luak isht apushli cha, pvska ik shatvmmo aiena vpashke, micha haiyukpulo homi aieninchit vpashke.

9. Okchaki ka huchikpo kashke, micha oka ishit honni keyu kvmohmi; amba luak isht vlhpusha hashke; noshko-
bo, iyi aiena, micha chukvsh, salakha, micha shilukpa aiena hashke.

10. Micha kaniohmi kia huchin tonla na onnaha he keyu hoke: kaniohmit itonla na onnakma luak ishit hush hukma hi oke, ish achashke.

11. Micha yakohmi hosh hushpa hi oke, vskofvchi ya isht hush il vskofaiyachi cha, huchi shulush a hush hoyulo, micha huchin tubi vt huchibbak foyukashke; micha anuk-
waya hosh hushpa hi oke, Chihowah im vbanvblit ont ia yoke.

12. Himak ninak a Echip yakni ya hlopulli lish vttahpi moma, hatak micha nanvlhpoa aiena Echip yakni aiasha ka

issot kanchi la chi hoke; micha Echip i naholba puta i sanalit na palvmmi onochi la chi hoke. Chihowah sia hoke.

13. Mikma issish vt aboha hvsh ai asha ka a lapoht maya kv̄t hv̄chi nan isht v̄lhpisa chi hoke; atuk o issish a pisa likmvt, hv̄chi v̄banv̄bli la chi hoke, mikmvt Echip yakni ya issot kanchi likma, ililli okpulo vt hv̄chi onvtolvt ishit hv̄chi kancha he keyu hoke.

14. Mikma himak nitak a hvsh ithana bilia yosh hv̄chin takala chi hoke, mikmvt hv̄chim aiitishali puta hlopulli ka holitoblit Chihowah impv̄chi isht hvsh aiasha hi oke; nan v̄lhpisa bilia yo impv̄chi isht hvsh aiasha hi oke.

15. Nitak untuklo ho pvska ik shatvmm̄mo ya hvsh pa hi oke; nitak vmmona mak inli ho shatvmm̄mi ya hv̄chim aboha puta ka hvsh kohchashke; kv̄na hosh nitak vmmona v̄ttvt ia hosh nitak ont isht untuklo ont v̄hli takla ka pvska shatvmm̄mi ya vpakmvt, shilombish yvm̄mvt Israel a akohchvt fiopa t̄vpa hi oke.

16. Micha nitak vmmonakma it̄vnaha holitopa aiasha hi oke, atuk osh nitak ont isht untuklokma, it̄vnaha hv̄chi holitopa kv̄t aiasha hi oke, yvm̄mak oka toksv̄li kaniohmi kia v̄lhtaha he keyu, peh hatak vt nana v̄pa v̄lhpesa ho, yvm̄mak illa hvsh atahla hi oke.

17. Micha pvska ik shatvmm̄mo impv̄chi ya isht hvsh aia-shashke; mih nitak fehna ak o hv̄chim apelichi puta ka Echip yakni ya apehlichit, hv̄chi kohchi li tuk oka. Yvmoh-mi hoka nitak ilv̄ppa hv̄chim aiitishali puta kv̄t nanv̄lhpisa bilia yo hvsh holitobla hi oke.

18. Hv̄shi vmmona, hv̄shi vt nitak ont isht auahushtakma opiakma, pvska ik shatvmm̄mo v̄pvt isht hvsh ia tuk osh, hv̄shi vt nitak ont ishit pokoli tuklo akucha achv̄fa opia ka, ont hvsh v̄hlich̄a hi oke.

19. Nitak untuklo ho shatvmm̄mi vt hv̄chim aboha puta ka iksho ka hi oke; Kv̄na hosh okla inla yokm̄a, keyukmvt yakni ya ai itola tok okm̄a, nana hosh pvska shatvmm̄mi ya vpakmvt, shilombish yvm̄mvt Israel okla moma ya akohchvt fiopa t̄vpa hi oke.

20. Nana kia shatvmm̄mi ya hvsh pa he keyu hoke; hvsh

aiasha moma ka pvska ik shatummō yō hvsh pa hi oke, achi tok.

21. Yvmohmi ma Moses vt Islael im asvnonchi moma ka hoyo cha, hvchin chukā achvfa vllhpisa hosh chukfushi achvfa ya ont ishit hvsh kohchi cha vbanvblit ont ia ya hvsh bashke.

22. Micha hissop pukussa hō hvsh eshi cha, issish ampushi alhto ka hvsh okvchi cha, issish ampushi vlhto kash okhissa paknaka lapat, micha tahlalakā lapali tuklo ka isht hvsh issashke : mikma hvsh achvfa kia' chim aboha okhissa ya hvchik kohcho hō onna chī hoke.

23. Chihowah yvt Echip okla hā issot kancha chī hosh hlopullit aya chī hoke : atuk osh issish vt okhissa paknaka lapali, micha tahlaklakā lapali tuklo ka issish asha na, pisakmvt okhissa ya vbanvbli cha, nanvbi ya hvchim aboha puta ka iba chukowvt issot ik kanchi, im ahna chī keyu hoke.

24. Mikma nana ilvppak osh chishno, micha hvchiso vhleha aiena ka i nan vllhpisa bilia yō hvsh holitobla hi oke.

25. Atukma yakohma hi oke, Chihowah yvt achit hvchim issa tok mak osh hvchima na, yakni ya hvsh onakmvt, nan nan isht asha ilvppa isht hvsh ahsa hi oke.

26. Atukma yakohma hi oke, hvchim vlla vhleha hvt, Nan isht asha ilvppvt, nanta hō miha hō? hvchim achikma.

27. Chihowah im vbanvblit ont ia nan vbit isht aiokpvchi yoke ; yvmvt Echip okla hā issot kanchi mvt, Islael im vlla vhleha im aboha puta ka vbanvblit ont ia cha, pin chuka achvfa puta Echip talaia ka pi hlakofichi tok oke, hvsh acha hi oke, im achi tok. Mihma okla hvt noshkoboka isht akachunoli cha, aiokpvchi tok.

28. Micha Islael im vlla vhleha hvt ia mvt, Chihowah yvt Moses, micha Alon a im apesa tuk mak o yvmohmi tok, yohmi tok.

29. Atuk o yakohmi tok, ninak iklvna ma, Chihowah yvt Echip yakni ya vttahpi moma ka issot kanchi tok, Falaoh im vttahpi yosh im aiombinili holitopa binili tuk a vttvt ia hosh yuka hosh aboha kvllo ya itonla ka ont vhli, micha nanvllhpoa vttahpi puta moma tok.

30. Mihma ninak a Falaoh, micha in tishu vhleha moma, micha Echip okla moma kv̄t tani tok; mihma Echip a a yai-ya chito fehna tok; aboha ya ik ai illo kv̄t iksho hatuk oka.

31. Mihma ninak a Moses, micha Alon a hoyo cha, Ho wakaya, micha vm okla ai iti takla ya hv̄chishno, micha Israel im vlla vhleha aienvt kohchvt hv̄sh iashke, micha hv̄sh ia cha, hv̄sh achi tuk okvt, Chihowah ya hv̄sh im antiashke.

32. Micha hv̄chī nanvlhpoa chipinta, micha hv̄chī nanvlhpoa hochito aiena hv̄sh achi tuk okvt, hv̄sh eshi cha, oh iá, micha vno ak kia anumpa yukpali hv̄s si onochi akinlashke, achi tok.

33. Mihma Echip okla hv̄t anukwayvt yakni kohcha chi k̄a okla h̄a im acheba fehna tok; momvt illit pi taha chishke, achi hatuk okvt.

34. Mihma okla hv̄t tansh yamvska ik shatvmmo k̄isha h̄o, micha a yamvska aiena k̄a i na fohka abonunta h̄o cshit iabanali tok:

35. Micha Israel im vlla vhleha hv̄t Moses im anumpa hatuk mak o yvmihchi tok: micha Echip okla h̄a tv̄li hv̄ta isht ilakshema, micha tv̄li holisso lakna isht ilakshema, micha nafohka aiena k̄a im a pota tok.

36. Mihma Chihowah yvt okla h̄a Echip okla itikba ya holhpanayo hanta ya ima tok; yohmi h̄o nana h̄o bunnakma im pota tok: mihma Echip okla h̄a wehpuli tok.

37. Mihma Israel im vlla vhleha hv̄t Lameses ashvt ia mvt, Sukkolh a ona tok, hatak akanowa yvt, vlla yvt aholhtina keyu k̄a tahlepa sipokni tahlepa hannali foka tok.

38. Mihma okla lawa itvnohova ak inli hosh apehvt ia tok: mihma nanvlhpoa chipinta, micha nanvlhpoa hocheto, nanvlhpoa laua fehna, hatok.

39. Mihma tansh yamvska Echip ai ishit kohcha k̄a ik shatvmmo hatuk oka, pv̄ska luboa ik shatvmmo nunachi tok; Echip a kocha pit tihleli, mihma āsha he keyu hatuk okvt, micha ilhpak kia ik ila tahlo tuk atok.

40. Yohmi k̄a Israel im vlla vhleha hv̄t Echip aiasha kv̄t afv̄mmi tahlepa ushta cha pokoli tuchina hatok.

41. Atuk o yakohmi tok, afv̄mmi tahlepa ushta cha pok-

oli tuchina kvt ont taha ma, nitak yvmmak fehna ka yakohmi tok, Chihowah im okla moma kvt Echip yakni ya kohchvt ia tok.

42. Pehlichit Echip yakni ya kohcha tok, Chihowah ya i holitobli fehna he ninak oke; Chihowah i ninak ilvppak o Israel im vlla vhleha moma im aittishali puta kvt holitobla he mak oke.

43. Mihma Chihowah yvt Moses, micha Alon a, Ilvppa vbanvblit ontia nanvlhpisa mak oke, okla inla yvt vpa he keyu hoke.

44. Amba hatak moma in tishu tvli holisso isht chumpa tuk o, hakshup ish tvbli tukma mih yosh vpa hi oke.

45. Okla inla, micha tishu ilhtohno hokvto vpa he keyu hoke.

46. Chuka achvfa ho ai vpa hi oke, nipi ya kaniohmi kia aboha ya ishit ish kohcha he keyu, micha foni achvfa kia hvsh kobvffa he keyu hoke.

47. Israel okla moma kvt holitobla hi oke.

48. Atukma okla inla hatak osh hvchi okla ahanta tuk osh, Chihowah im vbanvblit ontia ya holitobli bvnna kmvt, nakni moma kvt hakshup tvpashke. Yohmikmvt bilika vla cha, holitoblashke, micha yakni ya ai vtta tok a chohmashke; hatak hakshup tupa keyu kvt vpa he keyu hoka.

49. Nanvlhpisa achvfa hosh i yakni aivtta tok, micha okla inla yosh hvchi takla ahanta aiena ka im itoyula hi oke, im achi tok.

50. Ilvppak o Israel im vlla vhleha moma kvt yvmohmi tok. Chihowah yvt Moses, micha Alon a im apesa tuk mak o yvmihchi tok.

51. Atuk o mih nitak akinli ka yakohmi tok, Chihowah yvt Israel im vlla vhleha apehlichi vlhpisa ho pehlichit, Echip yakni ya kohchi tok.

CHAPTA XIII.

MIHMA Chihowah yvt Moses a im anumpulit,
2. Israel im vlla vhleha nana hosh hatak okma, nan-

vlhpoa yokmá, nana im oshvtto ya tiwi ka is sa hullochashke, vmmi hoke, achi tok.

3. Mihma Moses vt okla ha, Himak nitak ak o, Echip, micha aboha ayuka hvsh kucha tok vt hvsh ithaiyanashke; ibbak hlompko hosh Chihowah yvt ilvppa a hvchi kuchi tuk oke, pvska shatvmmi ya vpa he keyu hoke.

4. Himak nitak hvshi Abib ak o hvsh kuchvshke, im achi tok.

5. Atukma yakohma hi oke, Kenanait, micha Hittait, micha Amolait, micha Hifait, micha Chebusait i yakni, pishukchi, micha foe-bila a yanahanli yakni a hvchima chi hosh, hvchiki vhleha ha anumpa kullo il im onohonchi tok a, Chihowah yvt hvch ishtonakma, nan isht asha ilvppa hvshi ilvpak o isht hvsh aiasha hi oke.

6. Nitak untuklo ho pvska ik shatvmmo hvsh pa hi oke; atukma nitak untuklo kvv Chihowah impvchi ya hi oke.

7. Pvska ik shatvmmo nitak untuklo ho vpa hi oka, mikma pvska shatvmmi yvt hvchin toyula na, pisa he keyu hoke, micha hvsh abinat moma ka shatvmmi vt hvchin toyula na, pisa he keyu hoke.

8. Atukma nitak yvmma chiso ha im anolit, Ilvppa yakohmi kvv Echip a kohcha li ma, Chihowah yvt nana sa kanihmichi tok ak oke, ish achashke.

9. Mikma nan ishtatokowa yosh chibbak a lapala chi, micha ishit hvsh ithana bilia yosh hvchi nishkin ititakla ya takala chi hoke; yvmohmi ho Chihowah i nanvlhpisa hvv hvch itih ha foyuka chi hoke; Chihowah yvt ibbak hlompko hosh pehlichit Echip a hvchi kuchi tuk oke.

10. Yvmohmi hoka nanvlhpisa ilvppa ont aivlhpesakma, afvmmi hosh afvmmikma isht hvsh aiasha hi oke.

11. Atukma yakohma hi oke, Chihowah yvt, chishno, micha chiki vhleha ha anumpa kullo ya im il onochi tok mak osh, Kenanait i yakni chishtona cha, chimakma,

12. Uttahpi puta im oshvtto tiwi moma ka Chihowah ish i hullocha hi oke, mikma nanvlhpoa chim asha puta ka uttahi pi moma nakni puta kvv Chihowah immi ha hi oke.

13. Issuba nashoba vttahpi puta ka chukfushi yo falvmminchit isht ish chumpa hi oke, micha falvmminchit ish chumpa he keyukmvt, ikunla ya ish kotvffa hi oke: micha chim vlla itin takla ya hatak osh vttahpi moma ka falvmminchit ish chumpa hi oke.

14. Atukma yakohma hi oke, Nitak himak minti ka chiso hvv chim ponaklot, Ilvppvt nanta hoh cho? achikma, Chihowah yvt ibbak hlampko hosh pehlichit Echip yakni, micha aboha ayuka ha pi kohchi tok oke.

15. Micha yakohmi tok. Falaoh vt ik ia, kvllo hosh pi ahna he keyu ma, Chihowah yvt Echip yakni vttahpi moma ka, hatak vttahpi, micha nanvlhpoa vttahpi aiena ka is-sot kanchi tok; yvmohmi tok ak o nakni yosh im oshvtto tiwi moma ka vbit Chihowah isht aiokpvccheli hoke; amba vm vlla vttahpi moma ka falvmminchit chumpa li hoke, ish im achashke.

16. Atuk o nanisht atokowa yosh chibbak a lapala he, micha itikba takali yosh chi nishkin iti takla ya takala hi oke; ibbak hlampko hosh Chihowah yvt pehlichit Echip a pi kohchi tok oke.

17. Atuk o yakohmi tok, Falaoh vt okla ha ik ia im ahni ma, Chitokaka yvt pehlichit hina Filistin i yakni hlopullichit isht ik aiyo tok; yvmmak osh ik hopako ak inli kia; okla hvv tvnvp a pisakmvt nukhaklo cha, falamvt Echip a ona yoba na, Chitokaka yvt achi hatuk okvt.

18. Amba Chitokaka yvt okla fullolihinchit okhvta humma yakni haiaka ak o hlopullichit isht aya tok; mihma Israel im vlla vhleha hvv nahalupa im vlhtaha hosh Echip yakni a kohchvt ia tok.

19. Mihma Moses vt Chosef foni ya isht ia tok; Israel im vlla vhleha ha atokolit anumpa kvllo im il onochechit, Chitokaka yvt hvchim aya pulla hi oke; mikma sa foni ya ilvppa ai ishit hvsh ia hi oke, achi tok oka.

20. Mihmvt Sukkolh a asht ia mvt Ehlam a yakni haiaka vhli ya a binachi tok.

21. Mihma Chihowah yvt itikba ivt in tikba heka kvv nitak ma, tonik hoshonti hosh hikia beka tok; atuk osh

ninak ma in tohwikela chi kvt, tonik luak osh hikia beka tok; nitak, micha ninak ma, aya chi hatok.

22. Nitak ma hoshonti tonik atuk osh ninak ma tonik luak vt okla itikba hikia tuk a kanvlichit ik im esho tok.

CHAPTA XIV.

MIHMA Chihowah yvt Moses a im anumpulit,

2. Israel im vlla vhleha ha ish im anumpoli na, fullovt Pihahiloh itikba Miktol micha okhvta iti takla, Baal-Sifon i chapaka yak o binachashke.

3. Falaoh vt Israel im vlla vhleha ha, Yakni ya ai ia ikit-hano hoke, yakni haiaka yvt im okshitvshke, acha hi oke.

4. Mihma Falaoh ya chukvsh a kvlochi likma, iakaiya chi hoke, mikma Falaoh, micha in tvshka moma ka ishit sa holitopa chi hoke. Yvmohmi ho Echip moma kvt Chihowah sia ka ithana chi hoke, achi tok. Mihma yvmohmi tok.

5. Atuk o Echip i miko ya, Okla hvt tihlaia ka im anoli tok: mihma Falaoh chukvsh, micha in tvshka vhleha chukvsh aiena kvt okla hash i sanalit, shanaia cha, Nantihmi ho ilvppa e yvmihchit, Israel vhleha hvt pin toksula he tuk a ik ia il im ahni tuk oh cho? achi tok.

6. Mihmvt tnvvp im itichanvlli ha atahli mvt, im okla aiena ka ishtia tok.

7. Micha aiowa hosh itichanvlli tahlepa hannali, micha Echip itichanvlli moma, micha i kvpitvni moma ka ishi tok.

8. Mihma Chihowah yvt Echip i miko Falaoh ya chukvsh a kvlochi na, Israel im vlla vhleha ha iakaiyvt hliohli tok; mihma Israel im vlla vhleha hvt ibbak kvlo hosh kohchvt ia tok.

9. Yvmohmi tuk kia Echip okla hvt iakaiya tok, (Falaoh ya im issuba, micha tnvvp im itichanvlli moma, im issuba om binit, micha in tvshka chipota aiena hosh) atuk osh okhvta lapali ka Pihahiloh ichapaka Baal-Sefon itikba ak o binachit aiasha na, ont sakki tok.

10. Atuk osh Falaoh vt bilika mihinti ma, Israel im vlla

vhleha hvt akachakali ma, yakeh, Echip okla hvt iakaiyvt minti tok, mihma nukshopa fehna tok, mihmvt Islael im vlla vhleha hvt chitolit Chihowah ya im paya tok.

11. Mihmvt Moses a Echip a ahollohpi iksho kak o yakni haiaka a pilla chi ka ilvppa pisht ish la tuk oh cho? Nantihmi ho ish pi yvmihchit, Echip yakni ya ish pi kohchi tuk oh cho?

12. Echip a anumpa ilvppak o e chim anolit, Ik ashá, ish pim ahni na, Echip okla ilin toksvlashke, e chim achi tok keyu cho? Echip okla ha il im antia kak osh achukma kvt haiaka ai illit pi taha chi ka i shali hokah, im achi tok.

13. Mihma Moses vt okla ha, Hvchi nukshopa ná, lumvt hieli cha, Chihowah im ai okchaya himak nitak a hvchi pisa-cha chi ka hvsh pisashke: Echip okla ha himak nitak a hvsh pisa tuk vt, himakma anonti hvchik peso ho bilia chi hoke.

14. Chihowah yvt hvchim itiba chi hoke; mihma luhmvt hvsh hiela chi hoke, im achi tok.

15. Mihma Chihowah yvt Moses a, Nantihmi ho is sa paya cho? Islael im vlla vhleha ha ish im anumpuli na, tikba iashke.

16. Yohmi kia chin tvbi ya vba ish wieli cha, chibbak a okhvta paknaka ya ish wieli cha, ish iti filvmmichashke, mikma Islael im vlla vhleha hvt yakni shila yo okhvta iklvnna hlopulla chi hoke.

17. Mikma Ūno, yakeh, vno vt Echip okla chukvsh a kvlochi likma, iakaiya chi hoke, mikma Falaoh, micha in tvshka moma, micha tvnvp im itichanvlli, micha im issuba ombinili puta ka holitopa isht ishe la chi hoke.

18. Mihma Echip okla hvt, Falaoh tvnvp im itichanvlli, micha im issuba ombinili puta ka holitopa isht ishe likma, vno ak osh Chihowah sia ka ithana hi oke, im achi tok.

19. Mihma Chitokaka im enchil vt Islael i bina ha tikba aya tuk vt kanvllit asha ka ona tok, mihma tonik hoshonti hvt tikba ia tuk vt asha ka ont hikia tok.

20. Mihma Echip okla i bina, micha Islael i bina iti takla ona tok; mihmvt yvmvno i hoshonti okhlili mvt, amba

iluppreno ninak o in tohwikeli tok; yohmi ho achvut ont i bilinchi keyu ho ninak vt ont hlopulli tok.

21. Mihma Moses vt ibbak a okhuta paknaka pit weli tok; mihma Chihowah yvt hvshi akochaka mahli kullo ho ishtvutvut ninak yummak o hlopullichich, oka ya falvmmichi mvt, okhuta ha yakni shila ikbi tok, mihma oka yvt iti filvmmi tok.

22. Mihma Israel im vlla vhleha hvv yakni shila yo okhuta iklvna ona tok; mihma oka yvt holihta tovt isht impakimma, micha vlvfbekimma hikia tok.

23. Mihma Echip okla hvv iakaiyvt mahaya mvt, Falaoh im issuba moma tvv im itichanvlli, micha im issuba ombinili puta aiena kvv okhuta iklvna ona tok.

24. Atuk o yakohmi tok, onnahinli atoni ya, Chihowah yvt tonik luak, micha hoshonti ha hlopullichit pisa cha, Echip okla tvshka chipota ya komvtrchi tok.

25. Michav tvv im itichanvlli chvna ya shvfi na, shavllit weki tok; yohmi ma Echip okla hvv Israel vhleha i filvmmi eho tihlaiyashke, Chihowah yvt Echip okla ha i sanalit im itibi hoka, achi tok.

26. Mihma Chihowah yvt Moses a, Chibbak a okhuta paknaka ish o welashke; yohmi na oka yvt anonti vla cha, Echip okla ha, micha tvv im itichanvlli, micha im issuba ombinili puta ompohomashke, im achi tok.

27. Mihma Moses vt ibbak a okhuta paknaka o weli tok: atuk o onnahinli ma, okhuta hvv kullo hosh falavv tikba yatuk a chohmi tok: mihma Echip okla hvv yihlevv ai isso tok: mihma Chihowah yvt Echip okla okhuta iklvna ho oka tvvli tok.

28. Mihma oka vt falama cha, tvv itichanvlli, micha issuba ombinili puta, micha Falaoh in tvshka vhleha moma Israel a iakaiyvt okhuta ha et chukova tok, moma ka ompohomo tok: achvfa illa kia ik hlakoffo tok.

29. Amba Israel im vlla vhleha hokvto okhuta iklvna yvt yakni shila yo a nowa tok: mihma oka yvt holihta yosh im ishtimpakimma, micha im vlvfbekimma yo i hikia tok.

30. Yakohmi hosh nitak yvma Chihowah yvt Israel a

Echip okla ibbak a kohchit okchalinchi tok: atuk o Echip okla illi vt okhvta vhli aiasha na, Israel vt pisa tok.

31. Micha Israel vt Chihowah yvt nachinto fehna ho yvmihchit Echip okla ha onochi ka pisa tok; mihmvt okla hvt Chihowah ya i nukshopa cha, Chihowah, micha Moses aiena ka i yimmi tok.

CHAPTA XV.

MIHMA Moses micha Israel im vlla vhleha aiena kvt taloa ilvppa Chihowah ya in taloa cha, anumpulit, Chihowah ya in taloa la chi hoke, im aiyvt holitopa hoka, issuba micha im om binili kash okhvta ha oka kvnivchi hoke.

2. Chihowah ak osh vmi hlampko, micha vm ilhtalowak oke, micha aiokchaya li tobvshke; yvmmak osh an Chitokaka yoke; atuk o ai ahanta im atahli la chi hoke: aki in Chitokaka yoke, atuk o holitoblichy la chi hoke.

3. Chihowah yvt hatak tvnvp oke, hohchifo kvt Chihowah yoke.

4. Falaoh im itichanvlli, micha in tvshka chipota aiena ka okhvta pit kanchi tuk oke, in kvpetvni aiowa vhleha hash okhvta humma ya oka tmoli tuk oke.

5. Hofobi vt ompohomo tuk oke, tvli chohmit oklobushlit aka ona tuk oke.

6. Chihowah ma, chim ishtimpakimma yvt nan isht im aiahli ya isht holitopvshke, Chihowah ma chim ishtimpakimma yak osh tvnvp a bushullichit kanchishke.

7. Micha chim aholitopa chinto kak osh chi sanalit hikia tuk a ish im aiyashke, chim ai i nukkilli ya ish kanchi na, onush vpi chohmichit hukmit tahli tuk oke.

8. Chibishakni fiopa ma oka yvt isht itvnaha tuk oke: oka chito vt itvnaha chohmit wakayvt hikia tuk oke, okhvta iklvnna ahofobi yvt kalampi tuk oke.

9. Tvnvp vt, Hlioli lashke, sakki lashke, nawehpoa ya itakvshkoa lashke, sabvna tuk vt sa fihopashke, am bvshpo falaia ya halvllit shufi lashke, svbbvk vt ishit kanchashke, achi tuk oke.

10. Chi mahli ha ish om mahlichy na, okhuta hvt om-pohomo tuk, naki chohmi kvv oka chito ya a kvnnia tuk oke.

11. Chihowah ma, naholbvt toba puta im ai itin takla ya, kvta hak osh chishno chiyuhmi cho? nan ashvchi ik im ik-sho holitopa, holitopvt annohova kvv chinto, nafehna yvmih-chi chia hoke: kvta hak osh chishno chiyuhmi cho?

12. Chibbak isht impakimma ya ish wieli ma, yakni vt ishit nanvbli tuk oke.

13. Chishno vt ish i nukhaklo kak osh okla ha falvmminchit ish chumpa tuk vt pehlichit ish kohcha tuk oke: chimi hlampko ak o ishit pehlichit ish aiahanta holitopa ya isht ish ona tuk oke.

14. Okla hvt haklo cha, nukshopa hi oke; Palestina aia-sha okla ha nukhaklo yosh chukvsh a isha hi oke.

15. Yohmi ma Etom holitopa vhleha hvt nukhlakanacha hi oke; Moab hatak kvllo vhleha ha vwnihinchy yosh onvtola hi oke, Kenan aiasha okla hvt momvt bilvt tvmoa hi oke.

16. Nukshopa, micha komota hosh onvtola hi oke; chi shakba kvllo kak o lumvt tvli chohmi na, chim okla hvt ont ia hi oke, Chihowah ma, okla ish chumpa tuk vt ont ia hoke.

17. Micha chi yakni, nvniha ha ish ai vtta he yosh ish ikbi tok vt, ishtonvt ish a hilecha hi oke. Chihowah ma; vlti-po holitopa yvmmak oka chibbak osh kvllochit hilechi tok vt, Chihowah ma.

18. Chihowah yvt miko na bilvt bilia chi hoke, ahanchi tok.

19. Falaoh im issuba hvt tvnvp im itichanvlli, micha issuba ombinili aiena kvv okhuta ha pit chukowa tuk; mihma Chihowah yvt okhuta oka ya falvmminchit, anonti ishtvltv onochi tuk; amba Israel im vlla vhleha hvto, yakni shila yo okhuta iklvna aya tok.

20. Mihma hopaii ohoyo Alon in tek Miliam vt timbil ishi tok; mihma ohoyo moma kvv iakaiyvt timbil ieshi cha, hihihla hosh kohchvt ia tok.

21. Mihma Miliam vt im afalvmminchy mvt, Chihowah ya

hvsh in taloashke, holitopa hosh im aiya hoka; issuba, mi-cha im ombinili kash aieninchit okhvta ha pit kanchishke, achi tok.

22. Yohmi ho Moses vt Israel a pehlichit okhvta humma ya ashvt kohchi tok; mihma okla kohchvt ivt, Shu yakni haiaka ya nitak tuchina anowa ona mvt, oka ik ahayucho tok.

23. Atuk osh Malah ya ona mvt Malah oka ya ai ishka he keyu tok; homi hatuk oka; yvmohmi hatuk o hohchifo ka Malah achi tok.

24. Mihma okla hvvt Moses a nanumachit, Nanta ho il ishka chi cho? achi tok.

25. Mihma Chihowah ya i paya tok; mihma Chihowah yvt iti yo pisachi na, yvmmak ash oka pit okvchi ma, oka yvt champulli toba tok; yvmmak o nanvlhpisa bilia, micha nan isht apesa yo im ikbi tok, micha yvmmak o aiimoma ka pisa tok.

26. Micha Hvchin Chitokaka Chihowah im anumpa ha achunanchit hvsh i haponaklo cha, itikba ya ai vlhpiesa kak o yvmihinchit, im anumpa vlhpisa ha hvsh i haponaklot, i nanvlhpisa puta ka hvsh holitoblikma ililli ilvppa puta ka Echip okla ha onochi li tok vt hvchi onochi la he keyu hoke; Chihowah sia hosh hvchi hlakofichi li hoka, achi tok.

27. Atuk osh Elim, yvmma kvli hofobi auhtuklo, micha pam iti pokoli untuklo hosh hiohmaya tok, mihmvt yvmmak o oka bilika binachi tok.

CHAPTA XVI.

ATUK osh Elim a ashtia tok: mihma Israel okla moma kvvt Sin yakni haiaka, yvmmvvt Elim micha Saina itin takla talaia ka, Echip yakni ya kohcha tok vt hvshi atukla, micha nitak ont isht auhtahlapi fehna ona tok.

2. Mihma Israel im vlla vhleha okla moma kvvt yakni haiaka ya Moses, micha Alon a i sanalit nanumachi tok.

3. Micha Israel im vlla vhleha hvvt, Chitokaka yvt ahni

na, Echip yakni ya Chihowah ibbak ishit pilli tuk bano, nipi shuti yo il a chieya, micha pvska vpv̄t pi kaiya ma, yakni haiaka ilv̄ppa pisht hv̄shla, okla ilv̄ppa moma ho hohchv̄fo isht v̄bit hv̄sh tahla chi hoka, im achi tok.

4. Yohmi ma Chihowah yvt Moses a, Yakeh, v̄ba ya pvska et hv̄chi umbr̄che la chi hoke; mikma okla hv̄t kohchv̄t nitak moma vlhpisa kaniohmi ho aiowa bieka; yvmohmi a nanvlhpisa ha anowa hinlakmá, keyukmá, nanakmá imomaka pisa la chi hoke.

5. Atuk osh yakohma hi oke, nitak ont isht hannalikma isht v̄la tuk vt atahla hi oke: mikma nitak moma ka aiowa beka tuk a inlohmi tukla hi oke, achi tok.

6. Mihma Moses micha Alon vt Israel im v̄lla v̄hleha moma ka, Opiakma Chihowah ak osh Echip yakni ya pehlichit a hv̄chi kohchi tuk a hv̄sh ithaiyana chi hoke.

7. Atuk osh onnahinlikma Chihowah a holitopa ya hv̄sh pisa chi hoke, Chihowah i sanalit hv̄sh nanumachi ka haklo hoka; mikma pishno vt nanta pia hatuk o nan ish pi nanumanchi cho? achi tok.

8. Micha Moses vt Ilv̄ppak achi hoke, Chihowah yvt opiakma nipi v̄pa chi ho hv̄chima, atuk osh onnahinlikma pvska hv̄chimvt hv̄chi kaiyachikma, Chihowah yvt nanumachi ishtisanalit hv̄sh nanumachi ka haklo hoka, pishno v̄to nanta pia hoh cho? hv̄sh nanumachi kv̄t pishno ak o keyu; amba Chihowah ak oke, im achi tok,

9. Mihma Moses vt Alon a im anumpulit, Israel im v̄lla v̄hleha okla moma ka, Chihowah itikba hv̄sh lashke, hv̄sh nanumanchi ka haklo hoka, ish im achashke, im achi tok.

10. Atuk o yakohmi tok, Alon vt Israel im v̄lla v̄hleha okla moma ka im anumpuli ma, haiaka pilla okla pit hopokoyo ma, yakeh Chihowah isht a holitopa vt hoshonti ha fokv̄t haiaka tok.

11. Mihma Chihowah yvt Moses a im anumpulit,

12. Israel im v̄lla v̄hleha nanumanchi ka haklo lishke, im anumpulit, opiakma nipi hv̄sh pa chi hoke; mikmvt onnahinlikma pvska hv̄chi kaiya chi hoke; micha v̄no hv̄chin

Chitokaka Chihowah sia ka hvsh ithaiyana chi hoke, ish achashke, achi tok.

13. Atuk o yakohmi tok, opia ma, kofi vt vla cha, abinan-
chi ka ompohomo tok; atuk o onnahunli ma fichak vt binah
ha apakfopvt aiasha tok.

14. Atuk osh fichak itoyula kash osh vba ia ma, Yakeh
yakni paknaka nana lumbo chipintasi, okti hvt chipintasi
kvt chohmi hosh aka yo asha tok.

15. Atuk o Israel im vlla vhleha hvt pisa mvt, ilap bika,
Ilvppvt manna yoke, Ilvppvt nanta hoh cho? itim achit, nan
ik ithano hatuk okvt; mihma Moses vt, Puska ilvppak o
hvsh pa chi ho Chihowah yvt hvchima tuk oke.

16. Nana ilvppak o Chihowah yvt apesa tuk oke, Hatak
moma kvt vpa he vlhpesa kak osh aiowashke, hatak achvfa
ka oma isht vlhvisa iskitini achvfat ishtia, hatak holhtina
chi kaniohmi tuk a vlhpisashke hatak moma kvt binah aia-
sha ka im eshashke, im achi tok.

17. Mihma Israel im vlla vhleha hvt yvmihchi tok, micha
kanimi kvt i shahli, kanimi kvt ik lauwo ho aiowa tok.

18. Atuk o oma isht apesa ma, laua aiowa tuk vt im atam-
pa kvt iksho ma, kanomosi aiowa tuk vt ik im ono kvt ik-
sho tok, hatak moma kvt vpa he vlhpesa kak osh aiowa tok.

19. Mihma Moses vt Asha na kvna kia onnahunli ik im
onno kashke, im achi tuk oke.

20. Yohmi kia Moses a ik i haponaklo tok; amba kanimi
kvt ashanchi na onnahunli onna tok; atuk o shushi tobachi
cha shua tok, mihma Moses vt i nukhobela tok.

21. Atuk o onnahunlikma hatak moma kvt vpa he vlhpe-
sa kak osh aiowa beka tok; atuk o hvshi vt lvshpvt taha
ma bila beka tok.

22. Atuk osh yakohmi tok, nitak ont isht hannali ma in-
lohmi tuklo puska hatak achvfakmvt oma tuklot ia ho aiowa
tok, mihma okla moma ka pehlichu moma kvt vlv, Moses a
im anoli tok.

23. Mihma Ilvppak o Chihowah yvt achi tuk oke, Onna-
ha yvt a foha Chihowah i nitak holitopa yoke; micha hvsh
puska chi kvt himak nitak ak o hvsh puskashke; micha

hush hona chi kvt hush honashke; micha hvchim atampa kvt hvchin talaia na onnashke.

24. Mihma Moses vt im apesa tuk mak o ashanchi na onna tok, mihma shua kvt iksho ma, shushi nana kia iksho tok.

25. Mihma Moses vt, Himak nitak a yvmmak o hvsh-pashke, himak nitak vt Chihowah i nitak hullo hoke, himak nitak a haiaka ya asha na ish ahayucha he keyu kvt.

26. Nitak hannali ho hvsh aiowa chi hoke; amba nitak untuklo hokvto nitak holitopa hoke, yvmmak okvno hvsh ahayucha he keyu hoke, achi tok.

27. Atuk o yakohmi tok, nitak ishtuntuklo ka okla hash kanimā kvt aiowa chi hosh kohchvt ia tuk osh ik ahayucho tok.

28. Mihma Chihowah yvt Moses a, Katiohmi foka ho vm anumpa vlhpisa, micha a nan vlhpisa ka im antia ik hvchi bvnno ka chi cho?

29. Yakeh, Chihowah yvt nitak hullo ya hvchima tuk oke; yohmi hatuk osh nitak isht hannali ka nitak tuklo pvska ya hvchima tuk oke; hatak hvsh moma kvt hvsh ai asha aiyukali hvsh aiashashke; hatak achvfa kia nitak isht-untuklo ka aiasha tuk vt kohchvt ik aiyo kashke, im achi tok.

30. Yohmi ho okla hvt nitak isht untuklo ka foha tok.

31. Mihmvt Israel in chuka achvfa yvt hohchifo ha Manna, achi tok, micha tohbi kvt kolianta nihi chohmi tok; micha vpvtpisa ka pvska lumbo foebila ishit toba chohmi tok.

32. Mihma Moses vt, Nana ka ilvppak o Chihowah yvt apesa tok oke, Hvchim ai itishali hvt in talaia chi ho, oma achvfa ho alotolit hvsh talalashke; yvmohmi tuk o Echip yakni ya apehlichit hvchi kohchi li mvt, yakni haiaka ya pvska ishit hvchipeta li tok a pisashke, achi tok.

33. Micha Moses vt Alon a, Shutu eshi cha, manna ya oma alota achvfa ho ish alotolashke, micha hvchim ai itishali vt in talaia chi ho Chihowah itikba ya ish talalashke, im achi tok.

34. Chihowah yvt Moses a im apesa tuk mak o, talaia chi ho Alon vt itombi holitopa itikba talali tok.

35. Mihma Israel im vlla vhleha hvt manna vput itanowa na, afvmmi pokoli ushta hosh, okla aiasha yakni yō vla tok: manna vput itanowut Kenan yakni aivhli yā ona tok.

36. Yohmi ka oma vt efa kvshkoa ishit pokoli hoke.

CHAPTA XVII.

MIHMA Israel im vlla vhleha okla moma kvt yakni haia-ka Sin ashvt ia tok; micha Chihowah yvt im apesa tuk mak o aya mvt, Lefetim a binachi tok; mihma okla ishka he vt oka vt iksho tok.

2. Yvmohmi hō okla hvt Moses a na mihachit, oka ish pima na, il ishkashke, achi tok, mihma Moses vt, Nantihmi hō na hvs sa mihachi cho? Nantihmi hō Chihowah yā imomaka hvsh pisa cho? im achi tok.

3. Mihma okla hvt yvmma oka bvna tok; micha okla hvt Moses a na mihachit, Katiohmi hō ilvppa yvmohmit pehlichit Echip a ish pi kohchi cha, pim vlla vhleha, micha pi nanvlhpoa aiena ka oka bvnvchit vbit ish pi tahla chi cho? achi tok.

4. Mihma Moses vt Chihowah yā i payvt, Okla ilvppa katiohmi chi la chi cho? tvli ishit sa bolahosi hoke, achi tok.

5. Mihma Chihowah yvt Moses a, Israel im asvnonchi vhleha hā pehlichī cha, okla hā itikba ish iashke, micha chin tvbi okhina yā isht ish isso tok vt ish eshi cha, ish iashke.

6. Yakeh, yvmma chitikba Holeb a tvli chito paknaka hikia la chi hoke, mihma tvli yā ish issa chi hoke, mikma oka yvt tvli yā a kohcha na, okla hvt oka ishka chi hoke, im achi tok. Mihma Israel im asvnonchi vhleha hvt pisa hō Moses vt yvmihchi tok.

7. Mihma Israel im vlla vhleha hvt na mihachi tuk ak o; micha Chihowah yā imomaka pisvt, Chihowah yvt piba foka hokmá, keyukmá, nanta cho? achi tuk oka, yvmma hohchifo hā Massah micha Melibah achi tok.

8. Mihma Amalek vt vla cha, Israel Lefitim a ai itibi tok.

9. Mihma Moses vt Choshua ya, Hatak a ish atokoli cha, kohchvt ivt Amalek a ish itibashke; onnakma Chihowah in tvbi ya ieshi lish nvni^h paknaka ya hikia la chi hoke, im achi tok.

10. Yohmi ho Moses vt im achi tuk mak o Choshua vt yvmihchi cha, Amalek a itibi tok, Mihma [Moses, Alon micha Hu aiena kv^t ivt nvni^h paknaka ya ona tok.

11. Atuk o yakohmi tok, Moses vt ibbak a vba wielikma, Israel im aiya tok; atuk osh ibbak a akvchikma, Amalek vt im aiya tok.

12. Yohmi kia Moses ibbak vt weki tok; mihma tvli eshi cha, nutaka i bohli na, om binili tok, micha Alon micha Hu vt achvfv^t ibbak achvfa ka vba wielichit im ieshi ma, achvfa kv^t achvfa ya im eshi tok: mihma ibbak vt talaia achvfa na, hvshi vt pit okatula tok.

13. Mihma Choshua vt Amalek, micha im okla aiena ka brshpo falaia halupa yo ishtimaiya tok.

14. Mihma Chihowah yvt Moses a, Ilvppa ithana bilia chi ho holisso ho aholissochit ish takalichashke; micha Choshua ya ish haklochashke, Amalek a ithana ya shutik nutaka ya amosholichit kanchi la chi hoke, im achi tok.

15. Mihma Moses vt alta ikbi cha, hohchifo ha CHIHOWAH nissi, achi tok.

16. Chihowah yvt Amalek itim ai itishali itiakaiyvt mahaya ka itin tanampa chi hosh, Chihowah yvt anumpa kv^llo, il onochit anumpuli hoke, achi ha tok.

CHAPTA XVIII.

NAHOLITOMPA ishtv^tta Mitian v^tta Moses ipochi Chehlo vt Chitokaka yvt Moses, micha im okla Israel aiena ka nana moma i kaniohmihⁱnchi tuk, micha Chihowah yvt Israel a pehlichit Echⁱp a kohcha tuk a haklo mv^t,

2. Yohmi mv^t Moses ipochi Chehlo vt Sippolah Moses tekchi ya falvmmichit pila ha ya,

3. Mich^a ushi tuklo ka eshi tok, yv^mma achvfa hohchifo

CHAPTA XVIII.

kvt Keshom a tok, a yakni keyu hosh yakni inla yo ahanta li hoke, achi ha tok.

4. Mihma achvfa hohchifo kvt Eliesi atok, aki in Chitokaka yvt si apela yosh Falaoh i^rbvshpo falaia ya i sa hlakofi chi tuk oke, achi tok.

5. Mihmah Moses ipochi Chehlo vt Moses ushi vhleha, micha tekchi ya pehlichit yakni haiaka Chihowah i nvniha binachit aiasha tuk im ona tok.

6. Micha Moses a Ŭno chipochi Chehlo sia hvt, chi tekchi, micha ushi tuklo kvt apeha ho pehlichit chim vla lishke, im achi tok.

7. Mihma Moses vt kohchvt ivt ipochi yash ont afama cha, im akachunoli cha, i suksowa mvt, micha im achukma kvt iti ponaklo mvt binah ha chukowvt okla tok.

8. Mihma Moses vt ipochi ya Israel pulla kak o Chihowah yvt Falaoh, micha Echip okla aiena ka kaniohmichi tuk, micha hina takla ya na palvmmi kvt onvtola tuk, moma, mikma Chihowah yvt hlakofichi tuk aiena tuk im anoli tok.

9. Mihma Chihowah yvt Israel a nana achukma ho yvmihchit, yvmmak oka Echip okla ibbak^r a kohchit hlakoffichi tuk aiena ka Chehlo vt nayukpa tok.

10. Micha Chehlo vt, Chihowah yvmmak osh Echip okla ibbak a kohchit micha Falaoh ibbak a kohchit hvchi hlakoffichi tuk vt holitopashke; yvmmak osh okla hvt Echip okla ha ibbak nutakvt aiasha tuk a hlakoffichi tuk vt;

11. Himak a Chihowah ak osh naholba puta moma i shahli ka ithana lishke; nana ka ilefehuvchi hosh yvmohmi tuk a i shahli hoka, achi tok.

12. Mihmvt Moses ipochi Chehlo vt Chihowah ya hukmit im issa ya eshi cha, vbit im issa tok; mihma Alon, micha Israel im asvnonchi moma kvt vla cha, Moses ipochi ya Chihowah itikba okla ibai impa tok.

13. Atuk osh onnakma yakohmi tok, Moses vt okla ha nan im apesvt binili tok: mihma okla hvt Moses a i hinli na, onnahinli tuk vt opia tok.

14. Atuk o Moses ipochi vt okla ha kaniohmichi moma ka pisa mvt, Nanta mak o okla ish yvmihchi cho? Nantih-

mi ho chishno ak bieka hosh ish binili na, okla moma kv̄t chī hiel̄i na, onnahinli tuk vt opia hoh cho? im achi tok.

15. Mihma Moses vt ipochi ya Chitokaka ya ī ponakla chī kv̄t, v̄m vla hoka, im achi tok,

16. Achv̄fa hosh inla ya nan it̄i kaniohmi cha, v̄m v̄lakma im itin takla ya nan im apesa li hoke; micha Chitokaka ī nanv̄lhpisa, micha ī nanv̄lhpisa bilia ya ithv̄nanchi li hoke, im achi tok.

17. Mihma Moses ipochi vt, Nana ish yvmihchi kv̄t achukma keyushke.

18. Chishno, micha okla ilv̄ppa chī apeha aiena kv̄t hoyv̄blit hv̄chi taha chī hoke; nana ilv̄ppvt chī weki fehna hoka, chishno ak bano kv̄t ish atahla he keyu hoke.

19. Ūm anumpa is sā haponaklashke, na chī miha lashke, mikma Chitokaka yvt̄ chiba foyukashke; mikma chishno vt̄ okla ha Chihowah isht ai anumpuli chia hashke: yvmohmi na, nan im akaniohmi kā Chitokaka yā isht ish im onashke.

20. Micha nana akaniohma he nanv̄lhpisa, micha hina ataya he micha natoksv̄li yā yvmihcha he aiena kak ō ish im av̄vchashke.

21. Micha okla moma kā akohchvt̄ hatak kv̄llo, Chitokaka ī nukwiya, hatak ah̄li, nan anushkunna yā shitilema ak ō ish ahayuchashke; micha yohmi kak ō, tahlepa sipokni pehlich̄i, tahlepa pehlich̄i, pokoli tahlapi pehlich̄i, micha pokoli pehlich̄i ish ī hiohlechashke.

22. Mikma nitak moma okla hā nan im apesashke, atukma yakohmashke, nana chito moma kā isht chim v̄lashke: nana iskitini moma kā ilapinli hosh apesashke: yohmi hō chishno vt̄ ik chī kv̄llokma, na weki kā okla chiba shaiyashke.

23. Ilv̄ppak ō ish yvmihchikma, micha Chitokaka yvt̄ yvmihchit chim apesakma, yohmikma ish hlopulla chī hoke; mikma okla ilv̄ppa moma kv̄t nuktaiyav̄t im aiasha yā onashke.

24. Yohmi ma Moses vt̄ ipochi im anumpa ī haponaklo cha, nana achi tuk ā moma yvmihchi tok.

25. Mihmvt̄ Moses vt̄ Israel moma kā hatak kv̄llo hā ato-

kolit okla ha i nushkoboka ikbi na, tahlepa sipokni pehlichy, tahlepa pehlichy, pokoli tahlapy pehlichy, micha pokoli pehlichy tok.

26. Mihma nitak moma ho okla nan im apesa tok; nana kvllo kvno Moses a isht im ona cha, amba nana iskitini ka-ilapak inli hosh apesa tok.

27. Mihma Moses vt ipochy ya ik ia ahni na, ia tok; mihma ivt ilap i yakni ya ona tok.

CHAPTA XIX.

ISLAEL im vlla vhleha hvvt Echip yakni ya kohcha tok, hvshi ont isht atuchina mihi yo nitak fehna Sinai yakni haiaka ya ona tok.

2. Lefitim a asha tuk vt ia tuk osh Sinai chukushmi ya ona cha, yakni haiaka ya binachy tok; micha yvmmak o Israel vt nvniht itikba ya abinachit aiasha tok.

3. Mihma Moses vt oiyvt Chitokaka ya, im ona tok; mihma Chihowah yvt nvniht ha Moses a et ai i howvt Chekob in chuka achvfa ya yak ish im achashke, micha Israel im vlla vhleha ha ish im anolashke.

4. Echip okla ha nana ka kaniohmichy li ka hvsh pisa tuk oke; micha ossi sanachy om binilichit shaiyalit a bilika hvch isht vly li tuk a hvsh pisa tuk oke.

5. Yvmohmi hoka himak a vm anumpa ha hvsh im asitia mvhly cha, a nan itim apesa ya hvsh holitoblikmvt, yohmikmvt okla moma i shahlit vmmi hvchia ha chy hoke; yakni vt moma kvvt vmmi hoka.

6. Mikma vm apehlichika na holitopa isht asha, micha okla holitopa, hvchia ha chy hoke, ish im achashke. Anumpa ilvppa puta kak o Israel im vlla vhleha ha ish im anumpulashke, achy tok.

7. Mihma Moses vt vly cha, okla im asvnonchy vhleha ha hoyo cha, anumpa ilvppa moma Chihowah yvt im apesa tuk a itikba bohly tok.

8. Mihma okla moma kvvt itibafokvt afalamichit Chihowah

yvt anumpuli tuk moma kak o e yvmihcha chi hoke, achi tok. Mihma Moses vt okla im anumpa ha falamichit Chihowah ya isht im ona tok.

9. Mihma Chihowah yvt Moses a, Yakeh, hoshonti sukko ho a foyukvt chim vla la chi hoke; yvmohmi ho chitim anumpule likma okla hvt haklo cha, chi yvmmi na bilia chi hoke, im achi tok. Mihma Moses vt okla im anumpa ha Chitokaka ya im anoli tok.

10. Micha Chihowah yvt Moses a, Ivt okla ha im ona cha, himak nitak, micha onnaha ya ish hullochashke, mikma i nafoka ya achefa cha,

11. Nitak atuchina chi ka im vlhtashke; nitak ont atuchinakma okla moma kvt apisa ho Chihowah yvt akowvt Sinai paknaka ya vla chi hoke.

12. Mikma ai vhli apakfoyupa ho okla ha im ikbit, Ahah hvsh ahni cha, nvni ha hvchik oiyo kashke, micha aivhli ya hvch ik potolo kashke; kvna kia nvni ha potolikmvt illi pulla hi oke.

13. Ibbak achvfa kia potola he keyu; amba yohmikmvt tvli ishit boa he, keyukmvt nvhlvt hlopulla hi oke, vlhpoa yokma keyukmvt hatak okma nana kia okchaya he keyu hoke, ishtpufa vt ola kvt falaia ma nvni ha vla hi oke, ish achashke, im achi tok.

14. Mihma Moses vt nvni ha akowvt okla ha im ona cha, okla hash hullochi tok, mihma i nafohka ya achefa tok.

15. Mihma okla ha, Nitak atuchina chi ka hvchim vlhtashke, hvchi tekchi vhleha ha bilika hvchik ono kashke, im achi tok.

16. Atuk o yakohmi tok, nitak ont atuchina onnahnli ma, hiloha, micha hvshukmulli, micha hoshonti sukko aiena kvt nvni ha onvtoyula ma, ishtpufa falaia ola kvt chitoli atampa tok: yohmi na okla moma binah asha tuk vt wvnihinchit tok.

17. Mihma Chitokaka ya itafama chi ka Moses vt okla pehlichit binah ha kohchi tok; mihma nvni akishtvla ak o hieli tok.

18. Mihma Sinai nvni hvt shobulli bieka tok, Chihowah

yvt luak afoyuka akowvt vla tuk oka, mihma shobulli vba ia kvt tvli abila shobulli kak a chiyuhmi ma, nvni hash osh momvt winakahanchi fehna tok.

19. Atuk o ishtpufa falaia ola kvt falaivt chitoli kvt isht i shahlit mahaya ma, Moses vt anumpuli ma Chitokaka yvt anumpa ha isht im afalaminchitok.

20. Mihma Chihowah yvt akowvt nvni paknaka Sinai nvni paknaka ya vla tok; micha Chihowah yvt Moses a hoyot nvni paknaka isht ona tok. Mihma Moses vt oiya tok.

21. Mihma Chihowah yvt Moses a, Akowa cha, okla ha atokolit ish i mihashke, vbanvblit ont ia cha, Chihowah ya aiokchilefi cha, lauvt illi yoba na.

22. Mikma naholitopa isht asha vhleha hv Chihowah bilika ona kvt ile hullochashke, keyukma Chihowah yvt onvtola na, im achi tok.

23. Mihma Moses vt Chihowah ya, okla hv nvni Sinai ha vla he keyu hoke; atokolit ish pi miha kvt, Nvni apakfoyupa ka aivhli ya hvsh hilechi cha, hvsh hullochashke, ish achi tuk oka, im achi tok.

24. Mihma Chihowah yvt, Mahya, akowa, atukmvt ish oiya chi hoke, chishno, micha Alon aienvt: amba naholitomp isht asha, micha okla aiena kvto vbanvblit Chihowah ya ik im ono kashke. Chihowah yvt onvtola na, im achi tok.

25. Yohmi ma Moses vt akowvt okla im ona cha, im anumpuli tok.

CHAPTA XX.

MIHMA Chitokaka yvt anumpa ilvppa moma ka anum-puli tok,

2. Vno ak osh Chin Chitokaka Chihowah sia hosh Echip yakni, micha yuka aboha ya apehlichit chi kohchi li tuk oke.

3. Naholbat toba inla yvt sa tikba chim aiasha he keyu hoke.

4. In chuvt naholbat toba, keyukmvt nana kia shutik

vba aiasha, keyukmvt nutaka yakni aiasha, keyukmvt yakni nutaka oka ai asha holba ya ish ikba he keyu hoke.

5. Aka ish im akahchunoli, micha ish aiokprcha he keyu hoke, Chin Chitokaka Chihowah sia hv̄t Chitokaka nukta_hhla sia hosh i_{ki} vhleha nanashv̄chi tuk a im vlla vhleha ai itishali ont atuchina, micha ont ai ushta kia a nukkilli ka im aya li hoke.

6. Micha tahlepa sipokni kia sa holitobli cha, vm anumpa ha holitoblikma i nukhaklo li hoke.

7. Yvmmakfokalechit chin Chitokaka Chihowah hohchifo ha ish hochifa he keyu hoke; hohchifo ha yvmmakfokalechit hochifo tukma nan ik ashacho, Chihowah yvt ahna he keyu hoke.

8. Nitak hullo nitak a ish ithaiyana cha, ish holitoblashke.

9. Nitak hanali ish toksvli cha, chin na toksvli moma ka ish atahlashke.

10. Amba nitak ont isht untuklo hokvto chin Chitokaka Chihowah i nitak hullo yoke, yvmmak ak o toksvli nana kia chishno, micha chisso, micha chisso-tek chin tishu nakni, micha chin tishu ohoyo, micha chi nanv̄lhpoa, micha okla inla yosh chi holihta okhissa anukaka chi hikia aiena kv̄t ish yvmihcha he keyu hoke.

11. Nitak hannali ho Chihowah yvt vba, micha yakni, okhv̄ta, micha nana yvma aiasha moma ka ikbi cha, nitak isht untuklo ka foha tok oke; yvmohmi ha tuk osh Chihowah yvt nitak hullo nitak a holitoblich̄i cha, hulloch̄i tok oke.

12. Chiki, micha chishki ya ish holitoblashke; yvmohmi hosh chi nitak vt falaia hosh yakni ya Chihowah chin Chitokaka yvt chima tok a ish aiahantashke.

13. Kr̄na kia ish bi ná.

14. Hv̄sh itin lumaka ná.

15. Ish hukopa ná.

16. Chin chuka a bilika hatak a i sanalit anumpa ik a_hlo anolit ish atokoli ná.

17. Chin chuka a bilika hatak in chuka ya ish anushkunna ná: chin chuka a bilika hatak tekchi, micha in tishu, micha in tishu ohoyo, i wak toksvli, micha im issuba haksobish

falaia, micha nana hosh chin chuka a bilika hatak a immi hokma ish anushkunna ná, achi tok.

18. Mihma okla moma kv̄t hiloha, micha hv̄shukmv̄lli, micha ishtpufa falaia vt ola, micha nv̄nih hv̄t shobulli aiena ka pisa tok; micha okla hv̄t pisa mv̄t, kanv̄llit hopaki ho h̄eli tok.

19. Micha Moses a, Chishno ak osh ish pim anumpulikma e haklashke; amba Chihowah yvt ik pim anumpulo kashke, pilli yoba ná, im achi tok.

20. Mihma Moses vt okla ha, Hv̄chi nukshopa ná, hv̄chi tikba ya Chitokaka im anukshopa yvt takali na, ik hv̄chi yoshobo ka ch̄i ho imoma ka hv̄chi pesvt vla hoke, im achi tok.

21. Mihma okla hv̄t hopaki ho h̄eli tok, mihma Moses vt okhlili sukko Chitokaka yvt abinili ka bilika ia tok.

22. Mihma Chihowah yvt Moses a, Yakohmichit Islael im v̄lla v̄hleha ha ish im achashke. Ūba et a hv̄chim anumpule li ak inli ka hv̄sh p̄isa tuk oke.

23. Sa takla ka tv̄li hv̄ta naholba hv̄sh ikba he keyu hoke; micha hv̄chimmi a he tv̄li lakna naholba hv̄sh ikba he keyu hoke.

24. Lukfi yo alta is sv̄m ikbi cha, hukmit isht aiokpv̄chi, micha it̄i nanaiyv̄chi isht aiokpv̄chi, chin chukfi, micha ch̄i wak aiena ka v̄bit ai onochit isht ish ai okpv̄chashke, Kanimama sa hohchifo ha a bohyuli likmv̄t hv̄chim vla likmv̄t hv̄chi yukpali la hi oke.

25. Tv̄li yo alta is sv̄m ikba ch̄i hokmv̄t tv̄li tv̄hlahli yo isht ish ikba he keyu hoke; chim ishit tv̄hlachi ya ish o wielikmv̄t ish litehla ch̄i hokvt.

26. Micha atuya yo iv̄t vm alta ya chik ono kashke; yv̄mohmi ho o hikivt ch̄i shahbi vt yv̄mmak o ik ahaiako kashke, im achi tok.

CHAPTA XXI.

YŪMOHMI ka nan ishtapesa ilv̄ppa puta kak o itikba ya ish in takali chashke.

2. Heblu tishu ish chumpakma, afvmmi hanali hō chim antiashke; atukmvt afvmmi isht untuklo ka nanvlhtoba keyu, pilla hō yuka issvt kohchvt ia hi oke.

3. Ilap bano hosh v̄la tukmvt, ilap bano hosh kohcha hi oke; ohoyo im āsha ya tukma, tekchi vt awant kohcha hi oke.

4. I shahli hvt ohoyo ima tuk o, ushi v̄hleha, micha ushetik v̄hleha aiena ka im eshi tukma, tekchi yash micha im v̄lla v̄hleha aiena kvto i shahli ak o immi ha hi oke; mikma ilap bano hosh kohchvt ia hi oke.

5. Atuk o tishu hash osh atokolit, A shahli, sa tekchi micha vm v̄lla v̄hleha ha a holitopvshke, yuka issvt kohchvt ia la he keyushke, achikma,

6. Yohmikma i shahli hvt nan apesa v̄hleha ha isht im ona hi oke; micha okhissa, keyukmvt okhissa lapali ya isht ona he ak inli hoke, mikmvt i shahli hvt haksobish a chofak ishit bahlit hlumpla hi oke, mikma in toksanli na bilia hi oke.

7. Micha hatak osh ushetik vt tishu ohoyo ya chī hō kan-chikma, hatak tishu chohmit kohchvt ia he keyu hoke.

8. I shahli ilapovchi tuk vt ik ahninchokmvt falvmmi-chit ik chumpá, ahna hi oke: oklushi inla i kanchi hokvto a yvmohma he keyu ka hi oke, ik im āhlo hosh yvmihchi tuk okvt.

9. Micha ushi ak o im apoachi tuk okmvt, ushetik v̄hleha akinli chohmicha hi oke.

10. Ohoyo inla ishikmvt im ilhpak, i nafohka, micha itauwaya he aivlhpesa vt ik onancho ka he keyu hoke.

11. Tuchina ilvppa i yvmihcha he keyukmvt, tvi holisso vlhtoba keyu kia pilla hō kohchvt ia hi oke.

12. Kvna hosh hatak a isso na, illikma illi pulla hi oke.

13. Micha im aiehchi tuk keyu, amba Chitokaka ak osh ibbak a fohki tukma, malelit ai ona ya chim apesa la hi oke.

14. Amba hatak osh ilapunlv̄t haksichit chuka a bilika hatak o v̄ba chī hosh im ona tukma, vm alta ya i filvmmi-chit isht ish ia na, illashke.

15. Mikma kvna hosh īki micha ishki ya issokmvt illi pulla hi oke.

16. Micha kvna hosh hatak a hukopa cha, kanchi tuk, keyukmvt ibbak a fohkvt haiakakma illi pulla hi oke.

17. Mikma kvna hosh iki micha ishki ya, kalakshichit mihachikmvt illi pulla hi oke.

18. Mikma hatak vt iti kvllot ashwa tuk o, achvvt tvli, keyukmvt ibbak bonullit isht isso, atuk o, ik illo kia in topa itoyulakma,

19. Atuk osh anonti wakaya cha, in tvbi ieshit kohchvt hikikiakma, isso tuk vt ikashofa hi oke, peh nitak i kvnia tuk ak o atobba hi oke, micha hlakofichit vmohmicha hi oke.

20. Mikma hatak osh i yuka hatak, keyukmvt i yuka ohoyo yo iti tupa isht isso tuk o, micha ibbak onuchi pulla ho illikma, nahotopa onvtula pulla hi oke.

21. Yohmi kia itonla na, nitak achvfa, keyukmvt nitak tuklo ona tuk okmvrno, nahotopa onvtula he keyu hoke, in tvli holisso ya tuk oka.

22. Hatak vt iti kvllo cha, ohoyo vlla shali yo hotopali, yohmi na, vlla vt im akvma, yohmi kia achahaya kvk ik aiokpulokma, ohoyo i hatak ak osh apesvt onochi ho, nahotopa onvtula pulla hi oke, micha nan apesa vhleha hvk apesa ho atobba hi oke.

23. Amba achaka kvk aiokpulokma, fiopa hatuk a fiopa akinli ho hvsh abanalashke.

24. Nishkin okma nishkin, noti yokma noti, ibbak okma ibbak, iyi yokma iyi,

25. Hushmi yokma hushmi, nipi okpuni yokma nipi okpuni, fuma hokma fuma hashke.

26. Mikma hatak osh i yuka hatak, keyukmvt i yuka ohoyo yo nishkin a isso na, nishkin vt kvniakma, nishkin atuk mak o yuka issvt ik ia, im ahnashke.

27. Micha i yuka hatak noti a, keyukmvt i yuka ohoyo noti a issot kohchikma, noti atuk mak o kohchvt ik ia, im ahnashke.

28. Wak vt hatak o, keyukmvt ohoyo ho bahli na, illikma wak ash osh tvli ishit boa pulla hi oke, mikma nipi ya vpa he keyu hoke; amba wak immi vto i kashofa hi oke.

29. Amba wak vt chashpo ka lvpish isht bahli chatuk,

mihma immi ya atokolit im anoli tok atok okma, atuk o ik im okhishto ho, hatak, keyukmvt ohoyo ho vbikmvt wak vt tvli ishit boa hi oke; mikma immi hvrt illi ak inla hi oke.

30. Tvli holisso atobba he yo onochikma, im ilhfiopak vlhtoba ka kaniohmi ho onochi tukma atobba hi oke.

31. Ushi yo bahli tuk okma, keyukmvt ushetik o bahli tuk okma, nan vlhpisa ilvppak o ai iakaiya hosh i yvmihcha hi oke.

32. Wak vt hatak yuka ho, keyukmvt ohoyo yuka bahlikma, i shahli ya tvli hvta shekel pokoli tuchina ho imakma, wak ash osh tvli ishit boa hi oke.

33. Micha hatak osh hichukbi a tiwi, keyukmvt hichukbi ya kulli tuk osh ik ompohomo tuk o, wak, keyukmvt issuba nashoba yokma nana hosh aka itolvt fohakma,

34. Hichukbi immi atuk vt immi yatuk ash tvli holisso ima cha, atobba hi oke, micha nan vlhpoba illi ak osh immi hashke.

35. Micha hatak i wak vt inla immi ho okpvni na illikma, mikma wak okchaya ka kanchi cha, vlhtoba tuk tvli holisso yash ita kashapashke, mikma wak illi ak kia ita kashapashke.

36. Micha chashpo ka wak vt bahli chatuk a ithana atuk ak osh, immi vt ik im okhishto tukmvt; yohmikmvt wak a wak ak inli ho atobbashke; micha illi ak osh immi hashke.

CHAPTA XXII.

HATAK osh wak, keyukmvt chukfi yo hukopa cha vbi, keyukmvt kanchikmvt, wak atukma wak tahlapi, chukfi yatukma chukfi ushta ho falvmmichit atobbashke.

2. Hukupa vt tivbli hosh anta na, pisa cha isso tuk o illikma, yvmmak okvno vlhtobvt issish vt hlatapa he keyu hoke.

3. Hvshi vt kohchvt on tommi ha yokmvno vlhtobvt issish hlatapa hi oke, mominchit atobba he tuk oka; nana ik im ikshokma, hukupa tuk ak o kanchashke.

4. Nana hukupa tuk vt okchaya moma hosh wak, keyuk-

mvt issuba nashoba, keyukmvt chukfi yokmá nana hosh ibbak fohkvt haiaka ahlikma, inlohmi tuklo hō atobba hi oke.

5. Hatak osh osapa, keyukmvt pakvpi ahollokchi yō ai impvchi, micha i nanvlhpoa ya hatak inla im osapa yō fohkit ai impvchikmvt, im osapa achukma moma i shahli, micha pakvpi im ahollokchi achukma moma i shahli hō isht atobba hi oke.

6. Luak vt toba cha, kvti ha lapali na, onush talakchi, keyukmvt onush hikia vt, keyukmvt osapa vt luvt tahakma, luak tikelichi tuk vt atobbi pulla hi oke.

7. Hatak osh chuka a bilika hatak o tvli holisso, keyukmvt nachukushpa yō im isha chi ka ibbak fohki tuk o, kvna hosh hukopvt hatak ash in chuka ya ai ishit kohcha tuk osh hukopa vt haiakakmvt inlohmi tuklo hō atobbashke.

8. Hukopa tuk vt ik haiakokma, chuka yash i shahli ya, yvmmak osh in chuka abilika i nachukushpa ya potoli tuk oh chishba, ahnit nan apesa vhleha ha itikba isht onashke.

9. Anumpa kobvffi moma wak a tuk, issuba nashoba atuk okma, chukfi, nafohka, keyukmvt nana kvnia, nana kia inla hosh immi mihakma, anumpa ahalaia in tvnnvp bika kvtnan apesa vhleha ha itikba onashke: atuk o kanima hō nan apesa vhleha hvtonochikma in chuka abilika hatak a inlohmi tuklo hō atobbashke.

10. Hatak osh in chuka abilika hatak osh im isha chi hō, im issuba nashoba, keyukmvt wak, keyukmvt chukfi, keyukmvt nanvlhpoa nana kia ibbak fohki tuk o, kvna hosh pisa keyu hō illi, keyukmvt im omokpulo, keyukmvt tihlelit kanima isht ia tukma.

11. Yohmikma in chuka abilika hatak im vlhpoyak a ik potolo tuk vt Chihowah ya anumpa kvllo im il onochi ya ita tuklot ashwa ma anumpulashke: mikma immi yatuk vt vlhpesa ahni na, ik atobbo kashke.

12. Michai hukopa tuk okmvt immi ya im atobba hi oke.

13. Nana hosh niblit tahli tuk okma, isht atokowa ya isht vlashke, mikma nipvt taha tuk ano atobba he keyu hoke.

14. Micha hatak osh in chuka abilika hatak o nana ho im a pota tuk o immi hut awant aya keyu ho aiokpuloka, keyukmut illikma, atobbi pulla hi oke.

15. Amba immi vt awant aya hokma atobba he keyu hoke: nan ilhtohno yatuk okmut nana asitvbachi ha tuk oke.

16. Mikma hatak osh ohoyo himita yo haksichi cha, iba tvshki tukmut im atobbi cha, iba itauwayashke.

17. Iki vt ima he keyu kvv ahlikma, ohoyo himita im vltoba chatuk mak o tuli holisso im atobbashke.

18. Ishtahullo ohoyo hut ik okchaya, ish ahna he keyu hoke.

19. Kvna hosh nanvlhpoa ya ibatvshkikmut illi pulla hi oke.

20. Chihowah ak illa keyu, na holvut toba nana kia nan vbit isht aiokpvchikmut ishit kanchit vmohmicha hi oke,

21. Okla inla chukvsh okpvnit ish ilbvsha la he keyu hoke. Okla inla yosh Echip yakni hvsh aiasha tok okvt.

22. Ohoyo i hatak illi, micha vlla iki illi, kvna kia hvsh ilbvshala he keyu hoke.

23. Kaniohmichit hvsh ilbvshali na, et a pahaya ka haklo li pulla hi oke.

24. Mikmut vm i nukkilli vt libbi fehnakmut, bvshpo falaia ho ishit chibe la hi oke, mikma hvchi tekchi vhleha hut i hatak illi yokma, hvchvm vlla vhleha hut iki illi ya hi oke.

25. Um okla ilbvsha yvt hvchi bilika ahanta ka tuli holisso ish im pota hokmut, im atablit chelichi a ish in chohma he keyu, micha chelichi ish onocha he keyu hoke.

26. Chin chuka abilika hatak i nafohka ya nan isht atoni ish im eshi tuk mut, hvshi vt okatula takla ka ibbak a ish fohka hi oke.

27. Yvmmak illa ho anchi yatuk oke; haknip alata yatuk oke, nanta ho fohkvut nusa chi cho? atukma yakohma hi oke, a pahayakma, haklo la hi oke, nan ikana sia hokvt.

28. Chitokaka vhleha ha ishit yopomot ish anumpula he keyu; micha chim okla i miko ya kalakshichit isht ish anumpula he keyu hoke.

29. Chi na waya vmmona ya chim oka paki, micha alif

bila aiena ka is svm issa kvt chik achibalo kashke; chiso vttahi ya is suma hi oke.

30. Chi wak a, micha chin chukfi ya yvmmak inli ish chohmicha hi oke, Nitak untuklo ho ishki ya awant aya hi oke; nitak ont isht untuchinakma is suma hi oke.

31. Hatak a holitopa huchi ha chi hoke, micha nanvlhpoa ya nampoa hosh oktak a a nibli tuk nipi yo ish pa he keyu hoke, ofi puta ka ish i pila hi oke.

CHAPTA XXIII.

ANUMPA ik ahlo ya ish aiokpvcha he keyu; hatak yoshuba chibbak isht ish iba potolit ai vlhpesa keyu atokoli chik tobo kashke.

2. Okla lawa ya iakaiyvt nana ik achukmo ish yvmihcha he keyu; micha laua kvt nan aivlhpesa yvmihchi ya shanaiyacha chi ka iakaiyvt ish anumpula he keyu hoke.

3. Micha ilbvsha yoh kia anumpa in takalikma, shanaiyvt ish apelvcha he keyu hoke.

4. Chi tvnvp i wak, keyukmvt im issuba nashoba vt kvnivt ayakma, ish afamakmvt, anonti falaminchit isht ish im ona pulla hi oke.

5. Chi nukkilli im issuba nashoba vt i shapoh nuta hlipia na, ish pisakmvt apelvchi ik chi bnno hoh kia ish apelvchi pulla hi oke.

6. Chim ilbvsha vt nan vm vlhpesa ka ish shanaiyvcha he keyu hoke.

7. Nana ahli keyu ka i hopakvchit ish hikiashke; micha nan okpvti keyu, micha aivlhpesa ya chik bo kashke; yoshuba ya i kashofa la he keyu hoke.

8. Micha nahvlbina ya ish isha he keyu hoke; nahvlbina yvt hopoyuksa nishkin lvblich, micha aivlhpiesa im anumpa ha shanaiyvchi yoke.

9. Micha okla inla ya ish ilbvshala he keyu: Echip yakni okla inla yosh lvsh aiasha tuk osh okla inla chukvsh a ish ithana hokvt.

10. Micha afummi hannali h_o ch_i yakni ya ish hokchi cha, na waya ya ish ai vmashke.

11. Amba afummi ont ishtuntuklo hokvno, fohvt lumvt itoyulashke; yvmohmi h_o chim okla ilbvsha yvt ai vpashke; atuk o ashanchi na, nampoa oktak aiasha ak osh vpashke. Pakvpi chim ahollokchi, micha alif chim ahollokchi aiena yvmmak inli ish chohmichashke.

12. Nitak hannali h_o ch_i pilesa h_a ish yvmihchashke; atuk osh nitak isht untuklo k_a ish fohashke; yvmohmi h_o ch_i wak, micha chim issuba nashoba, micha ch_i yuka ohoyo ushi, micha okla inla aiena kvf fohashke.

13. Nana moma hvchim ahanchi li tuk a, ahah, hvsh ai ahnashke; micha naholbvt toba hohchifo h_a hvchik anolo kashke, micha chitvkha a kohcha na ik haklo kashke.

14. Afummi achvfakma, hituchina ha impvchi isht is svm asha hi oke.

15. Pvska ik shatvmmo impvchi isht hvsh a_{sha} hi oke, hvshi Abib vlhpisa hi a chim apesa li tuk mak o, nitak untuklo h_o pvska ik shatvmmo ish pa hi oke: hvshi yvmma Echip a ish kohcha tok okvt; achvfa kia nan iksho h_o sa tikba ya hikia he keyu hoke.

16. Micha hvsh toksvli osapa ya nana ish hokchi tukma nawaya vmmona vmo impvchi, micha nahoyo impvchi, afummi ont tahakma osapa ish atoksvli tuk vt na ish hoyokmvt isht hvsh a_{sha} hi oke.

17. Afummi achvfakma hituchina ha nakni yosh hvchim aiasha moma kvf Chithowah Chiokaka itikba ya h_iela hi oke.

18. Vbit ishit vm aiokpvchi issish a pvska shatvmmi ya aieninchit is svm issa he keyu hoke; micha vbit isht vm aiokpvchi nia vt a_{sha} na onna he keyu hoke.

19. Ch_i yakni awaya vmmona tikba y_o Chihowah chin Chitokaka im aboha ya isht ish ona hi oke. Issi kosoma ushi y_o ishki i pishukchi a isht ish honna he keyu hoke.

20. Yakeh, ai atahli le tuk vt chisht ala la ch_i, hina chi fohkit chisht a_{ya} ch_i k_a enchel o chitikba et hilechi li tok.

21. Ahah ish im ahni cha, im anumpa im antivt, chik

nukowacho kashke, na hvchi yoshuba ya chi kashofa he keyu; sa hohchifo kv̄t iba foyuka hoka.

22. Amba im anumpa ha ish im antia cha, anumpohonli li moma ka ish yvmihchi ho mvhlikma, chin tv̄np vhleha ha in tv̄np sia ha he; micha chi sanali vhleha ha i sanali sia ha hi oke.

23. Ūm enchel vt chi tikba ia cha, Amolait, micha Hittait, micha Pelissait, micha Kananait, micha Hifait, micha Chebusait aiena aiasha ka chisht onakma, ai ishit kanchi la hi oke.

24. I naholbvt toba puta ish im akahchunola he keyu, micha ish im antia he keyu, micha nana atoksvli ya iakaiyvt ish yvmihcha he keyu hoke; amba hvsh akvchit hvsh vmohmichi cha, i nan in chuwa ya kinahlichit ish kaiyancha hi oke.

25. Micha Chihowah hvchin Chitokaka ya hvsh im antia hi oke; mikma hvchi pvska, micha hvchim oka hvchim apaknvcha hi oke; mikma vno vt hvchim itin takla ya abeka ha ai isht kanchi la hi oke.

26. Nana kia hvchi yakni asha kv̄t ushi kanchi, micha ushi iksho kv̄t iksho ka hi oke, chi nitak holhtina ka onanchi la hi oke.

27. An nukshopa ka chi tikba ya pila likmvt, okla moma ish im ona ka ishit kanchi la chi hoke; micha chin tv̄np moma ka chi filvmmichi la hi oke.

28. Micha fohkv̄t puta ka chitikba ya pila likma, Hifait, Kananait, micha Hittait chi tikba tihlela chi hoke.

29. Afvmmi achvfa ho chi tikba tihlelit kohchi la he keyu; yohmi na yakni vt chukillissakma, nampoā hv̄t apaknv̄t chi sanala hinla hoke.

30. Kanomosi anonti kanomosi ho chi tikba tihlelit kv̄honchi likma, ish apaknv̄t yakni ya ish a binila hi oke.

31. Micha chim aivhli ya okhvta Humma vttvt ia hosh Filistin im okhvta ont vhli, micha chokushmi vttvt ia hosh okhina ont vhli kak o, vhlichit apesa la hi oke; yakni ya okla aiasha ka chibbak fohki la chi hoke; mikma chi tikba tihlelit ish kohcha hi oke.

32. Yumma, micha i naholbvt toba puta ka nana ish itim apesa he keyu hoke.

33. Chi yakni ya aiasha he keyu a, chi yoshublichia hinla hoka; i naholbvt toba ya ish im antiakma ishit chi yoshuba chi pulla hoke im achi tok.

CHAPTA XXIV.

MICHA Moses a, Chishno micha Alon, Natab, micha Abihu, micha, Israel im asvnonchi pokoli untuklo aienvt Chihowah ya oiyvt hvsh im vlashke: micha hopaki ho hielit hvsh aiokpvrchashke.

2. Mikma Moses ak illa hosh Chihowah ya bilika ona chi hoke: amba yummak okvto bilika ona he keyu, micha okla hvvt apehvt oiya he keyu, im achi tok.

3. Mihma Moses vt vla cha, Chihowah im anumpa ilvppa moma ka, micha nan isht apesa ilvppa moma ka okla ha im anoli tok; mihma okla moma kvvt anumpa achvfvvt afalami-chit, Anumpa moma Chihowah yvt achi tuk mak o e yvmihcha chi hoke, achi tok.

4. Mihma Moses vt Chihowah im anumpa moma ka holissochi tok, atuk osh onnahinli fehna wakaya cha, nvnih nutaka ya alta, micha Israel apehlichia auahtuklo vlvpisa ho tonik auahtuklo ikbi tok.

5. Mihmvt Israel im vlla vhleha hatak himithoa ya pila na, yummak ash osh hukmit ishtaiokpvchi, micha iti nan-aya yosh isht aiokpvchi aiena wak vbit onochit Chihowah ya im issa tok.

6. Mihma Moses vt issish a iklvnna ho ishi ch, ampoa mahaia vni tok, mihmvt issish a iklvnna alta yash o fimmi tok.

7. Mihmvt nan itim apesa holisso ha eshi cha, okla hvvt haklo ho itim anumpuli tok; mihma okla hvvt, Chihowah yvt achi tuk, moma kak o e yvmihcha chi hoke, micha il im antia chi hoke, achi tok.

8. Mihma Moses vt issish ash eshi cha, okla ha o fimmi

mtv, Yakeh, nan itim apesa issish, Chihowah yvt anumpa ilvppa puta ka isht hvchitim apesa tuk mak oke, achi tok.

9. Yohmi ma Moses, micha Alon, Natab, micha Abihu, micha Israel im asononchi pokoli untuklo aienvt oiya tok.

10. Michā Israel in Chitokaka ya pisa tok; micha iyi nuta ya saffai tvli yosh a patvlhpo ha tok, micha shohkauali kv̄t shutik fehna kak o chohmi tok.

11. Mihma Israel im vlla vhleha i holitopa vhleha ha ibbak ik onochō tok: yvmmak kia Chitokaka ya pisa mvt, impvt nan ishko tok.

12. Mihma Chihowah yvt Moses a, Nvnih ha oiyvt is sv̄m vlashke, micha yvmmak o ish antashke, mikma nanvlh-pisa, micha anumpa vlhpisa holissochi li tuk vt tvli patvssa chima lashke; yvmohmi ka ish im avrchashke, im achi tok.

13. Mihma Moses micha in tishu Choshua vt wakaya tok; mihma Moses vt Chitokaka i nvnih ha oiya tok.

14. Michā asv̄nonchi vhleha ha, Ashvt hvsh pi hoyo tuk o, anonti e chim vlashke; mikma yakeh, Alon, micha Hu vt hvsh apehvvshke, hatak kv̄na kia nana a yvmihcha he vt im ashakmvt, yvmmak o im vlashke, im achi tok.

15. Mihmvt Moses vt nvnih ha oiya tok, mihma hoshonti vt nvnih ha ompoholmo tok.

16. Mihma Chihowah im a holitopa vt Sinai nvnih ha on talaia ma, hoshonti hv̄t ompoholmo na, nitak hannali tok; atuk osh nitak isht untuklo ma Moses a hoshonti iklv̄nna ai i howa tok.

17. Mihma Chihowah im a holitopa pisa ka Israel im vlla vhleha hv̄t pisa hō luak nahukmit tahli ak o chohmi hosh nvnih paknaka talaia tok.

18. Mihma Moses vt ivt hoshonti iklv̄nna ka ibachukowvt nvnih ha oiya tok; micha Moses vt nvnih ha ahanta na, nitak pokoli ushta micha ninak pokoli ushta tok.

CHAPTA XXV.

MIHMA Chihowah yvt Moses a im anumpulit,
 2. Islael im vlla vhleha ha ish im anumpuli na, nan
 im issa isht vm vlashke; hatak moma chukvsh aiokpanchit
 bohli ka nan im issa ya is sum eshashke.

3. Micha nan im issa ilvppak o hvsh im ai ishashke, tvli
 holisso lakna, micha tvli hvta, micha asonak lakna,

4. Micha okchvmali, micha humakbi, micha tishepa, mi-
 cha linen lapushki, micha issi kosoma hishi,

5. Micha chukfi nakni hakshup humma, micha bacha hak-
 shup, micha shittim iti,

6. Pula ha chi ka bila, bila ishtahama ya chi ka, micha
 nabalama ya chi ka na balama puta,

7. Oniks tvli, micha efot, micha ikkishi alata, ontaloha
 chi ka tvli ak ashke.

8. Micha vlhtipo holitopa vm ikbi na, takla ahanta lashke.

9. Vlhhtipo holba ya, micha ishit toksvli chi pisachi le tuk,
 moma ka iakaiya hosh, yohmi fehna ho hobachit ish ik-
 bashke.

10. Mikma shittim iti yo itombi holitopa ya ikbashke,
 falaia kvv kubit tuklo micha iklvna, micha auahata kvv ku-
 bit achvfa cha iklvna, micha chaha kvv kubit achvfa cha
 iklvnnashke.

11. Micha anyka, micha kucha aiena ka tvli holisso lakna
 ahli yo ish lapalechashke; micha tvli holisso lakna afohoma
 isht apakfoyupa chi ka ish ai ikbashke.

12. Micha tvli holisso lakna chvnaha bilelit akmochoit
 chukbi ushta ka ish atakalichashke; micha in tvnnvp achvfa
 ka chvnaha tuklo hosh takohlashke; mikma in tvnnvp
 achvfa ka chvnaha tuklo hosh takohlashke.

13. Micha shittim iti yo tvli ish ikbi cha, tvli lakna lapa-
 lachit ish tahlashke.

14. Micha tvli ya chvnaha yash itombi holitopa in tvnnvp
 bika ya ish apittashke; yvmohmi ho itombi holitopa ya
 ishit sholashke.

15. Tvbi vt itombi chvnaha ya aivlhta hi oke; kocha wiha he keyu hoke.

16. Micha itombi holitopa ya nan atokowa chima la chi ka ish fohkashke.

17. Micha tvli lakna bano ho im ai i kanvt aiombinili ya isht ish ikbashke: falaia kv̄t kubit tuklo cha iklv̄nna aienak-mvt, auah̄ta kv̄t kubit achv̄fa cha, iklv̄nna aienashke.

18. Micha tvli holisso lakna yo Chilubim tuklo ho isht ish ikbashke; bovt toba ho ish ikbi cha, im ai i kanvt aiombinili vhli tuklo ka ish hiohlechashke.

19. Micha chelub achv̄fa ka vhli achv̄fa ka ish hilechik-mvt, chelub achv̄fa ya vhli achv̄fa ya ish hilechashke: im ai i kanvt aiombinili vhli tuklo fehna kak o chelubim ish ikbashke.

20. Mikma chelubim vt sanahchi ya ashatvblichit vba wielit, sanahchi ya im ai i kanvt aiombinili ya isht ai ompo-homashke; mikma nashuka vt iti sanalashke, im ai i kanvt aiombinili ya chelubim nashuka vt pit talaiashke.

21. Micha im ai i kanvt aiombinili ya itombi holitopa paknaka ish ontalalashke, micha itombi holitopa ya nan atokowa chima la chi ka ish fohkashke.

22. Mikma im ai i kanvt aiombinili paknaka chelubim tuklo kv̄t nanvlhpisa afohka itombi holitopa paknaka a hiel̄i ka itin takla ya yv̄mma chi ai afamvt nana moma anumpa vlh-pisa hā Israel im vlla vhleha imma ho chima la chikmvt chitim anumpule lachi hoke.

23. Shittim iti yo patv̄ssa ish ikbashke, falaia kv̄t kubit tuklo, auah̄ta kv̄t kubit achv̄fa, chaha kv̄t kubit achv̄fa cha, iklv̄nna hashke.

24. Micha tvli holisso lakna bano ho ish lapalechashke, micha tvli holisso lakna yo vhli i fullota ikbit ish apakfoyub-lashke.

25. Micha im aivhli apakfoyupa kv̄t ibbak pv̄tha achv̄fa ho ish ikbi cha, vhli i fullota yash tvli lakna yo i fullota apakfoyupa ish ikbashke.

26. Micha tvli holisso lakna chvnaha ushta ho ish ikbi cha, chukbi ushta iyi ushta ai o hikia ka ish talohlichashke.

27. U_hli y_o bilika y_o chvnaha hut takohlikma, tvbi vt shamvlli h_o patvssa yash ishit sholashke.

28. Micha tvbi shittim iti y_o ish ikbi cha, tvli holisso lakna ish lapalechashke, yvmohmi h_o patvssa ya ishit sholashke.

29. Micha im ampo, im ishtimpa, im isht ompoholmo, micha nan isht impvchi nana isht tosholi aiena a puta k_a ish ikbashke, tvli lakna bano h_o ish ikbashke.

30. Micha sa tikba ya pvska otvni a patvssa ya is sum on talali na a biliashke.

31. Micha tvli holisso lakna bano h_o p_ula a_iohikia ish ikbashke: bovt toba h_o p_ula a_iohikia ish ikbashke, im vpi, micha i naksish puta micha i kibikshi, micha in luboa, micha i napakanli yvmmak in lashke.

32. Mikma tahlaklaka ya naksish tuchina hosh akohchashke, p_ula a_iohikia in tvnnvp achvfa k_a naksish tuchina hosh akohchakma, p_ula a_io hikia in tvnnvp achvfa ya naksish tuchina hosh akohchashke.

33. Naksish achvfa k_a almont holbvt toba hosh kibikshi tuchina, luboa achvfa, pakanli achvfashke, micha naksish achvfa ya almont holbvt toba kibikshi tuchina, micha luboa achvfa, micha napakanli achvfashke; micha p_ula a_iohikia naksish kohcha hannali k_a yohmashke.

34. Micha p_ula a_iohikia ya i kibikshi vt almont holbvt toba ushta hosh in luboa, micha i napakanli aiena hi oke.

35. Mikma yvmmak inli k_a naksish tuklo nutaka ya lumbo achvfa, micha yvmmak inli k_a naksish tuklo nutaka ya lumbo achvfa, micha yvmmak inli k_a naksish nutaka ya lumbo achvfa, p_ula a_iohikia naksish hannali akohcha ya vlhpi-sashke.

36. In lumboa, micha i naksish puta kv_t yvmmak inlashke; moma kv_t tvli holisso lakna bano hosh bovt tobashke.

37. Micha p_ula aivlhto untuklo k_a ish ikbashke; mikma okla p_ulali na, itikba ya tohwikela hi oke.

38. Mikma ishit kiselichi, micha p_ula wishakchi tvptua aivlhto vt tvli holisso lakna banashke.

39. Tvli holisso lakna talent achvfa h_o ymma, nan aivlhto ilvppa puta k_a aieninchit ikbashke.

40. Mikma ahah ish ahni cha, holbut toba he ya nvnihi paknaka a chi pisachi le tuk a hobachit ish ikbashke.

CHAPTA XXVI.

M ICHA vlhtipo ya nantvna vba takali pokoli hosh linen tapvski itavna yosh okchvmali, micha hummai, micha tishepa ish ikbashke : toksuli imponna yosh ikbi yo chelubim ish ikbashke.

2. Nantvna vba takali achvfa kvf falaia kvf kubit pokoli tuklo akucha untuchinashke, mikma auata kvf nantvna vba takali achvfa kvf kubit ushtashke ; micha nantvna vba takali moma kvf vlhpisa aiachvfashke.

3. Nantvna vba takali tahlapi kvf itvchakvchashke, mikma nantvna vba takali inla tahlapi kvf itvchakvchashke.

4. Nantvna vba takali achvfa itvchaka vhli ya ahlopulli okchvmali ya ish ikbashke ; micha nantvna vba takali inla atukla yvf itvchaka vhli fehna ka yohmi akinli ho ish ikbashke.

5. Nantvna vba takali achvfa ka ahlopulli pokoli tahlapi ho ish ikbashke, micha nantvna vba takali atukla yvf, itvchaka yvf vhli ha ahlopulli pokoli tahlapi ho ish ikbi na, ahlopullit iti halvllashke.

6. Micha tvi holisso lakna yo ishtakamvssa pokoli tahlapi ho ish ikbashke, micha nantvna vba takali ya ishtakamvssa ak o isht ish itvchakalashke ; mikma vlhtipo achvfashke.

7. Micha issi kosoma hishi yo nantvna vbatakali ish ikbi na, vlhtipo ya ompoholmo yashke ; nantvna vbatakali auahchvfa ho ish ikbashke.

8. Nantvna vbatakali achvfa falaia kvf kubit pokoli tuchinashke ; micha nantvna vbatakali achvfa auata kvf kubit ushta hashke, micha nantvna vbatakali auahchvfa kvf vlhpisa kvf ai achvfashke.

9. Mikmvt nantvna vbatakali tahlapi ka ila ish itachakalashke ; mikmvt nantvna vba takali hanali ka ila ish ita

chakali cha, nantvna vbatakali ishit hannali ka vlhtipo itik-ba ya ish a pohlomashke.

10. Micha nantvna vbatakali achvfa itachahkvchi ya vhli fehna vhli ya ahlopulli pokoli tahlapi, micha nantvna vbatakali atukla ai itachaka ya ahlopulli pokoli tahlapi ho ish ikbashke.

11. Micha asonak lakna yo isht akamvssa pokoli tahlapi ho ish ikbi cha, ahlopulli ya ish apitta cha, ish itachakli na, vlhtipo vt achvfashke.

12. Mikma nantvna vbatakali atampa vlhtipo ompoholmo nantvna vbatakali iklvna kvv vlhtipo ya ont atampvt asha ka pit takalashke.

13. Mikma vlhtipo ya nantvna vbatakali afalaiaka atampa kvv in tvnnvp achvfa ka kubit achvfa ho, micha intvnnvp achvfa ka kubit achvfa ho ont vhlashke; vlhtipo ya ompoholmot ont atampvt in tvnnvp ilvppa, micha in tvnnvp yvma takalashke.

14. Micha vlhtipo ya ompoholmo ya chi ka, chukfi nakni hakshup humma yo, micha paknaka isht ompoholmo ya chi ka bacha hakshup o ish ikbashke.

15. Micha vlhtipo ya shittim iti bvsha hiohli ho ish im ikbashke.

16. Iti bvsha achvfa kvv falaia kvv kubit pokolikma, auata kvv iti bvsha achvfa kvv kubit achvfa cha, iklvna aienashke.

17. Iti bvsha achvfakma ai ishit shvmohli vt tuklo cha, a shvmohli ya itvlhpisashke; yvmohmi bieka ho vlhtipo im iti bvsha moma ka ish ikbashke.

18. Vlhtipo ya oka mahli in tvnnvp, oka mahli pilla ho iti bvsha pokoli tuklo ho ish ikbashke.

19. Micha iti bvsha pokoli tuklo nutaka ya a shamvlli ya tvli hvta pokoli ushta ho ish ikbashke; iti bvsha achvfa nutaka ya ishit shamvlli tuklo ka a shamvlli kvv tuklashke; mikma iti bvsha inla nutaka ya ishit shamvlli in tuklo ka ashamvlli tuklo hashke.

20. Mikma vlhtipo in tvnnvp atukla falvmmi in tvnnvp a iti bvsha pokoli tuklashke.

21. Mikma ashamvlli vt i pokoli ushtashke; iti bvsha

achvfa nuta ka ya ashavvlli tuklo; micha iti bvsha inla nuta ka ya ashavvlli tuklashke.

22. Mikma vlhtipo ya in tvnnvp hvshi aiokatula pilla ho iti bvsha hannali ho ish ikbashke.

23. Michavvlhtipo in tvnnvp tuklo chukbi ya iti bvsha tuklo ho ish ikbashke.

24. Michavvlhtipo nutaka yvt itvchakashke, micha paknaka ya itachakvt chvnaha achvfa ho shamvllashke, itatuklot yakoh-mashke; chukbi in tuklashke.

25. Michavvlhtipo iti bvsha untuchinashke; mikma ashavvlli tvli hvta yvt ashavvlli im auah hannalashke; iti bvsha achvfa nutaka ya ashavvlli tuklo, micha iti bvsha inla nutaka ya ashavvlli tuklashke.

26. Michavvlhtipo im okhowatkvchi ya shittim iti yo ish ikbashke, vlhtipo in tvnnvp achvfa im iti bvsha ya tahlapashke.

27. Mikma vlhtipo in tvnnvp achvfa iti bvsha ya okhowatkvchi tahlapashke; mikma vlhtipo in tvnnvp achvfa hvshi ai okatula pilla in tvnnvp tuklo iti bvsha ya okhowatkvchi tahlapashke.

28. Mikma itibvsha iklvna okhowatkvchi vt vhli ka vtvt iakmvt ont vhli ka onashke.

29. Michavvlhtipo iti bvsha ya tvli holisso lakna ish lapalechi cha, okhowatkvchi aivlbiha chi ka tvli holisso lakna chvnaha ish ikbashke, michavvlhtipo okhowatkvchi ya tvli lakna ish lapalechashke.

30. Michavvlhtipo kaniohmit vlhtipo vt toba chi ho nvniha a chipesvchi tuk mak o ish hilechashke.

31. Michavvlhtipo isht ompoholmo ya linen tapvski itapvna, okchvmali, hummai, michavvlhtipo tishepa aiena toksvli imponna ikbi yo ish ikbashke, chelubim a tobashke.

32. Michavvlhtipo shittim iti tonik ushta hosh tvli lakna alapali ho ish atakalichashke; tvli hvta ashavvlli ushta ka tvli lakna atakali vt ashashke.

33. Michavvlhtipo isht ompoholmo ya isht akamvssa nutaka ish takalichashke; yvmohmi ho nan vlhpisa afohka itombi holitopo ya ompoholmo kash anyakaka isht chukowvt ish takalichashke, mikma ompoholmo yvt aholitopa, michavvlhtipo holitopa i shahli ya chim iti filvmmichashke.

34. Micha nanvlhpisa afohka itombi holitopa moma i shahli anukaka talaia ka im ai i kana ai ombinili ya ish on-talalashke.

35. Micha iti patvssa ompoholmo kocha ish talalashke, micha pvla ai o hikia ya vlhtipo lapalika oka mahli pilla in tvnnvp iti patvssa ichapa ka ak o ish hilechashke; micha iti patvssa ya falvmmi in tvnnvp ak o ish hilechashke.

36. Micha vlhtipo okhissa takali ya linen tapvski itapvna hosh okchvmali, hummaii, micha tishepa chufak ushi isht vlhtaha ho ish ikbashke.

37. Micha atakali ya shittim iti tonik tahlapi ho ish ikbi cha, tvli holisso lakna ish lapalechashke; mikma atakali vt tvli lakna yashke; micha asonak lakna vt tvli lakna yashke, micha asonak lakna ashavvlli tahlapi ho bilelit ish im ak-mochashke.

CHAPTA XXVII.

MICHA shittim iti yo alta falaia kv̄t kubit tahlapi, mīcha auata kv̄t kubit tahlapi itilauī banot fullota ho ish ikbashke, mihma chaha kv̄t kubit tuchinashke.

2. Micha chukbi ushta ka, lapish ushta ho ish ikbashke, lapish vt yvmmakinlashke; micha asonak lakna ya ish lapalechashke.

3. Micha i hituk chubi aivlhta chi ka im ampmahaia, mīcha hituk chubi im isht piha, mīcha im ampushi, mīcha nipi im isht yichiffi, mīcha luak im ai vlhto mahaia aiena ka ish ikbashke, nan aivlhto moma ka asonak lakna yo ish ikbashke.

4. Micha asonak lakna tvnna ya ish im ikbashke; mīcha tvnna vt chukbi ushta ka asonak lakna chvnaha ushta ho ish ikbashke.

5. Micha nuta alta aivhli ka ish bohlashke: yohmi na, tvnna vt alta iklvnna ya ont vhlashke.

6. Micha alta ya shittim iti tvbi yo tvbi ish im ikbashke, mīcha asonak lakna ish lapalechashke.

7. Mikma tvbi vt chvnaha ya aivlhtashke, mīcha ishit

shola chi ho, tubi vt alta ya in tnnvp tuklo ka shvmoh-lashke.

8. Itombi vt chiluk asha ho iti bvsha yo isht ish ikbashke; nvni h a chi pesvchi tuk mak o yohmi ho okla ikbashke.

9. Micha vlhtipo i wanuta ya ish ikbashke, oka mahli in tnnvp oka mahli pilla wanuta ya na takohli vt linen tapvski ita pva yosh in tnnvp achvfa ka falaia kvk kubit tahlepa achvfashke.

10. Mikma in tonik pokoli tuklo, micha ashavlli pokoli tuklo kvk asonak lakna yashke: tonik in chanakbi, micha afohoma aiena kvk tvi hvta yashke.

11. Mikma falmmi in tnnvp ak kia falaia ka na takali vt falaia kvk kubit tahlepa achvfakma, tonik pokoli tuklo, micha ashavlli pokoli tuklo kvk asonak lakna yashke; tonik i na chanakbi afohoma aiena kvk tvi hvta yashke.

12. Mikma hvshi ai oka tula in tnnvp wanuta auata natakali vt kubit pokoli tahlapashke, in tonik vt pokolikma ashavlli vt pokolashke.

13. Micha hvshi ak ochaka in tnnvp hvshi akochaka pilla, ho wanuta auata kvk kubit pokoli tahlapashke.

14. Okhissa in tnnvp achvfa natakali vt kubit auah tahlapashke, in tonik vt tuchinakma, ashavlli vt tuchinashke.

15. Mikma in tnnvp achvfa ya natakali vt kubit auah tahlapashke, in tonik vt tuchinakma, ashavlli vt tuchinashke.

16. Mikma wanuta okhissa ya natakali vt linen tapvski itapva okchvmali, hummai, micha tishepa chofak ushi isht vlhtaha hosh kubit pokoli tuklashke, mikma in tonik vt ushtakma, ashavlli vt ushtashke.

17. Tonik moma wanuta apakfoyupa kvk tvi hvta isht afohomashke, i na chanakbi vt tvi hvta yokma, ashavlli vt asonak lakna yashke.

18. Wanuta falaia kvk kubit tahlepa achvfakma, auata kvk pokoli tahlapi bikashke; mikma chaha kvk kubit tahlapi hosh linen tapvski itapva yashke, micha ashavlli vt asonak takna yashke.

19. Ulhtipo ya nan aivlhto moma, nan isht apilesa, micha isht a honvhla moma, micha wanuta ya isht a honvhla moma aiasha kvt asonak lakna yashke.

20. Micha Israel im vlla vhleha ha ish im apesa na, bila pula hvt lua na, bilia chi ka alif bila ahli bovt pula hvchin toba ya isht chim vlashke.

21. Okla moma im vlhtipo isht ompoholmo kocha yvm-mvt ishtatokowa itikba ya Alon, micha ushi vhleha aiena kvt hielit opiaka, micha onnahinli aiena Chihowah i tikba talaia chi ka apihisa hi oke, im isht atiaka bilia ka nan vlhpisa bilia yosh in toyula cha, Israel im vlla vhleha ha i yvmohmashke.

CHAPTA XXVIII.

MICHA Alon chitibapishi, micha ushi vhleha aiena ka, Israel im vlla vhleha i filvmmichit Alon, micha Natab, micha Abihu, Eliesa, micha Ihlama, Alon ushi vhleha aiena ka ish eshi na, naholitopa isht ai vtta ya isht vm ahashwashke.

2. Micha chitibapishi Alon a nafohka holitopa, micha isht aiokli ya ish im ikbashke.

3. Micha hatak chukvsh hopoyuksa moma im anukfila hopoyuksa chukvsh alotoli li tuk a ish im anumpuli na Alon a hullochi na, na holitopa isht aivtta isht vm ahanta chi ka Alon a nafohka im ikbashke.

4. Nafohka ilvppa puta kak o ikbashke, ikkishi alata, micha efot, micha nafohka holitopa, micha i fullota asha nafohka, micha iahlipa, micha vskofvchi, aiena hashke; micha chitibapishi Alon, micha ushi vhleha aiena ka, nafohka holitopa im ikbi na, naholitompa isht aivtta ya isht vm ahashwashke.

5. Micha tvli holisso lakna micha okchvmali, micha hummai, micha tishepa micha linen tapvski itapvna aiena ho ishashke.

6. Micha efot a tvli holisso lakna, okchvmali, hummai,

tishepa, micha₂ linen tapvski yo ishtatoba toksli imponna yo ikbashke.

7. Tahchi abana tuklo cha, aivhli tuklo ka ai itachakashke, yohmi hosh itachakashke.

8. Mikma vskofvchi inla efot a atakali kvv yvmmakinli isht vlhtaha ya chohmit tvli lakna, okchvmali, micha hummai, micha tishepa, micha linen tapvski itapvna yashke.

9. Micha oniks tvli tuklo ho ish eshi cha, Israel im vlla vhleha hohchifo ka in chunlit ish lapalechashke.

10. Hohchifo hannali ka tvli achvfa ka ish takalichikmvt, hohchifo inla ka aivtta tok vlhpisa ho tvli achvfa ya ish takalichashke.

11. Tvli in chunli yosh ikbi yo ishtin chunli in chuwa holba ho Israel im vlla vhleha hohchifo aieninchit tvli tuklo ka ish in chunlashke, tvli lakna ashavvli asha yo ish ontalohlashke.

12. Micha efot tahchi ak o tvli tuklo kash ish ontalohlashke; Israel vt tvli nan isht ithaiyana na bilia yashke; mikma nan isht ithaiyana he mak o, Alon vt Chihowah itikba ya tahchi vbanalit hikiashke.

13. Micha tvli holisso lakna ashavvli ya ish ikbashke.

14. Micha ont vhli ka tvli lakna bano itachahkvchi tuklo ho ish ikbashke, i poshota vlhtaha ho ish ikbi cha, i poshota itachahkvchi yash ashavvli ya ish takalichashke.

15. Tvli imponna yosh ikbi yo nan isht apesa ikkishi alata ish ikbashke, efot toba ak o holba ho ish ikbashke; tvli holisso lakna, nan okchvmali, hummai, micha tishepa, micha lineu tapvski itapana yo isht ish ikbashke.

16. Pohloma hosh tahchaka ushta kvv iti laui banashke, falaia kvv span achvfakma, auata kvv span achvfashke.

17. Micha tvli ontvla tvli itiakaiya ushta ho ish ontalashke, itiakaiya vmmona satis, topas, micha kabvinkel, ilvp-pak osh itiakaiya vmmona hashke.

18. Mikma itiakaiya atukla kvv emelal, micha saffai, micha taimont ashke.

19. Mikma itiakaiya ont atuchina kvv likua, micha akat, micha amihlist ashke.

20. Mikma itiakaiya ont aiushta kv̄t belil, micha oniks, micha chashpa ashke, tv̄li lakna afohka ai ontv̄lashke.

21. Mikma tv̄li vt̄ Israel im v̄lla v̄hleha hohchifo lapohli hashke, hohchifo ha, v̄lhp̄isvt̄ auah̄tuklo hosh isht in chuwa in chuwa kā chohmi hashke, moyuma kv̄t ap̄ehlich̄i auah̄tuklo v̄lhp̄isa h̄o hohchifo hosh lapohli hashke.

22. Micha tv̄li holisso lakna bano h̄o im poshota toba ȳo ikkishi alata ont v̄hli kā itachakv̄chi ish ikbashke.

23. Micha tv̄li holisso lakna ch̄vnaha tuklo ikkishi alata yā ish ikbashke, mikmvt̄ ch̄vnaha tuklo yā ikkishi alata ont v̄hli tuklo kā ish atakolichashke.

24. Micha tv̄li holisso lakna itapaksh̄vna itv̄chakv̄chi tuklo kā ikkishi alata ont v̄hli kā tv̄li holisso lakna ch̄vnaha tuklo yā ish atakohlichashke:

25. Micha itapaksh̄vna itachakv̄chi tuklo kash wishakchi tuklo kā ashamv̄lli tuklo yā ish a kv̄llochi cha, itikba takali efot in tahchi abana yā ish abanalashke.

26. Micha tv̄li holisso lakna ch̄vnaha tuklo h̄o ish ikbashke; micha ikkishi alata chukbi tuklo aiv̄hli yv̄mma efot anukaka takali okhowataka yā ish takohlichashke.

27. Micha tv̄li holisso lakna ch̄vnaha tuklo inla yā ish ikbi cha, efot aka pilla okhowata tuklo itikba takali pilla efot im vskofv̄chi pisa inla yā paknaka isht itachaka yā in chapaka ak ̄o ish talohlichashke.

28. Mikma ikkishi alata yā ch̄vnaha yā efot in ch̄vnaha ak ̄o sita okch̄vmali ȳo isht ish itatakchichi na, efot im vskofv̄chi pisa inla yā paknaka takalashke, micha ikkishi alata vt̄ efot ā ik ī mokofo kashke.

29. Mikma Alon vt̄ Israel im v̄lla v̄hleha hohchifo hv̄t afoyuka h̄o aholitopa yā chukowakmvt̄ Chihowah yvt̄ isht ithaiyana bilia ch̄i kā nanisht apesa ikkishi alata yā chukv̄sh alatali hosh iba chukowashke.

30. Micha nanisht apesa ikkishi alata yā Ulim micha Hlummim ā ish fohkashke; atukma Alon vt̄ chukowvt̄ Chihowah itikba onakmvt̄ chukv̄sh ā onochit shaiyalashke, micha Israel im v̄lla v̄hleha nan im aiv̄lhp̄iesa yā Alon vt̄ chukv̄sh onochit shaiyalit Chihowah itikba hikia na biliashke.

31. Micha efot nafohka falaia holitopa ya okchvmali bieka ho ish ikbashke.

32. Mikma paknaka iklvnna ya chiluk vt hikiashke, mikma chiluk a nantvnnna yosh i fullotvt apakfoyupa kvv tvnvp ilefohka ak o chohmi na ik hlilafo kashke.

33. Micha aka pilla vhli ya pomkilanit okchvmali, micha hummai, micha tishepa yo vhli fullota ish ikbashke, mikma tvlula tvli holisso lakna itin takla ya takohlit fullotashke.

34. Nafohka falaia holitopa aivhli fullota ka tvlula tvli holisso lakna, mikma pomkilanit, tvlula tvli holisso lakna, mikma pomkilanit osh takalit iashke.

35. Mikma Alon vt nan isht im vtta ma onvtoyulashke: atukma aholitopa ya chukowvt Chihowah itikba ya o nakma, atuk osh kohchakma, ohonla haklo na ik illo kashke.

36. Micha tvli holisso lakna bano patvssa ish ikbi cha, isht in chuwa in chuwa ya chohmi ho in chunlit CHIHOWAH IM I HOLITOPA HOKE, achit ish takalichashke.

37. Mikma sita okchvmali ya ish lapalechi na iahlipa ha ontalaiashke, iahlipa itikba ak o ontalaiashke.

38. Mikma Alon noshkobo ha on talaia na, na habenvchi holitopa moma Israel im vlla vhleha hvv hullochi tuk, naholitopa aiashvchi puta ka Alon vt shaiyalashke: micha Alon noshkobo ha on talaia na, biliashke, yvmohmi ho Chihowah yvt aiokpvchashke.

39. Micha linen tapvski nafohka aiokli ho achunlit ish ikbashke, micha iahlipa ha linen tapvski o ish ikbashke, micha chufakushi isht vlhtaha ho vskovvchi a ish ikbashke.

40. Micha Alon ushi vhleha ha ilefoka lumbo ish im ikbashke, micha ishit holitopa ya, micha pisa aiokli a vskovvchi ish im ikbikmvt shapo ya ish im ikbashke.

41. Micha chitibapishi Alon, micha ushi vhleha aiena ka ish fohkvchechashke, micha bila isht ish ahvmmashke, micha i hullochit ish kashofashke; yvmohmi na naholitompa isht aivtta ya isht vm ahashwashke.

42. Micha isht il ompohoma chi ka linen obalafoka ya ish im ikbashke, hvvtip a vttvt iakmvt iyubi ont vhlashke.

43. Mikma Alon micha ushi vhleha aiena kvv okla moma

im vlhtipo ant chukowakmvt, keyukmvt aholitopa nan isht ai vtta chi hosh alta ya bilika onakmvt, foyukashke; yvmohmi hosh nan ashvchi onvttoyulvt ik illo kashke. I nan vlhpisa bilia yosh im isht atiaka yvt iakaya aiena kvv in toyulashke.

CHAPTA XXIX.

MICHA nana ilvppak o ish i yvmihchi hosh na holitompa isht ai vtta ya isht vm aiashwa chi ka ish hullochashke; wak hobvk himmita achvfa, micha chukfi nakni tuklo ik aiono kvv iksho yo ish eshi cha,

2. Micha pvska ik shatvmmo, micha pvska lumbo ik shatvmmo bila yvmmi, micha pvska tapvski ikshatvmmo bila ahama aiena ka onush bota yo ish ikbashke.

3. Mikmvt kishi achvfa ho ish fohki cha, kishi a vlhto ho wak hobvk, micha chukfi nakni tuklo ka aieninchit isht ish lashke.

4. Micha Alon, micha ushi vhleha aiena ka okla moma im vlhtipo okhissa itikba ya isht ish ona cha, oka isht ish achefashke.

5. Micha ilefohka ya ish eshi cha, nafohka lumbo, micha nafoka holitopa falaia efot, micha efot, micha ikkishi alata ya ish fohkechi cha, vskofvchi inla fehna efot a ish vskofvchechashke.

6. Micha iahlipa ha noshkobo ha ish on talalashke, micha bita holitopa ya iahlipa ha ish on talalashke.

7 Yvmohmikmvt bila isht ahvmmi ya ish eshi cha, noshkobo ha on hlatvblit ish ahvmmashke.

8. Micha ushi vhleha ha isht ishla cha, ilefoka lumbo ish fohkvchechashke.

9. Micha, Alon, micha ushi vhleha aiena ka vskofvchi ish vskofvchechashke micha shapo ish shapolechashke; mikma naholitompa isht ai vtta yvt immi ha he, nan vlhpisa biliashke; micha Alon micha ushi vhleha aiena ka ish hullochashke.

10. Micha wak hobok himmita ya okla moma im vlhtipo itikba isht vla he ya ish apesashke; mikma Alon, micha

ushi vhleha aiena kvt wak hobvk noshkobo ya ibbak isht ombitepashke.

11. Mikma wak hobvk ash okla moma im vlhtipo okhissa bilika Chihowah itikba ya ish aivbashke.

12. Micha wak hobvk im issish a ish eshi cha, alta lapish a chibbak ushi isht ish lapalichashke ; micha issish a mominchit alta akishtvla lapali ka ish hlatvblashke.

13. Micha anukaka ompoholmo nia moma, micha takoba nia yvmmt salakha ya onvttoyulaka, micha haiyichi tuklo, micha nia yvt onvttoyula aiena ka ish eshi cha, alta ya onochit ish hukmashke.

14. Amba wak hobvk ash nipi, micha hakshup, micha i yvlhki aiena ka binah kohcha ya luak isht ish hukmashke : nan ashvchi im issa yoke.

15. Micha chukfi nakni achvfa ho ish eshashke, mikma Alon, micha ushi vhleha aiena kvt chukfi nakni noshkobo ha ibbak a isht ombitepashke.

16. Mihma chukfi nakni yash ishbashke, micha im issish a ish eshi cha, alta paknaka ya o fimmit ish fullolechaske.

17. Micha chukfi nakni yash bvshlit tushahlichit ish tahli cha, anukaka micha iyi aiena ka ish achefa cha, ai itim aiyuka li ka ish ita chakli cha, noshkobo ya ish achakalashke.

18. Micha chukfi nakni yash moma alta onochit ish hukmashke ; hukmit Chihowah im issa yoke ; luak a onochit Chihowah im issa na balama yoke.

19. Mikmt chukfi nakni achvfa ya ish eshashke, mikma Alon, micha ushi vhleha hvt chukfi nakni yash noshkobo ha ibbak isht ombitepashke.

20. Yohmikma chukfi nakni yash ishbashke, micha im issish a ish eshikmt Alon haksobish ishtimpakimma vhli, micha ushi vhleha haksobish ishtimpakimma vhli, micha ibbak ishtimpakimma ibbak ishki, micha iyi ishtimpakimma iyishki aiena ka ish lapalechashke, micha issish a alta ya o fimmit ish lapalechaske.

21. Micha issish alta on asha ka, micha ishtahvmmi bila ya ish eshi cha, Alon micha i nafohka, Alon ushi vhleha, micha ushi vhleha i nafohka aiena ka ish o fimmashke,

mikma Alon, micha i nafohka, micha ushi vhleha, micha ushi vhleha i nafohka aiena kv̄t hullochi yashke.

22. Micha chukfi nakni yash nia, micha hv̄tip, micha anu-kaka ya ompoholmo nia, micha takoba nia, yummvt salvkha onvtoyula ka, micha haiyihchi tuklo micha nia yvt asha, micha fullup ishtimpakimma aiena ka ish ishashke; chukfi nakni nahullochi yoke.

23. Micha pvska lumbo chito achvfa, micha pvska lumbo iskitini bila yvmmi achvfa, micha pvska tapvski achvfa aiena ka pvska ik shatvmmo kishi vlhtot Chihowah itikba talaia aiena ka kohchit ish eshashke.

24. Micha moma ka Alon ibbak, micha ushi vhleha ibbak ish fohki cha, Chihowah itikba ya i walit im issa ya ish walashke.

25. Mikmvt ibbak a kohchit ish im ai eshi cha, hukmit im issa chi ka, Chihowah itikba na balama ya chi ho, alta onochit ish hukmashke, luak onochit Chihowah im issa yoke.

26. Micha Alon hullochi chukfi nakni ikkishi ha ish eshi cha, Chihowah itikba ya wali ya chi ho ish walashke, mikma chimmi hashke.

27. Micha Alon, micha ushi vhleha aiena ka immi ha he, ish it chukfi nakni wali tuk, micha vba pit wali tuk, walit im issa ikkishi, micha vba pit walit fulup a ish hullochashke.

28. Mikma Israel im vlla vhleha hak osh ima ho, Alon micha ushi vhleha immi ha he, nan vlhpisa bilia yashke; vba pit walit im issa yoka, micha Israel im vlla vhleha hv̄t iti nanaiyvchi im issa, vbit isht aiokpvchi, vba pit walit im issa, vba pit walit Chihowah im issa yoke.

29. Mikma Alon i nafohka holitopa yvt ushi vhleha iakai-ya kv̄t immi cha, foyukvt bila ahama he, micha foyuka ho hullocha hi oke.

30. Micha ushi yosh vlhtobvt naholitompa isht vta toba kv̄t okla moma im vlhtipo ya chukowvt aholitopa ya nan isht ai ahantakmvt nitak untuklo foyukashke.

31. Atuk o hullochi chukfi nakni ya ish eshi cha nipi aholitopa ya ish ahonashke.

32. Mikma Alon, micha ushi vhleha hv̄t chukfi nakni yash nipi ya, micha pvska kishi vlhto tuk a okla moma im vlhtipo okhissa talaia ka aieshit aieninchit ai vpa hi oke.

33. Micha hullochi, micha kashofa chi nana puta ka isht atobbi tuk ak o ai vpushke: amba okla inla yvt ai vpa he keyu, holitopa hoka.

34. Micha hullochi tuk nipi, keyukmvt pvska nana kia, atampa hosh asha na onnahinlikma, yohmikma atampa tuk ash luak ishit ish hukma hi oke, vpa he keyu, holitopa hoka.

35. Micha nana moma chim apesa li tuk mak o, Alon micha ushi vhleha ha ish i yvmihchashke, nitak untuklo ho hullochi hosh isht ish ahantashke.

36. Micha nitak aiyukali ho wak hobvk a nanashvchi ishit vlhtoba ho ish im issashke, micha nan ishit atobbi alta ish im ikbikmvt, alta ya ish kashoffaske, micha kashoffit bila ish ahvmmashke.

37. Nitak untuklo ho alta ya atobbit ish kashoffashke, mikma alta vt holitopa i shahli yashke; nana hosh alta ya halelikmvt holitopa hi oke.

38. Yohmi ka ilvppak o alta ya onochit ish im issa hi oke: onna hosh onnakma chukfushi afvmmi vmmona tuklo ho ish im ihisa na, bilia hi oke.

39. Chukfushi yash achvfa ka onnahinlikma ish im issa tukmvt, achvfa ya opiakma ish im issashke.

40. Micha chukfushi achvfa ka bota tohbi kvshkoa ishit pokoli ho boa na bila toba hin achvfa kvshkoa ai ushta ho ittaiyomi, micha nanishko im issa ya okapaki hin achvfa kvshkoa aiushta ho ish im issashke.

41. Micha chukfushi achvfa ya na-balama, micha luak ishit hukmit Chihowah im issa mak o onnahinli ya ilhpak im issa yash, micha ishko im issa ya tuk mak o chohmichit ish yvmihchashke.

42. Ilvppvt hvchim ai itishali moma ka hukmit im issa bilia yo Chihowah itikba okla moma im vlhtipo okhissa ya a yvmohma hi oke; yvmmak o a hvchi itafamvt, yvmmak o a chim anumpule la hi oke.

43. Micha yvmmak o Israel im vlla vhleha ha ai itafama

la hi oke, mikma vlhtipo hvt vm ai isht aholitopa ak o ishit kashofa hi oke.

44. Micha okla moma im vlhtipo, micha alta aiena ka kashofi la hi oke; micha Alon, micha ushi vhleha hak kia naholitopa isht ai vta ya isht vm ahashwa chi ka hullochi la chi hoke.

45. Micha Israel im vlla vhleha ha itin takla ya ahanta lish in Chitokaka sia ha chi hoke.

46. Mikma vno ak osh in Chitokaka Chihowah sia, atuk osh itin takla ahanta la chi hosh Echip yakni ya pehlichit kohcha li tok a ithaiyana chi hoke. In Chitokaka Chihowah sia hoke.

CHAPTA XXX.

MICHA na balama ai onochit hukma chi ka alta ish ikbashke, shittim iti yo ish ikbashke.

2 Falaia kv kubit achvfashke, mikma auata kv kubit achvfashke iti laui bat fullotashke; mikma chaha kv kubit tuklo hashke, lvpish vt yummak inlashke.

3. Micha paknaka, micha naksika apakfoyupa ka, micha lvpish aiena ka tvli lakna bano ho ish lapalechashke, micha tvli holisso lakna i fullotvt apakfoyupa ish ikbashke.

4. Micha i fullota nutaka chukbi tuklo ha tvli lakna chv-naha tuklo ho ish ikbashke, in tvnnvp tuklo ka ish takohli chashke, mikma tvbi vt shamohli na ishit shohla hi oke.

5. Micha shittim iti yo tvbi ish ikbashke, micha tvli lakna ish lapalechashke.

6. Micha nantvna vba takali yummvt nan vlhpisa afohka itombi holitopa bilika takali ka itikba im ai isht i kana om binili, yummvt nan vlhpisa afohka paknaka talaia ka itikba ish talalashke, yummak o achi afama la hi oke.

7. Mikma Alon vt onnahinli aiyukali ka nabalama onochit hukma hi oke, pula puta ka ai iskiachikmt nabalama onochit hukma hi oke.

8. Micha Alon vt opiakma pula ha palalikmt, nabalama

onochit hukma hi oke, chim ai itishahli moyuma ka Chihowah itikba ya na balama bilia hi oke.

9. Nabalama inla, micha vbit hukmit im issa, micha im ilhpak im issa aiena ka onochit ish im issa he keyu hoke; micha nan ishko im issa aiena ka ish on hlatvbla he keyu hoke.

10. Mikma Alon vt afvmmi achvfakma himonna ho nan-ashvchi im issa issish isht atobbi ya atobbit lvpush a onocha hi oke; chim ai itishali moyuma ka afvmmi achvfakma onochit atohomba hi oke: Chihowah ya i holitopa kvt moma i shahli hoke, achi tok.

11. Mihma Chihowah yvt Moses a im anumpulit,

12. Israel im vlla vhleha ha noshkobo holhtina ka ish eshikma hatak moyuma ka ish hotihnakma imi shilombish vlhtoba ya Chihowah imashke; yvmohmi ho ish hotihnakma ililli okpulo itin takla ya iksho kashke.

13. Ilvppak o imashke, holhtina ka iba holhtina tuk moma kvv vlhtipo holitopa shekel im vlhpisa vlhpisa ho, shekel iklvnna ho ima hi oke; shekel achvfa kvv kelah pokoli tuklo hoke, shekel iklvnna kak o Chihowah ya im issa ya hi oke.

14. Afvmmi pokoli tuklo vttvt vba maya holhtina ka iba holhtina tuk moma kvv Chihowah im issa ya ima hi oke.

15. Hvchimi shilombish isht vlhtoba nan im issa ya Chihowah hvsh imakmvt, nan in laua yvt shekel iklvnna ka ont ia ho ima ke keyukma, ilbvsha yvt ola takla ho ima he keyu hoke.

16. Mikma Israel im vlla vhleha ha nan isht atobbi tvli holisso ya ish eshi cha, okla moma nan im vlhtipo nan isht ai ahanta isht ish apesashke; yvmohmi ho Israel im vlla vhleha ha Chihowah itikba ai isht ithaiyana he, micha hvchimi shilombish isht vlhtoba yoke, achi tok.

7. Mikmvt Chihowah yvt Moses a im anumpulit,

18. Aiachefa yo asonak lakna ampo chito, micha iyi vt asonak lakna ak inli ho ish ikbashke, micha okla moma im vlhtipo, micha alta itin takla ish hilechi cha oka ish vnashke.

19. Yummak o Alon micha ushi vhleha aiena kv̄t ibbak, micha iyi aiena ka ai achefa hi oke.

20. Okla moma im vlhtipo ya chukowakmvt, keyukmvt luak ishit hukmit Chihowah im issa ya hukma chi hosh alta ya bilika ona aienakmvt ik illo ka hi oke.

21. Yummohmit ibbak, micha iyi aiena ka achefa cha ik illo kashke; micha nan vlhpisa vlhpesa bilia yosh, Alon, micha ushi vhleha im ai iti shali moma kv̄t in toyulashke, achi tok.

22. Micha Chihowah yvt Moses a im anummulit,

23. Nabalama i shahli puta ma ahli shekel tahlepa tahlapi, sinnamon balama vt ymma iklv̄na shekel tahlepa tuklo cha pokoli tahlapi, kalamvs balama vt shekel tahlepa tuklo cha pokoli tahlapi,

24. Micha kassia vt shekel tahlepa tahlapi vlhtipo holitopa ai vlhpisa shekel ashke, micha alif bila yvt hin achufa ho ish ishashke.

25. Micha nanishtahama holitopa bila, ikhish ikbi it-haiyana hosh ikbi yo nan ahama ish ikbashke; isht ahama holitopa bila hi oke.

26. Micha okla moma im vlhtipo ya micha nanvlhpisa afoyuka itombi holitopa,

27. Micha aiimpa, micha nan im ai vlhto moma, micha pula aiohikia, micha nan im aivlhto, nabalama ahukmi alta,

28. Micha ai onochit hukmit im issa alta, micha nan im aivlhto moma, micha aiachefa ampo chito, micha iyi aiena ka isht ish ahvmmashke.

29. Micha ish kashofi na holitopa kv̄t moma i shahli yashke, nana hosh halelikmvt holitopa hi oke.

30. Micha Alon, micha ushi vhleha aiena ka ahvmm̄it ish hullochashke, mikma na holitomp̄a isht aivtta ya isht vm ai-ahashwashke.

31. Micha Israel im vlla vhleha ish im anumpulit, hvchim ai itishali moma ka nan isht ahama bila ilvppvt a holitop chi hoke.

32. Hatak nipi okv̄no o fohopa he keyu, micha itaioma ya hobachit inla ya ish ikba he keyu hoke, holitopa hoke, hvchi holitopa hi oke.

33. Kuna hosh yuma chohmi ka itaiomi, keyukmut okla inla yo onochikmut, im okla achufa ya ai i filummit fiopa tupa hi oke ish achashke, achi tok.

34. Mihmut Chihowah yut Moses a, Nabalama istakti, oneka, micha kalbanum, ish ishashke; nabalama iluppa puta ka falakinsen bano yo, moma weki kut iti laui hashke.

35. Micha ikhish ikbi champullichhi ak o hobachit nabalama vlhpesvt itaioma kashofa, micha holitopa yo ish ikbashke.

36. Micha kaniohmi ka bolit ish lapushkichi cha, kaniohmi ka okla moma im vlhtipo anukaka isht atokowa itikba a chi afama la chi ka ish talalashke, chi holitopa i shahli ya chi hoke.

37. Micha nabalama ish ikba chi kut itaioma, yuma chohmi ka chimmi ish ikba he keyu, Chihowah immi hosh chi holitopa hi oke.

38. Kuna hosh yuma chohmi ka huwa chi hosh ikbikmut im okla achufa ya ai i filummit fiopa topa hi oke, im achi tok.

CHAPTA XXXI.

MIHMUT Chihowah yut Moses a im anumpulit,
2. Yakih, Chutah apelhlichhi aiachufa Hu ushi, Uli yo ushi Besaleel a atokolit hochifo lishke,

3. Micha hopoyuksvt, micha nana akostininchit, micha nanithanvt micha na toksvli ilaiyukali moma imponnvt.

4. Natoksvli inla tvli holisso lakna, micha tvli hvta, micha asonak lakna toksvla he,

5. Micha tvli tihlit on talohla he, micha iti ya chakonlichhi na toksvli ilaiyukali moma apesvchit imponna chi ho chukvsh Chitokaka imi shilombish a alotoli lishke.

6. Micha vno vt, yakeh vno vt Tan apelhlichhi aiachufa Ahisamak ushi Aholiab a aieninchit ima lishke; chim apesa li tuk moma ymicha chi ka, chukvsh hopoyuksa puta ka chukvsh i hopoyuksa moma nukfoki li tuk oke.

7. Okla moma im vlhtipo, micha nan vlhpisa a foyuka

itombi holitopa, micha ai im isht i kana ai om binili, yvm-mvt paknaka talaia ka micha vlhtipo i nan chukushpa moma,

8. Micha aiimpa, micha i nachukushpa, micha pva ai o hikia kashofa, i nachukushpa aiena moma, micha nabalama alta,

9. Micha aionochit hukmit im issa alta i nachukushpa aiena moma, micha ampo chito, micha iyi,

10. Nan isht vtta i nafohka, micha naholitompa isht vtta Alon a i nafohka holitopa, micha ushi vhleha hvt na holi-tompa isht ai vtta ya isht ashakmvt i nafohka,

11. Micha isht ahama bila, micha aholitopa nabalama aiena chim apesa li tuk mak o, moma yvmihchashke, im achi tok.

12. Micha Chihowah yvt Moses a im anumpulit,

13. Israel im vlla vhleha ha, A nitak hullo ya ahlit hvsh holitoblashke; hvchim ai iti shali moma ka nan ishtatako-wa yosh hvvim itin takla ya itoyula chi hoke; yvmohmi na, Chihowah sia hvchi kashofi li ka hvsh ithaiyana chi hoke.

14. Yvmohmi hoka nitak hullo yo hvsh holitoblashke, hvchi holitopa hoka, kvna hosh kobvffikmvt illi pulla hi oke; kvna hosh nitak yvmma na toksvli nana kia yvmihchikmvt, shilombish yvmmt im okla ha ai i filvmmmit fiopa tupa hi oke.

15. Nitak hannali ho natoksvli ya yvmihcha hinla hoke, Amba isht untuklo hokvto nitak hullo afoha, Chihowah i holitopa hoke; kvna hosh nitak hullo ya natoksvli nana kia yvmihchikmvt illi pulla hi oke.

16. Yvmohmi hoka Israel im vlla vhleha in ai itishali moma kvv nan itim apesa bilia ya nitak hullo ya holitoblit, nitak hullo ya ithaiyana hi oke.

17. Nan isht atakowa yosh vno, micha Israel im vlla vhleha pim itin takla ya itoyula na bilia hi oke; nitak hannali ho Chihowah yvt vba shutik, micha yakni aiena ka ikbi mvt, nitak isht untuklo ka foha cha, im achukma tok oka, ish im achashke, im achi tok.

18. Atuk osh Moses a Sinai nvnih paknaka ai im anum-puli tuk vt ont tahli mvt, nan vlhpisa patvssa tuklo tvli patvssa Chitokaka ibbak ushi yosh ai o holissochi yo ima tok.

CHAPTA XXXII.

MIHMA Moses vt nvnih h₂ akowa kv₂ ahchibali na, ok-la hv₂ pisa mv₂, okla hash osh Alon a im itvnaha cha, Wakaya cha, pi tikba ia ch₂ k₂ naholbv₂ toba ya pim ik-bashke, Echip yakni a pehlichit pi kohchi tok hatak Moses ilvppak okvno, nana kaniohmi tuk a kil ithano hokv₂, im achi tok.

2. Mihma Alon vt, Tvli holisso lakna haksobish takali, hvchi tekchi vhleha micha hvchiso vhleha, micha hvchiso tek vhleha aiena haksobish takohm₂ya k₂ tvptulit isht hv₂ sv₂ vlashke, im achi tok.

3. Mihma okla moma kv₂ tvli holisso lakna haksobish takali haksobish takohm₂ya tuk a tvptuli cha, Alon a isht im ona tok.

4. Mihma ibbak a im eshi cha, bilv₂ akmot, wakushi ikbi ha yv₂, ishit pilesa ishit tihlit ikbi tok: mihma, Ilvppa puta kak osh hvchi na holbv₂ toba yosh Echip yakni ya apehlichit hvchi kohchi tuk mak oke, Israel ma, okla achi tok.

5. Atuk o Alon vt pisa mv₂, itikba ya alta ikbi tok; micha anumpa boh₂lit, Onnaha yv₂ Chihowah impvchi yoke, achi tok.

6. Atuk osh onna kv₂ onnahinli fehna moma h₂, okla wakaya cha, hukmit im issa ya im issa mv₂, itin nanaiyvchi im issa ya isht v₂la tok, mihmv₂ okla hv₂ binilit impv₂ nan ishko tuk osh wakayv₂ ihlauvli tok.

7. Mihma Chihowah yv₂ Moses a, Iah, akowah, chim okla Echip yakni a pehlichit ish kohchi kash osh il okpv₂ni hoke.

8. Im apesa li tuk hina ya chekosi fehna h₂ kohchit fulv₂tvshke, bilv₂ akmot wak ushi toba ikbi cha, aiokpvchit nan vbit im issa cha, Ilvppa puta kak osh hvchi naholbv₂ toba vhleha hosh Echip yakni hvchi pehlichit kohchi tuk oke, Israel ma, achishke, achi tok.

9. Mihmv₂ Chihowah yv₂ Moses a, okla ilvppa pihisa li tuk oke, mikma yakeh, ikunla kv₂llo okla hoke.

10. Yvmohmi hoka inta, ik asha is sv₂ ahni na, vm ai i

nukkilli vt i sanalit libbashke, micha yummak o lushummi lashke, micha chishno ak o okla chinto ho chikbi lashke, im achi tok.

11. Mihma Moses vt in Chitokaka Chihowah ya im ilbushvt, Chihowah ma, nanta katiohmi ho chim ai i nukkilli vt chim okla ha, nan isht aiahli chinto, micha ibbak kullo hosh pehlichit Echip yakni ya isht ish kohcha tuk vt i sanalit libbi cho?

12. Nanta katiohmi ho Echip okla hvt nan ik achukmo yumihehit nvnihi fohka ai vbit tahlit yakni paknaka ai ishit kanchit mosholicha chi hosh pehlichit kohcha tuk oke, acha chi cho? chim ai i nukkilli libbi kvit ish shanaiya cha, nan ik achukmo chim okla i sanali ilvppa ish issashke.

13. Eblaham Aisak, micha Israel chin tishu vhleha, yummak oka chishno ak inli ile hochifot anumpa kullo anumpulit, chim isht atiaka apaknvchit vba shutik fochik a chohmichi la chi hoke, micha yakni isht anumpuli li tuk ilvppa chim isht atiaka ya ima likma immi bilia hi oke, ish im achi tok vt ish ithaiyanashke, achi tok.

14. Mihma Chihowah yvt im okla ha i sanalit nanuk achukmo yumihecha chi hosh anukfilli tuk vt issa tok.

15. Mihma Moses vt filema mvt, nvnihi ha akowa tok, mihma nanvlhpisa ai o holisso patvssa tuklo kvit ibbak a foka tok; patvssa yvt tahlaklaka a holisso ha tok; in tvnnvp achvfa ka a holisso mvt, in tvnnvp achvfa ka a holisso ha tok.

16. Michi patvssa yvt Chitokaka yosh ikbi ha tok, michi holisso ha Chitokaka yosh holissochit patvssa ya in chunli ha tok.

17. Atuk o Choshua vt okla shakapa ka haklo mvt, Moses a, Binah ha tvnvp shakapa ho haklo lishke, im achi tok.

18. Mihma Im aiya hosh shakapa ano keyu, michi ilap ak o im aiya ho paya hoh keyu, amba taloa hosh shakapa ka haklo lishke, achi tok.

19. Atuk o yakohmi tok, binah ha bilika ona mvt, waku-shi yash, michi hihla aiena ka pisa tok; mihmvt Moses im ai i nukkilli vt libbi mvt, nvnihi nuta ya patvssa yash ibbak a mokofit aka pila cha, koli tok.

20. Micha wak ushi okla ikbi kash eshi cha, luak itvchit hukmi mvt, fotohlt pushechi cha, oka ya o fimni mvt Israel im vlla vhleha ha ishkochechi tok.

21. Mihmvt Moses vt Alon a okla hvt nanta ho chi kati-ohmichi ho nanashvchi chinto yakohmi ka ish onochi cho : im achi tok.

22. Mihma Alon vt, A shahli im ai i nukkilli vt ik libbo kashke, okla hvt nan ik achukmo amosholi ya ish ithaiyanvshke.

23. Pi tikba ia chi ka naholbvt toba ya ish pim ikbashke ; Echip yakni ya pehlichit pi kohchi tuk, hatak Moses ilvppak okvno nana kaniohmi tuk a il ithana keyu hoka, vm achi tuk oka.

24. Mihma kvna hosh tuli holisso lakna ishikmvt tv-blashke, im achi li tuk oke. Yohmi ma okla vma tuk oke : yohmi na luak pit itvchili ma, wak ushi ilvppak osh kohcha tuk oke, achi tok.

25. Atuk o Moses vt okla hvt nipi bano na pisa mvt (Alon vt in tvnvp vhleha ha im i hofahyalit nipi banochi tuk oke.)

26. Yohmi ma Moses vt binah okhissa ya hikia cha, Kv-ta hosh Chihowah ya ibafoyuka cho ; vno vm vlashke, achi tok, Mihma Lefai ushi vhleha moma kvv im itvnaha tok.

27. Mihma Chihowah Israel in Chitokaka vt yak achish-ke, Hatak moma kvv hvchi bvshpo falaia ya hvsh ilapak-shvnni cha, binah okhissa puta chukovvt kohchvt hlopullit hatak moma kvv hvchitibapishi ha, micha hatak moma kvv ai itapiha ya, micha hatak moma kvv in chuka a bilika ya hvsh bashke, achishke, achi tok.

28. Mihma Lefai im vlla vhleha hvt Moses im anumpa hatuk mak o, yvmihchi tok ; mihma nitak yvmma akakoha kvv hatak tahlepa sipokni tuchina foka tok.

29. Moses vt himak nitak a hatak moma kvv ilap ushi, micha itibapishi hatuk kia Chihowah im isht ile hullochash-ke ; yvmohmi ho himak nitak a nan isht yukpali a hvchi onochashke, achi hatuk oka.

30. Atuk o onna ma, yakohmi tok, Moses vt okla ha, Nan-

ashvchi chinto hō hvsh ashvchishke, atuk o himak a oiyvt Chihowah ya im ia la chi hoke, na hvsh ashvchi ya atobbi li yoba na (or kashofit atobbi li yoba na) achi tok.

31. Mihmvt Moses vt falamvt Chihowah ya im ona cha, Ikikkeh, okla ilvppvt nan ashvchi chito hō ashvchi cha, tvli holisso lakna naholbvt toba ikbishke.

32. Yohmi kia himak a ish ahnikmvt, nanashvchi ya ish i kashofashke, atuk o ish yvmihcha he keyukmvt, chi holisso hō ish holissochi tuk vt is sa kashofashke, achi tok.

33. Mihma Chihowah yvt Moses a, Kuna hosh a yoshuba tukma, yvmmak o a holisso ha a kashofi la chi hoke.

34. Yvmohmi hoka himak a iah, micha okla pehlichit, yakni chim anoli li tuk a ish onashke. Yakeh, vm enchil vt hvchi tikba ia chi hoke: yohmi kia im aya li nitak mvt, nan ashvchi tuk a im ayvt onochi la hi oke.

35. Atuk osh Chihowah yvt okla ha Alon vt ikbi ma, wak ushi okla ikbi tuk pulla kak o nan ik achukmo onochi tok.

CHAPTA XXXIII.

MIHMVT Chihowah yvt Moses a, Iah, micha chishno, micha chim okla ha Echip yakni ya apehlichit ish kohchi tok aienvt ilvppa ashvt ivt, yakni Eblaham, micha Aisak, micha Chekob aiena ka anumpa kullo im il onochit chim ishtatiaka ima la chi hoke, achi li tok a ish onashke.

2. Mikma enchil a hvchi tikba pila la chi hoke; micha Kananait, Amolait micha Hittait, Pelisait, Hifait, micha Chebusait aiena ka tihlelit kohcha wehli la chi hoke.

3. Pishukchi, micha foebila ayanahanli yakni o hvchisht ona chi hoke: hvchitin takla ayvt ia la he keyu; ikunla kullo okla, hvchia hoka, hina takla mosholichit hvchi kanchi li yoba na, im achi tok.

4. Atuk o okla hvvt anumpa ik achukmo ilvppa haklo mvt okla yaiya tok, mihma achvfa kia isht ilakshema isht ik shemo tok.

5. Chihowah yvt Moses a, Israel im vlla vhleha, Ikunla

kullo okla hvchia hoke, yakosi itin takla kia hvchi takla ya onvt mosholichit hvchi kanchi la chi hoke : yvmohmi hoka himaka nan isht ilakshema ya hvsh shoelashke, yvmohmi ho nana hvchi kaniohmichi la chi kv̄t ithana lashke, ish im achashke, im achi tuk oke.

6. Mihma Israel im vlla vhleha hv̄t nan isht ilakshema ya Holeb nv̄nih bilika ya shoeli tok.

7. Mihma Moses vt vlhtipo ya eshi cha, binah ha kohcha hopaki ho hilechi cha, Okla moma im vlhtipoh achi tok. Atuk o yakohmi tok, kv̄na hosh Chihowah ya hoyokmv̄t, kohchvt okla moma im vlhtipo kohcha talaia kak o ona beka tok.

8. Atuk o yakohmi tok, Moses vt kohchvt vlhtipo ya ona ma, okla hash ot moma kv̄t wakaya cha, hatak moma kv̄t i binah aiyukali okhissa ya hiohm̄ayvt, Moses a pit iakaiyv̄chit pisa na, vlhtipo ya ont chukowa tok.

9. Atuk o yakohmi tok, Moses vt vlhtipo ya ont chukowa makinli ho, hoshonti tonik vt aka mintit vlhtipo okhissa ya ont a hikia tok; mihma Chihowah yvt Moses a itim anumpuli tok.

10. Mihma okla moma kv̄t hoshonti tonik vt vlhtipo okhissa ont hikia na pisa tok; mihmv̄t okla moma kv̄t wakaya cha, hatak moma kv̄t i binah okhissa ya ai aiokpv̄chi tok.

11. Mihma Chihowah yvt Moses a, hatak osh i kana itim anumpuli ka chohmit nashuka iti sanalit itim anumpuli tok. Mihma anonti falamvt binah ha ont chukowa tok : amba in tishu hatak himita Nun ushi Choshua vto vlhtipo ya kohchvt ik aiyo tok.

12. Mihma Moses vt Chihowah ya yakeh, Okla ilvppa isht ish onashke, is svm achishke : yohmi hokak osh kv̄na hosh ish atokoli na si awant ia chi ka chik svm anoloshke : yohmi hokak osh hohchifo ho ishit chithana li, micha na sa tikba ya vm isht i kana ya ish aiahayuchi ak inlishke, ish achi tuk oke.

13. Yvmohmi hoka himak a chim asilhha lishke, chi tikba ya chim isht i kana aiahayuchi li hokma, himak a chi

hina is svm otvninchashke: yohmi na chithaiyana lashke, yohmi na, chi tikba ya chim isht i kana ai ahayuchi lashke: micha okla ilvppvt chim oklushi ya ish anukfillashke, im achi tok.

14. Mihma Ūno ak osh hvchi awant ia la chi hoke, micha hvchi fohachi la chi hoke, achi tok.

15. Mihma, Si awant ish ia chi keyukmvt, ilvppa a pishit chik aiyo kashke.

16. Nanta hak o, Ūno, micha chim okla aiena kv̄t chim isht i kana ya ahayuchi tuk a ilvppak o isht ai akostininha hinla cho; pi awant ish aya kak a hinla keyu cho? Yohmi hosh vno micha chim okla aiena kv̄t okla moma yakni paknaka aiasha ka i filvmma hi oke, im achi tok.

17. Mihma Chihowah yvt Moses a, Ish anumpuli tuk, ilvppak kia yvmihchi la chi hoke. Ūm isht i kana ya ish ahayuchi tuk okvt, micha chi hohchifo ha ithana li hoke, im achi tok.

18. Mihma Chim asilhha lishke, chim aholitopa ya is sa pesvchashke, achi tok.

19. Mihma, Si ai achukmaka ya mominchit chitikba ya ont iachi la chi hoke, micha chitikba ya Chihowah hohchifo ha ai anoli la chi hoke: micha kv̄na ho i kana la he, ahni likmvt, i kana la hi oke; micha kv̄na i nukhaklo la hi, ahni likmvt, i nukhaklo la hi oke, achi tok.

20. Micha, Sa nashuka ya ish pisa he keyu hoke, hatak nana hosh sa pesa cha, okchaya he keyu hoka, achi tok.

21. Micha Chihowah yvt, Yakeh vm a kanima kv̄t talayvshke, mikma tvli chito paknaka ya ish o hikiashke.

22. Atukma yakohma hi oke, vm aholitopa yvt ant aya takla ka, tvli chito wakla ya chi fohki la chi hoke: micha ant aya li takla kv̄t subbak isht chi ompohomo la chi hoke.

23. Atuk osh subbak a ishe likma, vm ashaka ak o ish pisa hi oke, amba sanashuka ya pisa he keyu hoke.

CHAPTA XXXIV.

MIHMA Chihowah yvt Moses a, Tvli patvssa tuklo vmmona tuk a chohmi hō ish tvhlashke, mikma tuli patvssa yvmmak o tvli patvssa vmmona ish koli kash anumpa atakali tuk a ai o holissochi lashke.

2. Mikma onnahunlikma chim vlhtaha mvt, onnahunlikma Sinai nvni ha ish oiya cha, nvni paknaka ya sa tikba ya is svn vlashke.

3. Mikma hatak nana kia chi awant oiya he keyu; micha nvni afullota moma hatak nana kia hikia na, ik peso kashke; mikma nan vlhpoa chipunta, micha nan vlhpoa hochito aiena kvt nvni yvma itikba ya ik ai impo kashke, achi tok.

4. Mihma tuli patvssa tuklo vmmona tuk a chohmi hō tvhli tok, micha Moses vt onnahunli fehna moma hō, wakaya cha Chihowah yvt i miha tuk mak o, tuli patvssa tuklo kak osh ibbak foka hosh Sinai nvni ha oiya tok.

5. Mihma Chihowah yvt hoshonti afoyuka cha, akowa mvt, yvmmak o takla hikia cha, Chihowah hohchifo ha anohonli tok.

6. Micha Chihowah yvt itikba ont ia cha, chitolit, Chihowah, Chitokaka Chihowah nan i nukhaklo, i kana, i svlaha, micha ai achukma, micha aiahli aiena kvt in lavah.

7. Tahlepa sipokni hoh kia i nukhaklot bilia, ik vlhpieso, micha anumpa kobvffi, micha aiashvchi aiena ka i kashofi, micha anumpa hvt onvtola he vlhpesa ya hlakoficha he keyu, iki puta ik ai vlhpeso atuk mak o im vlla vhleha puta ka, micha vlla vhleha hash im vlla vhleha ai iti shali ont atuchina, micha ont ai ushta kia im aya yoke, achi tok.

8. Mihma Moses vt tushpvt noshkobo ha aka pit isht akachunoli cha aiokpvchi tok.

9. Micha Chihowah ma, himak a chim isht ikana ahayuchi li hokma, chim asilhha lishke, an Chihowah vt pi awant iashke (okla ikunla kvllō vhleha hoka), ik pi ai vlhpieso, micha il aiashvchi ya ish pi kashofashke, micha chimmi ikbit ish pi eshashke, achi tok.

10. Mihma, Yakeh anumpa ahli ikbi lishke, chim okla moma itikba ya na fehna yvmma chohmi kv̄t yakni moma ka, micha oklushi nana kia, a yvmohmi chatuk keyu hō yvmihchi la chī hoke; mikma okla takla ish ahanta tuk vt moma kv̄t Chihowah na yvmihchi ka pisa chī hoke, na hvchi yvmihchi li ka ishit nukhlakancha ya chī hoke.

11. Himak nitak a chim apesa li ka ish ithaiyanashke. Yakeh, Amolait, micha Kananait, micha Hittait, micha Pilissait, micha Hifait, micha Chibusait aiena ka hvchi tikba tihlelit kohcha wehli lishke.

12. Ahah ish ahni cha, yvmma ish ia kv̄t yakni ya okla ai asha ka anumpa chik itim apesokashke; ishit yoshoba yosh hvchitin takla ya aiasha yoba na.

13. Amba im alta puta, i naholbvt toba puta ka ish okprni cha, im iti lokoli puta ka chanlit ish akvchashke,

14. Naholbvt toba chitokaka inla ka ish aiokpvcha he keyu hoka, Chihowah yvmma hohchifo kv̄t Nuktanhla ya tuk osh, Chihowah nukttanhla yoke.

15. Yakni ya okla aiasha ka nan ish itim apesa na, havit i na holbvt toba ya iakaiya cha, i naholba ya nan vbit isht aiokpvchi, atuk o chim anoli na, vbit isht aiokpvchi a ishpa yoba nah.

16. Micha chiso vhleha ha ushetik vhleha ha ishit ish ima na, ushetik vhleha hash osh havit i naholbvt toba ya iakaiya cha, chiso vhleha ha havit i naholbvt toba iakaiyvchi yoba na.

17. Bilvt akmot naholbvt toba ya chik ikbo kashke.

18. Pvska ik shatvmmo impvchi ya ish holitoblashke. Hvshi Abib nitak o chim achi li tuk mak o, nitak untuklo hō pvska ik shatvmmo ish pashke; Abib hvshi o Echip a ish kohcha tok okvt.

19. Im oshvtto tiwi moma kv̄t vmmi hoke; micha chi nanvlpōa moma tikba vttā kv̄t wak okma, chukfi hokma nana kia, nakni okmvt vmmi hoke,

20. Amba issuba nashoba vttā ahpi ano falvmmichit chukfushi isht ish chumpashke; micha falvmmichit ish chumpa he keyukmvt, ikunla ya ish kotvffashke; micha

chiso vlheha vta ahpi moma ka falvmmichit ish chum-pashke; mikma achvfa kia ibbak bieka hosh sa tikba ya iklo kashke.

21. Nitak hannali ho ish toksvlashke, amba nitak isht untuklo kano ish fohashke; yakni patvffi nitak, micha nawaya nitak a ish fohashke.

22. Micha onush vmo waya vmmona wek puta impvchi ya, micha afvmmi ont taha, na waya hoyo impvchi ya ish holitoblashke.

23. Afvmmi achvfakma hituchina ha nakni yosh hvchim ai asha moma kvv Chitokaka Chihowah Israel in Chitokaka itikba ya hiela hi oke,

24. Oklushi puta ka hvchi tikba kohchit kanchi lish, chim ai vli a chitolichi la chi hoke, mikma afvmmi achvfakma hituchina ha chin Chitokaka Chihowah ya itikba ish hikia chi hosh ish iakma, hatak nana kia chi yakni a bvna he keyu hoke,

25. Vbit isht aiokpvchi issish a pvska ikshatvmmo aie-ninchit is svv issa he keyu hoke, micha vbanvblit ontia impvchi vbit isht aiokpvchi vt asha na onnahinli ya ona he ke keyu hoke,

26. Nawaya vmmona achukma i shahli aya chin Chitokaka Chihowah im aboha isht ish onashke. Issi kosoma ushi ya ishki i pishukchi a isht ish hona he keyu hoke, achi tok.

27. Mihmvt Chihowah yvt Moses a, Anumpa ilvppa puta ka ish holissochashke; anumpa ilvppa puta chohmi kak o, chishno micha Israel aiena ka itim apesa li hoka, im achi tok,

28. Micha yvmma nitak pokoli ushta, micha ninak pokoli ushta ho Chihowah takla ahanta tok, pvska ya ikpo, micha oka ya ik ishko tok; micha nan vlvh-pisa anumpa nan vlvh-pisa pokoli yash tvli patvssa ya ai o holissochi tok,

29. Atuk o yakohmi tok, Moses vt Sinai nvni h nanvlpisa tvli patvssa tuklo kvv Moses ibbak a foka ho akowa mvv nvni h akowa mvv, im anumpuli ma, nashuka yvt shohmalali ka ik ithano ki tok.

30. Atuk o Alon, micha Israel im vlla vhleha moma kv̄t Moses nashuka yvt shohmakali kā pisa mvt, bilika ona kā nukshopa tok.

31. Mihma Moses vt i howa tok; mihma Alon micha okla moma pehlichī vhleha hv̄t falamvt im ona tok, mihma Moses vt itim anumpuli tok.

32. Atuk osh i himmak ak o Israel im vlla vhleha moma kv̄t bilika ona tok; mihma nanv̄lhpisa hā Chihowah yvt Sinai nvn̄ih hā ai im anumpuli tuk moma kā ima tok.

33. Micha Moses vt im anumpulit ik tahlo kisha kv̄t, nashuka yā ishtompoholmo yā isht ompohomo tok.

34. Amba Moses vt itim anumpula chī hosh Chihowah itikba yā ona mvt, nashuka isht ompoholmo yā ishi tuk osh kohcha tok; micha kohcha mvt, Chihowah i miha tuk mak o Israel im vlla vhleha hā im anumpuli tok.

35. Atuk o Israel im vlla vhleha hv̄t Moses nashuka yā pisa ma, Moses nashuka yvt shohmalali tok, mihma Moses vt anonti nashuka yā isht ompoholmo yā isht ompohomo tuk osh im anumpula chī hosh iba chukowa tok.

CHAPTA XXXV.

MICHA Moses vt Israel im vlla vhleha moma kā itvnnali cha, Anumpa ilvppa puta kak o hv̄sh yvmihcha chī ho, Chihowah yvt hv̄chim apesa tuk oke.

2. Nitak hannali hō natoksvli vt vlhtahashke, amba nitak isht untuklo hokvto nitak chī holitopa Chihowah i nitak hullo a foha hi oke: kv̄na hosh yvmmak o natoksvli nana kia yvmihchikmvt illi pullashke.

3. Nitak hullo yā hv̄sh aiasha ahlopulli kā luak nana kia hv̄chik ikbo kashke, achi tok.

4. Micha Moses vt Israel im vlla vhleha okla moma kā im anumpulit, Nana ilvppak o Chihowah yvt hv̄chim apesvt,

5. Hv̄ch itin takla yā Chihowah nan im issa hv̄sh ai ish-ashke; kv̄na hosh chukvsh aiokpanchikmvt, Chihowah isht aiokp̄vchi, tv̄li holisso lakna, tv̄li hv̄ta, micha asonak lakna,

6. Micha nan okchamali, micha hummai, micha tishepa, micha linen tapvski, micha issi kosoma hishi,

7. Micha chukfi nakni hakshup humma, micha bacha hakshup micha shittim iti,

8. Pula ha chi ka bila micha ishtahama bila ya chi ka micha nabalama ya chi ka nabalama,

9. Micha oniks tvli, micha efot micha ikkishi alata ontv-la chi ka tvli puta ka isht vlashke.

10. Mikma chukvsh hopoyuksa vhleha hvchi takla aiasha kvv tvv Chihowah yvt apesa tuk moma ka yvmihchashke.

11. Ulhtipo tabanake, micha im ompoholmo, im ishtakamvssa, micha im iti bvsha, im okhowatkvchi, in tonik, micha im ashavvlli,

12. Itombi holitopa, micha in tvbi, ai i kana ai ombinili aiena, micha isht ompoholmo, ompoholmo,

13. Ai impa, micha in tvbi, micha nan im aivlhto moma, micha pvska otvni,

14. Micha tohwikela chi ka pula ai o hikia, micha i nachukushpa, micha pula bila aivlhto tohwikela chi ka bila aiena,

15. Micha alta nabalama ai o hukmi, micha in tvbi, micha ahama bila, micha nabalama, micha vltipo ya achukowa okhissa ya atakali,

16. Alta ai o hukmit isht aiokpvchi, im asonak lakna tvnna im aiena in tvbi, micha nan im aivlhto moma, ampo mahaia chito, micha iyi,

17. Wanuta ya natakali, in tonik, micha im ashavvlli, micha wanuta okhissa ya in takali,

18. Ulhtipo ya isht akamvssvt shvmohli, micha, wanuta isht akamvssvt shvmohli, micha im asita puta.

19. Aholitopa nan isht ai vta chi ka nafohkvv isht vta, naholitompa isht vta, Alon i nafohka holitopa, micha naholitompa isht ai vta isht asha chi ka ushi vhleha i nafohka puta ka ikba chi hoke, achi tok oke, im achi tok.

20. Mihma Israel im vlla vhleha okla moma kvv Moses a ai i filvmmitt ia tok.

21. Mihma chukvsh vt ayimitvchi tuk puta kvv, micha

shilombish vt vlhpiesa ahnichechi tuk puta kv̄t vla tok; mi-
cha Chihowah nan im issa ya okla moma im vlhtipo, mi-
cha nan isht aiahanta moma, mi-cha nafohka holitopa a toba chi
ka isht vla tok.

22. Mihma chukvsh aiokpanchi ai-yukali kv̄t hatak, mi-
choyo aiena kv̄t, vlut, ibbak vlbeha, mi-cha haksobish takali,
mi-cha ibbakushi vlbeha, mi-cha shakba vlbeha tv̄li lakna isht
ilakshema moma isht vla tok, mihma im issa tuk ai-yukali
hatak vt tv̄li holisso lakna, im issa ya Chihowah im issa tok.

23. Mihma hatak kv̄na hosh nan okchamali, mi-cha nahum-
maii, mi-cha na tishepa, mi-cha linen tapvski, mi-cha issi ko-
soma hishi, mi-cha chukfi nakni hakshup homma, mi-cha ba-
cha hakshup aiena kv̄t im asha tuk vt isht vla tok.

24. Kv̄na hosh tv̄li hv̄ta, mi-cha asonak lakna im issa ya
im issa ai-yukali kv̄t Chihowah nan im issa ya isht vla tok;
mikma hatak nana hosh shittim iti nan isht aiasha toba he
vt in tonlakmvt isht vla tok.

25. Mikma ohoyo chukvsh hopoyuksa moma kv̄t ibbak
ishit shv̄nni cha shv̄nni tuk vt nan okchamali, mi-cha na
hummaii, mi-cha natishepa mi-cha linen tapvski aiena ka isht
vla tok.

26. Mi-cha chukvsh vt hopoyuksachit ayimitvchi tuk
ohoyo moma kv̄t issi kosoma hishi o shv̄nni tok.

27. Mihma pehlichī vhleha hv̄t efot, mi-cha ikkishi alata
ya ontvla chi ka oniks tv̄li, mi-cha tv̄li puta ka isht vla
tok.

28. Mi-cha ahama ya chi ka, mi-cha nabalama chi ka, na-
balama, mi-cha tohwikeli ya chi ka bila aiena ka isht vla
tok.

29. Israel im vlla vhleha hv̄t hatak mi-cha ohoyo moma
kv̄t chukvsh vt vlhpesa ahnichichi na, na toksvli ilai-yukali
moma kv̄t toba chi ho Chihowah yvt Moses a toksvli apesa
tuk a, chukvsh aiokpanchi hosh Chihowah nana im issa ya
isht vla tok.

30. Mihma Moses vt Israel im vlla vhleha ha, Yakeh,
Chihowah yvt hochifot Chutah apehlichī aiachvfa Hu ushi
Uli ya ushi Besaleel ahe atokoli tuk oke.

31. Micha Chitokaka shilombish alotoli na, hopoyuksa nanithana, micha nana kostininchī, micha natoksvli ilaiyukali moma imponna;

32. Micha natoksvli inla fehna anukfillit, tvli holisso lakna, micha tvli hvta, micha asonak lakna toksvli,

33. Micha on taloha chī kv̄t tvli tvhli, micha iti yā bamakechi natoksvli inla fehna nana kia ikbi yā nukfohki tuk oke.

34. Micha im av̄cha he yā, yv̄mma, micha Tan apēhlichī aiachv̄fa Ahisamak, Aholiab itatuklo k̄a nukfohki tuk oke.

35. Yv̄mmak o natoksvli ilaiyukali moma nan in chunli, micha natoksvli inla fehna imponna, micha alakali, okchamali, micha hummai, micha tishepa, micha linen tapv̄ski, nantv̄nna, micha natoksvli kaniohmi kia yv̄mihchi, natoksvli inla fehna kia anukfilli aiena k̄a imponna nukfohki tuk oke.

CHAPTA XXXVI.

YOHMI ma Besaleel, micha Aholiab, micha hatak chukv̄sh hopoyuksa puta kv̄t natoksvli ilaiyukali moma vlhtipo yā isht atoksvli yā chī hō Chihowah yvt apesa tuk moma k̄a yv̄mihcha chī hō, Chihowah yvt hopoyuksa, micha nanithanvt toksvli imponna nukfohki tuk vt ikbi tok.

2. Mihma Moses vt Besaleel, micha Aholiab, micha hatak chukv̄sh hopoyuksa aiyyukali Chihowah yvt chukv̄sh a hopoyuksa nukfohki tuk, vlt natoksvli yā yv̄mihcha chī hō chukv̄sh vt a ayimmitv̄chi tuk puta k̄a hoyo tok.

3. Mihma vlhtipo yā isht a toksvli toba chī k̄a ishit toba yā Israel im vlla vhleha hv̄t im issvt isht vla tuk moma k̄a Moses a im ai ishi tok, micha onnahinli moma ma chukv̄sh aiokpanchi hosh nana im issa yā isht im ahanla tok.

4. Mihma hatak hopoyuksa moma vlhtipo yā natoksvli puta aiasha k̄a toksvli tuk vt nan ikbit toksvli tuk vt issvt ia tok.

5. Micha Moses a okla im anumpulit, Okla hv̄t natoksvli

toba ka Chihowah yvt apesa tuk a atampa fehna ho isht-
vlvshke, achi tok.

6. Mihma Moses vt apesa na, okla anolit binah ha hlopul-
lichit, Hatak nana kia, micha ohoyo nana kia, vlhtipo toba
chi ka natoksvli ikbit iklo kashke, achi tok. Yohmit okla
ha im alvmmi na, ishit iklo tok.

7. Nana im asha kvv natoksvli moma ishit toba ha vlhp-
sa ka ona, micha atampa fehna hoka.

8. Mihma hatak hopoyuksa aiyukali takla asha tuk vt
vlhtipo natoksvli a ikbi kvv, nan tvnna vba takali pokoli
hosh linen tapvski pvna okchamali, micha hummaii, micha
tishepa aiena ka ikbi tok, natoksvli inla Chelubim puta ka
ikbi tok.

9. Takali achvfa kvv falaia kvv kubit pokoli tuklo akucha
untuchinakma, takali achvfakmvt auata kvv kubit ushta tok;
vbatakali moma kvv vlhpisa kvv iti laui ha tok.

10. Takali tahlapi ka itachakli tok; micha takali inla ta-
hlapi ka itachakli tok.

11. Michā takali achvfa vhli ai itvchakvchi vhli ya ahlo-
pulli okchamali ya ikbi tok; micha takali achvfa ont vhli
fehna atukla itachakvchi a ai ikbi ak inli tok.

12. Takali achvfa ka ahlopulli pokoli tahlapi ho ikbi tok,
micha atukla ai itachakvchi takali vhli ha ahlopulli pokoli
tahlapi ho ikbi tok; ahlopulli vt ita halvlli tok.

13. Michā tvli holisso lakna isht a kamvssa pokoli tahl-
pi ho ikbi tok, micha isht a kamvssa ya takali ya ishit ita-
chakli tok. Yohmi ho vlhtipo achvfa toba tok.

14. Michā issi kosoma hishi yo takali ya vlhtipo ya im ikbi
na, vlhtipo ya ompoholmo tok; takali auahachvfa ho ikbi tok.

15. Takali achvfa kvv falaia kvv kubit pokoli tuchinak-
mvt, takali achvfa kvv auata kvv kubit ushta tok; takali
auahachvfa kvv vlhpisa kvv iti laui tok.

16. Takali tahlapi ka ila itachakli mvt, takali hannali ka
ila itachakli tok.

17. Michā takali ai itachaka ont vhli fehna ya ahlopulli
pokoli tahlapi ho ikbi tok, micha takali ai itachaka atukla
ka ahlopulli pokoli tahlapi ho ikbi tok.

18. Micha vlhtipo ya itachakali na, achvfa chi ka asonak lakna isht a kamvssa pokoli tahlapi ho ikbi tok.

19. Micha vlhtipo ompoholmo ya chukfi nakni hakshup humma ikbi mvt, yvma paknaka ompoholmo ya bacha hakshup o ikbi tok.

20. Micha vlhtipo ya shittim iti yo iti bvsha hiohli yo im ikbi tok.

21. Iti bvsha vt achvfa kvf falaia kvf kubit pokolikmvt, iti bvsha achvfa kvf auata kvf kubit achvfa cha iklvna tok.

22. Iti bvsha achvfa kvf ishit shamvlli tuklo hosh iti hopakv kvf iti laui tok, yakohmichi hosh iti bvsha moma ka vlhtipo ya im ikbi tok.

23. Micha vlhtipo ya iti bvsha im ikbi ka; oka mahli pilla oka mahli in tvnnvp a iti bvsha pokoli tuklo tok.

24. Micha iti bvsha pokoli tuklo kash nutaka ya tvli hvta yosh ashamahli pokoli ushta ho ikbi tok; iti bvsha achvfa im isht shamohli in tuklo ka nutaka ya ashamahli tuklokma, iti bvsha achvfa im isht shamohli tuklo ka ashamahli tuklo tok.

25. Micha vlhtipo in tvnnvp achvfa falvmmi pilla aivhli ya iti bvsha pokoli tuklo ikbi tok.

26. Micha tvli hvta yosh im ashamahli pokoli ushta ho ikbi tok, iti bvsha achvfa nutaka ya ashamahli tuklokma, iti bvsha inla nutaka ya ashamahli tuklo tok.

27. Micha vlhtipo hvshi aiokatula pilla in tvnnvp a iti bvsha hannali ho ikbi tok.

28. Micha in tvnnvp tuklo vlhtipo chukbi puta ka iti bvsha tuklo ho ikbi tok.

29. Micha akishtvla ya chvnaha achvfa ho isht ita chakali mvt, paknaka ya ita chakali tok; yakohmi hosh chukbi ita tuklo ka yvmihchi tok.

30. Mihma itibvsha untuchinakma tvli hvta yash, ashavmlli auah hannali tok; iti bvsha achvfa nutaka ya ashavmlli tuklo bieka tok.

31. Micha vlhtipo in tvnnvp achvfa iti bvsha ya shittim iti yo im okfoatkvchi tahlapi ho,

32. Micha vlhtipo in tvnnvp achvfa iti bvsha ya im ok-

howatkvchi tahlapi; micha vlhtipo in tvnnvp hvshi ai okatula pilla iti bvsha ya im okhowatkvchi tahlapi ho ikbi tok.

33. Micha iklnna okhowatkvchi iti bvsha puta kash hlopullechi kv ant vhli ia kv ont vhli achvfa ya ona tok.

34. Micha iti bvsha ya tvli holisso lakna yo lapalichi mvt, okhowatkvchi ashamoqli ya chi ka tvli holisso lakna chvnaha im ikbi mvt, okhowatkvchi ya tvli holisso lakna lapohliche tok.

35. Micha isht ompoholmo ya okchamali, micha hummai, micha tishepa, micha linen tapvski itapana cha, tvnna yo ikbi tok toksvli imponna yosh ikbi ho chelubim atoba yo ikbi tok.

36. Micha shittim iti yo tonik ushta ho im ikbi cha, tvli holisso lakna lapaliche tok; isht afacha yvt tvli holisso lakna, micha aivlbeha ya tvli hvta yo i bilelit akmoche tok.

37. Micha vlhtipo okhissa in takali ya okchamali, micha hummai, micha tishepa, micha itapana cha tvnna linen tapvski chufak ushi isht atahli yo ikbi tok.

38. Micha tonik tahlapi kash i chanakbi aiena ka ikbi tok, micha noshkobo micha im apakfopa aiena ka tvli holisso lakna lapaliche tok; amba ashamoqli tahlapi kv o asonak lakna a tok.

CHAPTA XXXVII.

MIHMA Besaleel vt shittim iti yo itombi holitopa ikbi tok; falaia kv kubit tuklo cha iklnakma, auata kv kubit achvfa cha iklnakma, chaha kv kubit achvfa cha iklna aiena tok.

2. Micha tvli holisso lakna bano ho anukaka, micha koheha aiena lapaliche tok, micha tvli holisso lakna i fullota ikbit apakfobli tok.

3. Micha chukbi ushta ka takohliche chi hosh chvnaha tvli holisso lakna ushta ho bilelit akmoche tok; in tvnnvp achvfa ka chvnaha tuklokma, in tvnnvp achvfa ka chvnaha tuklo tok.

4. Mihmvt shittim iti y_o tvbi ikbi cha, tvli holisso lakna lapalichi tok.

5. Micha tvbi yash itombi holitopa naksika chvnaha takohli kash isht sholachi h_o shamohli tok.

6. Micha ai i kana aiombinili ya tvli holisso lakna bano h_o ikbi tok; falaia kvt kubit tuklo cha iklvnakmvt, auata kvt kubit achvfa iklvna aiena tok.

7. Micha ai i kana aiombinili ont vhli tuklo ka, Chelubim tuklo tvli holisso lakna y_o ikbi tok; mih achvfa h_o bolit ikbi tok;

8. Chelub achvfa kvt ont vhli ilvppa o hikiakma, chelub achvfa kvt ont vhli in tvnnvp yvmmā o hikia tok; ai i kana aiombinili aiachvfa h_o ont vhli tuklo ka chilubim ikbi tok.

9. Mihma Chelubim vt sanahchi ya ashatvblit vba weli cha ai ikana aiombinili ya sanahchi isht ompohomo hosh nashuka iti sanalit hielit tok, Chelubim nashuka yvt ai i kana aiombinili pillā pit taloha tok.

10. Mikma shittim iti y_o aiimpa ikbi tok, falaia kvt kubit tuklokma, auata kvt kubit achvfakma, chaha kvt kubit achvfa cha iklvna tok.

11. Micha tvli holisso lakna bano h_o lapalichi cha, tvli holisso lakna apakfoyupa im ikbi tok.

12. Micha i fullota ya ibbak putha achvfa h_o im ikbit apakfobli tok; micha i fullota yash tvli holisso lakna y_o apakfoyupa ikbi tok.

13. Mihmvt tvli holisso lakna y_o chvnaha ushta h_o bilelit akmochi cha, chvnaha yash iyi ushta chukbi ushta takoh-
lichit tok.

14. I fullota y_o bilika ak o tvbi vt shamohli hosh sholachi h_o chvnaha hut takohli tok.

15. Micha aiimpa ishit sholachi tvbi ya shittim iti y_o ikbi cha, tvli holisso lakna ya lapalichi tok.

16. Micha nan aivlhto, aiimpa paknaka aiasha, im ampo patvssa, micha im ishtimpa, micha im ampo ompoholmo isht ompoholmo aiena ka tvli holisso lakna bano h_o ikbi tok.

17. Micha pula aiohika ya tvli holisso lakna bano h_o ikbi tok; bort toba h_o pula aiohikia ikbi, im vpi micha i nak-

sish filamohli, im ampo, micha i bikbina, micha i pakanli vt mih makinli tok.

18. Yohmi ka naksish vt hannali kut tvhlalaka akohcha tok; p_ula a_iohikia ya naksish tuchina hosh in t_unnvp a akohcha ma, p_ula a_iohikia ya naksish tuchina hosh akohcha tok.

19. Naksish achvfa ka almont holbvt toba hosh, ampo tuchinakmvt lumbo achvfa, micha napakanli achvfa; mikma naksish achvfa ka, ampo tuchinakmvt, almont holbvt toba hosh, lumbo achvfa, micha napakanli achvfa tok; yohmi kut p_ula a_iohikia ya naksish vt akohchvt ia hannali kut hlopulli tok.

20. Mihma p_ula a_iohikia ya ampo ushta, almont holbvt toba, micha in luboa, micha i napakanli aiena kut a_usha tok.

21. Yohmi ka y_ummak ash inli naksish tuklo, nuta ya lumbo achvfa, y_ummak ash inli naksish tuklo nuta ya lumbo achvfa, y_ummak ash inli naksish tuklo nuta ya lumbo achvfa, naksish hannali kohchvt ia ka vlhpisa tok;

22. In lumbo, micha i filamohlichi vt ai achvfa hatok; moma kut tvli holisso lakna achvfa bano hosh bov toba hatok.

23. Mich*a* i bila aivlhto untuklo ka, micha p_ula im isht tvptohli, micha p_ula tvptoha im aivlhto aiena tvli holisso lakna bano h*o* isht ikbi tok.

24. Tvli holisso lakna bano weki talent achvfa h*o* ikbi tok; micha im ai vlhto moma ka ikbi tok.

25. Nabalama ahukmi alta ya shittim iti y*o* ikbi tok; falaia kut kubit achvfakma, auata kut kubit achvfa tok, apatvssa ushta hatok; micha chaha kut kubit tuklo hatok, in lvpish vt y_ummak inli hatok.

26. Mich*a* paknaka ya, micha apatvssa apakfoyupa, micha lapish aiena ka tvli holisso lakna bano h*o* lapalich*i* tok; micha tvli holisso lakna y*o* i fullota apakfoyubl*i*t ikbi tok.

27. Mich*a* i fullota nutaka ya iti t*u*pa ashamohli na, shohlach*i* ka tvli holisso lakna chvnaha tuklo h*o* iti chabl*i*t ont achukbi tuklo ka takohlichi tok.

28. Micha iti tupa ya shittim iti yo ikbi cha, tuli holisso lakna lapalichi tok.

29. Micha ishtahama bila holitopa, micha nabalama shobulli ahli ho nabalama yo, ikhish atahli mak o ikbi tok.

CHAPTA XXXVIII.

MICHA shittim iti yo aionochit hukmit im issa alta ya ikbi tok, falaia kut kubit tahlapi mut, auata kut kubit tahiapi hatok, okhowataha ushta ha tok, micha chaha kut hubit tuchina tok.

2. Micha chukbi ushta ka in lapish a ikbi tok, lapish vt ai achufa hatok, micha tuli asonak lakna yo lapalichi tok.

3. Micha alta ya nan im aivlhto moma, shuti, micha tobaksi isht piha, micha ampmahaia, micha nipi ishit yichiffi, micha luak aivlhto ampo aiena ka ikbi tok, nan aivlhto moma ka asonak lakna yo ikbi tok.

4. Micha alta ya asonak lakna tunna yosh ai apakfoyupa nutaka ya bilika vttvt ia hosh ikvunna ka ona ikbi tok.

5. Micha asonak lakna tunna aivhli ushta ka iti tupa ai vlbeha chi ka asonak lakna chvnaha ushta ho bilelit im ikbi tok.

6. Micha iti tupa ya shittim iti yo ikbi cha, asonak lakna yo lapalichi tok.

7. Micha vba takalicha chi ka alta okfowataka bilika yo bohli chvnaha yash pit apitta tok, alta yvt chiluk asha yosh iti bvsha yo isht ikbi tok.

8. Micha nan ai vlhto chito asonak lakna yo, micha iyi vt asonak lakna yosh ohoyo itvnaha hv okla moma im vlhtipo okhissa ya ai itvnaha chatuk vt apisa yo isht ikbi tok.

9. Micha wanuta ya ikbi tok; okamahli in tvnvp okamahli pilla ho wanuta ya in takohli vt pvnvt tunna linen tapvski yosh kubit tahlepa achufa tok.

10. In tonik vt pokoli tuklo cha, ashamahli asonak lakna yvt pokoli tuklo tok; tonik im atakali vt micha im isht ita halvli vt tuli hvta atok.

11. Micha falummi in tūnnvp a takali vt kubit tahlepa achvfa ma, in tonik vt pokoli tuklo cha, im a shamohli asonak lakna vt pokoli tuklo tok; tonik im atakali, micha im isht ita halvlli vt tvi hvta atok.

12. Micha hvshi aiokatula in tūnnvp a takali vt pokoli tahlapi ma, in tonik vt pokoli cha, im ashamohli vt pokoli tok; tonik im atakali, micha im isht ita halvlli vt tvi hvta atok.

13. Micha hvshi akohchaka in tūnnvp, hvshi akohcha pilla hō kubit pokoli tahlapi tok.

14. Holihta okhissa in tūnnvp achvfa ka vba takali vt kubit auahtahlapi tok; in tonik vt tuchina cha, im ashamohli vt tuchina tok.

15. Micha wanuta okhissa in tūnnvp achvfa ilvppa in tūnnvp, micha ymma in tūnnvp, atakali vt kubit auahtahlapi tok, in tonik vt tuchina cha, im ashamohli vt tuchina tok.

16. Wanuta apakfoyupa fullota takali moma kv̄t pūvt tūnna linen tapvski atok.

17. Mihma tonik im ashamohli puta kv̄t asonak lakna atok; tonik im atakali, micha im isht ita halvlli vt tvi hvta atok; micha i noshkobo lapali kv̄t tvi hvta atok, wanuta tonik moma kv̄t tvi hvta yosh isht itahvllit taha tok.

18. Micha wanuta holihta okhissa takali vt chufak ushi isht vlhtaha hosh, okchamali, micha hummai, micha tishepa yosh pūvt tūnna linen tapvski atok; micha falaia kv̄t kubit pokoli tuklo cha, auata ymma chaha kv̄t kubit tahlapi wanuta takali ya chohmi tok.

19. Micha in tonik vt ushta, micha im ashamohli vt asonak lakna yosh ushta tok; im atakali vt tvi hvta, micha i noshkobo puta lapali, micha im isht ita halvlli puta kv̄t tvi hvta atok.

20. Micha vlhtipo ya, micha wanuta apakfoyupa ka isht ahonvhla moma kv̄t asonak lakna atok.

21. Na holitompa isht vta Alon ushi Ihlama vt pehlich hō, Lefai vhleha hv̄t nan isht aiasha chi hō, Moses vt apesa tuk mak o, isht atokowa vlhtipo pulla holhtina tuk vt vlhtipo moma ka ilvppak oke.

22. Mihma Chihowah yvt Moses a im apesa tuk mak o, Chutah apehlichy aiachvfa Hu ushi, Uli ya ushi Besaleel vt moma ka ikbi tok.

23. Micha Ahisimak ushi Aholiab Tan apehlichy aiachvfa nan in chunli, micha natoksvli imponna, micha i fullota okchamali, micha hummai micha tishepa, pvnvt tvnna linen tapvski isht vta vlhtaha yosh iba foka tok.

24. Micha aholitopa natoksvli moma isht vlhtaha tuk, tvi holisso lakna moma kv im issa, tvi holisso lakna fehna kv talent pokoli tuklo akucha chakali cha, shekel tahlepa untuklo cha, pokoli tuchina kv vlhtipo aholitopa shekel a vlhpisa hatok.

25. Micha tvi hvta ya okla moma im aiishit holhtina tuk a talent tahlepa achvfa cha, shekel tahlepa sipokni achvfa cha tahlepa untuklo, pokoli untuklo akucha tahlapi kv vlhtipo aholitopa shekel a vlhpisa hatok.

26. Hatak moma kv afvmmi pokoli tuklo vhlit vba ma-ya hosh holhtina ia chatuk vt hatak tahlepa sipokni tahlepa hannali, micha tahlepa sipokni tuchina, tahlepa tahlapi cha, pokoli tahlapi kv bekah achvfa, yvmmvt shekel ikvna hosh vlhtipo aholitopa shekel a vlhpisa hatok.

27. Micha tvi hvta talent tahlepa achvfa tuk ak o bilelit akmochoit, vlhtipo aholitopa im ashamohli, micha isht ompoholmo im ashamohli aiena ka ikbi tok, talent tahlepa achvfa tuk a ashamohli tahlepa achvfa tuk, talent achvfa tuk a ashamohli achvft ia tok.

28. Micha shekel tahlepa sipokni achvfa tahlepa untuklo cha, pokoli untuklo akucha tahlapi tuk a, tonik im atakali a ikbi mv, i noshkobo ya lapalichy cha, ita takchichy tok.

29. Mikma asonak lakna im issa vt, talent pokoli untuklo, micha shekel tahlepa sipokni tuklo cha tahlepa ushta tok.

30. Micha yvmmak o okla moma im vlhtipo okhissa afohka isht ikbi mv, asonak lakna alta, micha asonak lakna tvnna, micha alta nan im aivlhto moma ka,

31. Micha wanuta apakfoypa ka im ashamohli, micha wanuta holihta okhissa im ashamohli, micha vlhtipo im isht

afacha moma micha wanuta apakfoyupa ka isht honvha moma ka isht ikbi tok.

CHAPTA XXXIX.

MICHA aholitopa atoksula chi ka nafohka fohkut toksuli, okchamali hummaii, micha tishepa ya isht ikbi tok; micha Chihowah yvt Moses a i miha tuk mak o, Alon a nafohka holitopa ya im ikbi tok.

2. Micha efot vt okchamali, micha hummaii, micha tishepa, micha pvnvt tvnna linen osh tvli holisso lakna ishta toba yo ikbi tok.

3. Micha tvli holisso lakna ya lvllit tapvshichi cha, chuhli mvt, okchamali, micha hummaii, micha tishepa, micha pvnvt tvnna linen ash toksuli imponna hosh isht shemvchechit shemvchit tahli tok.

4. Isht itachaka chi ka tahchi abana ikbi cha, takchaka tuklo kak o isht itachaka tok.

5. Mikma efot inla im vskofvchi vt atakanli tuk vt yummvt aivltaha tuk akinli ho chohmi tok; Chihowah yvt Moses a i miha tuk mak o tvli holisso lakna isht vltahvt, okchamali, micha hummaii, micha tishepa, pvnvt tvnna linen atok.

6. Micha oniks tvli ikbi mvt in chuwa yvt chuwa chatuk holbvchi hosh chunlit, Israel im vlla vhleha hohchifo lapohli ho afohka yvt tvli holisso lakna yo ontalohli tok.

7. Micha Chihowah yvt Moses a i miha tuk mak o, Israel im vlla vhleha hvt tvli ishit ithaiyana chi ho efot in tahchv-bana ya on talali tok.

8. Micha efot vltaha ka chohmi hosh toksuli imponna yosh ikbi yo ikkishi alata ikbi tok; tvli holisso lakna vltaha hosh, okchamali, micha hummaii, micha tishepa, micha pvnvt tvnna linen o ikbi tok.

9. Iti laui bano fullota hatuk; ikkishi alata vt pohloma ha ikbi tok; pohloma hosh falaia kv span achvfakma, auata kv span achvfa tok.

10. Mihmvt tvli iti akaiya ushta h_o on talohli tok; iti akaiya vmmona kv̄t sativs, topas, micha kabv̄nkel atok; ihv̄ppak osh iti akaiya vmmona hatok.

11. Mikma iti akaiya atukla kv̄t emilal, safai, micha tai-amont ak atok.

12. Mikma iti akaiya atuchina kv̄t liku, akat, micha ama-hlist ak atok.

13. Mikma iti akaiya ont ai ushta kv̄t belil, oniks, micha chaspa atok, ai on taloha on talohvt tvli holisso lakna y_o on talohli tok.

14. Micha tvli vt Israel im vlla vhleha h_a vlhp̄isa hosh auah-tuklo hohchifo h_o vlhp̄isa tok, in chuwa y_a holbvt chuwa hosh hohchifo aiyukali lapalit apehlichi auah-tuklo tuk a vlhp̄isa tok.

15. Micha tvli holisso lakna bano h_o itapanvt ishit toba h_o ikkishi alata takchaka y_a itatakvli takohlichi tok.

16. Mihmvt aiontaloha tuklo k_a tvli holisso lakna y_o ikbi mvt, tvli holisso lakna chvnaha tuklo h_o ikbi cha, ikkishi alata takchaka tuklo k_a chvnaha tuklo y_a takohlichi tok.

17. Mihmvt tvli holisso lakna itatakvli itapv̄nvt itatakvli yash ikkishi alata takchaka y_a chvnaha tuklo kash apitta tok.

18. Micha itapv̄nvt itatakvli tuklo kash wishakchi y_a aiontaloha tuklo kash atakchichi mvt, efot itikba tahchibana y_a ontakohlichi tok.

19. Micha tvli holisso lakna chvnaha tuklo h_o ikbi cha, ikkishi alata takchaka tuklo vhli efot anukaka pilla et apota h_a takohlichi tok,

20. Micha tvli holisso lakna chvnaha inla tuklo k_a ikbi cha, efot vhli tuklo nutaka tikba pilla ai ita talakchi k_a icha-paka, efot isht talakchi vskofv̄chi inla paknaka yak o takalichitok.

21. Micha Chihowah yvt Moses a im achi tuk mak o, ikkishi alata yash in chvnaha yak o, efot in chvnaha y_a sita okchamali y_a pit isht atakchichi tok; yvmohmi h_o efot isht talakchi vskofv̄chi pisa inla y_a paknaka yokma, ikkishi alata yvt efot a ik i makofu ka chi hatok.

22. Micha tnnvt toba yosh okchamali bieka h_o efot nafohka falaia ya ikbi tok.

23. Mihma nafohka falaia iklvna ya tnnvp nafohka chiluk o chohmi hosh chiluk vt hikiakma, chiluk a i fullotvt taiyaha kv_t ik hlilafo ka chi hatok,

24. Micha nafohka falaia wishakchi ya pamkilanit okchamali, hummai, micha tishepa itapanvt tnnna linen aiena h_o ai ikbi tok.

25. Micha tvli holisso lakna bano h_o tvlula yo ikbi cha, nafoka falaia wishakchi ya pamkilanit vt takohli itin takla tvlula ya takohlich_i mvt, pamkilanit itin taklv_t apakfoyupa ka takohlich_i tok.

26. Chihowah yvt Moses a i miha tuk mak o, fohkv_t nan isht vta ya chi h_o nafohka falaia wishakchi ya tvlula, mikmvt pamkilanit tvlula mikmvt pamkilanit takohlit apakfoyupa tok.

27. Micha tnnvt toba yo linen tapvski nafohka ya Alon micha ushi vhleha h_a,

28. Micha linen tapvski iahlipa, micha linen tapvski noshkobo ishit shema, aiokli, micha pnnvt tnnna linen linen obalafohka,

29. Micha pnnvt tnnna linen tapvski vskofvchi, micha okchamali, micha hummai, micha tishepa chofak ushi isht vltaha h_o Chihowah yvt Moses a i miha tuk mak o ikbi tok.

30. Micha tvli holisso lakna bano patvssa holitopa bita h_o ikbi cha in chuwa holbvt chuwa h_o, aio holissochit CHIHOWAH I HOLITOPA, achi h_o lapalich_i tok.

31. Micha Chihowah yvt Moses a i miha tuk mak o, sita okchamali ishit takchi cha, chahvchit iahlipa h_a atakchich_i tok.

32. Yakohmi hosh okla moma im ai vta vlhtipo natoksvli moma kv_t vlhtaha tok; mihma Israel im vlla vhleha hv_t yvmihchit, Chihowah yvt Moses a i miha tuk mak o moma ka okla yvmihch_i tok.

33. Micha vlhtipo ai vta, micha i nachukushpa moma, im isht a kamvssa, im iti bvsha, im okhowata, micha in tonik, micha im ashvmohli,

34. Micha isht ompoholmo chukfi nakni hakshup humma, micha isht ompoholmo bacha hakshup, micha vlhtipot ompoholmo,

35. Nanvlhpisa afohka itombi, micha im iti tvptua, micha aiombinilit i nukhaklo,

36. Aiimpa, micha nan im aivlhto moma, micha pvska otvni,

37. Mih bano pula aihikia bila ai im aivlhto, bila aivlhto iti akaiyvt hiohla chi fehna ka, micha im aivlhto moma, micha pula lua chi ka bila,

38. Micha tvli holisso lakna alta, micha bila ishtahama, micha nabalama micha vlhtipo okhissa ya takali,

39. Asonak lakna alta, micha asonak lakna tvnna, im iti tvptua, micha nan im aivlhto moma, ampo chito, micha iyi,

40. Wanuta atakali, in tonik, micha im ashamohli, micha wanuta holihta okhissa atakali im asita, micha im ishtafacha, micha okla moma im aivtta vlhtipo atoksvli nan aivlhto moma,

41. Aholitopa ya nan isht aivtta chikmvt fohkvt nan isht vtta, micha naholitopa isht aivtta ya isht vtta chikmvt fohka he ya naholitompa isht vtta Alon i nafohka holitopa, micha ushi vhleha i nafohka,

42. Chihowah yvt Moses a i miha tuk moma mak o, yvmohmit Israel im vlla vhleha hvt natoksvli moma ka yvmihchi tok,

43. Mihma Moses vt natoksvli moma ka pisa tok; mihma yakeh, Chihowah yvt miha tuk mak o okla yvmihchi tuk atok, mihma Moses vt yukpali anumpa onochi tok.

CHAPTA XL.

MIHMA Chihowah yvt Moses a im anumpulit,
2. Okla moma im aivtta vlhtipo ya hvshi vmmona, micha nitak vmmona ka ish hilechashke.

3. Micha nanvlhpisa afohka itombi holitopa yummak o

ish fohkashke, 'micha isht ompoholmo ya itombi holitopa yash isht ish ompohomashke.

4. Micha aiimpa ya isht ish chukowa cha, nana achukmvt taloha chi ka achukmalit ish ontalalashke; micha pula aiohikia ya isht ish chukowa cha, bila aivlhto ya ish pulalashke.

5. Micha tvli holisso lakna alta nabalama ahukmi ya nanvlhpisa afohka itombi holitopa itikba ish talalashke, micha vlhtipo ya okhissa takali ya ish atakaliclashke.

6. Micha okla moma im aivtta vlhtipo okhissa itikba ya ai onochit hukmit im issa alta ya ish hilechashke.

7. Micha okla moma im aivtta, micha alta iti takla ya ampo chito ya ish talali cha, oka ish vnashke.

8. Micha apakfoyulit wanuta ya ish talali cha, wanuta holihta okhissa natakali ya ish takalichashke.

9. Micha ishtahama bila ya ish eshi cha, vlhtipo ya micha anukaka, nana moma aiasha ka, micha nan im aivlhto aiena moma ka ish ahvmmi cha, ish hullochashke, mikma hullashke;

10. Micha aionchit hukmit im issa alta, micha im aivlhto moma ka ish ahvmmashke, micha alta ya ish hullochashke. micha alta hullo kvv moma i shahlashke.

11. Micha ampo chito, micha iyi aiena ka ish ahvmmi cha, ish hullochashke.

12. Mikmvt Alon, micha ushi vhleha aiena ka okla moma im vlhtipo okhissa itikba ya isht ish ona cha, oka isht ish achefashke.

13. Micha Alon a nafohka holitopa ish fohkvchechaske; micha ish ahvmmi cha, ish hullochashke; yvmohmi ho naholitompa isht aivtta ya isht vm ai vttashke.

14. Micha ushi vhleha ha isht ishla cha, nafohka ish fohkvchechashke.

15. Micha iki ya ish ahvmmi tuk vt chohmichit ish ahvmmashke; yohmikma naholitopa isht aivtta ya isht vm ai ashwashke, ahama kvv im aiitishali mahaya ka naholitopa isht vtta bilia ya chi pulla hoka.

16. Yummak o Moses vt yvmihchi tok, Chihowah yvt i miha moma tuk mak o yvmihchi tok.

17. Atuk o yakohmi tok, hvshi vmmona afummi atukla, hvshi vt nitak vmmona ma, vlhtipo vt vlhtaha tok.

18. Mihma Moses vt vlhtipo ya hilechi cha, im asha-mohli a ita kullochi mvt, iti busha ya hiohlechi cha, okh-watkruchi a okfowvllichi cha tonik a hiohlichi tok.

19. Mihmvt Chihowah yvt Moses a i miha tuk mak o vlhtipo yash ompoholmo ya auatvlit ompohomo tok; micha ompoholmo yash, paknaka ya ompohomo tok.

20. Micha nanvlhpisa ya eshi cha, itombi holitopa ya fohki mvt, iti tvptua ya itombi holitopa ya apitta tok; micha itombi holitopa paknaka ya aiombinili i nukhaklo ya ontalali tok.

21. Mihmvt Chihowah yvt Moses a i miha tuk mak o, itombi holitopa ya vlhtipo ya isht chukowa cha, isht ompoholmo ya hilechi cha, nan vlhpisa afohka, itombi holitopa ya ompohomo tok.

22. Micha aiimpa ya okla moma im aivtta ya anukaka vlhtipo ya falvmmi in tvnnvp ompoholmo ya kohcha yo hilechi tok.

23. Micha Chihowah yvt Moses a i miha tuk mak o, pvska ya Chihowah itikba ya achukmalit talali tok.

24. Micha pvla aiohikia ya okla moma im aivtta anukaka aiimpa ichapaka vlhtipo ya im okamahli in tvnnvp a hilechi tok;

25. Micha Chihowah yvt Moses a i miha tuk mak o, pvla ha Chihowah itikba a palali tok.

26. Micha tvli holisso lakna alta ya okla moma im aivtta isht ompoholmo itikba ak o hilechi tok.

27. Micha Chihowah yvt Moses a i miha tuk mak o nabalama aionochit hukmi tok.

28. Micha vlhtipo okhissa takali hilechi tok.

29. Micha Chihowah yvt Moses a i miha tuk mak o, aionochit hukmit im issa alta, okla moma im aivtta vlhtipo okhissa ya bilika hilechi cha, hukmit im issa, micha ilhpak im issa onochit im issa tok.

30. Micha ampo chito ya okla moma im aivtta, micha alta itin takla hilechi cha, ai ibbachefa chi hosh oka uni tok.

31. Micha Moses, micha Alon, micha ushi vhleha aiena ibbak, micha iyi aiena ka yummak aiachefa tok.

32. Chihowah yut Moses a i miha tuk mak o, okla moma im ai vtta chukowakmut, micha alta ya bilika onakmut, ibbachefa beka tok.

33. Micha vlhtipo, micha alta apakfoyupa ka wanuta ya hilechi mut, wanuta okhissa takali ya hilechi tok. Yvmohmi hosh Moses vt natoksvli a atahli tok.

34. Yohmi ma hoshonti vt okla moma im aivtta ya ompoholmo ma, Chihowah im aholitopa vt vlhtipo ya alo-toa tok.

35. Mihma okla moma im aivtta ya hoshonti vt ompoholmo hatuk o, micha Chihowah im aholitopa vt vlhtipo a alotoa hatuk o Moses vt chukowa he keyu tok.

36. Atuk o vlhtipo paknaka ya hoshonti hash ai ishit vba ishtia ma, Israel im vlla vhleha hvt anowut aya moma ka mahaya tok.

37. Amba hoshonti ha vba isht ik aiyokma, ik aiyo tuk osh, nitak nana ka vba ishtiak mak o beka tok.

38. Israel in chukachvfa moma kut nowut ayvt ont hlo-pulli moma ka pisa ho Chihowah i hoshonti hvt nitak ma, vlhtipo ya onvtoyula tuk osh, ninak ma, luak osh onvtoyula beka tok oke.

LEFITIKUS HOLISSO.

MOSES I HOLISSO ATUKLA KUT

LEFITIKUS HOHCHIFO HOKE.

CHAPTA I.

MIHMA Chihowah yvt Moses a i howa cha okla moma im vlhtipo ya et im anumpulit,

2. Israel im vlla vhleha ha im anumpulit, Hatak hvsh ka-nima hosh nan im issa ya Chihowah isht hvsh im onakmvt, na hvsh im issa, vlhpoa hochito ai ishit wak, micha vlhpoa chipunta ya isht hvsh im onashke.

3. Mikmvt nan im issa yvt vlhpoa hochito ai ishit na hukmit im issa hokmvt nakni yosh ai okpuloka iksho ho im issashke, ilap ahni hosh Chihowah itikba okla moma im vlhtipo okhissa yak o ai im issashke.

4. Micha na hukmit im issa noshkobo ha, ibbak isht om bitepashke. Micha im aiokpuchi na, isht im vlhtoba hi oke.

5. Mikma wak hobyk ash Chihowah itikba ai vba hi oke; mihma na holitopa isht asha Alon ushi vhleha hvt issish a isht vla cha, issish ash alta, yummvt okla moma im vlhtipo okhissa bilika hikia ka o fimmit fullohlichashke.

6. Micha na hukmit im issa ya hlufi cha bvshlit tahla hi oke.

7. Mikma na holitomp isht vtta Alon ushi vhleha hvt alta ya luak onochi cha achukmalit luak a iti onochashke.

8. Mikma na holitomp isht asha Alon ushi vhleha hvt, tvptua, noshkobo micha nia aiena ka luak vt alta on asha iti on asha ka paknaka ya achukmalit onochashke.

9. Amba ikfoka, iyi aiena kvno, oka isht achifa hi oke: mihma na hukmit im issa Chihowah i balama achukma lua yo naholitopa isht vtta yvt mominchit alta onochit hukma hi oke.

10. Micha nan im issa kv̄t nan v̄lhp̄oa chipunta chukf̄ulh-poa, keyukm̄vt issi kosoma yō hukmit im issak m̄vt, nakni yosh ai okpuloka kv̄t iksho hō isht v̄lashke.

11. Micha Chihowah itikba alta ya fal̄vmmi in t̄vnn̄vp o ai v̄bashke; micha na holitomp̄a isht āsha Alon ushi v̄hleha h̄vt issish ā alta ya o fimmit fullohlichashke.

12. Micha noshkobo micha nia aiena k̄a b̄vshlit tahlashke. Mikma na holitopa isht v̄tta ȳvt alta ya luak on āsha na iti v̄t o āsha k̄a achukmalit onochashke.

13. Amba ikfoka micha iyi aiena kv̄no oka isht achifashke, micha na holitomp̄a isht v̄tta ȳvt mominchit isht v̄la cha alta ya onochit hukmashke; na hukmit im issa luak ishit hukmit im issa Chihowah ya nan ī balama achukma yoke.

14. Micha na hukmit im issa ya Chihowah ya nan im issa kv̄t, hushi yokma, nan im issa ȳvt p̄vchi ȳvshoba, keyukm̄vt p̄vchushi yō isht v̄lashke.

15. Mikma na holitopa isht v̄tta ȳvt alta bil̄ika isht ona cha, noshkobo h̄a sh̄vnnit t̄vbli cha alta ya onochit hukmashke; micha im issish ā sh̄vnnit alta lapalika a hlatv̄b-lashke.

16. Micha imp̄vffakchi ya naliteha aieninchit eshi cha alta lapalika ī h̄vshi akochaka in t̄vnn̄vp, hituk chubbi aiasha bil̄ika pilashke.

17. Micha sanahchi v̄t āsha moma hō pahlv̄llashke; yoh-mi kia ik ita hokofo kashke; mikma na holitopa isht v̄tta ȳvt alta ya luak on āsha k̄a mikma iti on āsha k̄a onochit hukmashke; na hukmit im issa luak ishit hukmit Chihowah nan ī balama achukma yoke.

CHAPTA II.

MICHA kv̄na hosh ilhpak im issa Chihowah ya im issak m̄vt nan im issa kv̄t bota tohbi lipehbi ya hi oke; micha bila ya on hlatv̄blikm̄vt filakinsen onochashke.

2. Mikm̄vt na holitomp̄a isht āsha Alon ūshi v̄hleha h̄a isht im onashke, mikma naholitomp̄a isht v̄tta ȳvt bota.

tohbi micha bila, micha filakinsen moma aiena ibbak alota achvfa ho eshi cha isht ithana yo alta onochit hukmashke. Chihowah nan i balama achukma yo luak ishit hukmit im issa yashke.

3. Mikma ilhpak im issa atampa hokvto Alon micha ushi vhleha immi hashke; luak ishit hukmit Chihowah im issa nana holitopa moma i shahli hoke.

4. Apalvska a nuna yo ilkpak im issa ya isht ishla hokmvt, bota tohbi lipehbi pvska lumbo ik shatvmmo bila yvmmi yashke, keyu hosh pvska lapushki ik shatvmmo yokmvt bila isht ahamashke.

5. Micha ilhpak ish im issa yvt ampo mahaia a nuna yokmvt bota tohbi lipehbi toba hosh ik shatvmmo bila yvmmi yashke.

6. Ish bushullichy cha bila ish on hlatvblashke: ilhpak im issa yoke.

7. Micha ilhpak ish im issa yvt ampo vlvvsha a nuna yokmvt bota tohbi lipehbi bila yvmmi yashke.

8. Ilhpak im issa yvt ilvppa chohmi puta kak o atoba ka Chihowah isht ish im onashke; atuk o na holitompa isht vtta ya imakma yvmmak osh alta a hikia ka isht onashke.

9. Micha na holitompa isht vtta yvt ilhpak im issa yash ai ishit isht ithana yo ikbit alta onochit hukmashke; luak ishit hukmit im issa Chihowah nan i balama achukma yoke.

10. Micha ilhpak im issa atampa kvv Alon, micha ushi vhleha immi ha hi oke; luak ishit hukmit Chihowah im issa ya nana holitopa moma i shahli hoke.

11. Ilhpak im issa nana kia Chihowah hvsh im issa kvv shatvmmi ya he keyu hoke; luak ishit hukmit Chihowah im issa nana kia shatvmmi, keyukmvt foi bila nana kia hvsh hukma he keyu hoke.

12. Nawaya vmmona im issa hokvno, Chihowah hvsh im issa hi oke. Yohmi kia na balama yo alta ai on lua he keyu hoke.

13. Micha ilhpak hvsh im issa puta kvv hvpi ha hvsh yvmmichashke; ilhpak im issa ya Chihowah nan itim apesa

hupi ik ono kv̄t iksho kashke; nana hv̄sh im issa moma kv̄t hv̄pi aieninchit hv̄sh im issashke.

14. Micha ilhpak im issa na chi waya vmmona ya Chihowah ya ish im issakmvt ilhpak im issa na chi waya vmmona ya onush hiloha luak ishit shilvt onush noshkobo alota chilohka yashke.

15. Micha bila ish on hlatv̄bli cha filakinsen ish onochashke; ilhpak im issa yoke.

16. Mikma na holitopa isht vtta yvt isht ithana yo onush chilohka kashapa, micha bila kashapa, micha filakinsen moma aiena ka hukmashke; luak ishit hukmit Chihowah im issa yoke.

CHAPTA III.

MICHA nan im issa yvt itin nanaiyv̄chit im issa yokmvt, vlhp̄oa hochito ai ishit nakni yokma, tek okmá, nana ho im issakmvt, ai okpuloka iksho ho Chihowah itikba ai im issashke.

2. Nan im issa noshkoba ha ibbak isht ombitepa cha okla moma im vlhtipo im okhissa yak o ai vbashke: mikma na holitompa isht asha Alon ushi v̄hleha hv̄t issish a alta o fimmit fullohlehashke.

3. Micha itin nanaiyv̄chit im issa illichit im issa yo luak ishit hukmit Chihowah im issa yo im issashke: ikfoka ompohomo nia, micha ikfoka ompoholmo nia momashke.

4. Micha haiyihchi tuklo micha nia yvt on asha yvm̄mvt ikfeka bilika asha micha sv̄lakha i hlapa, micha haiyihchi aiena ka ishashke.

5. Micha Alon ushi v̄hleha hv̄t ymma alta onochit hukmit isht aiokpv̄chi vt iti luak on asha pakna on asha ka a luacha hi oke, luak isht hukmit nan im issa yvt Chihowah i balama achukma yoke.

6. Micha nan im issa yvt itin nanaiyv̄chit im issa illichit im issa yvt vlhp̄oba hochito ai ishit nakni, keyukmvt tek okmá nana hokma, aiokpuloka iksho ho im issashke.

7. Chukfushi yo im issa hokmvt Chihowah itikba ai im issashke.

8. Micha nan im issa tuk vt noshkobo ha ibbak isht ombitepa cha okla moma im vlhtipo itikba ai vbashke: mikma Alon ushi vhleha hvt issish a alta o fimmit apakfoyublashke.

9. Micha illichit im issa itin nanaiyechit im issa luak ishit hukmit Chihowah im issa yo im issashke: i nia micha hasimbish vt moma, nvli foni ya ont tikelichit tvblashke: micha ikfoka ompohomo nia micha ikfoka nia moma,

10. Micha haiyihchi tuklo, micha nia yvmmvvt ikfeka bilika asha ka, micha svlakha ya paknaka i hlapa haiyihchi aiena ka ishashke.

11. Mikma na holitompa isht vtta yvt alta onochit hukmashke: ilhpak im issa im ilhpak o luak ishit hukmit Chihowah im issa yoke.

12. Micha nan im issa yvt issi kosoma yokma, Chihowah itikba ai im issashke.

13. Micha noshkobo ha ibbak isht ombitepa cha okla moma im vlhtipo itikba ai vbashke: mikma Alon ushi vhleha hvt issish a alta o fimmit apakfoyublashke.

14. Micha nan im issa yvt luak ishit hukmit Chihowah im issa yo im issashke: ikfoka ompoholmo nia micha ikfoka nia moma ashaka.

15. Micha haiyihchi tuklo, micha nia yvmmvvt ikfeka bilika asha ka, micha svlakha paknaka i hlapa micha haiyihchi aiena ka ishashke.

16. Mikma na holitompa isht vtta yvt alta onochit hukmashke; ilhpak luak ishit hukmit im issa na balama achukma yoke; nia moma kvv Chihowah immi hoke.

17. Nia micha issish aiena ka hvchik po ka he vt, hvchim ai unchuloli fullota ka nan vlhpisa bilia yosh itoyula hi oke, im achi tok.

CHAPTA IV.

MICHA Chihowah yvt Moses a im anumpulit,
 2. Israel im vlla vhleha ha im anumpulit, Hatak osh ik ithano hosh nana ashvchit Chihowah i nan vlhpisa, yvm-mak oka yvmihcha he vlhpesa tuk keyu hosh ymma kani-ma kia kobvffikmvt.

3. Na holitompa isht vta nan ahama tuk osh okla nan ashvchi ya yvmihchit ashvchikmvt, yohmikmvt nan ashvchi ya ashvchi tuk vt nan ashvchi im issa ya wak hobvk himita ai okpuloka iksho ho Chihowah isht im onashke.

4. Micha wak himita ya Chihowah itikba okla moma im vlhtipo okhissa ya isht onashke; micha wak hobvk noshko-bo ya ibbak isht ombitepashke: micha Chihowah itikba ya wak hobvk ash ai vbashke.

5. Mikma na holitompa isht vta nan ahama tuk vt wak hobvk ash im issish a ai eshi cha okla moma im vlhtipo ya isht onashke.

6. Micha na holitompa isht vta yvt ibbak ushi ya issish ash oka hilechi cha Chihowah itikba a holitopa natakali itik-ba ya issish a untuklo ha fimmashke.

7. Micha na holitompa isht vta yvt issish kanohmi na ba-lama achukma a hukmi alta Chihowah itikba okla moma im vlhtipo anukaka hikia ka lapish a on lapalichashke; micha wak hobvk im issish moma ka ai onochit hukmit im issa al-ta, yummvt okla moma im vlhtipo okhissa hikia ka akishtv-la ya pit hlatvblashke.

8. Micha nan ashvchi im issa ya chi ka, wak hobvk ash i nia ya moma ishashke; ikfoka ya nia yvt ompoholmo ka, micha nia moma ikfoka ai asha ka,

9- Micha haiyihchi tuklo, micha nia yummvt ikfeka bili-ka asha ka, micha svlakha paknaka i hlapa, haiyihchi aiena ka ishashke.

10. Itin nanaiyvchit im issa illichit im issa wak hobvk a ai ishi tuk a chohmichit ishashke; micha na holitompa isht vta yvt ai onochit hukmit im issa alta ya onochit hukmashke.

11. Micha wak hobvk ash hakshup, micha nipi moma noshkobo aiena, micha iyi aiena, micha ikfoka micha yvlhki aiena.

12. Wak hobvk ash mominchit bina kocha a kashofa, hituk chubbi ahlatapa ya isht ona cha iti onochit luak ishit hukmashke; hituk chubbi a hlatapa yak o a luashke.

13. Micha Israel okla moma kv̄t ik ithano hosh nana ashvchi hokma, mihma okla moma kv̄t in luma tuk, mihmvt Chihowah i nan vlhpisa ya yoshubit, nana kanohmi yvmmak oka yvmohma he vlhpesa tuk keyu hosh yvmohmi tuk;

14. Nan ashvchi ya ashvchi tuk vt akostininchikmvt okla hv̄t nan ashvchi tuk vt wak hobvk himita yo im issa cha okla moma im vlhtipo itikba isht onashke.

15. Mikma okla moma im asvnonchi vhleha hv̄t wak hobvk ash Chihowah itikba ya ibbak isht ombitepashke: mikma wak hobvk vt Chihowah itikba ai illashke.

16. Mikma na holitompa isht v̄tta nan ahama tuk vt wak hobvk ash im issish a okla moma im vlhtipo ya isht onashke.

17. Micha na holitompa isht v̄tta yvt issish kaniohmi ka ibbak ushi oka hilechi cha Chihowah itikba a holitopa natakali itikba fehna ka untuklo ha fimmashke.

18. Micha issish ash kaniohmi ka alta yvmmv̄t Chihowah itikba okla moma im vlhtipo anukaka hikia lapish a isht o fimmashke: Micha issish ash mominchit ai onochit hukmit im issa alta yvmmv̄t okla moma im vlhtipo okhissa hikia akishtula ya pit hlatv̄lashke.

19. Micha i nia moma ka im aieshit alta onochit hukmashke.

20. Micha wak hobvk a nanashvchi im issa wak hobvk a yvmihchi tuk a chohmichit ilvppak kia yvmihchashke, mikma na holitompa isht v̄tta yvt i kashofikma i kashofashke.

21. Mikma wak hobvk ash bina kocha isht ona cha wak v̄mmona hukmi tuk vt chohmichit hukmashke; okla moma nan ashvchi im issa yoke.

22. Hatak pehlichy yosh nan ashvchi, ik ithano hosh Chitokaka in Chihowah i nan vlhpisa achvfona ya kobv̄ffit

nana ka a yvmihcha he vlhpesa keyu yvmihchi tuk ash nan ashvchikma;

23. Nan ashvchi ya ashvchi tuk vt ont nukfoyukakmvt nan im issa yvt issi kosoma ushi nakni yosh ai okpuloka iksho ho isht vlashke.

24. Micha issi kosoma noshkobo ha ibbak isht umbitepa cha Chihowah itikba hukmit im issa ai vbi ak o ai vbashke: nan ashvchi im issa yoke.

25. Mikma na holitompa isht vta yvt nan ashvchi im issa issish a ibbak ushi isht eshi cha aionochit hukmit im issa alta lapish a o lapalichashke: micha im issish a aionochit hukmit im issa alta akisht vla ya ahlatvblashke.

26. Micha itin nanaiyvchit im issa illichit im issa nia ya chohmichit nia moma ka alta onochit hukmashke: nan ashvchi tuk a na holitompa isht vta yvt i kashoffikma i kashofashke.

27. Micha okla hvt kanima hosh nana ka ikithano hosh nan ashvchi tuk nana ka ayvmihcha he vlhpesa keyu ho yvmihchi cha Chihowah i nan vlhpisa ha kobuffi tuk ash im ai ahlikmvt;

28. Keyukmvt nan ashvchi ashvchi tuk vt ithaiyanakmvt, nanashvchi ya ashvchi tuk vt issi kosoma ushi tek ash ai okpuloka iksho ho nan im issa isht onashke.

29. Micha nan ashvchi im issa noshkoba ha ibbak isht umbitepa cha hukmit ai im issa ak o nan ashvchi im issa yo ai vbashke.

30. Mikma na holitompa isht vta yvt issish a ibbak ushi isht eshi cha ai onochit hukmit im issa alta lapish a o lapalichashke: micha issish a mominehit alta akishtvla ya a hlatvblashke.

31. Micha itin nanaiyvchit im issa illichit im issa nia ishi chatuk a chohmichit nia moma ka ishashke: micha Chihowah i balama achukma ya chi ka na holitompa isht vta yvt alta onochit hukmashke: micha na holitompa isht vta yvt i kashoffikma i kashofashke.

32. Micha nan ashvchi im issa yo chukfushi isht onakmvt tek ash ai okpuloka iksho ho isht onashke.

33. Micha nan ashvchi im issa noshkobo ha ibbak isht umbitepa cha nan ashvchi im issa mak o hukmit im issa ai vbi ya ai vbashke.

34. Mikma naholitompa isht vtta yvt nan ashvchi im issa issish a ibbak ushi isht eshi cha ai o hukmit im issa alta lapish a o lapalichashke: micha issish a mominchit alta akishtvla ya ahlavblashke.

35. Micha itin nanaiyvchit im issa illichit im issa chukfushi nia ishi tuk a chohmichit nia moma ka ishashke: micha naholitompa isht vtta yvt luak ishit hukmit Chihowah im issa mak o yvmihchit alta onochit hukmashke: micha nanashvchi yvmihchi tuk a na holitompa isht vtta yvt i kashoffikma i kashofashke.

CHAPTA V.

MICHA shilombish nan ashvchikmvt anumpa kvllo anumpuli ka haklo, na pisa yosh pisakma, keyukmvt akostininchikma akaniohmikia, ik anolokmvt nan ashvchi vt onvtonlashke.

2. Keyukmvt shilombish osh nana liteha yo potoli, poa liteha illi okma keyukmvt vhpoe liteha illi okma, keyukma na balahanli liteha yokma nana hatuk oh kia, atuk osh ik ithano hatukmvt, yummak kia liteha cha nan ashvchi vt onvtonla hi oke.

3. Keyukmvt hatak liteha yo haleli tukma, liteha nana ho isht litehvt liteha hatukma, atuk osh ik ithano tukmvt ithanakmvt nanashvchi vt onvtonla hi oke.

4. Keyukmvt shilombish osh nana ik achukmo micha nana achukma nana hoh kia, anumpa kvllo il onochit ila piti vbi o achit yvmihcha chi ikithano hosh miha hokmvt, atuk osh akostininchikmvt anumpa yummak ash achvfa kanima ka nan ashvchi im aiahla hi oke.

5. Atukma yakohma hi oke: ilvppa achvfa kanima ka nan ashvchi tuk vt im ai ahlikmvt, nana yumma ashvchi tuk vt il ai anolashke.

6. Mikmvt nan ashvchi ya ashvchi tuk vt yoshobvt nan

im issa ya v_lhp_oa shipunta tek o ai ishit chukfushi, keyukmvt issi kosomushi yo issi kosoma ai ishit nan ashvchi im issa ya ch_i h_o Chihowah isht im onashke: mikma nanashvchi tuk a naholitompa isht v_tta y_vt i kashofashke.

7. Atuk o yoshuba yvmohmi tuk vt chukfushi vt ik im iksho mvt, pvchi yoshoba tuklo, keyukmvt pvchushi tuklo h_o Chihowah isht im onashke: achvfa hv_t nan ashvchi im issa yokma, achvfa kv_t hukmit im issa yashke.

8. Micha na holitompa isht v_tta ya isht im onashke; mikma yvmmak osh tikba nan ashvchi im issa yak o im issv_t noshkobo h_a shvnnit tvblashke; yohmi kia ita pahlvlla he keyu hoke.

9. Micha nan ashvchi im issa issish a alta lapalika o fimmi cha, issish vt a_sha m_oma k_a alta akishtv_la ya shvnnit hlatvblashke; nan ashvchi im issa yoke.

10. Micha atukla k_a ayvmihchi chatuk a yvmihchit hukmit im issa yo im issashke: nan ashvchi ya ashvchi tuk a na holitompa isht v_tta y_vt i kashoffikma i kashofashke.

11. Amba pvchi yoshaba tuklo, keyukmvt pvchushi tuklo kv_t ik im ikshokmvt, nan ashvchi tuk vt nan ashvchi im issa im issa kv_t bota tohbi lipehbi efah kvshkoa isht pokoli h_o isht onashke; bila yvmmicha he keyu, micha filakinsen onocha he keyu hoke; nan ashvchi im issa yoka.

12. Yohmikmvt na holitompa isht v_tta isht im ona hi oke, mikma na holitompa isht v_tta y_vt ibbak alota achvfa h_o ishi cha isht ithaiyana mak o alta onochit hukma hi oke; luak ishit hukmit im issa y_vt ayvmihchit Chihowah im issa chatuk mak o yvmihcha hi oke: nan ashvchi im issa yoke.

13. Mikma nanashvchi achvfa ilvppa kanima h_o ashvchi tukma naholitompa isht v_tta y_vt i kashoffikma i kashofashke; mikma atampa kv_t ilhpak im issa chohmi naholitompa isht v_tta immi hashke, ish im achashke, im achi tok.

14. Micha Chihowah y_vt Moses a im anumpulit,

15. Shilombish osh na yoshoba yvmihchi, micha ik itha-no hosh Chihowah i naholitopa ya im ashvchi tuk, yohmikmvt nayoshuba tuk vt na yoshoba im issa yo chukfushi nakni ai okpuloka iksho h_o, ish hotihna h_o tvli hv_ta shekel ka-

nohmi, aholitopa shekel vlhpisa mak o Chihowah isht im onashke.

16. Micha na holitopa okpni tuk vt achukmalashke, micha kvshkoa ishit tahlapi ho apotali cha naholitompa isht vttā ya imashke; mikma naholitompa isht vttā yvt nan-ashvchi im issa yash chukfi nakni yash isht i kashoffikma i kashofashke.

17. Micha shilombish osh nan ashvchit Chihowah i nan vlhpisa hvt olvbi tuk ilvppa kanima kia yvmihchikmvt ik ithano hatuk oh kia nan ashvchi vt im ai ahli cha nanashvchi vt onvtuyula hi oke.

18. Na yoshoba im issa ya vlhpoa chipunta ai ishit chukfi nakni ai okpuloka iksho ho ish i hotehna tuk a aieninchit na holitompa isht vttā isht im onashke, mikma naholitompa isht vttā yvt nan ik ithano hosh ashvchi tuk a na yoshoba im issa yash isht i kashoffikma i kashofashke.

19. Na yoshoba im issa yoke; Chihowah i yoshoba tuk o ahli hoke, im achi tok.

CHAPTA VI.

MICHA Chihowah yvt Moses a im anumpulit,

2. Shilombish osh nan ashvchit Chihowah i yoshoba ya yvmihchit isha chi ho nana ibbak fohki tuk, keyukmvt itapela yatuk o in chuka a bilika hatak o i holabi, keyukmvt nana ho afoa hosh im eshi, keyukmvt in chuka a bilika hatak o haksichi tuk;

3. Keyukmvt nana kvnia tuk o ahayuchi tuk osh ymma holabi, micha holabi hosh anumpa kvllo anumpuli, ilvppa moma kanima ho hatak vt yvmihchi cha ai ashvchikmvt,

4. Yohmikmvt yakohma hi oke, nan ashvchi tuk osh nan ashvchi kv im ajahli hokvt, nana im afoa hosh im eshi tuk vt i falvmminchashke; keyukmvt haksichi hosh ishi tuk, keyukmvt im isha chi ho ibbak fohki tuk, keyukmvt nana kvnia ahayuchi tuk,

5. Keyukmvt nana moma holabi hosh anumpa kvllo

anumpuli tuk osh yoshoba tuk vt nan im issa nita kmvt nana ka i falumminchashke; micha kvshkoa ishit tahlapi ho im a lapalichi cha kvna ho immi hatuk a imashke.

6. Micha na yoshoba im issa chi ho nan vlhpoa chipunta ai ishit, chukfi nakni ai okpuloka iksho ho ish i hotehna tuk a aieninchit, nayoshoba tuk vt im issa Chihowah isht im onvt naholitompa isht vtta ya isht im onashke.

7. Mikma naholitompa isht vtta yvt Chihowah itikba ai i kashoffa hi oke; micha yoshobvt nana moma yvmihchi tuk vt i kashofashke, achi tok.

8. Mihma Chihowah yvt Moses a im anumpulit,

9. Alon micha ushi vhleha ha ish i mihvt, Ilvppvt hukmit im issa i nan vlhpisa hoke. Alta ya onvtuyulvt luhuwa na, ninak vt ont hlopullit onna, micha alta ya luak vt a chieyvt luhuwa yoka, hukmit im issa yoke.

10. Micha na holitompa isht vtta yvt i linen na fohka ya ishit fohkashke, micha i linen obala fohka ya nipi ya ishit fohkashke; micha luak vt hukmit tahli tuk hituk chubbi, micha hukmit im issa aiena alta on asha ka eshi cha alta apotoa kak o ashachashke.

11. Mikmt i nafohka ya shufi cha nafohka inla ho ishit fohka cha, hituk chubbi bina kocha akashofa ho isht onashke.

12. Mikma alta ya luak on asha kv a luhuwa hi oke; mosholicha he keyu hoke; mikma na holitompa isht vtta yvt onnahinli momakma iti onochit hukmi cha hukmit im issa ya achukmalit onochi beka hi oke; micha itin nanaiyvchit im issa nia ya hukma hi oke.

13. Luak vt alta on chieyvt luhuwa na bilia hi oke, moshola he keyu hoke.

14. Micha ilvppak osh hukmit im issa nan vlhpisa hoke; Alon ushi vhleha hak osh Chihowah itikba alta aiasha ya ai im issa hi oke.

15. Micha ilhpak im issa bota tohbi, micha bila on asha tuk aiena, micha filakinsen ilhpak im issa on asha tuk moma aiena ka ibbak alota achvfa ho eshi cha na balama achukma ka isht ithaiyana mak o alta onochit Chihowah ya i hukma hi oke.

16. Micha atampa yano Alon micha ushi vhleha aiena hosh vpa hi oke; pvska ik shatvmmo aiena h_o aholitopa ak o ai vpa hi oke; okla moma im vlhtipo i wanuta ya ai vpa hi oke.

17. Isht shatvmmi aienvt pvska he keyu hoke. Luak ishit hukmit im issa ya i kashapa mak o ima li tuk oke. Yvm-mvt nanashvchi im issa, micha nayoshoba im issa chihyuh-mit holitopa kv_t moma i shahli hoke.

18. Alon im vlla vhleha ibafoka nakni moma kv_t ai vpa hi oke. Luak ishit hukmit Chihowah im issa yvt hvchim ai unchuloli h_a nan vlhpisa bilia ya ch_i hoke; potoli aiyu-kali kv_t holitopa hi oke, im achi tok.

19. Micha Chihowah yvt Moses a im anumpulit,

20. Ilvppak osh Alon micha ushi vhleha im issa yosh nan ahama nitak fehnakmvt Chihowah im issa hi oke; ilhpak im issa bilia mak osh bota tohbi lipehbi efah kvshkoa ont ishit pokoli ho iklvna ka onnahinlikma im issa hokmvt, opiakma iklvna ka im issashke.

21. Ampo mahaia vlhto h_o bila ishit yvmmicha hi oke; atuk osh palvskakma isht ish chukowa hi oke; micha ilhpak im issa palvskvt tushahli ya na balama achukma mak o Chihowah ish im issa hi oke.

22. Mikma ushi vhleha naholitompa isht v_tta yvt vlhto-bvt nan ahama tuk vt im issa hi oke. Chihowah i nan vlh-pisa bilia hoke: momvt lua hi oke.

23. Ilhpak im issa na holitompa isht v_tta ilap aiyuka ho-kvt momvt lua hi oke; vpa he keyu hoke, im achi tok.

24. Mihma Chihowah yvt Moses a im anumpulit,

25. Alon micha ushi vhleha im anumpulit, Ilvppak osh nanashvchi im issa nan vlhpisa yoke; hukmit im issa ai vbi ak o nan ashvchi im issa ya Chihowah itikba ai vbashke; holitopa i shahli hoke.

26. Nan ashvchi h_o im issa tuk, naholitompa isht v_tta ak osh vpashke. Okla moma im vlhtipo i wanuta aholitopa ak o ai vpa hi oke.

27. Nana hosh nipi yash halelikmvt holitopa hi oke; mi-cha yvmma issish vt nafohka nana h_o ai o fimimpa tuk ma, ai o fimimpa tuk a aholitopa yak o ish ai achifashke.

28. Amba lukfi shuti ahonni tuk ano kola hi oke, micha asonak lakna yo ahonni tuk muno, kasholichi cha, oka isht achifa hi oke.

29. Naholitompa isht asha nakni moma kak osh vpa hi oke; holitopa i shahli hoke.

30. Mikma nan ashvchi im issa nana kia itin nanaiyvcha chi hosh issish a okla moma im vlhtipo aholitopa ya isht chukowa tuk a vpa he keyu hoke; luak ishit lua hi oke.

CHAPTA VII.

MICHA ilvppak osh yoshoba im issa nan vlhpisa hoke: holitopa i shahli hoke.

2. Hukmit im issa ai vbi ak o yoshoba im issa ya ai vba hi oke; mikma issish a alta o fimmit apakfobla hi oke.

3. Micha nia moma ka im issa hi oke: hasimbish micha nia yvt ikfoka ompoholmo aiena.

4. Micha haiyihchi tuklo, micha nia on asha yummvt ik-eksa bilika asha, micha i hlapa yummvt svlakha paknaka asha haiyihchi aiena ka ishashke.

5. Micha na holitompa isht vtta yvt luak ishit hukmit Chihowah im issa mak o alta onochit hukma hi oke; yoshoba im issa hoke.

6. Naholitompa isht vtta nakni moma kvv vpashke; a holitopa ak o ai vpashke, holitopa i shahli hoke.

7. Nanashvchi im issa yvt kaniohmi hatuk a yoshoba im issa yvt yohmi akinli hoke, nan vlhpisa im achvfa hoke: isht atobbichi tuk naholitompa isht vtta yak osh isha hi oke.

8. Hatak kvna hosh hukmit im issa ya naholitompa isht vtta yvt hukmit im issa ya im issa tuk naholitompa isht vtta fehna kak osh hakshup a il ai ishashke.

9. Apalvska ya apalvska tuk ilhpak im issa moma, micha ai vlwusha, micha ampo mahaia ya a nunanchi tuk moma aiena kvv naholitompa isht vtta yvt im issa tuk mih fehna kak o immi hashke.

10. Micha bila aiyoma tuk micha shila, ilhpak im issa

moma ka Alon ushi vhleha moma kv̄t itilauī biekā hosh ishashke.

11. Micha ilvppak osh itin nanaiyv̄chit im issa, v̄bit im issa Chihowah im issa hi yā nan v̄lhpisa hoke.

12. Yakoke, ahnit isht aiokpv̄chi yō im issakm̄vt, yak oke ahnit isht aiokpv̄chi yā pv̄ska ik shatv̄mmo bila aiyoma yō, micha pv̄ska lapushki bila ahama, micha bota tohbi lipehbi pv̄ska bila aiyoma aienvt v̄lvvsha hō im issashke.

13. Pv̄ska yv̄mma im issakm̄vt nan im issa yā pv̄ska shatv̄mmi, micha yakoke ahnit v̄bit im issa, itin nanaiyv̄chit im issa aieninchit im issashke.

14. Micha isht aiokpv̄chi yā moma kash achv̄fa ka Chihowah i weli yō im issa hi oke; mikma itin nanaiyv̄chit im issa issish a fimmi tuk naholitompa isht v̄tta kak o immi ha chi hoke.

15. Mikma yakoke, ahnit isht aiokpv̄chi v̄bit im issa itin nanaiyv̄chit im issa yash nipi yā im issa nitak mihmakini hō vpashke; asha na onna he keyu hoke.

16. Amba anumpa il onochi tok ash im issa, keyukm̄vt ilap ahnit im issa yokm̄vno, v̄bit im issa yvt im issa mih nitak akinli ka vpashke, atukm̄vt onna yak kia asha tuk a vpashke.

17. Amba v̄bit im issa nipi vt asha na nitak ont atuchina tuk vt, luak ishit lua hi oke.

18. Micha v̄bit im issa itin nanaiyv̄chi im issa nipi yash nitak ont atuchina ka ikpa nana kia im aiokpv̄cha he keyu, micha im issa tuk vt isht im v̄lhpisa he keyu hoke; nan ishit yuwala hi oke; shilombish kv̄na hosh vpakm̄vt ilap nan ashv̄chi onv̄tonla hi oke.

19. Micha nipi yosh nana liteha yā haleli tuk a, vpa he keyu, luak ishit hukma hi oke, micha nipi yokv̄no, kashofa moma kv̄t vpa hi oke.

20. Amba shilombish nana hosh im a liteha yvt onv̄tonla hosh, v̄bit im issa itin nanaiyv̄chi im issa Chihowah immi hō vpakm̄vt, shilombish yv̄mmak kia im okla ha ai i filv̄mm̄t f̄opa t̄vpa hi oke.

21. Micha shilombish kv̄na hosh nana liteha, hatak liteha,

keyukmvt nampoa liteha, keyukmvt nan isht yuwala liteha nana kia potoli cha, vbit im issa itin nanaiyvchi im issa Chihowah immi ha vpakmvt, shilombish yvmma fehna kv̄t im okla im ai itin takla ya i flvmm̄it fiopa t̄pa hi oke; ish im achashke, im achi tok.

22. Mihma Chihowah yvt Moses a im anumpulit,

23. Israel im vlla v̄hleha h̄a im anumpulit, Wak nia, keyukmvt chukfi, keyukmvt issi kosoma nia nana kia hvshpa he keyu hoke.

24. Micha nampoa ilap inlit illi tuk nia, micha nampoa nana hosh niblit v̄bi tuk nia ya, nana kaniohm̄icha hinla, yohmi kia ik kaniohmi nana kia hvshpa he keyu hoke.

25. Kvna hoh kia nampoa nia, yvmmak oka hatak vt luak ishit hukmit Chihowah im issa chatuk a vpakmvt, vpa tuk shilombish fehna kv̄t im okla im ai itin takla i flvmm̄it fiopa t̄pa hi oke.

26. Micha hvsh aiasha ya kanima kia hushi okma keyukmvt nampoa issish nana kia hvshpa he keyu hoke.

27. Shilombish kvna hosh issish kaniohmi kia vpakmvt shilombish yvmma fehna kv̄t im okla im ai itin takla i flvmm̄it fiopa t̄pa hi oke, ish im achashke, im achi tok.

28. Mihma Chihowah yvt Moses a im anumpulit,

29. Israel im vlla v̄hleha h̄a im anumpulit, Kvna hosh vbit im issa, micha itin nanaiyvchi im issa ya Chihowah im issakmvt vbit im issa, micha itin nanaiyvchi im issa ya Chihowah hak o isht im onashke.

30. Luak ishit hukmit Chihowah im issa ya ilap ibbak akinli hosh isht ona hi oke, nia micha ikkishi aieninchit isht vlashke; yohmi na Chihowah itikba fahfuli mak o fahfulashke.

31. Mikma nia ya naholitompa isht v̄tta yvt alta onochit hukmashke; amba ikkishi hvto Alon micha ushi v̄hleha hak o immi hashke.

32. Micha vbit im issa itin nanaiyvchi im issa ya wahlit im issa mak o fulup isht impak imma ya naholitompa isht v̄tta yak o ish imashke.

33. Alon ushi v̄hleha h̄a kanima hosh itin nanaiyvchi im issa

issish micha nia aiena ka im issa hokvt mihi yosh fulup isht impak imma ya immi mak osh ishashke.

34. Israel im vlla vhleha im ai itin takla ya nan vlhpisa bilia mak o vbit im issa, micha itin nanaiyvchi im issa ya ai ishit fahfuli ikkishi micha wahli fulup a Israel im vlla vhleha im ai ishit naholitompa isht vttā, Alon micha ushi vhleha ha ima li tuk oke, ish im achashke, im achi tok.

35. Ilvppak osh Alon nan ahama tuk vt, micha ushi vhleha nan ahama tuk vt, luak ishit hukmit Chihowah im issa yvt naholitompa isht vttā ya Chihowah nan isht im vttā chi ho atokoli nitak ma immi toba tok oke.

36. Yummak oka im ai unchuloli hlopulli ka nan vlhpisa bilia mak o Chihowah yvt nan ahvmmi nitak mvt Israel im vlla vhleha hvt ima he im apesa tok oke.

37. Ilvppak osh hukmit im issa, micha ilhpak im issa, micha nanashvchi im issa, micha yoshoba im issa, micha hullochi im issa, micha vbit im issa itin nanaiyvchi im issa aiena nan vlhpisa mak o;

38. Chihowah yvt Moses a Sainai nvnih ha, Israel im vlla vhleha hvt Chihowah ya nan im issa chi ho i miha nitak mvt Sainai yakni haiaka ya ai im apesa tok mak oke.

CHAPTA VIII.

MIHMA Chihowah yvt Moses a im anumpulit,

2. Alon micha ushi vhleha aieninchit, micha nafohka ya micha isht ahama bila aieninchit, micha nanashvchi im issa mak o wak hobvk, micha chukfi nakni tuklo, micha pvska ik shatvmmo kishi achvfa aiena ho ish ishashke.

3. Michā okla moma hoyot okla moma im vlhtipo okhissa ya ish ai itvnashke, im achi tok.

4. Mihma Chihowah yvt ai i miha tuk mak o, Moses vt yvmihchi tok; mihma okla hvt okla moma im vlhtipo okhissa ya ai itvnaha tok.

5. Mihma Moses vt okla moma ka, Ilvppak osh yvmohma chi ho Chihowah yvt miha tok oke, im achi tok.

6. Mihmut Moses vt Alon micha ushi vhleha isht vla cha oka isht achifa tok.

7. Micha nafohka ya fohkachechi mut vskofvchi ya vskofachechi cha nafohka holitompa fohkachechi mut efot a fohkachechi tok; micha vskofvchi inla fehna efot atakali yash isht vskofvchechi tok.

8. Mihmut ikkishi alata yash i nuchechi tok, micha ikkishi alata yash Ulim micha Hlvmmim aiena ka lapalichi tok.

9. Micha iahlipa hash noshkobo ha on talali tok, micha iahlipa ha ibitakla fehna ka tuli lakna patvssa bitah holitopa yo lapalichi tok. Chihowah yvt Moses a i miha tuk mak o yohmi tok.

10. Micha Moses vt isht ahama bila ya eshi cha, vlhtipo micha nana anukaka asha tuk moma ka ahvmmi cha hullochi tok.

11. Micha alta ya untuklo ha isht o fimmi tok, micha alta, mikma nan im ai vlhto moma, ampo mahaia chito, iyi aiena ka hullocha chi hosh ahvmmi tok.

12. Micha Moses vt hullocha chi hosh isht ahama bila ya Alon noshkobo ha on hlatvbli tok.

13. Micha Chihowah yvt Moses a i miha tuk mak o Moses vt Alon ushi vhleha ha isht vla cha nafohka fohkvchechi mut, vskofvchi ya vskofvchechi cha shapo ya shapolechi tok.

14. Micha nanashvchi im issa mak o wak hobuk a isht vla tok; mihma Alon micha ushi vhleha hut nan ashvchi im issa mak o wak hobuk noshkobo ha ibbak isht umbitepa tok.

15. Mihma vbi tok; mihma Moses vt issish a eshi cha itin nanaiyvcha chi mak osh alta lapish a ibbak ushi isht o fimmit fullohlechi cha, alta ya kashoffi mut, hullochit issish ash alta akishtvla ya a hlatvbli tok.

16. Micha ikfoka nia yvt on asha tuk moma, micha svlakha paknaka ya i hlapa, micha haiyihchi tuklo, micha i nia moma ka eshi cha Moses vt alta onochit hukmi tok.

17. Amba wak hobuk ash, micha hakshup, micha nipi micha i yvlhki aiena kvno, Chihowah yvt Moses a i miha tuk mak o binah ha kocha ya luak ishit a hukmi tok.

18. Micha hukmit im issa mak o chukfi nakni a isht vla tok; mihma Alon micha ushi vhleha hvt chukfi nakni yash noshkobo ha ibbak isht umbitepa tok.

19. Mihma vbi tok: mihma Moses vt issish a alta ya isht o fimmit fullohlechi tok.

20. Micha chukfi nakni yash bvshlit tahli tok; micha Moses vt noshkobo, micha tushahli, micha nia aiena ka hukmi tok.

21. Micha takoba, micha iyi aiena ka oka isht achifa tok; micha Moses vt chukfi nakni yash mominchit alta onochit hukmi tok, na balama achukma mak o vbit im issvt hukmi, micha luak ishit hukmit Chihowah im issa tok; Chihowah yvt Moses a i miha tuk mak o yvmohmi tok.

22. Micha chukfi nakni achufa, hullochi chukfi nakni ya isht vla tok; micha Alon micha ushi vhleha hvt chukfi nakni noshkobo ha ibbak isht umbitepa tok.

23. Mihma vbi tok; micha Moses vt issish a eshi cha Alon haksobish wishakchi, micha isht impakimma ibbak ishki, micha isht impakimma iyi ishki aiena ka o lapalichi tok.

24. Micha Alon ushi vhleha ha isht vla cha Moses vt issish ash isht impakimma haksobish wishakchi, micha isht impakimma ibbak ishki, micha isht impakimma iyi ishki aiena ka o lapalichi tok; micha Moses vt issish ash alta ya isht o fimmit fullohlechi tok.

25. Micha nia, micha hasimbish, micha anukaka nia asha tuk a, micha svlakha paknaka i hlapa micha haiyihchi tuklo, micha i nia, micha fulup isht impakimma aiena ka ishi tok.

26. Micha puska ik shatvmmo kishi vlhto, Chihowah itikba talaia tuk a puska ik shatvmmo achufa ai ishit, micha puska bila yvmmi, micha puska tapvski achufa aiena ka eshi cha, nia yash onochi mvt, fulup isht impakimma ya onochi tok.

27. Mihmvt moma ka Alon ibbak a fohki cha, ushi vhleha ibbak fohki mvt, fahfulit im issa mak o Chihowah itikba fahfuli tok.

28. Mihma Moses vt ibbak a akohchit im eshi cha ai o

hukmi alta ya onochit hukmi tok, na balama achukma hullochi ya tok; luak ishit hukmit Chihowah im issa yoke.

29. Micha Moses vt ikkishi ha eshi cha fahfulit im issa mak o Chihowah itikba fahfuli tok, yummvt hullochi chukfi nakni ya Moses ak o immi hatuk oka, Chihowah yvt Moses a i miha tuk mak o yvmohmi tok.

30. Micha Moses vt isht ahama bila ya micha issish vt alta on asha tuk a eshi cha, Alon micha i nafohka ya o fimmi mvt, micha ushi vhleha, micha ushi vhleha i nafohka ya o fimmi tok; micha Alon micha i nafohka, micha ushi vhleha micha ushi vhleha i nafohka ya aieninchit hullochi tok.

31. Micha Moses vt Alon a micha ushi vhleha ha Okla moma im vlhtipo okhissa yak o nipi ya hvsh a honashke, micha yummak o, Alon micha ushi vhleha aienvt ai vpashke, achi li tok mak o, yummak o hullochi pska kishi alhto aieninchit hvshpashke.

32. Micha nipi, micha pska aiena kvv asha moma ka luak ishit hvsh hukmashke.

33. Micha okla moma im vlhtipo okhissa ya nitak untuklo itin takla ka hvchi hullochi nitak vt ont ik taho kisha ka, hvchik kohcho kashke nitak untuklo ho hvchi hullocha chi hoke.

34. Hvchi kashoffa chi hosh himak nitak a yvmihchi tuk vt yohma chi Chihowah yvt miha tuk oke.

35. Yvmohmi hoka nitak micha ninak moma ka okla moma im vlhtipo anukaka hvsh asha na nitak untuklashke, micha Chihowah yvt atokolit miha tuk a hvsh holitoblashke; yohmi hosh ik hvchillo kashke; yummak o a miha tuk oka; im achi tok.

36. Yvmohmi ma Chihowah yvt Moses a tohnot i miha tuk mak o, Alon micha ushi vhleha aiena kvv nana moma ka yvmihchi tok.

CHAPTA IX.

YUMOHMI ma nitak ont isht untuchina ma, yakohmi tok; Moses vt Alon micha ushi vhleha, micha Israel asvnonchi vhleha aiena ka pit hoyo tok.

2. Mihmt Alon a, Nan ashvchi im issa chi mak o wak ushi himita ya, micha nahukmit im issa chi ho, chukfi nakni aiokpulo iksho ho ish ieshi cha Chihowah itikba ya ish im issashke.

3. Mikmt Israel im vlla vhleha ha im anumpulit, nan ashvchi im issa chi mak o, issi kosomushi ya hvsh ishashke; micha nahukmit aiokpucha chi ho, micha wak ushi, micha chukfvlhpoa ushi aiokpulo iksho ho afvmmi vmmona bika ya hvsh ieshashke.

4. Yvmohmikmt itin nanaiyvchi im issa ya Chihowah itikba ya vbit isht ai okpvchi ya wak hobvk, micha chukfi nakni a nan ilhpak im issa bila itaiyuma ka aieninchashke; himak nitak a Chihowah yvt auet hvchim otvna chi hoka, ish achashke, achi tok.

5. Mikma Moses vt nana im apesa tuk ak o okla moma in tabanekel itikba ya isht aivla tok; mihma okla moma kv bilika vla cha Chihowah itikba ya ita hiel tok.

6. Yohmi ma Moses vt nana hvsh yvmihcha he Chihowah yvt hvchim apesa tok a ilvppak oke; yohmikma Chihowah nan isht im a holitopa yvt hvchim a haiaka hi oke, achi tok.

7. Mihmt Moses vt Alon a, Alta ya ish ona cha, nan chim ashvchi im issa, micha chin nahukmit im issa mak o ish im issa hi oke; yohmi cha chishno inli, micha okla aiena pulla tuk mak o, nan isht a kashofa ish im ikba hi oke; yvmohmi cha okla puta nan im issa ya ish ema cha, Chihowah yvt achi tuk mak o, nan isht i kashofa ka ish im ikba hi oke, im achi tok.

8. Yohmi ka Alon vt alta ya ona cha nan ashvchi im issa wak ushi ilap immi atuk mak o vbi tok.

9. Mihma Alon ushi vhleha hv issish atuk a isht im ona tok; mihma yvmmt ibbak ushi a issish ash a oklubichi tuk

osh alta lupish puta ka on lapalichi cha, alta akishtula ya is-sish a vhlavbli tok.

10. Amba nia, micha haiyihchi, micha nanashvchi im issa svlakha paknaka onhlepa, yvmma Chihowah yvt Moses a im apesa tuk mak o, alta paknaka ya a hukmi tok.

11. Micha nipi, hakshup aiena ka vlbina akohcha ka hukmi tok.

12. Micha na hukmit im issa ya vbi tok; mihma Alon ushi vhleha hvv issish atuk a ima tok, mihma yvmmvt alta ai apakfopa ai o fimmi tok.

13. Yvmohmi cha na hukmit im issa im ita kvshkoa, micha noshkobo aiena ka ima tok; mihma alta paknaka ya ai o hukmi tok.

14. Micha takba foka, iyi puta aiena ka achefvt tahli cha nahukmit im issa alta ai onochi cha hukmi tok.

15. Micha okla puta nan im issa ya isht vla cha issi kosoma, yvmmvt okla puta nan ashvchi im issa yoka vbi cha vmmona chohmi tuk o, nan ashvchi im issa atukmak o chohmichit im issa tok oke.

16. Micha na hukmit im issa isht vla cha ayohmi chatuk vvhpesa ho im issa tok.

17. Yvmohmi cha nan ilhpak im issa ya isht vla cha ibbak alota achvfa ho ishit alta paknaka onochit onnahinli nahukmit im issa ya aieninchit hukmi tok.

18. Okla moma nan im itin nanaiyvchi vbit isht aiokpvcha he a wak hobvk, chukfi nakni aiena ka vbi tok; mihma Alon ushi vhleha hvv issish a ishit ema na, alta paknaka aiapakfoblit o fimmi tok.

19. Wak hobvk micha chukfi nakni nia, hasimbish, haiyihchi, takba foka isht ompoholmo, svlakha onhlepa ya ima tok.

20. Mihma nia ya ikkishi onochi tok; mihma nia yash alta paknaka ya ai o hukmi tok.

21. Mihma Alon vt ikkishi micha fulup isht impakimma ita tuklo na wali im issa chi mak o, Moses vt apesa tuk mak o, Chihowah itikba ya wali tok.

22. Mikmvt Alon vt ilap ibbak a okla ha vba pit i weli

cha yukpali tok; nan ashvchi im issa, na hukmit im issa, micha itin nanaiya im issa imihisut tahli mut ai i filvmmmit akowa tok.

23. Yohmi ma Moses micha Alon ita tuklot okla moma in tabanekel a iba chukowa tuk osh kohcha mut, okla hash yukpali tok.

24. Yvmohmi ma luak osh Chihowah itikba ya vttvt kucha cha nahukmi im issa micha nia vt alta onvtoyula ka hukmi tok; yvmmak o okla hvv pisa mut shakapa cha nashuka ya aka isht hlipkaiyachi tok.

CHAPTA X.

ATUK o Alon ushi Netab micha Abihu vt nabalama a hukmi ishi bika cha luak a fohki mut nabalama ya onochi cha, yvmmak oka i miha tuk keyu ka luak inla Chihowah ya im issa tok.

2. Mihma luak vt Chihowah ya a minti hosh kohchvt ivt hukmit tahli na Chihowah itikba ai illi tok.

3. Yohmi ma Moses vt Alon a, Ilvppak o Chihowah yvt anumpulit, A bilika vla ka a holitopa la chi hoke. Mich a okla moma itikba a holitopa la chi hoke, achi tuk mak oke, im achi tok. Mihma Alon vt nan ik acho ki tok.

4. Mihma Moses vt Alon imoshi Ussiel ushi Mishael micha Elsafan a hoyo cha, Bilika hvshla cha hvchitibapishi vhleha ha okla moma im vlhtipo itikba ai ishit binah ha kocha isht hvsh onashke, im achi tok.

5. Yohmi ho Moses vt achi tuk mak o, bilika ona cha i nafohka ya foka ho binah ha kocha isht ona tok.

6. Mihma Moses vt Alon, micha ushi Eliesa micha Ihlama, Hvchi noshkobo o hlipa ya hvchik shuvo kashke, micha hvchi nafohka ya hvchik hlilvffo kashke; hvch illi na, micha im ai i nukkilli vt okla moma ka onvtuyula na: amba hvchitibapishi vhleha Israel in chukachvfa moyuma kvv luak a Chihowah yvt oti tuk ak o chitoli hosh yayashke.

7. Mich a okla moma im vlhtipo okhissa ya i filvmmmit hv-

chik ayo kashke, hvch illi ná; nan isht ahama Chihowah i bila yvt hvchi onvtonla hokvt, im achi tok. Mihma Moses im anumpa hatuk mak o okla yvmohmi tok.

8. Mihma Chihowah yvt Alon a im anumpulit,

9. Chishno micha chiso vhleha hvsh aiena kv̄t okla moma im vlhtipo ya hvsh chukowakmvt oka paki, micha nan ishko kv̄llo aiena ka hvchik ishko kashke, hvch illi ná, ilvppvt hvchi ai unchuloli hlopulli ka nan vlhpisa bilia ya chi hoke.

10. Yvmohmikma naholitopa, micha nan ik holitopo, micha nan ik kashofo, micha nana kashofa ya hvsh itim inlvchashke.

11. Yvmohmi hosh Chihowah yvt Moses a tohnot ai im anumpohonli tok nan vlhpisa moma ka Israel im vlla vhleha ha hvsh im abahanchashke; im achi tok.

12. Mihma Moses vt Alon micha ushi okchaya moma tuk Eliesa micha Ihlama aiena ka im anumpulit, Ilhpak im issa luak ishit hukmit Chihowah im issa asha moma tuk a hvsh eshi cha isht shatvmmi vt iksho ho alta bilika hvsh ai vpashke: holitopa i shahli yoke.

13. Ilvppvt vbit luak ishit hukmit Chihowah im issa puta ak o ai ishit chimmi, micha chiso vhleha immi hatuk okvt, a holitopa ak o hvsh ai vpashke, yummak o a miha tuk mak oka.

14. Micha fahfuli ikkishi micha wahli fulup a akashofa ho chishno, micha chiso vhleha, micha chisotek vhleha aienvt hvsh ai vpashke; itin nanaiyvchi im issa vbit im issa Israel im vlla vhleha hv̄t ima tuk akohcha kv̄t chimmi micha chiso vhleha aienvt immi hatuk okvt.

15. Fahfulit ikkishi im issa ya Chihowah itikba fahfula chi kv̄t, wahli fulup, micha fahfuli ikkishi ha luak ishit hukmit im issa nia ya aieninchit isht vlashke; yohmi ka Chihowah yvt miha tuk mak o yvmv̄t chimmi micha chiso vhleha immi nan vlhpisa bilia ya chi hoke, im achi tok.

16. Atuk o Moses vt nan ashvchi im issa issi kosoma ya achunanchit hoyo ma, Yakeh, lua tuk atok: mihma Alon ushi vhleha okchaya moma tuk, Eliesa micha Ihlama ya i nukhobela cha,

17. Nanta katiohmi ho nanashvchi im issa, aholitopa ya hvch ik ai apo tuk oh cho? holitopa i shahli hatuk, micha okla moma nan ashvchi ya Chihowah itikba hvsh a shaiyala chi, micha isht hvsh i kashoffa chi aiena ho Chitokaka yvt hvch ima hatuk oka.

18. Yakeh, issish a aholitopa anukaka isht ikloshke hvchi miha li tuk mak o aholitopa ya hvsh ai vpa mvhla he tuk oke, im achi tok.

19. Mihma Alon vt Moses a, Yakeh, himak nitak nan ashvchi im issa, micha hukmit im issa aiena ka Chihowah itikba ai im issa tuk oke; atuk o nana yakohmi kak osh si onvtulvshke: atuk osh himak nitak a nan ashvchi im issa vpa li tuk ma, Chihowah yvt aiokpvcha he tuk oh cho? im achi tok.

20. Atuk o Moses vt yvmma haklo mvt, im vvhpesa tok.

CHAPTA XI.

MIHMA Chihowah yvt Moses micha Alon itatuklo ka im anumpulit,

2. Israel im vlla vhleha ha im anumpulit, nampoa yakni paknaka aiasha moma ka, nampoa ilvppa puta kak o hvsh pa hi oke.

3. Nampoa puta ka nana hosh iyakchush vt iti filvmmi, iyi vt chulakto cha, hvshuk vpa tuk vt falvmminchit kohchit hopasa ak o hvshpa hi oke.

4. Yohmi kia ilvppa puta kak o hvshuk vpa tuk vt falvmminchit kohchi cha hopasa yoh kia, micha iyakchush chulakto yoh kia, hvshpa he keyu hoke. Kamel a chohmi ka hvshuk vpa tuk vt kohchi cha hopasa kia, iyakchush a chuhlvfi keyu hokvt, hvchin liteha hoke.

5. Michā chukfi hvshuk vpa tuk vt falvmminchit kohchit hopasa kia iyakchush a ik chuhlvffo hokvt hvchin liteha hoke.

6. Michā puta kuta hvshnk a vpa tuk vt falvmminchit kohchit hopasa kia iyakchush a ik chuhlvffo hokvt hvchin liteha hoke.

7. Micha shukha, yummvt iyakchush chuhlvffi kia hvshuk vpa tuk vt falvmminchit kohchit hopasa keyu hokvt hvchin liteha hoke.

8. Nipi ya hvshpa he keyu, micha haknip illi ya hush potola he keyu hoke, hvchin liteha hoke.

9. Oka aiasha ka ilvppa puta moma kak o hvshpa hi oke, nana hosh oka, micha okhvta, micha okhina ai itvnowa yosh isht okyohli micha hakshup fachula im asha ya hvshpa hi oke.

10. Micha isht okyohli micha hakshup fachula ik im iksho moma okhvta micha okhina aiasha, oka ai itvnowa moma, nana okchaya nana hoh kia oka aiasha kvv hvchi yuwala ya hi oke.

11. Isht hvchi yuwala he mak oke; nipi ya hvsh pa he keyu, amba nipi illi yvt isht hvchi yuwala hi oke.

12. Nana hosh isht okyohli micha hakshup fachula ik im iksho hosh, oka aiashakmvt mihi yosh isht hvchi yuwala hi oke.

13. Micha hushi puta ka ilvppak osh isht hvchi yuwala hi oke, vpa he keyu; ishit yuwala hoke, Ussi micha ossiflech (okhvta ussi) micha ospole, (ussi nuni vpa)

14. Micha fvta, micha kait im aiachvfa,

15. Fvta chito moma im ai achvfa,

16. Micha opah: micha oksup-ibafohli, micha kuku micha biakak im ai achvfa.

17. Micha opah iskitini, micha kamolant micha opah chito.

18. Micha okak, micha chilantakoba micha kia-ussi.

19. Micha stok micha itikushayaia (hushwak) im ai achvfa, micha lapwin, micha halambisha aiena ka hvshpa he keyu hoke.

20. Hushi puta balvlli iyi ushta kash ishit nohowa moma kvv isht hvchi yuwala hi oke.

21. Yohmi kia naheli balvlli, iyi ushta ishit nohowa iyi paknaka ya iyi holhki vt asht yakni ya isht on tullitaya yokma moma ka hvshpa hi oke.

22. Ilvppa puta kak o hvsh ai vpa hi oke. Hawa ilap

aiachvfa, micha hawa yushmilali ilap ai achvfa micha shushi lapitta ilap ai achvfa, micha hatvffo ilap ai achvfa aiena kak oke.

23. Amba naheli balahanli inla iyi im ushta moma kvtnan isht hvchi yuwala ya chi hoke.

24. Michailuppa puta kak o isht hvchi liteha hi oke. Kvna hosh yvmma illi ya halelikmvt litiha na, ont opia hi oke.

25. Michakvna hosh illi yvmma kaniohmi ho sholi hokmvt i nafohka ya achifa cha litiha na, ont opia hi oke.

26. Nampoahvt iyakchush iti filvmmichi, micha iyi pahlata keyu hosh hvshuk vpa tuk vt falvminchit kohchit hopasa keyu puta haknip illi yvt hvchin liteha hoke.

27. Michanampoaiyi ushta ishit nohwa ilaiyuka puta, nampoanana hosh iyi puta ishit nohwa hokmvt yvmma puta kvtnan hvchin liteha hoke: Kvna hosh haknip illi haleli hokmvt litiha na, ont opia hi oke.

28. Micha illi yvmma sholi tuk mvt i nafohka ya achifa cha litiha na, ont opia hi oke; hvchin liteha yoke.

29. Iluppa puta aiena kak osh na balali yakni om balahanli vt hvchin liteha hi oke: weasel, micha pinti micha luksii lap ai achvfa,

30. Michafellet, 'micha kamelion, micha halanchilawa, micha snail, micha yulhkun aiena kak a hi oke.

31. Iluppa puta balahanli puta kvtnan hvchin liteha hoke. Kvna hosh illi tuk a halelikmvt litiha na, ont opia hi oke.

32. Michanana ho iti nan ai vlhto, keyukmvt nafohka, keyukmvt na hakshup, keyukmvt bahta, nan aivlhto nana kia, nan ai atahli chatuk o illi yosh onvtulakma, liteha hi oke; oka okvchi cha litiha na ont opia hi oke; yohmi hosh kashofa hi oke.

33. Michalukfi tvnna puta nan ai vlhto nana kia, nana hosh alhto tuk o okatulakma liteha hi oke; mikma hvsh kola hi oke.

34. Ilhpak moma vpa he vlhpesa ho oka yvmma chohmi hosh on hlatapakma yvmmak atuk vt liteha hi oke; micha

nan ishko nana hō ishka he v̄lhpesa hosh nan aiv̄lhto puta ȳmma chohmi hō v̄lhtokm̄vt liteha hi oke.

35. Micha nana puta kanima hō illi yash kaniohmi hosh onvtulakma liteha hi oke; apalvska, keyukm̄vt shuti vt baiv̄llit ataloha, kovt kinahla hi oke, liteha yokvt, micha hv̄chin liteha hi oke.

36. Yohmi kia kvli, keyukm̄vt kvli hofobi yosh oka l̄awa achukma hokm̄vto kashofa hi oke; amba ȳmma illi ya h̄aleli hokvto liteha hi oke.

37. Micha illi yash kaniohmi hosh napehna hollokcha chin tuk a onvtulakma kashofa hi oke.

38. Amba napehna ya oka nana hosh o hlatapa tuk o illi yash kaniohmi hosh onvtulakma hv̄chin liteha hi oke.

39. Nampoa nana hosh hv̄shpa hinla tuk osh illikma kvna hosh illi ȳmma halelikm̄vt litiha na, ont opia hi oke.

40. Micha kvna hosh illi yash vpakm̄vt i nafohka ya achifa cha litiha na, ont opia hi oke; micha kvna hosh illi yash sholi tuk oh kia i nafohka ya, achifa cha litiha na, ont opia hi oke.

41. Micha na balali puta yakni paknaka ya o balahanli vt nan ishit yuwala ya hi oke; v̄pa he keyu hoke.

42. Nana hosh ikfoka ishit nohowa, keyukm̄vt iyi ushta hō ishit nohowa, keyukm̄vt na balali yakni om balahanli ya iyi laua kv̄t i shahlikma, ȳmmak oka hv̄sh pa he keyu, nan isht yuwala yoka.

43. Na balv̄lli balahanli chatuk nana kia, ishit yuwala isht hv̄sh il ikba he keyu, micha ȳmmak oka isht hv̄sh ile litehli cha isht hv̄chi liteha he keyu hoke

44. Chitokaka hv̄chi Chihowah sia hoka, ȳvmohmi hoka hv̄sh ile hullochi cha hv̄chi holitopashke, holitopa sia hoka; micha na balv̄lli yakni o balahanli chatuk nana kia isht hv̄sh ile litehla he keyu hoke.

45. Hv̄chin Chitokaka sia ha chi hosh Echip yakni ya apehlichit hv̄chi kohchi tuk Chihowah sia hoka; ȳvmohmi hoka hv̄chi holitopashke; sa holitopa hoka.

46. Ilv̄ppak osh nampoa, micha hushi, micha okchaya

puta oka ya ataya, micha nana puta yakni ya om balahan-
li aiena nan vlhpisa hoke.

47. Ik kashofo, micha kashofa, micha nampoa vpa he
vlhpesa ka, micha nampoa vpa he vlhpesa keyu ya ishit itim
inlvchi yoke; hvsh im achashke, im achi tok oke.

CHAPTA XII.

MICHA Chihowah yvt Moses a im anumpulit,
2. Israel im vlla vhleha ha im anumpulit, Ohoyo
hvt chakali cha vlla nakni yo eshikmvt nitak untuklo ho ik
kashofo ka hi oke, liteha kvv ila filvmmi chatuk nitak itin
takla mak o ik kashofo ka hi oke.

3. Atuk o nitak ont isht untuchinakma vlla yvt hakshup
in tvpashke.

4. Yomohmi ka ohoyo hash ot issish onvttoyulvt ile ka-
shofi kvv nitak pokoli tuchina akucha tuchina hi oke; ile
kashofi nitak vt ont ik taho kisha ho nana hullo nana kia
potola he keyu, micha vlhtipo holitopa ont chukowa he
keyu hoke.

5. Amba vlla tek o eshi hokmvt nitak hullo tuklo ho ik
kashofot ile filvmmicha hi oke; micha issish onvttoyulvt ile
kashofi kvv nitak pokoli hannali akucha hannala hi oke.

6. Micha vlla nakni, keyukmvt vlla tek atuk o ile kashofi
nitak vt ont tahakma, hukmit im issa yo chukfushi
afvmmi vmmona, micha nanashvchi im issa yo pvchushi,
keyukmvt pvchi yoshoba aiena ho okla moma im vlhtipo
okhissa isht onvt naholitompa isht vta ya isht im ona hi
oke.

7. Mikma yvmmak osh Chihowah itikba ya ai im issa
cha i kashoffa hi oke. Mikma issish i yanali tuk vt kashofa
hi oke. Ilvppvt nakni, keyukmvt tek o eshi tuk vt i nan
vlhpisa hoke.

8. Yohmi ka chukfushi ya isht vla he keyukmvt pvchi
yoshoba tuklo, keyukmvt pvchushi tuklo ho isht vlashke;
achvfa kvv hukmit im issa yokma, achvfa kvv nanashvchi

im issa ya hi oke, mikma naholitompa isht vta yvt i kashoffikma, kashofa hi oke; ish im achashke, im achi tok.

CHAPTA XIII.

MICHA Chihowah yvt Moses micha Alon a im anumpu-lit,

2. Hatak nipi hakshup a shatali, hlachowa, keyukmut tohbi hosh talaia, micha nipi hakshup a lapali kvv ililli leplosi vbi chohmikma, naholitompa isht vta Alon, keyukmut ushi vhleha naholitompa isht asha achvfa isht im ona hi oke.

3. Mikma naholitompa isht vta yvt nipi hakshup ililli onvtonla ka pisashke; atuk o ililli a lapali ka hishi tohbit isht ia, micha ililli pisa ka kolukbi kvv nipi hakshup inla ka i shahlikmut ililli leplosi yoke: mikma naholitompa isht vta yvt pesa cha ik kashofa, achashke.

4. Nipi hakshup tohbi chohmi tuk vt tohbikma, micha kolukbi kvv hakshup a i shahli keyu, micha hishi vt tohbi keyu, yohmikma ililli ishi tuk ash naholitompa isht vta yvt nitak untuklo ho aboha fohkit im okhishta hi oke.

5. Atukmut nitak isht untuklokma naholitompa isht vta yvt pisa hi oke: atuk o yakeh! ililli vt pisa ka ont talaia cha ililli vt hakshup a chitot isht ik aiyokma, naholitompa isht vta yvt himakma nitak untuklo ho aboha fohkit im okhishta hi oke.

6. Atuk mut naholitompa isht vta yvt nitak ont isht untuklokma anonti pisa hi oke: atuk o yakeh! ililli hvv lusbi choyuhmi cha ililli hvv hakshup a chitot isht ik aiyokma, naholitompa isht vta yvt kashofah, acha hi oke: peh hlachowa yoke; mikma i nafohka ya achifa cha kashofa hi oke.

7. Amba kashofa chi ho naholitompa isht vta yvt pisa ha ya hlachowa yvt hakshup a chito fehvt isht iakma, naholitompa isht vta yvt anonti pisa hi oke.

8. Atuk osh naholitompa isht vta yvt pisakma yakeh! ililli hvv hakshup a chitot isht ia ho pisakmut naholitompa isht vta yvt ik kashofa, acha hi oke, leplosi yoke.

9. Ililli leplosi vt hatak a onvtoyulakma naholitompa isht vtta ya isht im ona hi oke.

10. Mikma naholitompa isht vtta yvt pisa hi oke, micha yakeh! shatali yvt hakshup a tohbi, micha hishi a tohbichi, micha shatali yvt okchushbvt homma ho pisakmvt,

11. Leplosi sipokni yosh nipi hakshup a onvtoyula hoke; mihma naholitompa isht vtta yvt ik kashofa, acha hi oke; micha ik im okhishto kashke, ik kashofa hoka.

12. Micha leplosi yvt kohchvt nipi ya onvtoyulvt mahayakma, micha ililli onvtola tuk ash nipi moma ka ompoholmot noshkobo vttvt ia hosh iyi ya ont vlichikma, naholitompa isht vtta yvt kanima yo a pesakmvt,

13. Yohmikmvt naholitompa isht vtta yvt anukfillashke; atuk o yakeh! leplosi yvt nipi ya mominchikma ililli onvtola tuk ash kashofa, achashke, momvt tohbit taha hoke; kashofa hoke.

14. Yohmi kia nipi okchaki yvt haiakakma ik kashofa ka hi oke.

15. Mikma naholitompa isht vtta yvt nipi okchaki a pisa cha, ik kashofa, acha hi oke, nipi okchaki yvt ik kashofa yoka; leplosi yoke.

16. Keyukmvt nipi okchaki yvt anonti inlv isht ia cha tohbi tobakma, naholitompa isht vtta ya im ona hi oke.

17. Mikma naholitompa isht vtta yvt pisa hi oke; mikma yakeh! ililli yvt tohbit tahakma naholitompa isht vtta yvt ililli onvtola kash kashofa, acha hi oke: kashofa hoke.

18. Micha nipi yvma hakshup a hichi vt talaia tuk osh vtta hoke.

19. Micha hichi atalaia tohbi shatali, keyukmvt tohbi iskitinesi hosh talaia, tohbi micha homma chohmi hosh talaia tuk o naholitompa isht vtta ya pisachi;

20. Atuk o naholitompa isht vtta yvt pisakma, Yakeh! Kolukbi kv hakshup a ishahli, micha hishi vt tohbit tahakma, naholitompa isht vtta yvt ik kashofa, achashke; ililli leplosi yosh hichi ya a kvhla hoke.

21. Amba naholitompa isht vtta yvt pisakma, yakeh! hishi tohbi kv iksho, micha kolukbi kv nipi hakshup inla

ya ik i shahlokma, amba lusbi choyuhmi; yohmikma naholitompa isht vtta yvt aboha fohkit im okhishta na, nitak untukla hi oke.

22. Amba nipi hakshup a chitot isht i shahlit mahayakma, naholitompa isht vtta yvt ik kashofa, acha hi oke, ililli hoke.

23. Amba tohbi talaia tuk vt atalaia tuk a talaia cha chitot isht ik aiyokma, hichi lua yoke; mikma naholitompa isht vtta yvt kashofa, acha hi oke.

24. Keyukmvt hakshup a lvshpvt hukmi fehna, nipi okehushba homma lua ya tohbi iskitini homma chohmi, keyukmvt tohbi hosh talaiakma;

25. Yohmikma naholitompa isht vtta yvt pisa hi oke; mikma yakeh! tohbi iskitini talaia ho hishi vt tohbit isht ia, micha pisa ka kolukbi kvv nipi a i shahlikma, leposi yosh lua ka atobvt kohcha hoke, yumohmi hoka naholitompa isht vtta yvt ik kashofa, acha hi oke, ililli leposi yoke.

26. Amba naholitompa isht vtta yvt pisa ma, yakeh! tohbi iskitini ka hishi tohbi kvv iksho, micha kolukbi kvv nipi inla ya ik i shahlokma, amba lusa chohmi; yohmikma naholitompa isht vtta yvt nitak untuklo ho aboha fohkit im okhishtashke.

27. Atuk osh nitak ont isht untuklokma naholitompa isht vtta yvt pisa hi oke; yohmikma nipi ya chitot isht i shahlit isht iakma naholitompa isht vtta yvt ik kashofa, acha hi oke; ililli leposi yoke.

28. Micha tohbi iskitini talaia kvv mihinli talaia cha, nipi ya chitot isht ik aiyo, amba lusa chohmikma lua shatali yoke; na holitompa isht vtta yvt kashofa, acha hi oke; luvv homma yoke.

29. Hatak osh keyukmvt ohoyo hosh ililli hvv noshkobo keyukmvt nutakhish a onvtolakma,

30. Yohmikma naholitompa isht vtta yvt ililli ha pisa hi oke; mikma yakeh! pisa ka kolukbi kvv nipi ya i shahlikma, micha hishi lakna tapvski chohmi hosh asha, yohmikma naholitompa isht vtta yvt ik kashofa, acha hi oke; hla-

chowa shila, leposi fehna hosh noshkobo, keyukmvt nutakhish onvtoyula hoke.

31. Micha naholitompa isht vttā yvt ililli hlachowa ya pisa ma, yakeh! pisa ka kolukbi kv̄t nipi ya ik i shahlo, micha hishi lusa yvt iksho, yohmikma naholitompa isht vttā yvt ililli hlachowa onvtonla tuk a nitak untuklo ho aboha fohkit im okhishta hi oke.

32. Atuk osh nitak ont isht untuklokma naholitompa isht vttā yvt ililli yash pisa hi oke; mikma yakeh! ililli hlachowa yvt chitot isht ik aiyo, micha hishi lakna kv̄t iksho, micha pisa ka hlachowa hv̄t kolukbi kv̄t hakshup a ik i shahlokma,

33. I shafa hi oke; yohmi kia hlachowa yano shafa he keyu hoke; mikma naholitompa isht vttā yvt hlachowa ya himakma nitak untuklo ho aboha fohkit im okhishta hi oke.

34. Atuk osh nitak ont isht untuklokma naholitompa isht vttā yvt hlachowa yash pisa hi oke; mikma yakeh! hlachowa yvt nipi ya chitot isht ik aiyo, micha pisa ka kolukbi kv̄t ik i shahlo, yohmikma naholitompa isht vttā yvt kashofa, acha hi oke; mikma i nafohka ya achifa cha kashofa hi oke.

35. Amba kashofa ha ya hlachowa yvt nipi ya chito feh-nvt isht ia,

36. Yohmikma naholitompa isht vttā yvt pisashke; mikma yakeh! hlachowa yvt nipi ya chitot isht iakma, naholitompa isht vttā yvt hishi lakna hoyā he keyu, ik kashofa hoke.

37. Amba hlachowa yash osh pisa ka mih achufa talaia, mikma hishi lusa yvt yumma ai offokma, hlachowa yvt hla-kofi, kashofa hoke, mikma naholitompa isht vttā yvt kashofa, acha hi oke.

38. Micha hatak osh keyukmvt ohoyo hosh nipi hakshup a tohbi taloha, tohbi shohkauwanli taloha,

39. Yohmikma naholitompa isht vttā yvt pisa hi oke; mikma yakeh! nipi a tohbi taloha kv̄t lusa chohmikmvt, chikchiki talaia yosh nipi ya toba hoke; kashofa hoke.

40. Micha hatak osh pashi yvt noshkobo ha achilofa cha yushmilali, yohmi kia kashofa hoke.

41. Micha kvna hosh noshkobo ha nashuka pilla hosh pashi yvt i chilofakmvt ibitakla yushmilali hoke, yohmi kia kashofa hoke.

42. Micha noshkobo yushmilali, keyukmvt ibitakla yushmilali ya hlachowa tohbi homma chohmit talaiakmvt; noshkobo yushmilali keyukmvt ibitakla yushmilali ya leplosi tobtv kohcha hoke.

43. Yohmikma naholitompa isht vttā yvt pisa hi oke; mikma yakeh! noshkobo yushmilali ya keyukmvt ibitakla yushmilali hlachowa shatali kvv tohbi homma chohmi leplosi yvt nipi ya a haiaka chatuk a chohmikmvt,

44. Hatak leplosi onvtonla, ik kashofa hoke; naholitompa isht vttā yvt ik kashofa kvvohmi, acha hi oke; ililli hvv noshkobo hak o onvtola hoke.

45. Mikma ililli onvtonla tuk leplosi vbi yash osh i nafohka yvt hlilafa cha noshkobo bieka hi oke, micha itivlbi vba ya ompohomo cha payvt, Ik kashofa, Ik kashofa, ahan cha hi oke.

46. Ililli hvv onvtoyula nitak moyuma ka liteha hi oke; ik kashofa hokvt ilap banot ahanta hi oke; aivtta yvt binah ha kocha ya hi oke.

47. Micha nafohka ya ililli leplosi vt onvtonla, chukfi hishi yokma, linen okma,

48. Linen osh keyukmvt chukfi hishi yosh vpi tvnna yokma, keyukmvt ishit tvnna yokma, nahakshup okma, keyukmvt nahakshup osh nana toba yokma,

49. Ililli hvv okchamali chohmi, keyukmvt homma chohmi hosh nafohka ya, keyukmvt nahakshup, keyukmvt vpi tvnna, keyukmvt ishit tvnna, keyukmvt nahakshup nana ho onvtonlakmvt, ililli leplosi yoke; atuk o naholitompa isht vttā ya pisacha hi oke.

50. Mikma naholitompa isht vttā yvt ililli ha pisa cha ililli onvtonla tuk a im okhishta na nitak untukla hi oke.

51. Atuk osh nitak ont isht untuklokma nan ililli hash pisa hi oke; nafohka ya vpi tvnna ak okmá; keyukmvt ishit tvnna ak okmá, keyukmvt nahakshup ak okmá, keyukmvt nana hosh nahakshup ishit toba ak okmá, nana ho ililli hvv

chitot isht iakma, ililli hvt leplosi chilita yoke ; ik kashofa hoke.

52. Yohmi hoka chukfi hishi yosh, keyukmvt linen osh vpi tvnna, keyukmvt ishit tvnna, keyukmvt nahakshup keyukmvt nahakshup ishit toba yosh ililli hvt onvtonla nafohka yvmma hukma hi oke : leplosi chilita yoka, luak ishit luashke.

53. Atuk o naholitompa isht vtta yvt pisakma, yakeh ! nafohka ya vpi ponola yokma, keyukmvt ishit tvnna yokma keyukmvt nahakshup nana ho ishit toba ya ililli hvt chitot isht ik aiyokma,

54. Yohmikma naholitompa isht vtta yvt ililli onvtonla nana kash achifa chi ka i miha cha, himakma nitak untuklo ho im okhishta hi oke.

55. Atukma ahchifa ha ya naholitompa isht vtta yvt pisa hi oke ; mikma yakeh ! ililli pisa kvv inlvv isht ik aiyo, micha ililli hvt chitot isht ik aiyokmvt ik kashofa hoke ; luak ishit ish luacha hi oke ; noshkobo, keyukmvt ibitakla yushmilali hokma, nana kia anukaka chilita yoke.

56. Micha naholitompa isht vtta yvt pisakma yakeh ! ahchifa ha ya ililli hvt lusa chohmikma, nafohka yash, keyukmvt nahakshup ash, keyukmvt vpi yash, keyukmvt ishit tvnna yash hlilvfit kohcha hi oke.

57. Atuk o anonti nafohka yash, keyukmvt vpi yash, keyukmvt ishit tvnna yash, keyukmvt nahakshup osh nato-ba yash haiakakmvt ililli vlmoli yoke : ililli onvtonla yvmma luak isht ish hukma hi oke.

58. Micha nafohka ya vpi hokma keyukmvt ishit tvnna yokma ; keyukmvt nahakshup osh nana kia toba tuk okma nana ish achifa tuk ash ililli hvt kvniakma, atukla ma vlvchifa cha kashofa hi oke.

59. Nafohka yvt chukfi hishi, keyukmvt linen osh vpi yokma ; keyukmvt ishit tvnna yokma, keyukmvt nahakshup isht atoba nana ho ililli hvt onvtoyula na, kashofa, acha he, keyukmvt ik kashofa, acha hi ya, nan vlvhpisa hvt ilvppak oke, im achi tok.

CHAPTA XIV.

MICHA Chihowah yvt Moses a im anumpulit,
 2. Iluppak osh leplosi vbi vt kashofa he nitak a nan
 vllhpisa hoke; naholitompa isht vtta ya isht im ona hi oke.

3. Mikma naholitompa isht vtta yvt binah ha kohchvt ia
 hi oke; micha naholitompa isht vtta yvt pisa hi oke;
 mikma yakeh! lepa hatak leplosi vbi vt ililli leplosi onvton-
 la tuk vt hlakofikma,

4. Yohmikma kashofa chi kash hushi kashofa okchaya
 tuklo ho, micha chuahla iti, micha tishepa, micha hissop
 aiena ho im esha hi ya naholitompa isht vtta yvt miha hi
 oke.

5. Micha hushi yash achvfa hosh lukfi tvnna nan aivlhto
 fohka hosh oka kapvssa paknaka ai illa hi ya, mihashke.

6. Hushi okchaya yano, yvmma, micha chuahla iti micha
 tishepa micha hissop aiena kash eshi cha yvmma micha
 hushi okchaya yash, oka kapvssa paknaka ai illi tuk ash
 issish a akvcha hi oke.

7. Micha kashofa chi kash untuklo ha o fimma hi oke,
 micha kashofa, achi cha hushi okchaya oktak ashahbi ho
 hikacha hi oke.

8. Micha kashofa chi kvv i nafohka ya achifa cha pashi
 moma ka shafikmvt oka ya ilachefa cha kashofa hi oke; atuk
 osh yohmi ha yosh binah ha onashke; micha nitak untuklo
 ho binah ha kocha ya ahantashke.

9. Yohmi kia nitak ont isht untuklokma noshkobo pashi
 ya mominchit micha nutakhish, micha im osana aiena mo-
 minchit shafashke; peh i pashi mominchit shafashke; micha
 i nafohka ya achifashke; micha nipi ya oka isht achifa cha
 kashofa hi oke.

10. Micha nitak isht untuchinakma chukfushi nakni tuklo
 aiokpulo kvv iksho, micha chukfushi tek afvmmi vmmona
 achvfa hosh aiokpuloka iksho, micha hukmit im issa mak o
 bota tohbi lipehbi vllhpisa ishit pokoli tuchina hosh bila
 aiyoma ho micha bila ampushi achvfa aiena ho isha hi oke.

11. Mikma kashoffa chin tuk naholitompa isht vttā yvt hatak kashofa chī kash, micha nana yvmma puta kash Chihowah itikba okla moma im vlhtipo okhissa yā isht onashke.

12. Micha na holitompa isht vttā yvt chukfushi nakni achvfa kā ishi cha na yoshobat im issa yā im issa chī, micha bila ampushi achvfa kā eshi cha fahfulit im issa mak o Chihowah itikba yā fahfulashke.

13. Micha chukfushi yash nan ashvchi im issa micha hukmit im issa aivba he aholitopa ak o ai vba hi oke; nan ashvchi im issa yvt naholitompa isht vttā immi hatuk a yvmmak inli chohmit nayoshobat im issa yak kia immi hoke; holitopa i shahli hoke.

14. Micha naholitompa isht vttā yvt vbanvblit im issa issish a eshi cha naholitompa isht vttā yvt kashofa chī kash haksobish isht impakimma wishakchi, micha ibbak isht impakimma ibbak ishki, micha iyi isht impakimma iyishki aiena kā lapalicha hi oke.

15. Micha naholitompa isht vttā yvt bila ampushi achvfa kash kanohmi kā eshi cha tosholit ilap ibbak vlhfubekimma ibbak pvtā yā ona hi oke.

16. Micha naholitompa isht vttā yvt ibbak ushi isht impakimma yā bila yvt ibbak vlhfubekimma alhto kash okvchi cha bila yash Chihowah itikba yā untuklo ha ibbak ushi ishit fimma hi oke.

17. Micha bila yvt ibbak alhto moma tuk a naholitompa isht vttā yvt kashofa chī kash isht impakimma haksobish wishakchi, micha ibbak isht impakimma ibbak ishki, micha iyi isht impakimma iyishki aiena kā yoshobvt im issa issish alapanli kā onocha hi oke.

18. Micha bila yash atampa kv̄t naholitompa isht vttā ibbak alhto kā kashofa chī kash noshkobo hā on hlatvbla hi oke, micha naholitompa isht vttā yvt Chihowah itikba im a kashoffa hi oke.

19. Micha naholitompa isht vttā yvt nan ashvchi im issa im issa cha ik kashofa tuk vt kashofa chin tuk ash i kashofa hi oke, micha i himmak o hukmit im issa yā vba hi oke.

20. Micha naholitompa isht vta yvt hukmit im issa micha ilhpak im issa ya alta ya onochit im issa hi oke, micha naholitompa isht vta yvt i kashoffikma i kashofa hi oke.

21. Mikma hatak ilbvsha yatuk osh yohmi ka ahayucha he keyukmut vbanvblit im issa mak o chukfushi achvfa, micha ilhpak im issa mak o bota tohbi lipehbi kushkoa ishit pokoli achvfa bila aiyoma, micha bila ampushi achvfa aiena fahfula chi, micha isht im atobba chi ka isha hi oke.

22. Micha pvchi yoshoba tuklo, keyukmut pvchushi tuklo ahayucha hinla kv achvfa kv; nanashvchi im issa, micha achvfa kv hukmit im issa ya chi aiena hi oke.

23. Micha nitak isht untuchinakma i kashofa chi hosh Chihowah itikba okla moma im vlhtipo okhissa ya isht onvt naholitompa isht vta ya isht im ona hi oke.

24. Mikma naholitompa isht vta yvt chukfushi vbanvblit im issa yash, micha bila ampushi achvfa kash eshi cha Chihowah itikba fahfulit im issa mak o fahfula hi oke.

25. Micha vbanvblit im issa chukfushi yash vbi cha naholitompa isht vta yvt vbanvblit im issa yash issish kaniohmi ka eshi cha kashofa chi kash haksobish isht impakimma wishakchi, micha ibbak isht impakimma ibbak ishki, micha iyi isht impakimma iyishki aiena ka lapalechashke.

26. Micha bila yash kaniohmi ka naholitompa isht vta yvt tosholit ilap vlhfubekimma ibbak pvta ya ona hi oke.

27. Micha naholitompa isht vta yvt ibbak vlhfubekimma bila alhto kash kaniohmi ka ibbak ushi isht impakimma ya untuklo ha Chihowah itikba isht fimma hi oke.

28. Mikmut naholitompa isht vta yvt bila ibbak alhto tuk vt kaniohmi ka kashofa chin tuk ash haksobish isht impakimma wishakchi, micha ibbak isht impakimma ibbakushi, micha iyi isht impakimma iyishki aiena, vbanvblit im issa issish alapanli ka lapalecha hi oke.

29. Micha bila yvt ibbak a alhto moma tuk a Chihowah itikba im a kashoffa chi hosh i kashofa chi kash nashkobo ha on hlatvbla hi oke.

30. Micha pvchi yoshoba yash, keyukmut pvchushi yash ahayucha hinla kv achvfa ka im issa hi oke.

31. Ahayucha hinla tuk ash o achvfa ka nanashvchi im issa mak o micha achvfa ka hukmit im issa mak o ilhpak im issa aieninchit im issa hi oke. Micha naholitompa isht vtta yvt i kashoffa chin tuk a Chihowah itikba ya i kashoffa hi oke.

32. Ilvppak osh ililli leplosi onvtonla isht kashofa he ya ibbak vt ahayucha he keyu ya i nan vllhpisa hoke, im achi tok.

33. Mihma Chihowah yvt Moses micha Alon a im anum-pulit,

34. Kenan vt hvchi yakni ya chi ho hvchima li ka hvsh onakma, atuk o hvchi yakni ya chuka yo ililli leplosi ya onochi likma,

35. Chuka yash immi hvt naholitopa isht vtta ya ont im anolit, chuka ya ililli hvt onvtonla, vm ahobvshke, achikma,

36. Yohmikma naholitompa isht vtta yvt ililli pisa chi kv aboha ya ik chukowo kisha, anukaka asha moma ka toshoht tahla chi ka i miha hi oke; yvmohmi ho aboha asha tuk moma kv ik kashofo ik tobo kashke; atuk o i himmak a ya naholitompa isht vtta yvt aboha ya pisa chi hosh chukowa hi oke.

37. Micha ililli ha pisa hi oke; mikma yakeh! ililli hvt aboha itabana ya kolukbit okchamali chohmit, keyukmvt hamma chohmit buskvchi hosh pisa ka kolukbi kv itabana ya i shahlikma,

38. Yohmikma naholitopa isht vtta yvt aboha ya kohchvt aboha okhissa ya ona cha nitak untuklo ho okhishtvt hilecha hi oke.

39. Atuk osh nitak isht untuklokma naholitompa isht vtta yvt vla cha, anonti pisa hi oke; mikma yakeh! ililli hvt aboha itabana ya chitot isht iakma,

40. Yohmikma naholitompa isht vtta yvt ililli onvtonla tvi yash ishit kancha hi a i miha hi oke, mikma tmaha holihta kohcha ik a kashofo yo ont kancha hi oke.

41. Micha aboha anukaka fullota ka shafichi cha na pushi shafa kash tmaha holihta kohcha ik a kashofo yo ont hlatvbla hi oke.

42. Micha tuli inla eshi cha, tuli yummak ash atobbichit bohla hi oke; micha yummuska inla yo eshi cha aboha ya isht apolusla hi oke.

43. Atuk o ililli hvt anonti vla cha, tuli ya ishit kanchi ha ya, micha aboha ya shafi ha ya micha aboha yvt vlhpolosa ha ya aboha ya kohchakma,

44. Yohmikma naholitompa isht vtta yvt ona cha, pisa hi oke; mikma yakeh! ililli hvt aboha ya chitot isht iakmvt, leplosi chilita yosh aboha ya onvtola, ik kashofa hoke.

45. Micha aboha yash tuli, micha iti, micha aboha in lukfi yummuska moma aiena ka tivbla hi oke, micha tumaha holihta ya kohcha ik akashofa yo isht ona hi oke.

46. Mikma kvna hosh okhishtvt hikia moma ho chukowa tuk mvt ik kashofa ho ont opia hi oke.

47. Mikma kvna hosh aboha yash itola tukmvt i nafohka ya achifa hi oke; mikma kvna hosh aboha yash ai impa tukmvt i nafohka ya achifa hi oke.

48. Mikma naholitopa isht vtta yvt ont chukowa cha pisa ma, yakeh! aboha yvt vlhpolusa ha ya illilli hvt chitot isht ik aiyokma, naholitompa isht vtta yvt aboha yvt kashofa, achashke, ililli hvt hlakofi hoka.

49. Micha aboha ya kashofa chi kvt hushi tuklo, micha chuahla iti, micha tishepa, micha hissop aiena ho isha hi oke.

50. Micha hushi yash achufa ka lukfi tunna fohkit oka kapussa paknaka yo vba hi oke.

51. Mikmvt chuahla iti, micha hissop, micha tishepa micha hushi okchaya yash aiena ka eshi cha hushi illi yash issish, micha oka kapussa yash okvchi cha untuklo ha aboha ya o fimma hi oke.

52. Micha aboha ya hushi issish, micha oka kapussa, micha hushi okchaya, micha chuahla iti, micha hissop, micha tishepa aiena ho ishit kashoffa hi oke.

53. Amba hushi okchaya vno tumaha holihta kohcha oktak a shahbi yo isht onvt hikachi cha aboha ya i kashoffa hi oke, mikma kashofa hi oke.

54. Ilvppak osh ililli ilaiyukali leplosi, micha hlachowa a puta.

55. Micha nafohka, micha aboha in leplosi,

56. Micha shatali, micha hlachowa, micha shohkaualit talaia aiena kv̄t i nanv̄lhpisa hoke.

57. Ik kashofokma, micha kashofakma im v̄lv̄rchi yoke. Ilv̄ppak osh leplosi nan v̄lhpisa hoke, im achi tok.

CHAPTA XV.

MICHA Chihowah yvt Moses micha Alon a im anum- pulit,

2. Israel im v̄lla v̄hleha im anumpv̄lit Hatak nana hosh nipi a yanv̄lli ya ishikmvt i yanv̄lli ak atuk mak o ik kashofo hoke.

3. Micha im a yanv̄lli ka ilv̄ppak osh ik im a kashofo ya hi oke; im a yanv̄li vt nipi ya a yanv̄lli hokma, keyukmvt im a yanv̄lli vt nipi ya issa hokma nana kia ik im a kashofo yoke.

4. Yanv̄lli ya ishi yosh topa ai onvtola chatuk puta kv̄t ik kashofo hoke; micha nana ho om binili tuk moma kv̄t ik kashofo ya hi oke.

5. Mikma kv̄na hosh in topa ha halelikmvt i nafohka ya achifa cha oka yupa hi oke; micha ik kashofo ho ont opia hi oke.

6. Mikma yanv̄lli ishi hosh on asha tuk a kv̄na hosh on asha tuk mvt i nafohka ya achifa cha, oka yupa hi oke, micha ik kashofo ho ont opia hi oke.

7. Micha yanv̄lli ishi ho kv̄na hosh nipi ya potoli tuk- mvt i nafohka ya achifa cha, oka yupa hi oke: micha ik kashofo ho ont opia hi oke.

8. Micha yanv̄lli ishi yosh kashofa yo ontofa, yohmikma i nafohka ya achifa cha, oka yupa hi oke; micha ik kashofo ho ont opia hi oke.

9. Micha yanv̄lli yo ishi yosh issuba om patv̄lhpo nana ho om binilikma ik kashofo ka hi oke.

10. Micha nana ho im patali tuk o kv̄na hosh halelikmvt ik kashofo ho ont opia hi oke; atuk o kv̄na hosh nana

yvmma kaniohmi ka sholi tuk mvt i nafohka ya achifa cha, oka yupa hi oke; micha ik kashofo ho ont opia hi oke.

11. Micha yanvlli ishi hosh kvna ho potoli tuk ma (micha ibbak a oka isht ik achifo tukmvt) i nafohka ya achifa cha, oka yupa hi oke; micha ik kashofo ho ont opia hi oke.

12. Micha yanvlli ishi hosh lukfi tvnna nan aivlhto yo potoli tukma koa hi oke, micha iti nan aivlhto moma kvt oka isht achifa hi oke.

13. Atuk osh yanvlli ishi tuk osh i yanvlli vt i kashofakmvt, kashofa chi kvt nitak untuklo ho im ile hotehvt i nafohka ya achifa cha, oka yanvlli yo yupa hi oke, micha kashofa hi oke.

14. Micha nitak ont isht untuchinakma puchi yoshoba tuklo, keyukmvt puchushi tuklo ho eshi cha, Chihowah itikba onvt okla moma im vltipo okhissa ya ona cha naholitompa isht vtta ya ima hi oke.

15. Mikma naholitompa isht vtta yvta chvfa ka nan ashvchi im issa mak o micha achvfa ka hukmit im issa mak o im issa hi oke; micha naholitompa isht vtta yvt i yanvlli ya Chihowah itikba im ai i kashofa hi oke.

16. Itapotakma isht ai unchuloli vt hatak nana hosh kohchakmvt nipi moma ka oka isht achifa cha ik kashofo ho ont opia hi oke.

17. Micha nafohka puta micha na hakshup puta ka itapotakma isht ai unchuloli hv on asha kvt oka isht achifa cha, ik kashofo ho ont opia hi oke.

18. Ohoyo ak kia yvmmak oka hatak vt itapotakma isht ai unchuloli hv on asha hosh iba tvshkikma ita tuklot oka yupa hi oke, micha ik kashofo ho ont opia hi oke.

19. Micha ohoyo hosh yanvlli eshi cha haknip a yanvlli vt issish okma, nitak untuklo ila filvmmicha hi oke, mikma kvna hosh halelikmvt ik kashofo ho ont opia hi oke.

20. Mikma ila filvmmi ahanta hosh nana onvtola tuk moma kvt ik kashofo ka hi oke, micha nana on asha tuk moma kvt ik kashofo ka hi oke.

21. Mikma kvna hosh in topa ha halelikmvt i nafohka ya

achifa cha, oka yupa hi oke, micha ik kashofo h_o ont opia hi oke.

22. Mikma k_vna hosh nana ai on a_sha tuk a halelikmvt i nafohka ya achifa cha, oka yupa hi oke; micha ik kashofo h_o ont opia hi oke.

23. Micha in topa ha, keyukmvt nana h_o on a_sha tuk halelikmvt ik kashofo h_o ont opia hi oke.

24. Micha hatak nana hosh kaniohmit iba tvshki tuk osh issish vt on a_shakmvt nitak untuklo h_o ik kashofo ka hi oke; micha topa ai itola tuk moma kv_t ik kashofo ka hi oke.

25. Micha ohoyo hv_t issish i yanvlli kv_t ila filvmmmit ahanta nitak a nitak laua hosh atapakma, keyukmvt yanvlli kv_t ila filvmmmit ahanta nitak a ont iakma, ik im a kashofo yanvlli nitak moma kv_t ila filvmmi nitak ak inli h_o chohmashke; ik kashofo ka hi oke.

26. I yanvlli nitak moma hosh topa moma ai onvtola yvt ila filvmmi topa yak o in chohma hi oke, micha nana h_o on a_sha tukmvt ik kashofo kv_t ila filvmmmit ahanta kv_t ik kashofo yatuk ak o chohma hi oke.

27. Atuk o k_vna hosh nana yv_mma puta ka halelikmvt ik kashofo ka hi oke; micha i nafohka ya achifa cha oka yupa hi oke, micha ik kashofo h_o ont opia hi oke.

28. Amba i yanvlli tuk vt i kashofakma nitak untuklo h_o il im ahotehna hi oke; atuk i himmak a yo kashofa hi oke.

29. Atuk osh nitak ont isht untuchinakma pvchiyoshoba tuklo, keyukmvt pvchushi tuklo eshi cha naholitompa isht v_tta okla moma im vlhtipo okhissa yak o isht im ona hi oke.

30. Mikma naholitompa isht v_tta yvt achvfa ka nanashvchi im issa mak o, micha achvfa ka hukmit im issa mak o im issa hi oke; micha naholitompa isht v_tta yvt Chihowah itikba ik i kashofo yanvlli im a kashofa hi oke.

31. Yakohmichi hosh Israel im vlla vhleha ha ik im a kashofo ya hvsh i filvmmicha hi oke; yvmohmi h_o vm vlhtipo yvt im ai itin takla hikia ka litehli cha ik kashofot ik illo ka hi oke.

32. Ilvppak osh yanvlli ya ishi, micha isht ai unchuloli hvt kohcha tuk mvt ishit liteha tuk.

33. Micha ohoyo hvt hullo isht abeka, mikma hatak vt micha ohoyo hvt yanvlli ishi, micha ik kashofo yo iba tvshki tuk aiena ka i nan vlhpisa hoke, hvsh im achashke, im achi tok.

CHAPTA XVI.

MICHA Alon ushi tuklo hosh Chihowah itikba nan im issa cha illi, illi ha ya, Chihowah yvt Moses a im anumpuli tok.

2. Micha Chihowah yvt Moses a, Chitibapishi Alon a ish im anumpulashke. Yvmohmi ho aholitopa natakali anuka-ka aiombinilit i nukhaklo itikba, yvmvt itombi holitopa ontalaia ka nitak moma ik ono kashke. Yvmohmi hosh ik illo kashke; hoshonti anukaka yo ai ombinilit i nukhaklo paknaka ahaiaka la chi hoke.

3. Yakohmi hosh Alon vt aholitopa ka ya ona hi oke; nan ashvchi im issa mak o, wak hobvk himita, micha hukmit im issa mak o, chukfi nakni iesha hi oke.

4. Linen nafohka holitopa foyuka cha, obalafoka linen vt nipi alataiya hi oke, micha linen vskofvchi ya vskofvchikmvt, linen iahlipa ha ishit shema hi oke; ilvppa puta kvv nafohka holitopa hoke. Yvmohmi hoka nipi ya oka isht achifa cha ishit fohka hi oke.

5. Micha nan ashvchi im issa mak o issikosoma ya issikosomushi tuklo ho aiishi, micha hukmit im issa mak o, chukfi nakni achvfa ho Israel im vlla vhleha okla moma ka im esha hi oke.

6. Mikmvt nanashvchi im issa mak o Alon vt i wak hobvk o yvmvt ilap akinli mak o im issa cha, ilap, micha in chuka achvfa ya i kashoffa hi oke.

7. Micha issikosoma tuklo kash eshi cha, Chihowah itikba isht onvt okla moma im vlhtipo okhissa ya isht ona hi oke.

8. Micha Alon vt issikosoma tuklo ho nashoeli onocha

hi oke; nashoeli achvfa kvt Chihowah ak o immi hokma, nashoeli achvfa kvt issikosoma okchaya immi ha hi oke.

9. Micha Alon vt issikosoma Chihowah i nashoeli vt onvtola kash isht onvt nanashvchi im issa mak o im issa hi oke.

10. Amba issikosoma okchaya ya chi mak o nashoeli vt onvtola tuk a isht i kashofa chi hosh, micha issikosoma okchaya chi mak o yakni haiaka chvfficha chi kash okchaya ho Chihowah itikba isht ona hi oke.

11. Micha Alon vt nanashvchi im issa wak hobak ash yummvt ilap atuk mak o isht ona cha, ilap micha in chuka achvfa ya i kashoffa hi oke, micha ilap akinli nanashvchi im issa mak o wak hobak ash vba hi oke.

12. Micha alta yvt Chihowah itikba hikia ka tobaksi ai eshi cha, nabalama aivlhto ya alotoli cha, bout lapushki yo nabalama ya ibbak aloteli cha, natakali anuka ya isht onashke.

13. Micha na balama ya Chihowah itikba luak ai onocha hi oke; yvmohmi ho shobulli hoshonti kvt ai ombinilit i nukhaklo yummvt isht atokowa ontalaia ka ompoholma hi oke; yomohmi ho ik illo ka hi oke.

14. Micha wak hobvk ash im issish a ai ombinilit i nukhaklo hvshi akochaka pilla ka ibbak ushi isht o fimma hi oke; micha ai ombinilit i nukhaklo itikba ya issish ash untuklo ha ibbak ushi isht fimma hi oke.

15. Yohmikmvt nanashvchi im issa issikosoma yummvt okla hatuk mak o vbi cha, im issish a natakali anukaka isht onashke; micha issish yummakma wak hobvk im issish ishit yvmihchi tuk vt chohmicha hi oke, micha ai ombinilit i nukhaklo paknaka o fimmit micha ai ombinilit i nukhaklo itikba fimma hi oke.

16. Micha Islael im vlla vhleha hvt ik kashofa kak o micha nanashvchi moma ka yvmihchi tuk ak o aholitopa ya i kashoffa hi oke; micha ik a kashofa im itin takla ya okla moma im vlhtipo yvt hikia tuk a yvmihcha hi oke.

17. Micha okla moma im vlhtipo aholitopa ya kashofa chi hosh chukowakmvt, ilap micha in chuka achvfa, micha Is-

lael okla moma aiena ka kashoffi cha, ik kohcho kisha ka, hatak nana kia iksho ka hi oke.

18. Micha kohchvt Chihowah itikba alta hikia ka ona cha, yvmma kashoffa hi oke; micha wak hobvk issish micha issikosoma issish a ishi cha, alta lapish a lapalichit fullolecha hi oke.

19. Micha issish a untuklo ha ibbak ushi isht o fimmi cha, Israel im vlla vhleha ik a kashofo yatuk a kashoffit hullocha hi oke.

20. Atuk osh aholitopa, micha okla moma im vlhtipo, micha alta aiena ka kashoffit tahlikmvt issikosoma okchaya yash isht ona hi oke.

21. Micha Alon vt ibbak a ita tuklonchit issikosoma okchaya noshkobo ha isht umbitepa cha, Israel im vlla vhleha ik aivlhpeso, micha nanashvchi moma aiyoshcha chatuk moma ka anolit issikosoma noshkobo onochi cha, hatak ai vlhpesa ho ibbak fohkit yakni haiaka pit pila hi oke.

22. Mikma issikosoma yvt ai vlhpesa keyu moma shaiyalit yakni okla a binili keyu isht ona hi oke; mikma issikosoma ya yakni haiaka ya ont chvfficha hi oke.

23. Mikma Alon vt okla moma im vlhtipo ya ont chukowa cha, aholitopa chukowa chikmvt linen nafohka ishit fohka tuk vt shufi cha yvmmak inli ho bohla hi oke.

24. Micha nipi ya aholitopa ya oka isht ai achifa mvt, i nafohka ishit fohka cha, ilap hukmit im issa, micha okla hukmit im issa aiena ka im issa cha, ilap, micha okla aiena ka i kashoffa hi oke.

25. Micha nan ashvchi im issa nia ya alta onochit a hukma hi oke.

26. Mikma issikosoma okchaya mak o issikosoma chuffichi tuk vt i nafohka ya achifa cha oka yupi ha yosh binah ha ont chukowa hi oke.

27. Micha nanashvchi im issa mak o wak hobvk micha nanashvchi im issa mak o issikosoma, yvmma im issish o aholitopa ya kashoffa chi hosh isht chukowa kash, achvvt binah ha kohcha isht ona hi oke; micha hakshup, micha nipi, micha i yvlhki aiena ka luak itvchit hukma hi oke.

28. Micha hukmi tuk vt i nafohka ya achefakmut oka yu-
pi ha yosh binah ha ont chukowa hi oke.

29. Micha ilvppak osh hvchi nan vlhpisa bilia ya chi ho-
ke. Hvshi isht untuklo, hvshi talali tuk nitak ont ishit po-
kolikma, hvchi yakni ai achvfa hokma, keyukmut okla inla
yosh hvchi takla anta tuk okma, nana kia aienvt hvchi shi-
lombish a hvsh ilbvshali cha natoksuli nana kia hvsh yvmih-
cha he keyu hoke.

30. Nitak yummak o naholitompa isht vtta yvt Chihowah
itikba ya na hvsh aiashvchi moma a hvchi kasoffi na hvchi
kashofa chi ho hvchi kashoffa hi oke.

31. Nitak hollo afoha hvchi nitak a hi oke: mikma nan
vlhpisa bilia ya hvchi shilombish a hvsh ilbvshala hi oke.

32. Micha naholitompa isht vtta yvt naholitompa isht ai
vtta ya iki ya vlhtobvt isht vtta chi ho nana ahvmmi tuk,
micha hullochi mihi yosh i kashoffa hi oke, micha linen na-
fohka, nafohka holitopa fehna ka foyuhka hi oke.

33. Micha aboha holitopa ya i kashoffa hi oke, micha ok-
la moma im vlhtipo, micha alta aiena ka i kashoffa hi oke;
micha naholitompa isht asha ya, micha okla moma ka i ka-
shoffa hi oke.

34. Micha ilvppak osh afvmmikma himmona ha Israel im
vlla vhleha nanashvchi moma ka i kashofa he vt hvchi nan
vlhpisa bilia ya chi hoke, ish im achashke, achi tok. Mih-
ma Chihowah yvt Moses a ai i miha tuk mak o yvmih-
chi tok.

CHAPTA XVII.

MICHA Chihowah yvt Moses a im anumpulit,
2. Alon, micha ushi vhleha, micha Israel im vlla
vhleha moma aiena im anumpulit, Nana ilvppak o Chiho-
wah yvt anumpulit,

3. Hatak kvna hosh Israel in chuka achvfa ya ai achvfa
yosh wak hobvk, keyukmut chukfushi, keyukmut issikosoma
ya binah ha ai vbi, keyukmut binah ha kocha ai vbi.

4. Atuk osh okla moma im vlhtipo okhissa isht onvt Chi-

howah im issa mak o Chihowah im vlhtipo itikba ya ont ik im ai issokmvt hatak yumma issish vt onvtola hi oke; issish hlatvbli tuk oke, micha hatak yummvt im okla im ai itin takla ya fiopa tupa hi oke.

5. Yumohmi ho Israel im vlla vhleha hvv vbit im issa ya oktak ashahbi ai im issa Chihowah ya isht im onvt okla moma im vlhtipo okhissa ya isht onvt, naholitompa isht vta ya isht im ona cha itin nanaiyvchi im issa mak o Chihowah im issa hi oke.

6. Mikma na holitompa isht vta yvt issish a Chihowah im alta okla moma im vlhtipo okhissa hikia ka o fimma hi oke, micha Chihowah i balama achukma mak o nia ya hukma hi oke.

7. Micha himak pilla ma nan isht ahullo okpulo puta, yummak o havi tovt iakaiya tuk vt vbit im issa he keyu hoke: Ilvppak osh im ai itishali hlopulli ka i nan vhpisa bilia ya chi hoke.

8. Mikma Israel in chuka achvfa ya, keyukmvt okla inla yosh hvchi takla ahanta yosh hatak nana hosh hukmit im issa, keyukmvt vbit im issa yo im issa,

9. Micha Chihowah im issa chi kvv okla moma im vlhtipo okhissa ya isht ik onokmvt, hatak yummvt im okla im ai itin takla ya fiopa tupa hi oke.

10. Micha hatak nana hosh Israel in chuka achvfa ya ai achvfa hokma, keyukmvt okla inla yosh hvchim aitin takla ahanta hokma, nana hosh issish kaniohmi nana kia vpakma; issish vpa tuk hatak shilombish yumma sa nashuka ya isht a sanalichi la chi, micha im okla im ai itin takla ya fiopa tubli la hi oke.

11. Nipi aiokchaya yvt issish ak oka; atuk o hvchimi shilombish isht a kashofa chi ho alta onochit hvch ima li tuk oke, issish ak okvt hatak shilombish a i kashoffi hoka.

12. Yumohmi hatuk o Israel im vlla vhleha ha Hatak hvsh achvfa kia, issish a hvshpa he keyu, micha okla inla yvsh hvchitin takla ahanta kvv issish vpa he keyu, achi li tuk oke.

13. Micha hatak kvna hosh Israel in chuka achvfa ya

ai achvfa yosh, keyukmut okla inla hvchitin takla ahanta yosh owutta tuk osh nampoā, keyukmut vba hushi kia vpa hinla vlhpesa ka ishikmut, issish a aka hlatubli cha, lukfi pushi isht ompohoma hi oke.

14. Na nipi moma isht ai okchaya yoka issish ak osh ymma isht ai okchaya yoke: Yvmohmi hatuk o Israel im vlla vhleha ha, Nipi kaniohmi nana kia issish a hvshpa he keyushke, achi li tuk oke. Na nipi moma isht ai okchaya yvt issish ak oka, kva hosh vpakmut fiopa tupa hi oke.

15. Micha hatak nana hosh (hvchi yakni aiachvfa yokma, keyukmut okla inla yokma nana hosh) ilap akinli hosh illi, keyukmut nana hosh vbi tuk o vpa tukmut i nafohka ya achifa mut, oka yupi cha ik kashof ho ont opia hi oke: yohmi hosh kashofa hi oke.

16. Amba ik achifo, micha ik yupokmut nanashvchi vt onvtoyula hi oke, ish im achashke, achi tok.

CHAPTA XVIII.

MICHA Chihowah yvt Moses a im anumpulit,

2. Israel im vlla vhleha ha ish im anumpulit, vno ak osh Chitokaka hvchin Chihowah sia hoke, ish im achashke.

3. Echip yakni aiasha, ymma hvsh aiasha tuk, ymmut nana a kaniohmi ya hobachit hvsh yvmihcha he keyushke; micha Kenan yakni hvch isht ona la chi ymma asha kvv nana yvmohmi ya hobachit hvsh yvmohma he keyu hoke, micha i nan vlhpisa ka im anti vt hvsh nohwa he keyu.

4. Um aivlhpesa micha nan isht apesali, puta ka hvsh yvmihchi cha, a nan vlhpisa ha holitoblit hvsh foyuka hi oke; Chitokaka hvchin Chihowah sia hoke.

5. Yvmohmi hoka a nanvlhpisa, micha a nanvlhpisa aivlhpisa ak o hvsh yvmihcha hi oke; ymmak o hatak vt yvmihchi hokmak osh aiokchaya hi oke: Chihowah sia hoke.

6. Hvsh achvfa kia i kanohmi ha, nipi bano ho i wakkmma chi hosh bilika hvch ik ono kashke; Chihowah sia hoke.

7. Chiki nipi bano ya, keyukmut chishki nipi bano ya chiki wakummo kashke; chishki yoka, nipi bano ya ish i wakumma he keyu hoke.

8. Chiki tekchi nipi bano ya ishi wakumma he keyu hoke; chiki nipi bano yoke.

9. Chin tek chiki ya ushetik, keyukmut chishki ya ushetik, chuka ak inli ho keyukmut yakni inla ai itola tok okma nana kia nipi bano ya ish i wakumma he keyu hoke.

10. Chiso ha ushetik, keyukmut chiso tek a ushetik nipi bano ya ish i wakumma he keyu hoke: yummak osh chi nipi bano ash inli hoka.

11. Chiki tekchi ushetik, chiki vt tobachi tuk (chin tek oka) nipi bano ya ishi wakumma he keyu hoke.

12. Chiki in tek nipi bano ya ishi wakumma he keyu hoke. Yummut chiki ya i kanohmi fehna ohoyo hoke.

13. Chishki itibapishi nipi bano ya ishi wakumma he keyu, chishki ya i kanohmi fehna ohoyo hoka.

14. Chiki itibapishi ha nipi bano ya ishi wakumma he keyutekchi ya ish apota he keyu: chi hukni yoka.

15. Chipok nipi bano ya ishi wakumma he keyu, chiso ha tekchi yoke; nipi bano ya ishi wakumma he keyu hoke.

16. Chitibapishi tekchi nipi bano ya ishi wakumma he keyu, chitibapishi nipi bano yoke.

17. Ohoyo ha micha ushetik a nipi bano ya ishi wakumma he keyu; micha ushi ya ushetik, keyukmut ushetik a ushetik a ishit nipi bano ya ish i wakumma he keyu, i kanomi fehna ohoyo hoka: na haksi yoke.

18. Micha itibapishi hvt okchaya moma ka ohoyo ishit itaienvchit nipi bano ya wakummit chukvsh a ish okpuna he keyu hoke.

19. Micha ohoyo hvt ik kashofu ho naksika binilechi tuk a nipi bano ya i wakumma chi hosh bilika ish ona he keyu hoke.

20. Micha chin chuka a bilika hatak tekchi ya apotvt isht ish ile litehla he keyu hoke.

21. Micha chim isht atiaka ya luak hlopullichit Molek a

ish im onacha he keyu; micha chin Chitokaka hohchifo ha chik ahobalecho kashke; Chihowah sia hoke.

22. Hatak bika ya ohoyo chohmichit chik iba tushko kashke; nan isht yuwala yoke.

23. Michā nan v̄lhpoa nana kia iba tushkit isht ish ile litehla he keyu; micha ohoyo k̄vna kia nan v̄lhpoa ya tushka ch̄i hosh itikba hikia he keyu hoke; itaiyokoma hoke.

24. Nana ilv̄ppa puta nana kia isht h̄vchik ile litehla kashke; ilv̄ppa puta kak o oklushi puta h̄vchi tikba akocha wehli li tuk vt isht ile litehli tuk oka.

25. Mikma yakni vt liteha hoke; yvmohmi kak o nan ash̄vchi tuk ak o im aya hi oke; mihma yakni oh kia okla ha hoetvt kohchi hoke.

26. Yvmohmi hoka, a nanv̄lh̄pisa puta, micha nan v̄lhpesa apih̄isali puta ka h̄vsh yvmihchi cha nan isht yuwala ilv̄ppa kanima kia h̄vchik yvmihcho kashke; h̄vchim ai okla akinli, keyukm̄vt okla inla yosh h̄vchi takla ahanta kanima kia h̄vchik yvmihcho kashke.

27. Nan isht yuwala ilv̄ppa moma kak o yakni ya hatak v̄hleha h̄vchi tikba aiasha tuk vt yvmihchi ho yakni vt liteha tuk oke.

28. Yvmohmi ho oklushi puta h̄vchi tikba aiasha tuk a hoetvt kohchi tuk vt yakni vt h̄vchishno ak kia hoetvt ik h̄vchi kohcho kashke.

29. Nan isht yuwala ilv̄ppa puta kanima ka k̄vna hosh yvmihchikm̄vt ymma yvmihchi tuk sh̄ilombish vt im okla im ai itin takla ya akohchvt fiopa t̄upa hi oke.

30. Yvmohmi hoka a nanv̄lh̄pisa ya h̄vsh holitobli hosh nan isht yuwala puta h̄vchi tikba aiasha tuk vt yvmihchi tok ach̄vfa nana kia h̄vchik yvmihcho kashke, micha yvmak o isht h̄vchik ile litehlo kashke: Chitokaka h̄vchin Chihowah sia hoke, ish im achashke, im achi tok.

CHAPTA XIX.

MICHA Chihowah yvt Moses a im anumpulit,
 2. Israel im vlla vhleha okla moma ka im anumpulit,
 Nan ashvchi ik hvchim iksho kashke: Chitokaka hvchin
 Chihowah sia hvv nanashvchi ik svv iksho hoka.

3. Hatak hvsh puyuta kvv hvchishki, micha hvchiki
 aiena ka hvsh i nukwia cha, a nitak hollo ya hvsh holitob-
 lashke: Chitokaka hvchin Chihowah sia hoke.

4. Fullotvt na holbut toba ya hvchik im ono kashke;
 micha bilvt akmot na holbut toba hvch ik ikbo kashke: Chi-
 tokaka hvchin Chihowah sia hoke.

5. Micha vbit im issa ya itin nanaiyvchi im issa yo Chito-
 kaka hvsh im issakmvt, hvchishno hvchim anukfila hosh
 hvsh im issa hi oke.

6. Hvsh im issa i nitak akinli, micha im onna aiena kak
 o hvshpa hi oke; atuk o kaniohmi kvv nitak ont atuchina
 ka ashakmvt luak ishit hukma hi oke.

7. Micha nitak ont atuchina ka kaniohmi ka vvakma nan
 isht yuwala yoke; aiokpvcha he keyu hoke.

8. Yvmohmi hoka kvna hosh vvakmvt nanashvchi tuk
 vt onvtonla hi oke; Chihowah i nahullochi ya ik ahobalo
 hoka; micha shilombish yvmvvt im okla im aiitin takla
 akohchvt fiopa tupa hi oke.

9. Micha hvchi yakni nana awaya hvshmokmvt, hvchim
 osapa chukbi puta ka vmohmichit hvshma he keyu hoke;
 micha hvsh ai vmo yvt vlvullit hvsh ai vma he keyu
 hoke.

10. Pakvpi hvchim ahollokchi a hvsh vlvulla he keyu;
 micha pakvpi hvchim ahollokchi yash paki ya mominchit
 hvsh ai vma he keyu hoke; ilbvsha micha okla inla aiena
 ka hvsh im ashacha hi oke; Chitokaka hvchin Chihowah sia
 hoke.

11. Hvsh hukopa he keyu, micha hvsh haksicha he keyu,
 micha hvsh iti holaba he keyu hoke.

12. Micha ahli keyu ka sa hochifot anumpa kvllo hvsh

anumpula he keyu; micha chin Chitokaka hohchifo ha ik ahobalot chik hochifo kashke: Chihowah sia hoke.

13. Chin chuka bilika hatak a ish haksicha he keyu; micha ish wehpula he keyu; hatak ilhtono vt asitubi tuk vt chin tonla na ik onno kashke.

14. Ik haponaklo ya anumpa okpulo isht chik mihacho kashke, micha niskin lpa ya isht ibetvbli itikba chik bohlo hosh, amba chin Chihowah ya ish i nukwiashke: Chitokaka sia hoke.

15. Nanapesa ka ai vlhpesa keyu ya ish yvmihcha he keyu; hatak ilvrsha nipi ya ish holitobla he keyu; micha hatak holitopa annoa ya ish holitobla he keyu hoke: amba aivlhpiesa ho chin chuka bilika hatak a ish im apesa hi oke.

16. Chim okla itin takla ya nan anoli yosh chuka abaiyvt ish aya he keyu; micha chin chuka bilika hatak im issish a i sanalit ish hikia he keyu hoke: Chitokaka sia hoke.

17. Chitibapishi ha chi chukvsh a ish i nukkillla he keyu hoke; ik kaniohmi kia chin chuka a bilika hatak a ish im anumpula hi oke, micha nanashvchi vt ik onvtonla; ish ahna he keyushke.

18. Chim okla vlla vhleha ha hvsh il aiokha, he keyu; micha hvsh i potvna he keyu; amba chin chuka a bilika hatak a hvsh holitobli kvv chishno akinli ish chohmichashke: Chitokaka sia hoke.

19. A nanvlhpisa ha hvsh holitoblashke. Chi nan vlhpoa ya ilaiyukalichit ish itim ai ikbicha he keyu hoke: Chim osapa ya na nihi itaiyoma yo ish ahokcha he keyu hoke: micha linen micha chukfi hishi itaiyoma nafohka ya ish foyuka he keyu hoke.

20. Micha kvna hosh yuka ohoyo yosh hatak im vlhpoa, micha falvmminchit chumpa tok keyu, micha yuka issa ima tok keyu ho iba tvshki tuk ma fuma hi oke; yuka issa keyu yatuk oka illit okla he keyu hoke.

21. Mikma vbanvbli im issa ya Chihowah isht im onvt, vbanvblit im issa mak o, chukfi nakni yo okla moma im vlhti-po okhissa ya isht ona hi oke

22. Mikma na holitompa isht vta yvt nanashvchi yvmihchi

kash chukfi nakni yash o Chihowah itikba ya isht im ai i kashoffa hi oke; mikma nanashvchi yvmihchi tuk vt i kashofa hi oke.

23. Atuk o yakni ya hvsh onakmut ilhpak achī hō iti puta hvsh hokchi tukmut wayakma, hakshup ik tapo hvsh itapesa hi oke: afvmmi tuchina kak osh hakshup ik tupo yō hvchī chohma hi oke: ai vpa he keyu hoke.

24. Amba afvmmi ont ai ushta hokma waya moma kv̄t holitopa hō Chihowah isht holitoblichā hi oke.

25. Atuk osh afvmmi ont ishit tahlapi kak o waya ka hvsh ai vpa hi oke: yvmohmi hō hvchī wāhaya hi oke: hvchin Chitokaka Chihowah sia hoke.

26. Nana hoh kia issish aieninchit hvshpa he keyu hoke; micha nan isht yushpakvmmi ya hvsh yvmihcha he keyu, micha nitak hvsh apestikela he keyu hoke.

27. Hvchi noshkobo chukbi pashi ya vmot hvchik apakfoblichō kashke, micha hvchi nutakhish chukbi ya hvchik okpano kashke.

28. Illi ak atuk o hvchi nipi ya hvsh ile bvshla he keyu, micha in chuwa ya hvsh ile yvmihcha he keyu hoke: Chihowah sia hoke.

29. Chisotek a havi ikbicha chī hosh chik kancho kashke, yvmohmi hō yakni vt havi toba bieka, mikmut yakni vt nahaksi ho isht alotowa hi oke.

30. A nitak hullo ya hvsh holitobli cha vm aboha holitopa ya hvsh holitoblashke: Chihowah sia hoke.

31. Shilombish okpulo ai itim achvfa ya hvchik ahnincho kashke; micha isht ahullo, yvmma isht hvchi liteha chī ka hvchik im asilhho kashke: hvchin Chitokaka Chihowah sia hoke.

32. Hatak noshkobo tohbi yō itikba ya ish wakaiyashke; micha hatak sipokni nashuka ya ish holitoblashke; micha chin Chitokaka ya ish i nukwī yashke: Chihowah sia hoke.

33. Micha okla inla yosh hvchi takla hvchī yakni ahanta tuk a apistikelit chukvsh hvsh okpvna he keyu hoke.

34. Amba okla inla yosh hvchi takla ahanta kv̄t hvchim ai itin takla ai vta tuk akinli hō hvchin chohmashke, mikma

huch i holitopa kut huchishno akinli huchin chohmashke; okla inla yosh Echip yakni ya hvsh ai asha tuk oka; huchin Chitokaka Chihowah sia hoke.

35. Nan apesa, isht vlhpisa, ishit weki, keyukmut ai vlhpisa yoh kia, ik ai vlhpeso nana ho hvsh yvmihcha he keyu hoke.

36. Aweki aivlhpesa, micha isht weki aivlhpesa, efah aivlhpesa, micha hin aivlhpesa hosh huchim asha hi oke. Huchin Chitokaka Chihowah sia hosh Echip yakni ya apehlichit hvchi kohchi li tok oke.

37. Yvmohmi hoka a nanvlhpisa, micha vm aivlhpesa yvmihchi ak o ithanvt hvsh yvmihchashke Chihowah: sia hoke, ish im achashke, achi tok.

CHAPTA XX.

MICHA Chihowah yvt Moses a im anumpulit,
2. Anonti Israel im vlla vhleha ha im anumpulit, Kuna hosh Israel im vlla vhleha hosh, keyukmut okla inla Israel takla vta yosh im isht atiaka yo Molek a imakmut illi pulla hi oke, yakni yash okla hv teli ishit bola hi oke.

3. Mikma hatak ymma sa nashuka ya isht i sanali lish im okla ai itin takla ya a kohchit ishit kanchi la hi oke; vm aboha holitopa ya litehla chi hosh micha sa hohchifo holitopa ik ahobalo ka chi hosh im isht atiaka yo Molek a ima hoka.

4. Micha yakni ya okla hv hatak vt im ishtatia ka ya Molek a ima ho pisa kia kaniohmit nishkin luhmi cha ikbo tuk ma,

5. Yvmohmikma hatak ymma, micha in chuka achvfa ya, micha Molek iti haua chi hosh huit iakaiya moma ka, sa nashuka isht i sanali lish, im okla im ai itin takla ya kohchit fiopa tvbli la hi oke.

6. Micha shilombish kuna hosh fullotvt shilombish okpulo itim aiachvfa micha isht a hullo ya iakaiyvt huit iakaiyak-

ma, shilombish y^umma sa nashuka isht i sanali lish, im okla im ai itin takla ya kohchit fiopa tubli la hi oke.

7. Y^umohmi hoka, h^ush ile hullochi cha h^uchi holitopashke; h^uchin Chitokaka Chihowah sia hoke.

8. Atuk o a nanvlhpisa ha h^ush holitobli cha h^ush y^umihchashke. Chihowah sia hosh h^uchi hullochi li hoke.

9. K^una hosh i^uki, keyukmvt ishki ya kallakshichit anum-pulikmvt illi pulla hi oke; i^uki, keyukmvt ishki ya kallakshichit anumpuli hoka; yohmi ka im issish vt ilap ak inli ka onvtoyula hi oke.

10. Micha k^una hosh hatak tekchi yo itin lumaka tuk, chuka a bilika hatak tekchi itin lumaka yash itin lumaka hatak, micha itin lumaka ohoyo aiena kv^t illi pulla hi oke.

11. Micha hatak vt i^uki tekchi ya iba tvshki tuk vt i^uki nipi bano ya wakvmmi tuk oka, ita tuklot illi pulla hi oke; im issish vt ilap ak o onvtonla hi oke.

12. Micha hatak osh ipok a iba tvshkikmvt ita tuklot illi pulla hi oke; itaiyokomachi hokvt; im issish vt ilap akinli hosh onvtoyula hi oke.

13. Micha hatak vt hatak bika iba tvshkit ohoyo iba tvshki ka chohmikmvt, ita tuklot nan isht yuwala ya y^umihchi hokvt, illi pulla hi oke; im issish vt ilap akinli hosh onvtola hi oke.

14. Micha hatak osh ohoyo ha micha ishki ya aieninchit ishikmvt haksi yoke; y^umma micha ita tuklo ka aienvt luak ishit lua hi oke: y^umohmi ho h^uchitin takla ya haksi kv^t iksho kashke.

15. Micha hatak osh nan vlhpoa iba tvshkikmvt illi pulla hi oke; mikma nanvlhpoa ya h^ushbi pulla hi oke.

16. Micha ohoyo hosh nanvlhpoa bilika onvt nanvlhpoa in tushkikma, ohoyo hash micha nanvlhpoa aieninchit h^ush ba hi oke: illit okla pulla hi oke; im issish vt onvtuyula hi oke.

17. Micha hatak vt in tek a i^uki ushetik a, keyukmvt ishki ushetik a ishi cha nipi bano ka pisa, micha ilap a nipi bano ka pisakma nahaksi yoke: im okla itikba ya fiopa tvpvt okla

hi oke: in tek nipi bano ya wakummi tuk oka, nanashvchi vt onvtola hi oke.

18. Micha hatak osh ohoyo abeka yo iba tvshki cha nipi bano ya wakummikmt, im a yanvlli ya pisa hoka, mikma ohoyo hvt im issish a yanvlli wakummi hoka ita tuklot im okla im ai itin takla issvt fiopa tvpvt okla hi oke.

19. Micha chishki itibapishi micha chiki in tek nipi bano ya ish wakumma he keyu; i kanomi fehna ya i wakummi hoka: nanashvchi vt onvtonla hi oke.

20. Micha hatak osh imoshi tekchi ya iba tvslikikmt imoshi nipi bano ya wakummi hoka, nanashvchi vt onvtonla hi oke; vlla ik im iksho hosh illit okla hi oke.

21. Micha hatak osh itibapishi tekchi ya ishikma, nan ikkashofo yoke: itibapishi nipi bano ya wakummi hoke, vlla ik im iksho hosh illit okla hi oke.

22. Yvmohmi hoka, a nanvlhpisa moma, micha vm aivlhpesa yvmihchi aiena ka hvsh holitobli cha, hvsh yvmihchashke; yvmohmi hosh yakni hvsh aiasha chi ka hvchisht ona la chi kvv hoetvt ik hvchi kohcho kashke.

23. Hvchi tikba a kanchi li tok oklushi vt nana akaniohmi ya hvsh aya he keyu hoke, nana ilvppa puta kak o yvmihchi chatuk, yvmohmi hatuk o shitilema li tuk oke.

24. Yvmohmi tuk kia I yakni ya hvsh aiasha hi oke, hvchim achi li hatuk, atuk osh yakni pishukchi micha foibila aiyanahanli ya hvsh aiasha chi ho hvchima la chi hoke; hvchin Chitokaka Chihowah sia hosh okla inla ya hvch iti filvmmichi li tuk oke.

25. Yvmohmi hoka, nanvlhpoa kashofa, micha ik kashofo, micha hushi ik kashofo, micha kashofa puta ka hvsh itim invcha hi oke; yohmi ka nanvlhpoa, keyukmt hushi, keyukmt nan okchaya kaniohmi yosh yakni om balahanli, yvmmak o ik kashofo apesvt hvchi filvmmichi li tuk a hvchi shilombish a ishit yuwala yo ishit hvchi ikbo kashke.

26. Micha hvs svm i holitopa hi oke; Chihowah sia hvt sa holitopa hosh vmmi hvchia ha chi ho okla inla ya ile hvchi filvmmichi li tuk oke.

27. Micha hatak osh, keyukmt ohoyo hosh shilombish

okpulo ai itibai achufa, keyukmut isht a hullo vt illi pulla hi oke; twli yo ishit bola hi oke; im issish vt ilap ak o onv-tonla hi oke, ish im achashke, achi tok.

CHAPTA XXI.

MICHA Chihowah yvt Moses a im anumpulit, Na holi-tompa isht asha Alon ushi vhleha ha im anumpulit, Kanima kia im okla ai illi ya ishit liteha he keyu.

2. Amba i kanomi hosh i kanomi fehna, ishki, micha iki micha ushi, micha ushetik micha itibapishi,

3. Micha in tek osh hatak haleli keyu, i kanomi fehna yosh i hatak iksho chatuk, yvmmak okvno liteha hinla hoke.

4. Yohmi kia im okla im ai itin takla ya hatak i shahli yatuk okvt, ile litehlit ik ile holitoblo kashke.

5. Noshkobo ha yushmilali ikba he keyu, micha nutakhish chukbika ya shafa he keyu, micha nipi ya ile bvshla he keyu hoke.

6. In Chitokaka ya i holitopa cha, i Chitokaka hohchifo ha ik ahobalecho kashke; luak ishit hukmit Chihowah im issa, micha in Chitokaka i pvka yo im issa hokvt; yvmohmi hokvt holitopa hi oke.

7. Haui ya, keyukmut ik ahobo ohoyo ha ik esho kashke, micha i hatak vt kanchi tok ohoyo ha isha he keyu hoke; in Chitokaka i holitopa hoka.

8. Yvmohmi hoka chin Chitokaka i pvka im issa hoka ish hullocha hi oke; chi holitopa hi oke; hvchi hullochili tuk Chihowah sia hut sa holitopa hoka.

9. Micha naholitompa isht vta ushetik osh haut anta cha ik ilahobalo tuk mut, iki ya ik ahobalo hoke: luak ishit lua hi oke.

10. Mikma itibapishi vhleha im ai itin takla ya naholitompa isht vta i shahli, noshkobo ha isht ahama bila yvt on hlatapa tok, micha nafohka ya fohka chi ho hullochi tok vt noshkobo ompohomo ya shufa he keyu, micha i nafohka ya hlilvffa he keyu hoke.

11. Micha haknip illi ya iba chukowa he keyu, micha iki, keyukmut ishki yatuk ok mak o ile litehla he keyu hoke.

12. Micha aboha holitopa ya kohcha he keyu, micha in Chitokaka im aboha holitopa ya ik ahobalo ka he keyu hoke; in Chitokaka isht im ahama bila isht a holitopa yvt onv-tonla hokvt; Chihowah sia hoke.

13. Micha hatak ik halelo yo ohoyo ha isha hi oke.

14. I hatak illi, keyukmut i hatak vt kanchi, keyukmut ik ahobo, keyukmut haui aiena ka isha he keyu, amba ilap im okla akinli hatak haleli keyu ho ohoyo isha hi oke.

15. Micha im okla im ai itin takla ya im isht atiaka ya ik ahobalecho kashke: Chihowah sia hosh hullochi li hoke, ish im achashke, im achi tok.

16. Mihma Chihowah yvt Moses a im anumpulit,

17. Alon a im anumpulit, Kvna hosh chim isht atiaka yosh im ai iti shali ha anta kvt ik im ai ono vt ashakmut in Chitokaka i pvka ya im issa chi hosh bilika ik ono kashke, ai vla he keyu;

18. Hatak nishkin lupa, keyukmut iyimomokpulo, keyukmut ibechulo latvssa, keyukmut nana hoh kia isht atampa,

19. Keyukmut hatak osh iyi kobafa, keyukmut ibbak kobafa,

20. Keyukmut nvli kofona, keyukmut hofanti ik ono, keyukmut nishkin okpulo, keyukmut nutak balakchi hlachowa, keyukmut hlachowa ik vtto, keyukmut i nihi kvhla hatak nana kia ai okpuloka im asha kvto bilika ona he keyu hoke.

21. Hatak nana hosh naholitompa isht vta Alon isht atia-ka yosh ai okpuloka im asha kvt luak ishit hukmit Chihowah im issa ya bilika onvt im issa he keyu hoke: aiokpuloka im asha hoke; bilika onvt in Chitokaka i pvka ya im issa he keyu hoke.

22. In Chitokaka i pvka holitopa i shahli, micha holitopa aiena ka vpa hi oke.

23. Aiokpuloka im asha hokvt, peh chukowvt natakali ya onvt alta ya bilika ona he keyu hoke; yvmohmi hosh vm

aboha holitopa ya ik ahobalo kashke : Chihowah sia hosh hullochi li hoka, ish im achashke, achi tok.

24. Mihma Moses vt Alon micha ushi vhleha, micha Israel im vlla vhleha moma ka im anoli tok.

CHAPTA XXII.

MICHA Chihowah yvt Moses a im anumpulit,
2. Alon micha ushi vhleha ha aiena ka ish im anum-puli na, Israel im vlla vhleha nan im aholitopa ya ai i filvmmi cha, nana a hullochi tuk a sa hohchifo ha isht ik ahobalo kashke : Chihowah sia hoke.

3. Hvchim isht atia moma ka kvna hosh hvchim ai iti shali ha anta kut ik im akashofu vt onvtonla hosh nana holitopa Israel im vlla vhleha hv Chihowah ya i hullochi cha tuk a bilika onakmut sa tikba ai i filvmmi fiopa tupa hi oke ; Chihowah sia hoke.

4. Hatak nana hosh Alon ushi yosh lepa, keyukmut i yahananli vt ik kashofu kisha na, naholitopa ya ai vpa he keyu hoke. Micha kvna hosh nan illi isht ik kashofu, keyukmut im isht ai unchuloli vt i kohcha tuk o halelikmut,

5. Keyukmut kvna hosh na balvli nana ho ik kashofu ishit toba tuk, keyukmut hatak osh ik a kashofu kaniohmi ho im aiesha hinla aiena ho haleli tuk,

6. Shilombish osh ilvppa chohmi kanima ho haleli tuk mut, ik kashofu ho ont opia cha, nipi ya oka isht ik achifo kisha kut naholitopa ya ai vpa he keyu hoke.

7. Atuk osh hvshi vt okatulakma kashofa hi oke, micha im ilhpak atuk okvt i himmak a yano naholitopa ya ai vpa hi oke.

8. Ilap akinlit illi tuk, micha nampoahosh vbi tuk a vput isht ile litehla he keyu hoke, Chihowah sia hoke.

9. Yvmohmi hoka, a nan vlpisa ya holitoblashke, ik ahobalot nan ashvchi isht onvtoyula cha, illi nah : Chihowah sia hosh hullochi lishke.

10. Okla inla nana hosh naholitopa ya vpa he keyu hoke :

naholitompa isht vtta i nowrt aya, micha tishu ilhtono aiena kv̄t naholitopa ya vpa he keyu.

11. Amba naholitompa isht vtta yvt shilombish o i tvli holisso ishit chumpa tuk vt ai vpa hi oke : micha in chuka ya ai vtta tok aiena kv̄t im ilhpak a okla ai vpa hi oke.

12. Naholitompa isht vtta ushetik vt okla inla yo auwayak-mvt naholitopa im issa ya ai vpa he keyu hoke.

13. Amba naholitompa isht vtta ushetik vt i hatak illi, keyukmvt kanchi tuk o vlla ik im iksho yosh falamvt iki in chuka onakmvt himita tok o chohmit iki im ilhpak a vpa hi oke ; yohmi kia okla inla nana hosh vpa he keyu hoke.

14. Micha⁵hatak vt ik ithano hosh naholitopa ya vpakmvt, kashapa ont ishit tahlapi ya ibafoka cha, naholitopa aienin-chit naholitompa isht vtta ya ima hi oke.

15. Micha Israel im vlla vhleha hv̄t naholitopa Chihowah im issa tuk a ik ahobalo kashke.

16. Micha naholitopa ya vpa cha, vbanvbli nan ashvchi vt ik onvtonlá, ik ahno kashke : Chihowah sia hosh hullochi li hoka, ish im achashke, achi tok.

17. Micha Chihowah yvt Moses a im anumpulit,

18. Alon, micha ushi vhleha ha micha Israel im vlla vhleha moma aiena ka im anumpulit, Israel in chuka achvfa ya, keyukmvt okla inla yosh Israel a asha kv̄t hatak kv̄na hosh anumpa kv̄llo il onochi tuk moma isht aiokpv̄chi im issakmvt, micha hukmit im issa nana ho ilap ahnit im issa ya Chihowah im issakmvt :

19. Hv̄chishno, hv̄sh ahni hosh nakni yosh aiokpuloka iksho wak, keyukma chukfi kia micha issi kosoma aiena ho hv̄sh im issashke.

20. Amba nana hosh aiokpuloka im ashakma hv̄sh im issa he keyu hoke : hv̄chim aiokpv̄cha he keyu hoka.

21. Micha kv̄na hosh anumpa kv̄llo il onochi tuk vt aia-hlichā chī hosh itin naniyv̄chi im issa mak o vbit im issa, keyukmvt ilap ahni hosh, wak okmá keyukmvt chukfi yok-má nana im issa mak o Chihowah im issakmvt aiokpv̄cha chī ka ik ai ono vt iksho ka hi oke.

22. Niskin lupa, keyukmvt kobafa, keyukmvt imomokpu-

lo, keyukmvt shatali im asha, keyukmvt nutak balakchi, keyukmvt hlachowa aiena ka Chihowah hvsh im issa he keyu, micha alta onochit luak ishit hukmit Chihowah hvsh im issa he keyu hoke.

23. Wak hobvk osh, keyukmvt chukfushi yosh i nana ho isht atapa, keyukmvt isht ik ono ya ilap ahnit ish im issa hinla hoke; amba anumpa kvlo il onochi atuk ano aiokpvcha he keyu hoke.

24. Litowa keyukmvt kvhla, keyukmvt kobafa, keyukmvt bvsha aiena ka Chihowah hvsh im issa he keyu hoke; micha hvchi yakni ya hvsh ai im issa he keyu hoke.

25. Micha okla inla ibbak foyuka ho ilvppa kanima ka hvchin Chitokaka i pvska ya hvsh im issa he keyu hoke; im a liteha yvt foka, micha aiokpuloka yvt foka hoka, hvch im aiokpvcha he keyu hoke; ish im achashke, achi tok.

26. Micha Chihowah yvt Moses a im anumpulit,

27. Wak hobvk, keyukmvt chukfi, keyukmvt issi kosoma yo isht ona hokma, nitak untuklo ho ishki ya im anta ha hi oke; nitak isht untuchina ai vhlit ia hokvno luak ishit hukmit Chihowah im issa yo aiokpvcha hi oke.

28. Micha wak tek okma, chukfi tek okma nana kia nitak achafa it aieninchit hvshba he keyu hoke.

29. Micha yakoke ahnit ima, vbit im issa yo Chihowah ya hvsh im issakmvt, hvchishno hvsh aiahni hosh hvsh im issashke.

30. Mih nitak akinli ho vpvvt taha hi oke, hvsh ashanchi na ont onna he keyu: Chihowah sia hoke.

31. Yvmohmi hoka vm anumpa vhpisa ha hvsh holitobli cha, hvsh yvmihcha hi oke; Chihowah sia hoke.

32. Micha sa hohchifo holitopa ka hvch ik ahobalo ka he keyu; amba Israel im vlla vhleha im ai itin takla ya sa holitopa hi oke; Chihowah sia hosh hvchi hullochi lishke.

33. Hvchin Chihowah sia ha chi hosh Echip yakni ya pehlichit hvchi kohchi li tok oke: Chihowah sia hoke; im achi tok.

CHAPTA XXIII.

MICHA Chihowah yvt Moses a im anumpulit,
2. Israel im vlla vhleha ha im anumpulit, Chihowah
impvchi yummak oka itvnaha holitopa achit hvsh anola chi,
ilvppa puta kak osh impvchi li yoke.

3. Nitak hannali ho natoksvli vt vlhtaha hi oke: amba
nitak isht untuklo kvto nitak hullo afoha aiitvnaha holitopa
yoke: yummak oka natoksvli nana kia hvsh yvmihcha he
keyu hoke; hvsh aiasha moma ka Chihowah i nitak hollo
ya hi oke.

4. Ilvppa puta kak osh Chihowah impvchi itvnaha holi-
topa yo ont ai vlhpiesakma hvsh anola hi oke.

5. Hvshi vmmona nitak ont isht auahhushta ont opia
kak osh Chihowah im vbanvblit ont ia yoke.

6. Micha hvshi mih makinli nitak ont isht auahhtahlapi
kak osh pvska ik shatvmmo impvchi Chihowah isht im asha
yoke: nitak untuklo ho pvska ik shatvmmo hvshpa hi oke.

7. Nitak vmmona kak o itvnaha holitopa hvchim asha hi
oke: tishu atoksvli nana kia hvsh yvmihcha he keyu hoke.

8. Amba nitak untuklo ho luak ishit hukmit im issa mak
o Chihowah hvsh im issa hi oke: nitak isht untuklo kv
itvnaha holitopa hoke, tishu atoksvli ya hvsh yvmihcha he
keyu hoke, ish im achashke, im achi tok.

9. Micha Chihowah yvt Moses a im anumpulit,

10. Israel im vlla vhleha ha im anumpulit, Yakni hvch
ima li ka hvsh ona cha, nawaya hvshmokmvt, waya vmmo-
na hvshmo tuk vt sita achvfa ho naholitompa isht vta ya
isht hvshim ona hi oke.

11. Mikma hvchim aiokpancha chi ho Chihowah itikba ya
sita yash hvsh fahfula hi oke: nitak hullo tuk onnakma na-
holitompa isht vta yvt fahfula hi oke.

12. Micha sita ha hvsh fahfuli nitak mvt, hukmit Chiho-
wah im issa mak o chukfushi nakni aiokpuloka iksho afvm-
mi vmmona hvsh im issa hi oke.

13. Micha balama achukma mak o luak ishit hukmit Chihowah im issa ilhpak im issa yvt bota tohbi lipehbi kvshkoa ishit pokoli tuklo hosh bila aiyoma hi oke; micha ishkot im issa oka paki hin kvshkoa isht ai ushta ha hi oke.

14. Micha puska, micha tanchi vlvvsha, micha tanchi hilu_ha noshkobo aiena ka hvchin Chitokaka ya nan im issa ya isht hvsh im ona mih nitak ona keyu ka hvshpa he keyu hoke; hvsh aiasha moma hvchim ai itishali hlopulli ka nan vlpisa bilia ya hi oke.

15. Micha nitak hollo ha ya onnakma sita ha fahfulit im issa yo ont isht hvsh chukowa tuk nitak vttut ia ho hvsh hohtenashke; nitak hullo untuklo hosh tahashke.

16. Nitak hullo ont isht untuklo ha yo onna ont vhli ho nitak pokoli tahlapi ho hvsh hotehnashke; micha ilhpak im issa himona yo Chihowah hvsh im issashke.

17. Kvshkoa ishit pokoli tuklo atoba, fahfuli puska lumbo tuklo ho hvsh aiasha ya ishit kohchvt isht hvsh onashke; bota tohbi lipehbi yosh ishit shatvmmi aiyomvt palvska ya hi oke, Chihowah ya i nawaya vmmona yoke.

18. Micha puska ya chukfushi aiokpuloka iksho afvmmi vmmona untuklo, micha wak hovyk himita achvfa, micha chukfi nakni tuklo aieninchit hvsh im issa hi oke; hukmit Chihowah im issa mak osh ilhpak im issa micha ishkot im issa aiena Chihowah i balama achukma luak ishit hukmit im issa ya hi oke.

19. Yohmikmvt nan ashvchi im issa mak o issi kosomushi achvfa ho issi kosoma yo ai ishit hvshba hi oke, micha itin nanaiyvchi im issa vbi mak o chukfushi afvmmi vmmona tuklo ho hvshba hi oke.

20. Mikma naholitompa isht vtta yvt fahfulit im issa mak o waya vmmona puska ya chukfushi tuklo kash aieninchit Chihowah itikba afahfula hi oke: Chihowah i hullochi yosh naholitopa isht vtta immi ha hi oke.

21. Micha mih nitak ak inli ho hvsh anoli na itvnaha hvchi holitopa yashke: yvmmak oka tishu atoksuli hvsh yvmihcha he keyu. Hvsh ai asha moma hvchim ai itishali a hlopulli ka nan vlpisa bilia ya hi oke.

22. Atuk osh hvchi yakni nan awaya ya hvsh ai vmok-mvt hvsh bvshlikmvt hvchim osapa chukbi puta ka kashofit hvsh isha he keyu, micha na hvchi waya vlbullit hvsh aiowa he keyu hoke; hatak ilbvsha micha okla inla aiena kak o hvsh im ashancha hi oke: hvchin Chitokaka Chihowah sia hoke, ish im achashke achi tok.

23. Micha Chihowah yvt Moses a im anumpulit,

24. Israel im vlla vhleha im anumpulit, Hvshi isht untuklo hvshi ymma nitak vmona ma nitak hullo isht ithaiyana hinla isht pufa olahanchi, itvnaha holitopa hvchim asha hi oke.

25. Yummak oka tishu a toksvli ya hvsh ymihcha he keyu hoke; amba luak ishit hukmit im issa ya Chihowah hvsh im issa hi oke, ish im achashke, achi tok.

26. Micha Chihowah yvt Moses a im anumpulit,

27. Micha hvshi isht untuklo ilvppa i kashoffi nitak vt aiasha hi oke: itvnaha hvchi holitopa hi oke, micha hvchimi shilombish a hvsh ilbvshali cha luak ishit hukmit Chihowah im issa ya hvsh im issashke.

28. Micha nitak ymma na toksvli nana kia hvsh ymihcha he keyu hoke: hvchin Chitokaka Chihowah itikba ya hvchi kashoffit na kashoffi nitak oka.

29. Nitak ymma shilombish nana hosh ilbvsha he keyukmvt, shilombish ymmvt im okla im ai itin takla kohchvt fiopa tupa hi oke.

30. Micha nitak ymma shilombish nana hosh natoksvli nana kia ymihchikma shilombish ymma im okla im ai itin takla ai ishit kanchi la hi oke.

31. Na toksvli nana kia hvsh ymihcha he keyu hoke, hvsh ai asha moma hvchim ai itishali hlopulli ka nan vlpisa bilia ya hi oke.

32. Afoha hvchi nitak hollo ya hi oke, mikma hvchimi shilombish a hvsh ilbvshala hi oke; hvshi vt nitak ont ishit chakkali vt opia, opia ka vttvt ia hosh opia ka ont vhli kak o hvchi nitak hollo ya hvsh holitobla hi oke, im achi tok.

33. Micha Chihowah yvt Moses a im anumpulit,

34. Israel im vlla vhleha im anumpulit, Hvshi isht untuk-

lo ilvppa nitak ont isht auah^htlapi kak o nitak untuklo ho Chihowah ya vlhtipo im ai impvcha hi oke.

35. Nitak vmmona ka itvnaha holitopa asha hi oke, yvmmak oka yuka toksvli nana kia hvsh yvmihcha he keyu hoke.

36. Nitak untuklo ho luak ishit hukmit im issa ya Chihowah hvsh im issa hi oke: nitak ont isht untuchina ka itvnaha hvchi holitopa asha hi oke, micha luak ishit hukmit Chihowah hvsh im issa hi oke: itvnaha holitopa yoke; yuka natoksvli nana kia hvsh yvmihcha he keyu hoke.

37. Chihowah impvchi ilvppa puta kak o luak ishit hukmit im issa Chihowah im issa ya, hukmit im issa, micha ilhpak im issa, vbit im issa, micha ishkot im issa aiena nana ilvppa puta ka nitak im aivlhpiesakma itvnaha holitopa achit hvsh anola hi oke.

38. Micha Chihowah i nitak hollo puta, micha na hvchi hvlbina, micha anumpa kullo hvsh ilonochi moma, micha ilap ahnit hvsh im issa, Chihowah hvsh ima aiena hi oke.

39. Micha hvshi ont isht untuklo nitak ont isht auah tahlapikma, yakni ya awaya tuk a hoiyvt hvchim vlhtahakmvt nitak untuklo ho impvchi yo Chihowah isht hvsh im aiasha hi oke, nitak vmmona kv^t nitak hollo yatukma, nitak ont isht untuchina kv^t nitak hollo ya hi oke.

40. Micha nitak vmmona ka iti hochukma naksish, pam iti naksish, micha iti hishi chito naksish micha bok ushi ontlaka itokowisha aiena hvsh ishashke; micha nitak untuklo ho hvchin Chitokaka Chihowah itikba ya hvchi yukpashke.

41. Micha afvmmi achvfakma nitak untuklo impvchi yo Chihowah isht hvsh im aiasha hi oke. Hvchim ai itishali ha nan vlhpisa bilia ya hi oke; hvshi isht untuklokma isht hvsh aiasha hi oke.

42. Chishako hvsh ai asha na nitak untukla hi oke; Israel osh v^tta tok moma kv^t chishako aiasha hi oke.

43. Yvmohmi ho Echip yakni ya pehliechit kohchi li mvt, Israel im vlla vhleha ha chishako ashachit isht aya li tok a hvchim ai itishali hv^t ithaiyana hi oke, hvchin Chitokaka Chihowah sia hoke, ish im achashke, achi tok.

44. Mihma Moses vt Israel im vlla vhleha hā Chihowah impvchi puta k_a im anoli tok.

CHAPTA XXIV.

MIHMA Chihowah yvt Moses a im anumpulit,
2. Israel im vlla vhleha hā ish i miha na, p_vla ha ch_i
k_a p_vla bila ai vlhto vt luhuwa na bilia ch_i k_a, alif bila boā
ahli y_o isht chim onashke.

3. Nan isht atokowa in takali y_a kocha okla moma im
vlhtipo anukaka Chihowah itikba yak o opia vttvt ia hosh
onnahinli ont vhli hā Alon vt ai im apihisa biliashke; hv-
chim ai itishali hā nan vlhpisa bilia ya hi oke.

4. P_vla ai o hikia kashofa p_vla bila aivlhto on taloha k_a
Chihowah itikba talohonli na bilia he, apesashke.

5. Micha bota tohbi lipehbi y_o ish ishi cha p_vska lumbo
auahtuklo h_o ish p_vskashke: p_vska achvfakma kvshkoa
ishit pokoli tuklo kashke.

6. Micha itiakaiya tuklo h_o ish talohlashke, itiakaiya
achvfakma hannali hosh ai impa kashofa Chihowah itikba
hikia k_a on talohashke.

7. Micha itiakaiya aiyyukali k_a filakinsen bano y_o ish on
ashachashke: yvmohmi h_o luak ishit hukmit Chihowah im
issa isht ithana bilia yosh p_vska y_a on ashashke.

8. Nitak hollo moma k_a nan itim vlhpisa bila y_o Israel im
vlla vhleha im ai ishi tuk mak o Chihowah itikba achukmvt
talohli na biliashke.

9. Mikma Alon, micha ushi vhleha hā immi ha hi oke;
micha aholitopa ak o ai vpa hi oke; nan vlhpisa bilia h_o
luak ishit hukmit Chihowah im issa yosh i holitopa fehna
hoka, ish im achashke, achi tok.

10. Atuk o iki vt Echip hatak o Israel ohoyo ushi yosh
Israel im vlla vhleha hā takla kohchvt aya tok; atuk o Israel
ohoyo ushi ilvppvt bina hā Israel hatak o itachowa tok.

11. Mihma Israel ohoyo ushi vt CHIHOWAH hohchifo hā
ik ahobalot anumpulit kallakshichit anumpuli tok; mikma

Moses a isht im vla tuk, mihma (ishki vt Tan apehlichi ai achufa Tibli ya ushetik osh hohchifo kvt Shilomilh atok.)

12. Mihma Chihowah im anukfila hvt im otuna chi ho, ai atoni fohki tok.

13. Atuk o Chihowah yvt Moses a im anumpulit,

14. Kallakshichit anumpuli tuk a binah ha kocha isht ish onashke; mikma haklo tuk moma kvt ibbak a noshkobo onochashke, mikma okla moma kvt tuli ishit bolashke.

15. Micha Israel im vlla vhleha ha im anumpulit, kvna hosh in Chitokaka ya kalakshichit anumpulikmvt nan ashv-chi vt onvtonlashke.

16. Mikma kvna hosh Chihowah hohchifo ha ik ahobalot anumpulikmvt illi pulla hi oke, mikma okla moma kvt tuli ishit boli pulla hi oke; okla inla yvt yakni ya ai vtta tok akinli chohmit CHIHOWAH hohchifo ha ik ahobalot anumpulikmvt illi pulla hi oke.

17. Micha kvna hosh hatak bika vbikmvt illi pulla hi oke.

18. Micha kvna hosh nan vlhpoa yo vbikmvt achukmala hi oke, nan vlhpoa yokma nan vlhpoa ya hi oke.

19. Micha hatak vt chuka abilika vtta ya im okpunikma, yvmihchi tuk a chohmichit ilap ma yvmihcha hi oke.

20. Kinuffi hokma kinafa, nishkin okma nishkin, nuti yokma nuti; hatak o kaniohmichit im okpunikma, anonti yohmi ho ilap a yvmihcha hi oke.

21. Micha kvna hosh nan vlhpoa vbikmvt atobbashke, micha kvna hosh hatak a vbikmvt illa hi oke.

22. Okla inla hvchi yakni ya ai vtta tuk a itilauet nan vlhpisa hvchim achufa hi oke, hvchin Chitokaka Chihowah sia hoka, ish im achashke, achi tok.

23. Mihma kalakshichit anumpuli tuk ash binah ha kocha isht ona cha tuli ishit bola chi ho Moses vt Israel im vlla vhleha ha im anumpuli tok, mikma Chihowah yvt Moses a i miha tuk mak o Israel im vlla vhleha hvt yvmihchi tok.

CHAPTA XXV.

MICHA Chihowah yut Moses a Sinai nvnih ha ai im anumpulit,

2. Israel im vlla vhleha ha im anumpulit, Yakni hvch ima la chi ka, hvsh onakma, yohmikma yakni vt Chihowah i nitak holitopa ya i holitobla hi oke.

3. Afvmmi hannali ho chim osapa ya ish hokchikmut, afvmmi hannali ho chi pakvpi ahollokchi ya naksish vmot uni ya ishma hi oke.

4. Amba afvmmi isht untuklo hokvto yakni afoha nitak hollo ya hi oke, Chihowah i nitak hollo ya hi oke; chim osapa ya ish ahokcha he keyu, micha chi pakvpi a hollokchi ya naksish a ishma he keyu hoke.

5. Ish ai vmo ya ilap akinli hosh awaya ishma he keyu, micha chi pakvpi a hollokchi vt naksish ik vlmo ya paki ya ishma he keyu, yakni vt afoha he afvmmi yoka.

6. Micha yakni ya i nitak hollo ya ilhpak chim asha hi oke; chishno, micha chin tishu, micha chin tishu ohoyo, micha tishu chim ilhtono, micha okla inla yosh chi awant anta aiena,

7. Micha chi wak, micha nan vlhpoa chi yakni aiasha aiena ka awaya moma kvv ilhpak vt im aiasha hi oke.

8. Micha afvmmi nitak hollo untuklo ho afvmmi untuklo bat untuklo ho ish hohtenashke; mikma afvmmi nitak hollo untuklo kvv chim afvmmi pokoli ushta akucha chakkali hashke.

9. Yohmikma hvshi ont isht untuklo kvv nitak ont ishit pokolikma, chubili isht pufa ish olachechashke, i kashoffi nitak ma hvchi yakni moma ka olachechit hvsh hlopullecha hi oke.

10. Micha afvmmi ont ishit pokoli tahlapi ya hvsh hullocha hi oke, micha yakni moma hlopullechit okla aiasha moma ka yuka issachit anumpa hvsh i bohlashke: hvchi chubili ya hi oke, mikma hatak hvsh moma kvv i yakni aiyukali,

micha hatak hvsh moma kv̄t in chuka aiyukali hvsh ona hi oke.

11. Afv̄mmi ishit pokoli tahlap yv̄mmvt hv̄chi chubili ya hi oke: nana hvsh hokcha he keyu, micha ilap akinli offo ya hvshma he keyu, micha pakv̄pi naksish vlmo tuk keyu ya pak̄i hvsh ai v̄ma he keyu hoke.

12. Chubili yoka; hv̄chi holitopa hi oke: osapa awaya ak o hvshpa hi oke.

13. Chubili afv̄mmi ilv̄ppa hatak puta kv̄t ilap i yakni aiyukali ka falamvt hvsh ona hi oke.

14. Micha chuka abilika hatak a nana kia ish i kanchikmvt, keyukmvt nana kia chuka a bilika ish in chumpakmvt hvsh itilbv̄shala he keyu hoke.

15. Chubili ha ya afv̄mmi holhtina vlhp̄isa h̄o chin chuka abilika ya ish in chumpa hi oke, mikma nawaya afv̄mmi holhtina vlhp̄isa h̄o yv̄mmak osh ch̄i kancha hi oke.

16. Afv̄mmi laua ka vlhp̄isa hosh aiv̄lli ka i shahlehit isht ish ia hi oke, micha afv̄mmi iklauo ka vlhp̄isa h̄o aiv̄lli ka ish ola taklv̄chashke; nawaya ya afv̄mmi holhtina ya vlhp̄isa h̄o ch̄i kanchi hoka.

17. Yvmohmi hoka, hvsh itilbv̄shala he keyu hoke, amba chin Chitokaka ish i nukwiya hi oke, hv̄chin Chitokaka Chihowah sia hoke.

18. Yvmohmi hoka a nan vlhp̄isa ka hvsh yvmihcha hi oke, micha v̄m aiv̄lhp̄iesa yvmihchi ya hvsh holitoblashke, mikmvt achukma hosh yakni ya hvsh aiasha hi oke.

19. Mikma yakni vt na waya ka waya hi oke, micha impvt hv̄chi kaiya cha yv̄mmak o achukma hosh hvsh aiasha hi oke.

20. Atuk o afv̄mmi isht untuklo ka nana h̄o hokchit na waya ka emach̄i keyu ho kv̄t nanta hak o e pa ch̄i cho? hvsh achi hokma,

21. Yohmikma afv̄mmi ont ishit hannalikma ishit yukpali li ya apesvt hv̄chi onochi la hi oke, mikma afv̄mmi tuchina waya yo hv̄chi waya hi oke.

22. Atuk o afv̄mmi ont isht untuchinakma nana hvsh hokcha hi oke, micha nawaya sipokni ak o hvshpa na,

afummi ont ishit chakkala hi oke; yvmma i na waya kv̄t iklo kisha ka sipokni ak o hvshpa hi oke.

23. Yakni vt kv̄nīvt bilia he keyu hoke; yakni vt v̄m̄mi hoka, okla inla, micha nowvt aya hvchia hosh hvsh aiasha hoka.

24. Yohmi ka yakni hvsh aiasha moma ka yakni falvminchit chumpa ka v̄lhpesa hvsh ahna hi oke.

25. Hvsh itibapishi hv̄t ilbvshvt isht ia cha, i yakni kaniohmi ka kanchi tuk o, i kanomi hosh falvminchit chumpvt vlakmvt itibapishi hv̄t kanchi tuk a falvminchit chumpashke.

26. Mikma hatak vt falvminchit im a chumpa hinla kv̄t ik im ikshokmvt, amba ilap vto falvminchit chumpa hinla,

27. Yv̄hmikma a kv̄nia tok afummi ha hohtena cha atampa ka i kanchi tok a i falvminchashke yvmohmi ho falamvt i yakni ya onashke.

28. Amba i falvmincha he keyukma, na kv̄nia tuk vt chumpa tuk ash ibbak fok̄a na chubili afummi ka ona hi oke; atuk osh chubili ya mokofa hi oke, mikma i yakni ya falamvt ona hi oke.

29. Micha hatak vt tv̄maha holihta ya chuka in talaia tuk osh kanchi tuk mvt, kv̄nia ha ya afummi achvfa fehna itin-takla ho falvminchit chumpa hinla hoke, afummi achvfa v̄lhpesakma falvminchit chumpashke.

30. Micha afummi achvfa v̄lhpesa ka falvminchit ik chumpokma, tv̄maha holihta chuka talaia tuk vt chumpa tok ash kv̄llot im ai itishali a hlopulli ka immit bilia yo tobashke; chubili ma kohcha he keyu hoke.

31. Amba chuka alokoli yo chuka taloha holihtvt apak-foyupa keyu hokvto yakni haiaka osapa ya chohma hi oke, falvminchit chumpa hinlakmvt yvmohma hi oke, mikmvt chubili ma kohcha hi oke.

32. Yohmi kia Lefait v̄hleha in tv̄maha holihta ya micha i yakni tv̄maha a holihta chuka puta ka nitak nana ho falvminchit chumpakmvt Lefait v̄hleha hv̄t yvmihcha hi oke.

33. Micha hatak osh Lefait a in chumpa tuk ma chuka

kunia tuk a micha i yakni tumaha holihta aiena kut chubili ma kohcha hi oke; Israel im vlla vhleha im ai iti takla ya Lefait, vt in tumaha holihta chuka puta kak osh i yakni yoka.

34. Amba in tumaha holihta abilika fullota yakni haiaka hokuto kunia he keyu, i yakni bilia yoka.

35. Micha chitibapishi hut chiba fokut ilbushut kunia cha, nana bunnakma ish apelvchashke, ahli okla inla micha nowut aya yoh kia, yvmohmi ho chi takla ahantashke.

36. Micha chelichi micha i shahlit isht ia aiena ka chik im esho kashke; amba chin Chitokaka ya ish i nukshopashke; yvmohmi ho chitibapishi hut okchaya cha chi takla ahantashke.

37. Chelichi ho chin tvli holisso ya ish ima he keyu, micha i shahlit ibafohka chi ho chim ilhpak o ish i pota he keyu hoke.

38. Hvchin Chitokaka Chihowah sia hosh, Kenan yakni ya hvch ima lish, hvchin Chitokaka sia chi hosh Echip yakni ya a hvchi pehlichit kohchi li tok oke.

39. Micha chitibapishi hut chi bilika ahanta kut ilbushut kuniakma micha chi kanchikma; yuka chohmichit ish toksvlecha he keyu;

40. Amba tishu ilhtono micha nowut aya chohmit chin toksvilit chi takla ahanta na, chubili afvmmi ha ont vlla hi oke.

41. Atuk osh yohmikma ilap, micha im vlla vhleha aiena itapihut chi filvmmiit falamvt ilap in chuka achvfa micha iki vhleha i yakni ya ona hi oke.

42. An tishu vhleha hosh Echip yakni pehlichit kohchi li tok oka, hatak yuka chohmichit kancha he keyu hoke.

43. Kvllot ish toksvlecha he keyu, amba chin Chitokaka ya ish i nukshopa hi oke.

44. Hatak yuka micha ohoyo yuka chim aiasha kut oklushi Chihowah ik ithano chi afolublith aiasha kak a hi oke; yohmi kak o hatak yuka micha ohoyo yuka aiena ka hvsh a chumpa hi oke.

45. Micha okla inla im vlla vhleha hvt nowvt aya yosh hv-chi takla aiasha, micha in chuka achvfa hvchi takla aiasha hv-chi yakni ya atobachi tok aiena kak o, hvsh a chumpa hi oke, mikma yummak osh hvchim ilayak a hi oke.

46. Micha hvsh ai isha he ai vlhpesa yatuk o hvchim vlla et hvchiakaiya kv̄t immi ha chi hosh isha he ai vlhpesa ho hvsh isha hi oke; yummvt hvchi yuka na bilia he oke; amba hvch itibapishi vhleha, Israel im vlla vhleha hokvno kv̄llot hvsh iti toksvlecha he keyu hoke.

47. Micha nowvt aya micha okla inla yosh chi bilika ahanta kv̄t holitopvt taiyaha, micha chitibapishi hvt bilika ahanta kv̄t ilbvshvt taha cha, okla inla micha nowvt aya yash chi bilika ahanta ka keyukmvt okla inla yash in chuka achvfa ai unchuloli yo im ile kanchikma,

48. Kanchi ha ya falvmminchit chumpa hinlakmvt yohma hi oke, itibapishi vhleha achvfa kv̄t falvmminchit chumpa hinlakmvt yohma hi oke.

49. Imoshi, keyukmvt imoshi ya ushi vt falvmminchit chumpa hinla, keyukmvt in chuka achvfa ya i kanomi fehna kania kia falvmminchit chumpa hinlakmvt yohma hi oke; keyukmvt ilap ak inli kia falvmminchit ile chumpa hinlakmvt yohma hi oke.

50. Mikmvt chumpa tok a afvmmi ile kanchi tok a hohtenvt isht ia hosh chubili afvmmi ha isht onashke: micha vlhtoba kv̄t afvmmi holhtina ka vlhpisa hi oke. tishu ilhtono nitak vlhpisa ak o vlhpisa ha hi oke.

51. Afvmmi laua hosh takali moma hokma yvmma vlhpi-sa ho falvmminchit ishit chumpa tvli holisso ya anonti tvli holisso ishit chumpa tok a ima hi oke.

52. Micha afvmmi ik lauo hosh chubili afvmmi ona chi kv̄t takanli momakma, yohmi ho i hohtena hi oke mikma im afvmmi vlhpisa ho falvmminchit chumpa isht vlhtoba ya ima hi oke,

53. Micha tishu hosh afvmmi ilhtohno chohmit takla ahanta ho, mikma ish pisa ho achvfa kash ot kv̄llochit toksvlecha he keyu hoke.

54. Micha afvmmi ilvppa puta ka falvmminchit ik chum-

pokma, chubili afummi hano, ilap micha im vlla vhleha aiena kvt apiha ho kohcha hi oke,

55. Isael im vlla vhleha hvt vno ak o an tishu vhleha hoka, an tishu vhleha hosh Echip yakni ya pehlichit kohchi li tok oke: hvchin Chitokaka Chihowah sia hoke.

CHAPTA XXVI.

NA holbut toba, micha na holbut toba in chuwa hvsh ikba he keyu, micha na holbut toba ikbit hvsh hilecha he keyu, micha twli na holbut toba nana kia hvsh im aka chunola chi kvt chi yakni a hvsh hilecha he keyu hoke, hvchin Chitokaka Chihowah sia hoka.

2. A nitak hollo ya hvsh holitobli cha vm aboha holitompa ya hvsh holitobla hi oke, Chihowah sia hoke.

3. A nan vllhpisa hvsh ai itvnova cha vm anumpa vllhpisa ya ieshit hvsh yvmihchikma,

4. Yohmikma ont aivllhpiesakma, umba ka hvch ihima la hi oke, mikma yakni vt na waya ha hvchi waya hi oke; mikma kowi iti hikia kvt vnit hvchi waya hi oke.

5. Mikma hvsh nihechi kvt paki vmo ya ona he, micha paki vmo yvt hokcha he vllhpesa ona hi oke; mikma pvaska vput hvchi kaiya cha, achukma hosh hvchi yakni ya hvsh aiasha hi oke.

6. Mikma yakni ya iti nanaiya ima la hi oke, yohmikma hvsh tvshkikma nana hosh hvchi nukshobla he keyu, amba nampo okpulo ya yakni ya kohchit ishit kanchi la hi oke; mikma bvshpo falaia yvt hvchi yakni ya hlopulla he keyu hoke.

7. Mikma hvchin tvnvp a hvsh tihleli na, yvmmak osh hvchi tikba ya bvshpo falaia ishit akakoha hi oke.

8. Mikma hvsh tahlapikmvt tahlepa achvfa kia hvsh tihlela he, micha tahlepa hvsh achvfakmvt tahlepa sipokni pokoli kia hvsh tihlela hi oke, mikma hvchin tvnvp vt hvchi tikba ya bvshpo falaia ishit akakoha hi oke.

9. Hvch ithaiyana lish hvchi wayachit hvchi apaknvchi

la hi oke, micha vm anumpa kvllochit na hvchitim apesa la hi oke.

10. Mikma ilhpak sipokni ak o hvshpa tuk osh himona ak atuk pulla kak o isht hvsh kohcha hi oke.

11. Mikma an tabenakel a hvchim ai itin takla ya hilechi la hi oke micha vm ishilombish vt hvchi yuwala he keyu hoke.

12. Micha hvch im ai itin takla ya a nowa la hi oke, micha hvchin Chihowah sia hokma, vm okla hvchia ha hi oke.

13. Hvchin Chitokaka Chihowah sia hosh ymma i yuka hatak hvchia ha he keyu mak o, Echip yakni ya pehlichit hvchi kohchi li tuk oke, micha ikonla abana ishit talakchi puta ka tvptulit apissulechit hvchi nowvchi li hatuk oke.

14. Yohmi kia hvs sa haponakla he keyukma, micha vm anumpa ilvppa moma hvsh ymihcha he keyukma,

15. Micha a nan vlhpisa ha hvsh shitelemakma, keyukmvt hvchimi shilombish vt vm aivlhpesa ymihchi ya yuwala cha a nan vlhpisa moma ka hvsh ymihcha he keyukma, amba na hvch itim apesa li ya hvsh kobvffikma,

16. Uno ak kia ilvppa hvchi ymihchi la hi oke; vno fehna kv̄t komonta, tahvt isht ia, yvnha mikma niskin elli yo micha chukvsh nukhaklochi yo onochit hvchim apesa la hi oke, mikma peh pilla ho hvchi napehna ya hvsh hokcha hi oke; hvchin tvnv̄p ak osh vpa hi oka.

17. Mikma sa nashuka ya isht hvchi sanalichi likma, hvchin tvnv̄p itikba ya hvch illa hi oke; hvchi nukkilli puta kv̄t hvchi pehlichā hi oke, mikma kv̄na hosh hvchi hlioli keyu kia hvsh tihlahaya hi oke.

18. Micha nana ilvppa moma ka hvs sa haponakla he keyukma, na hvsh ashvchi pulla kak o, himakma napalv̄mmi untuklo ha isht hvchi onochi la hi oke.

19. Micha nan isht hvsh a kv̄llo isht ilefehuvchi ya kobvffi la hi oke; micha hvchi shutik a tvli chohmichi likmvt, hvchi yakni ya asonak lakna ya hvchin chohmichi la hi oke.

20. Mikma pilla ho hvchim i hlampko hv̄t taha chi hoke;

huchi yakni yvt nawaya ya huchi waya he keyu hoke, micha yakni ya iti puta kv̄t vni ya waya he keyu hoke.

21. Micha hvs s̄vm ilapunla cha hvs sa haponakla he keyukma, na hvsh ashvchi atukmak o ililli untuklo ho himakma huchi onochi la hi oke.

22. Micha nampoa okpulo aiena hvchim itin takla et tihleli likma ymmvt hvchim vlla vhleha ha wehpuli cha, huchi nan vhp̄oa ya vbit tahla hi oke, micha huchi kanamosechi likma, huchi hina puta kv̄t aksha hi oke.

23. Atuk osh ilvppa puta ka isht huchi kostininchi la he keyukma, amba hvs s̄vm ilapunlakma,

24. Yohmikma vno ak kia hvchim ilapunla lish, na hvsh ashvchi pulla ka untuklo ha na palvmmi huchi onochi la hi oke.

25. Micha a nan vhp̄isa ha i sanali tuk a ilaiokha chi ka bvshpo falaia ya huchi onochi la hi oke; mikma hvchin tmaha holihta anuka itahobvt hvsh itvnahakma, ililli huchi onochi la hi oke, mikma tvnvp ibbak hvsh fohka hi oke.

26. Mikma ishit hlampko huchi pv̄ska ya kobvffi likma, ohoyo pokoli hosh huchi pv̄ska ya a palv̄ska achvfa ho anunachi cha huchi pv̄ska ya wekichi hosh anonti hvch ima hi oke; mikma hvshpa kia ik huchi fihopo ka hi oke.

27. Micha ilvppa moma kv̄t yvmohmi kia hvs sa haponakla he keyu, amba hvs s̄vm ilapunlakma,

28. Yohmikma vno ak kia nukhobela hosh hvchim ilapunlv̄t aya la chi hoke; micha vno, vno fehna kv̄t na hvsh ashvchi tuk a untuklo ha napalvmmi huchi onochi la hi oke.

29. Mikma hvchiso vhleha nipi ya hvshpa cha hvchiso tek vhleha nipi ya hvshpa hi oke.

30. Micha hvch im achaha puta ka ishit kanchi lish na holba hvchin toba puta ka chanlit akakohli likmvt huchi hakn̄ip illi ya huchi na holbvt toba puta ka on ashachi la hi oke, micha vmi shilombish vt huchi yuwala hi oke.

31. Micha hvchin tmaha hohlita puta ka chukilissvchi lish, hvchim vlhtipo holitompa puta ka chukilissvchi likmvt, na huchi balama ya huwa la he keyu hoke.

32. Micha yakni ya a chukilissa isht ona la chi hoke,

mikma hvchin tñvvp vhleha yvmma ai ahanta kv̄t okokko!
ahna ch̄i hoke.

33. Micha oklushi Chihowah ik ithano puta ka im itin takla hvchi fimmi lish bvshpo falaia shufit hvchiakaiyachi la hi oke; mikma hvch̄i yakni vt chukilissakma, hvchin tuma-ha holihta puta kv̄t ai okpuloka hi oke.

34. Yohmikma hvchin tñvvp i yakni a hvsh aiasha na yakni vt chukilissa momakmvt i nitak hollo ya a yukpa hi oke; yohmi pulla hokmvno yakni vt foha cha, i nitak hollo ya a yukpa hi oke.

35. Chukilissvt talaia momakmvtō foha hi oke; hvsh on asha ma hvch̄i nitak hollo ya ik foho tuk okvt.

36. Micha okchaya momvt in tñvvp i yakni asha ka chukvsh iilli fohki la hi oke, mikma iti hishi fatahvchit ola yvt tihlela hi oke; mikma bvshpo falaia i yihlepa chohmit yihlepa hi oke, micha kvna hosh hlioli keyu kia akakoha hi oke.

37. Micha kvna hosh hlioli keyu kia bvshpo falaia itikba yo chohmit itō kahvt akakoha hi oke, mikmvt kv̄llot hvchin tñvvp itikba hvsh hie la he keyu hoke.

38. Micha oklushi Chihowah ik ithano im itin takla ai illit hvchi taha hi oke, mikma hvchin tñvvp i yakni vt hvchi tahla hi oke.

39. Micha hvchi okchaya kvto hvchin tñvvp i yakni ai ashvt nan ashvchi ishit hlipushit, micha iki nan ashvchi ya ishit hlipushit ia hi oke.

40. Yohmi kia ilap nan ashvchi, micha iki vhleha nan ashvchi, yoshoba aiena a yoshoba tuk, micha vm ilapunla tuk,

41. Micha vno ak kia im ilapunla li tuk, micha in tñvvp i yakni ya isht ona li tuk aiena ka vm il aionohonlikma, micha chukvsh hakshup ik tapo vt akanlosi cha, nan ashvchi pulla hosh na palvmmi onvtula tuk vt vllhpesa ahnikma,

42. Yohmikma Chekob a nan itim apesali tok vt ithaiyana la hi oke, micha Aisak a nan itim apesali tok vt ithaiyana la hi oke, micha Ebleham a nan itim apesali tok aiena kv̄t ithaiyana la hi oke, micha yakni ya ithaiyan a la hi oke.

43. Micha yakni ya issakma, yvmv̄t iksho hō chukilis-

svt talaiakmvt, i nitak hollo ya a yukpa hi oke: micha nan ashvchit na palvmmi onvtula tuk vt vlhpesa ahna hi oke; vm aivlhpesa yvmihchi ya shitilema tuk okvt, micha imi shilombish vt a nan vlhpisa puta ka shitilema tuk okvt.

44. Amba yvmmak moma ka ik yohmi kia in tvnvp i yakni ashakma kanchi la he keyu, micha shitilemvt nan itim apesali vt kobvffit kanchit vmohmichi la he keyu; in Chitokaka Chihowah sia hokvt.

45. Amba yvmmak atuk pulla mak o in tikba vhleha ha yvmmak oka in Chitokaka sia ha chi hosh, oklushi Chihowah ik ithano vhleha hvv pisa ho, Echip yakni ya pehlichit kohchit nan itim apesali tok vt, ithaiyana la hi oke, Chihowah sia hoke, ish im achashke, achi tok.

46. Nana vlhpisa ilvppa puta, micha ai vlhpesa yvmihchi, micha nanvlhpisa ilvppa puta kak o Chihowah yvt Moses a tohnot Sinai nvnih ha Israel im vlla vhleha ha ai itim apesa tok oke.

CHAPTA XXVII.

MIHMA Chihowah yvt Moses a im anumpulit,

2. Israel im vlla vhleha ha im anumpulit, Hatak nan ahlichy anumpa ha atokolit ilonochikmvt, ish im apesa ho hatak vt Chihowah immi ha hi oke.

3. Ish im apesa kvv nakni yosh afvmmi pokoli tuklo vttvt ia hosh afvmmi pokoli hannali ont vhli ha hi oke, ish im apesa kvv vlhtipo holitopa shekel ak o iakaiya hosh tvli hvta shekel pokoli tahlapa hi oke.

4. Michay ohoyo hokmvno shekel pokoli tuchina ho ish im apesa hi oke.

5. Michay afvmmi tahlapi ho vttvt ia hosh afvmmi pokoli tuklo ont vhli hokma nakni yokma, shekel pokoli tuklo, ohoyo hokma shekel pokoli ho ish im apesa hi oke.

6. Michay hvshi achvfa ho vttvt ia hosh afvmmi tahlapi ont vhli kano nakni yokma, tvli hvta shekel tahlapi ish im apesa he, michay ohoyo hokma tvli hvta shekel tuchina ho ish im apesa hi oke.

7. Micha afummi pokoli hannali uttvt vba maya ka nakni yokma, shekel auahlahlapi hō, micha ohoyo hokma, shekel pokoli hō ish im apesa hi oke.

8. Yohmi kia ilvrsha hatuk osh ish im apesa tuk a ik onanchokmvt na holitompa isht vttā itikba ya ilotvnicha he, mikma na holitompa isht vttā yvt vlhtoba onocha hi oke; anum-pa ahlichī ilonochī ash osh yvmihcha hinla vlhpisa hō vlhtoba onachashke.

9. Micha nan vlhpoa yō hatak vt Chihowah im issvt isht im ona, yohmikma hatak kuna hosh yvmma chohmi hō Chihowah im issakma, moma kv̄t holitopa hi oke.

10. Inlvcha he keyu, micha okpulo yatuk a achukma yō, keyukmvt achukma yatuk a okpulo yō atobbicha he keyu hoke, micha nan vlhpoa yatuk o nan vlhpoa yō atobbiechikma yvmma micha vlhtoba kash aiena kv̄t holitopa hi oke.

11. Micha nan vlhpoa liteha nana hō yvmmak oka vbit im issa mak o Chihowah im issa keyu, yohmikmvt nan vlhpoa ya naholitompa isht vttā ya isht im ona hi oke.

12. Mikma naholitompa isht vttā yvt achukma hokmá, okpulo yokmá nana kia vlhtoba onocha hi oke; naholitompa isht vttā chia hv̄t vlhtoba ish onochi tuk mak o yvmohma hi oke.

13. Yohmi kia falvmminchit chumpa chī pulla hokmvt, ish im apesa tuk a ishit tahlapi hō apotola hi oke.

14. Micha hatak osh in chuka ya Chihowah i holitopa chī hō hullochikma naholitompa isht vttā yvt achukma hokmá okpulo yokmá nana kia vlhtoba onocha hi oke, naholitompa isht vttā yvt vlhtoba onochi tuk mak o kv̄lot hikia hi oke.

15. Atuk o hullochi tuk ash osh in chuka falvmminchit chumpa chikma vlhtoba ish apesa tuk a tvli holisso ishit tahlapi hō apotoli cha immi hashke.

16. Micha hatak vt im osapa kashapa ka Chihowah ya i hullochikma, napehna ya vlhpisa hō ish im apesa hi oke: bali pehna homa achvfa kv̄t tvli hv̄ta shekel pokoli tahlapi vlhpisa hi oke.

17. Chubili ak o vttvt ia ho im osapa ya hullochi tuk ma, ish im apesa tuk ash vlhpisa hosh hikia hi oke.

18. Amba chubili i himmak o im osapa ya hullochi tuk ma, naholitompa isht vttta yvt afvmmi takanli moma chubili afvmmi ont vhli kak o vlhpisa ho tvli holisso i hohtena hi oke, mikma ish im apesa tuk ash isht ola takla hi oke.

19. Atuk o osapa ya hullochi tuk ash osh kaniohmit falvmminchit chumpa hinlakmvt ish im apesa tuk ash, tvli holisso ishit tahlapi ka ibafohkikmvt kvllot immi ha hi oke.

20. Micha osapa ha falvmminchit chumpa he keyukmvt, keyukmvt osapa ya hatak inla yo i kanchi tukmvt himmakma falvmminchit chumpa he keyu hoke.

21. Amba osapa yvt chubili ya kohchakmvt Chihowah holitopa hullochi osapa ya hi oke; yvmmvt naholitompa isht vttta immi ha hi oke.

22. Micha hatak osh osapa chumpa tuk osh yvmmvt i yakni yatuk keyu ho Chihowah ya i hullochi tuk ma,

23. Yohmikma naholitompa isht vttta yvt ish im apesa tuk vlhpisa ho chubili afvmmi ont vhli ho i hohtenashke; mikma nitak yvmma ish im apesa tuk nana holitompa mak o Chihowah ya imashke.

24. Chubili afvmmi ya in chumpa tuk ash osapa yvt falamvt i yakni atuk ak o im onashke.

25. Micha vlhtipo holitopa shekel ak o iakaiya hosh ish im apesa bieka hi oke, kelah pokoli tuklokmtv shekel achvfa hi oke.

26. Vlhpoa ushi vttahpi ak illa hosh yvmmvto Chihowah im vttahpi ya hi vlhpisa hoke, hatak nana hosh hullocha he keyu hoke, wak hobvk okma, chukfi nana kia, Chihowah immi hoke.

27. Micha nan vlhpoa liteha yokma, ish im apesa tuk a iakaiya hosh falvmminchit chumpa cha, ishit tahlapi ibafohka hi oke; keyukmvt falvmminchit ik chumpokma, ish im apesa tuk a iakaiya hosh kvnia hi oke.

28. Yohmi kia nana hullochi tuk nana im asha moma ka ai ishit, hatak o keyukmvt, nan vlhpoa yo keyukmvt, osapa aiena kanima ho hullochi tukma kvnia he keyu, micha

falvmminchit' chumpa he keyu hoke: nana hullochi puta kvt Chihowah i holitompā i shahli hoke.

29. Nana hullochi achvfa kia hatak vt hullochi tuk a falvmminchit chumpa he keyu hoke, amba illi pulla hi oke.

30. Micha yakni ya nana ishit pokoli puta, yakni nana awaya puta, keyukmvt iti vni puta kvt Chihowah immi hoke, Chihowah i holitopa hoke.

31. Yohmi ka hatak osh im ishit pokoli falvmminchit chumpa pullakmvt ishit tahlapi ka apotola hi oke.

32. Micha nan vlhpoa hochito, keyukmvt chipunta aiena ishit pokoli ak okmvt kanima hosh fuli nuta ont ia ak a hi osh, ishit pokoli ak osh Chihowah i holitopa hi oke.

33. Achukma hokmá, okpulo yokmá nana ka hoyā he keyu, micha inla atobbicha he keyu, inla atobbichi pulla hokma, yvmma micha vlhtoba kash aiena kvt i holitopa ha hi oke, falvmminehit chumpa he keyu hoke, ish im achashke, im achi tok.

34. Nan vlhpisa ilvppa puta kak o Israel im vlla vbleha i nan vlhpisa ha chi ka Sinai nvnih ha Chihowah yvt Moses a ai im apesa tok oke.

NUMBAS HOLISSO.

MOSES I HOLISSO AIUSHTA KUT

NUMBAS HOHCHIFO HOKE.

CHAPTA I.

MIHMA Chihowah yvt yakni haiaka Sinai ya Echip yakni ya a kohchvt minti tok afvmmi atukla, hvshi atukla kv nitak vmmona ma, okla moma im vhtipo ya Moses a et ai im anumpulit,

2. Israel im vlla vhleha moma holhtina ka in chuka achvfa iakaiya ho iki in chuka achvfa iakaiya ho nakni puta noshkobo vhpisa hohchifo holhtina ka hvsh ishashke.

3. Afvmmi pokoli tuklo ai vhlit vba maya kohchvt tvnvp ia hinla puta, Israel ai asha ka, chishno micha Alon itatuklot tvshka pehlichy aiyukali ho hvsh hotehnashke.

4. Mikma apehlichy aiyukali ka hatak achvfa iki vhleha in chuka achvfa i noshkoboka aiyukali vt hvch ibafoka hi oke.

5. Hatak hohchifo ilvppa puta kak osh hvchi apehvt hiela chi hoke. Luben apehlichy ya, Sheteu ushi Elisv;

6. Simeon apehlichy ya, Sulishattai ushi Shelumiel,

7. Chutah apehlichy ya, Amminatab ushi Nahshon,

8. Issaka apehlichy ya, Sua ushi Nehlaneel,

9. Sebulun apehlichy a, Helon ushi Eliab,

10. Chosef im vlla vhleha; Eflaim apehlichy, Ammihut ushi Elishama; Manasseh apehlichy a Petahsu ushi Kamaliel,

11. Benchamin apehlichy a, Kiteoni ushi Abitan,

12. Tan apehlichy a Amishattai ushi Ahiesa,

13. Asha apehlichy a Oklan ushi Pakiel,

14. Kat apehlichy a Teuel ushi Eliasaf,

15. Naftali apehlichy a Enan ushi Ahila,

16. Ilvppa puta kak osh okla moma ka ai annohowa iki vhleha apehlichi yo i holitopa Israel a tahlepa sipokni puta i noshkoboka yatok.

17. Mihma Moses micha Alon itatuklo kv̄t hatak ilvppa puta hohchifo hosh takali tuk o ishi tok.

18. Micha okla moma ka hvshi atukla nitak vmmona ma itvnahli tok, mihma in chuka achvfa iakaiyvt iki vhleha in chuka vlhpisvt hohchifo holhtina yatuk a noshkobo holhtina afvmmi pokoli tuklo ai vhlit vba maya ka okla anoli tok.

19. Mihma Chihowah yvt Moses a im apesa tuk mak o, yohmit Sinai yakni haiaka ya a hohtena tok.

20. Mihma Israel ushi akni fehna Luben im vlla vhleha ai unchuloli iki vhleha in chuka achvfa yvt chuka achvfa vlhpisvt nakni puta afvmmi pokoli tuklo ai vhli vttvt vba maya kohchvt tv̄nv̄p itibit ia hinla moma kv̄t noshkobo holhtina hosh hohchifo holhtina tok.

21. Luben apehlichi yosh holhtina kv̄t tahlepa sipokni pokoli ushta cha tahlepa tahlapi tok.

22. Simeon im vlla vhleha ai unchuloli vt iki vhleha in chuka achvfa vt, in chuka achvfa vlhpisvt nakni puta afvmmi pokoli tuklo vttvt vba maya kohchvt tv̄nv̄p itibit ia hinla puta kv̄t noshkobo holhtina hosh hohchifo holhtina tok.

23. Simeon apehlichi holhtina kv̄t tahlepa sipokni pokoli tahlapi akucha chakkali cha tahlepa tuchina tok.

24. Kat im vlla vhleha ai unchuloli hv̄t iki vhleha in chuka achvfa yvt chuka achvfa vlhpisvt afvmmi pokoli tuklo ai vhli vttvt vba maya kohchvt tv̄nv̄p itibit ia hinla puta kv̄t hohchifo holhtina tok.

25. Kat apehlichi yvmma holhtina kv̄t tahlepa sipokni pokoli ushta akucha tahlapi, tahlepa hannali cha pokoli tahlapi tok.

26. Chutah im vlla vhleha ai unchuloli hv̄t iki vhleha in chuka achvfa yvt chuka achvfa vlhpisvt afvmmi pokoli tuklo ai vhli vttvt vba maya kohchvt tv̄nv̄p itibit ia hinla puta kv̄t hohchifo holhtina tok.

27. Chutah apehlichi yvmmvt holhtina kv̄t tahlepa sipokni pokoli untuklo akucha ushta cha tahlepa hannali tok.

28. Issaka im vlla vhleha ai unchuloli hvt iki vhleha in chuka achvfa vt chuka achvfa vlhpisa hosh afummi pokoli tuklo ai vhli vttvt vba maya kohchvt tnvvp itibit ia hinla puta kvt hohchifo holhtina tok.

29. Issaka apehlichei yummvt holhtina kvt, tehlepa sipokni pokoli tahlapi akucha ushta cha tahlepa ushta tok.

30. Sebulun im vlla vhleha ai unchuloli hvt iki vhleha in chuka achvfa vt chuka achvfa vlhpisvt afummi pokoli tuklo ai vhli vttvt vba maya kohchvt tnvvp itibit ia hinla puta kvt hohchifo holhtina tok.

31. Sebulun apehlichei yummvt holhtina kvt tahlepa sipokni pokoli tahlapi akucha untuklo cha tahlepa ushta tok.

32. Chosef im vlla vhleha yummvt Eflaim im vlla vhleha ai unchuloli hvt iki vhleha in chuka achvfa yvt chuka achvfa vlhpisa hosh afummi pokoli tuklo ai vhli vttvt vba maya kohchvt tnvvp itibit ia hinla puta kvt hohchifo holhtina tok.

33. Eflaim apehlichei yummvt holhtina kvt tahlepa sipokni pokoli ushta cha tahlepa tahlapi tok.

34. Manasseh im vlla vhleha ai unchuloli hvt iki vhleha in chuka achvfa yvt chuka achvfa vlhpisa hosh afummi pokoli tuklo ai vhli vttvt vba maya kohchvt tnvvp itibit ia hinla puta kvt hohchifo holhtina tok.

35. Manasseh apehlichei yummvt holhtina kvt tahlepa sipokni pokoli tuchina akucha tuklo cha tahlepa tuklo tok.

36. Benchamin im vlla vhleha ai unchuloli hvt iki in chuka achvfa yvt chuka achvfa vlhpisa hosh afummi pokoli tuklo ai vhli vttvt vba maya kohchvt tnvvp itibit ia hinla puta kvt hohchifot holhtina tok.

37. Benchamin apehlichei yummvt holhtina kvt tahlepa sipokni pokoli tuchina akucha tahlapi cha tahlepa ushta tok.

38. Tan im vlla vhleha ai unchuloli hvt iki vhleha in chuka achvfa yvt, chuka achvfa vlhpisvt afummi pokoli tuklo ai vhlit vba maya kohchvt tnvvp itibit ia hinla puta kvt hohchifot holhtina tok.

39. Tan apehlichei yummvt holhtina kvt tahlepa sipokni pokoli hannali akucha tuklo cha tahlepa untuklo tok.

40. Asha im vlla vhleha ai unchuloli hvt iki in chuka achvfa, chuka achvfa vlhpisvt afvmmi pokoli tuklo ai vhlit vba maya kohchvt tenvp itibit ia hinla puta kv̄t hohchifot holhtina tok.

41. Asha ap ehlich i yvmmvt holhtina kv̄t tahlepa sipokni pokoli ushta akucha achvfa cha tahlepa tahlapi tok.

42. Naftali im vlla vhleha ai unchuloli hvt iki vhleha in chuka achvfa yvt chuka achvfa vlhpisvt afvmmi pokoli tuklo ai vhlit vba maya kohchvt tenvp itibit ia hinla puta kv̄t hohchifot holhtina tok.

43. Naftali ap ehlich i yvmmvt holhtina kv̄t tahlepa sipokni pokoli tahlapi akucha tuchina cha tahlepa ushta tok.

44. Ilvppa puta kak osh, Moses micha Alon itatuklo kv̄t hohtena ma holhtina tok; Israel i holitopa hatak auah tuklo: iki vhleha in chuka achvfakma achvfvt ia tok.

45. Yohmi ho Israel im vlla vhleha moma iki vhleha in chuka achvfa vlhpisa hosh afvmmi pokoli tuklo ai vhli vttvt vba maya kohchvt tenvp itibit ia hinla puta kv̄t holhtina tok.

46. Holhtina kv̄t moma kv̄t tahlepa sipokni tahlepa hannali cha tahlepa sipokni tuchina tahlepa tahlapi cha pokoli tahlapi aiena tok.

47. Amba Lefait vhleha hvt iki vhleha ap ehlich i kv̄t takla ik holhtino tok.

48. Chihowah yvt Moses a im anumpulit,

49. Lefai ap ehlich i illa ho ish hohtena he keyu, micha Israel a takla holhtina ka ish isha he keyu;

50. Amba Lefait vhleha isht atokowa vlhtipo, micha nan ai vlhto moma yvmma foyuka, micha nana hosh ai immi putakma, apistikli ya chi ka ish atokolashke, mikma vlhtipo ya, micha nanai vlhto moma aiena ka shoyula chi hoke: micha nana isht im ahashwa, micha vlhtipo holitopa ya abinachit afolubla hi oke.

51. Vlhtipo holitopa yvt ia chikma, Lefait vhleha hak osh akvcha hi oke; micha vlhtipo holitopa yvt hikia chikma, Lefait vhleha hak osh hilecha hi oke; atuk o hatak nan ik ithano yosh bilika ona hokvt illa hi oke.

52. Mikma Israel im vlla vhleha hokvt ilap im vlhtipo

puta ka i binah aiyukali a hilecha hi oke; micha hatak aiyukali kv̄t i na hv̄ta shali abinanchit okla moma hlopulla hi oke.

53. Amba Lefait vhleha hokv̄to nan isht atokowa vlhtipo holitopa hilechit apakfoyupv̄t binancha hi oke: yvmohmi hō im ai i nukkilli vt̄ Israel im vlla vhleha hā ik onvtulo kashke: mikma Lefait vhleha hak osh nan isht atokowa vlhtipo holitopa ya ieshit atonna hi oke, im achi tok.

54. Mihma Israel im vlla vhleha hv̄t Chihowah yv̄t Moses a im apesa tuk mak o, moma yvmihchi tok.

CHAPTA II.

MIHMA Chihowah yv̄t Moses micha Alon a im anumpu-
lit,

2. Israel im vlla vhleha hatak puta kv̄t ilap i nahv̄ta shali, iki in chuka achv̄fa i nahv̄ta aiyukali kak o abinancha hi oke: okla moma im vlhtipo holitopa i hopakechit afolublit a binancha hi oke.

3. Mikma i hv̄shi akochaka pilla hak o Chutah i nahv̄ta shali ai achv̄fa kv̄t okla laua moyuma kv̄t abinancha hi oke; mikma Amminatab ushi Nahshon ak osh Chutah im vlla vhleha hā i kv̄pitv̄ni ha chī hoke.

4. Mihma in tv̄shka vhleha holhtina kv̄t tahlepa sipokni pokoli untuklo akucha ushta cha tahlepa hannali tok.

5. Mikma yv̄mma pit iakaiyv̄t binanchi kv̄to Issaka apeli-
chi kak a hi oke: mikma Sua ushi Nehlaneel ak osh Issaka im vlla vhleha hā i kv̄pitv̄ni ha chī hoke.

6. Mihma in tv̄shka vhleha hv̄t holhtina kv̄t tahlepa si-
pokni pokoli tahlapi akucha ushta cha tahlepa ushta aiena tok.

7. Yohmi ma Sebulun apeli-
chi kak a tok; mihma Helon ushi Eliab ak osh Sebulun im vlla vhleha hā i kv̄pitv̄ni ha chī hoke.

8. Mihma in tv̄shka vhleha hv̄t holhtina kv̄t tahlepa si-
pokni pokoli tahlapi akucha untuklo cha tahlepa ushta aiena tok.

9. Chutah i binah aiasha holhtina moma kv̄t okla moyuma kv̄t tahlepa sipokni achvfa cha tahlepa sipokni pokoli untuchina tahlepa sipokni hannali micha tahlepa ushta aiena tok, ilvppa puta kak osh tikba iashke.

10. Oka mahli in tvnnvp a Luben in tvshka vhleha mak osh a binanchi ya i nahvta shali a hikia ch̄i hoke: mikma Luben im vlla vhleha i kvpitvni vt Sheteu ushi Elisu ak a hi oke.

11. Mihma in tvshka vhleha micha a holhtina kv̄t tahlepa sipokni pokoli ushta akucha hannali cha tahlepa tahlapi tok.

12. Mikma apontvt binanchi kv̄t Simeon apehlich̄i ak a ch̄i hoke; mikma Simeon im vlla vhleha i kvpitvni vt Sulishattai ushi Shelumiel ak a ch̄i hoke.

13. Mikma in tvshka vhleha micha holhtina kv̄t tahlepa sipokni pokoli tahlapi akucha chakkali cha tahlepa tuchina tok.

14. Yummakma Kat apehlich̄i ak a ch̄i hoke, mikma Kat ushi vhleha i kvpitvni vt Leuel ushi Eliasaf ak a ch̄i hoke.

15. Mihma in tvshka vhleha micha holhtina tuk vt tahlepa sipokni pokoli ushta akucha tahlapi micha tahlepa hannali cha pokoli tahlapi tok.

16. Luben i binah h̄a aiashvt holhtina tuk vt okla moma kv̄t tahlepa sipokni tahlepa achvfa tahlepa sipokni pokoli tahlapi akucha achvfa, micha tahlepa ushta cha pokoli tahlapi tok: micha ilvppa puta kak osh aya atukla yosh wakaya hi oke.

17. Yohmikma okla moma im vlhtipo holitopa yvt w McKayvt Lefait vhleha i binah, binah iklvna aiasha tuk aienvt ia ch̄i hoke; kaniohmit binachi tuk vt moma hosh ahikia aiyukali, micha i nahvta shali aiyukali h̄ielit iashke.

18. Hvshi ai okatula in tvnnvp a Eflaim in tvshka vhleha mak osh i binah nahvta shali vt hikia hi oke: mikma Eflaim im vlla vhleha h̄a i kvpitvni vt Ammihut ushi Elishama ak a ch̄i hoke.

19. Mihma in tvshka vhleha, micha holhtina tuk vt tahlepa sipokni pokoli ushta cha tahlepa tahlapi tok.

20. Mikma apotoa kv̄t Manasseh apēhlichī ak a chī hoke, mikma Manasseh im vlla v̄hleha hā ī kv̄petvni vt Petahsu ushi Kamaliel ak a chī hoke.

21. Micha in tv̄shka v̄hleha, micha holhtina tuk vt tahlepa sipokni pokoli tuchina akucha tuklo cha tahlepa tuklo tok.

22. Yohmikma Benchamin apēhlichī ak a chī hoke; mikma Benchamin im vlla v̄hleha ī kv̄pitvni vt Kiteoni ushi Abitan ak a chī hoke.

23. Micha in tv̄shka v̄hleha, micha holhtina tuk vt tahlepa sipokni pokoli tuchina akucha tahlapi cha tahlepa ushta tok.

24. Eflaim ī binah hv̄t holhtina moma, okla moma kv̄t tahlepa sipokni tahlepa achvfa, tahlepa sipokni untuchina cha tahlepa achvfa tok; micha aya atuchina kak o hielit ia chī hoke.

25. Tan ī binah nahvta shali vt falvmmi in tv̄nnvp im okla aiasha bilika hikia chī hoke: mikma Tan im vlla v̄hleha ī kv̄pitvni vt Ammishattai ushi Ahiesa yak a chī hoke.

26. Mihma in tv̄shka v̄hleha, micha holhtina kv̄t tahlepa sipokni pokoli hannali akucha tuklo cha tahlepa untuklo tok.

27. Mikma apotovt binachi kv̄t Asha apēhlichī ak a chī hoke, mikma Asha im vlla v̄hleha ī kv̄pitvni vt Oklan ushi Pakiel ak a chī hoke.

28. Mihma in tv̄shka v̄hleha, micha holhtina tuk vt tahlepa sipokni pokoli ushta akucha achvfa cha tahlepa tahlapi tok.

29. Yvmmakma Naftali apēhlichī ak a chī hoke; micha Naftali im vlla v̄hleha ī kv̄pitvni vt Enan ushi Ahila ak a chī hoke.

30. Mihma in tv̄shka v̄hleha, micha holhtina tuk vt tahlepa sipokni pokoli tahlapi akucha tuchina cha tahlepa ushta tok.

31. Tan ī binah aiashvt holhtina moma kv̄t tahlepa sipokni tahlepa achvfa tahlepa sipokni pokoli tahlapi akucha untuklo cha tahlepa hannali tok: yvmmvto ī nahvta ieshit ashaka fehna aya chī hoke.

32. Israel im vlla vhleha ilvppa puta kak osh iki in chuka achvfa vhlpisa hosh holhtina tok. Okla moma binah puta ka aiashvt holhtina tuk moma kv̄t tahlepa sipokni tahlepa hannali, tahlepa sipokni tuchina cha tahlepa tahlapi pokoli tahlapit aiena tok.

33. Amba Chihowah yvt Moses a im apesa tuk mak o, Lefait vhleha hvto Israel im vlla vhleha takla ik holhtina tok.

34. Mihma Chihowah yvt Moses a im apesa tuk mak o, moma Israel im vlla vhleha hv̄t yvmihchi tok; yohmi hosh iki vhleha in chuka achvfa vhlpisa hosh in chuka achvfa aiyukali i nahvta shali abinachi, micha yohmi hosh wakayvt ia beka tok.

CHAPTA III.

ILUPPA puta aiena kak osh, Chihowah yvt Sinai nv̄nih ha Moses a im anumpuli nitak, Alon micha Moses a anoli holisso yoke.

2. Mihma hohchifo ilvppa puta kak osh Alon ushi vhleha hatok. Natab vt v̄tta vmmona, micha Abihu, Eleasa micha Ihlama ak'atok.

3. Hohchifo ilvppa puta kak osh Alon ushi vhleha yosh naholitompa isht asha ya chi bila ahv̄mmit yvm̄vt naholitompa isht asha vlhtoka isht ai ah̄ashwa chi ho hullochi tok oke.

4. Atuk o Natab micha Abihu vt yakni haiaka Sinai ya Chihowah itikba ya luak inla yo im issa cha illi tok, mih̄mv̄t vlla ik im iksho ki tok; mihma Eleasa micha Ihlama itatuklo kv̄t iki Alon itikba ya naholitompa isht v̄tta vlhtoka ya isht ai ah̄ashwa tok.

5. Mihma Chihowah yvt Moses a im anumpulit,

6. Lefai apehlich̄i yo bilika isht ishla cha, naholitompa isht v̄tta Alon itikba ya isht ish onashke; yohmi na yvm̄mak o nana isht im ahantashke.

7. Mich̄a nan isht im ai v̄tta ya yvm̄ihinchit, micha okla moma nan isht im ai v̄tta, okla moma im vlhtipo holitopa

itikba ya a yvmihinchit, vlhtipo holitopa isht ai ahanta ya yvmihinchashke.

8. Micha okla moma im vlhtipo holitopa nan isht toksvli puta ka ieshit Islael im vlla vhleha nan isht im aivtta yvmihinchit vlhtipo nan isht aiahanta ya yvmihinchaske.

9. Lefait vhleha ha, Alon micha ushi vhleha hak o ish imashke: Islael im vlla vhleha ha akohchit mominchit ima li hatuk oke.

10. Mikma Alon micha ushi vhleha ha ish atokoli na, naholitompa isht vttta vlhtoka ya isht ahashwa chi hoke: mikma hatak inla yosh bilika vlakmvt illi pulla chi hoke, achi tok.

11. Micha Chihowah yvt Moses a im anumpulit,

12. Micha vno vt yakeh! vno vt Islael im vlla vhleha ha vttahpi ishki im oshvto tiwi puta ya atobbichit Islael im vlla vhleha ha akohchit Lefait vhleha hak o ishe lishke; yohmi hoka Lefait vhleha hvt vmmi ha chi hoke.

13. Uttahpi moma kvv vmmi hokvt; Echip yakni ya vttahpi moma ka vbit tahli li tok nitak mvt Islael a hatak, micha nanvlhpoa aiena vttahpi puta ka hullochit il ai ishi il tok okvt; vmmi ha chi hoke. Chihowah sia hoke, achi tok.

14. Micha Chihowah yvt yakni haiaka Sinai ya Moses a im anumpulit,

15. Lefai im vlla vhleha ha iki in chuka achvfa ahohchifot iakaiyvt ilap im iksa ibafohkvv ish hohtenashke: nakni puta hvshi achvfa vttvt vba maya kak o ish hohtenashke, achi tok.

16. Mihma Moses vt Chihowah yvt im apesa tuk im anumpa hatuk mak o hohtena tok.

17. Mihma Lefai ushi vhleha hohchifo hvt ilvppak atok; Keshom micha Kohalh micha Melali ak atok.

18. Mikma Keshom ushi vhleha ahohchifot in chuka achvfa yvt Libni micha Shimei ilvppak atok.

19. Mikma Kohalh ushi vhleha in chuka achvfa yvt Am-lam micha Iseha, Heblon micha Ussiel, ilvppak atok.

20. Mikma Melali ushi vhleha in chuka achvfa yvt Mahli

micha Mushi ak atok; Ilvppa puta kak osh iki vhleha in chuka achvfa vlhpisa hosh Lefait vhleha in chuka achvfa hatok.

21. Keshom a chuka achvfa Libnait, micha chuka achvfa Shimait ak atok, Keshomait vhleha hvt chuka achvfa ilvp-pak atok.

22. Yvmmvt nakni moma holhtina holhtina tuk vt hvshi achvfa ai vhli vttvt vba maya holhtina mvt, tahlepa sipokni untuklo cha tahlepa tahlapi tok.

23. Keshomait vhleha chuka achvfa vt hvshi ai okvtula pilla vlhtipo holitopa ashaka yak o binacha hi oke.

24. Keshomait vhleha iki in chuka achvfa i shahli vt Lael ushi Eliasaf ak a hi oke.

25. Micha Keshom ushi vhleha hvt okla moma im vlhtipo ya nan isht aiahanta yvt, vlhtipo holitopa, micha vlhtipo, yvmma isht ompoholmo, micha okla moma im vlhtipo okhissa a takali,

26. Micha wanuta natakali puta, micha wanuta okhissa yvmmvt vlhtipo holitopa micha alta bilika fullota natakali, micha yvmma im isht talakchi puta, micha nan isht aiahanta puta iesha chi kak oke.

27. Mikma Kohalh a chuka achvfa Amlamait micha chuka achvfa Isekalaith, micha chuka achvfa Heblonait micha chuka achvfa Ussielait: ilvppa puta kak osh Kohalhait chuka achvfa puta hatok.

28. Nakni moma hvshi achvfa ai vhlit vba mayvt holhtina kvv tahlepa sipokni untuchina cha tahlepa hannali hosh vlhtipo holitopa ya atonit ieshi tok.

29. Kohalh ushi vhleha in chuka achvfa puta kvv oka mahli pilla vlhtipo apotoa ho binacha hi oke.

30. Kohalhait vhleha chuka chvfa puta ka iki in chuka achvfa i shahli vt Ussiel ushi Elisafan ak achi hoke.

31. Micha nana aiatoni ieshi kvv itombi holitopa, micha ai impa, micha pva ai o hikia, micha alta puta, micha nan isht toksvli nan aivlhto vlhtipo holitopa aiasha, micha natakali, micha nan isht toksvli puta kak a hi oke.

32. Mikma naholitompa isht vta Alon ushi Eleasa yak

osh Lefait vhleha i shahli ya i shahli ya chi hoke, micha vlhtipo holitopa apesvchi vhleha yo apistikela chi hoke.

33. Melali ya Mahlait in chuka achvfa, micha Mushait in chuka achvfa ak atok. Ilvppak osh Melali in chuka achvfa ya tok.

34. Mihma hvshi achvfa vttvt vba mayvt nakni moma holhtina mak osh holhtina tuk vt tahlepa sipokni hannali, cha tahlepa tuklo tok.

35. Mikma iki in chuka achvfa Melali in chuka achvfa ya Abihail ushi Suliel ak osh i shahli ya chi hoke. Ilvppa puta kak osh vlhtipo nowvt aya apotvut i falvmmi in tvnnvp ak o binacha hi oke.

36. Melali ushi vhleha nana apistikelit ieshi vto chuka nowvt aya im iti shima, micha im okhowatakvchi, micha in tonik, micha ai o hikia, micha nana aivlhto moma, micha nana isht toksvli moma,

37. Micha tonik puta wanuta apakfoyupa micha ai o hikia moma, micha isht ishtvffena puta, micha isht talakchi puta aiena kak a chi hoke.

38. Amba chuka nowvt aya itikba hvshi akochaka pilla okla moma im vlhtipo hvshi akocha pilla ho binachi hokvto, Moses micha Alon micha ushi vhleha aiena kak achi hoke, yummvt vlhtipo holitopa ya atonit ieshit Israel im vlla vhleha ha pehlichia chi hoke, hatak inla yosh bilika vla hokvto illi pulla chi hoke.

39. Lefait vhleha holhtina moma, Chihowah yvt apesa na chuka achvfa puta Moses micha Alon ita tuklo kvv hohtena tuk a nakni moma hvshi achvfa ai vhli vttvt vba maya kvv tahlepa sipokni pokoli tuklo akucha tuklo tok.

40. Mihma Chihowah yvt Moses a, Israel im vlla vhleha nakni vttahpi moma hvshi achvfa ai vhli vttvt vba maya ka ish hohtena cha hohchifo holhtena ka ish ishashke.

41. Micha Israel im vlla vhleha ai iti takla ya tikba vta ak oh chatuk a atobbichit Lefait vhleha hak o is svv isha chi hoke, (Chihowah sia hoke,) micha Israel im vlla vhleha i wak ai iti takla tikba cheli ak oh chatuk a atobbichit Lefait vhleha i wak ak a chi hoke, im achi tok.

42. Mihma Chihowah yvt im apesa tuk mak o, Moses vt Israel im vlla vhleha tikba vtta moma ka hohtena tok.

43. Mihma nakni tikba vtta moma hvshi achvfa ai vhlit vba maya hohchifot holhtina holhtina tuk vt tahlepa sipokni pokoli tuklo akucha tuklo cha tahlepa tuklo pokoli untuklo akucha tuchina tok.

44. Mihma Chihowah yvt Moses a im anumpulit,

45. Israel im vlla vhleha tikba vtta moma ak oh chatuk a atobbichit Lefait vhleha hak o, micha i wak ak oh chatuk a atobbichit Lefait vhleha i wak ak o ish ieshashke; mihma Lefait vhleha hak osh vmmi ha chi hoke: Chihowah sia hoke.

46. Micha falvmminchit chumpa chi Israel im vlla vhleha tikba vtta ai achvfa tahlepa tuklo cha pokoli untuklo akucha tuchina yvmmvt Lefait vhleha i shahli ka,

47. Noshkobo vlhpisa ho shekel tahlapi bieka ho ish isha chi hoke, vlhtipo holitopa ai vlhpisa shekel vlhpisa ho ish isha chi hoke, shekel vt kelah pokoli tuklo hoke.

48. Micha vlhkocha falvmminchit chumpa he tuk o ishit chumpa tvli holisso yash Alon micha ushi vhleha hak o ish imashke, achi tok.

49. Mihma Moses vt falvmminchit ishit chumpa tvli holisso yash Lefait vhleha hvt falvmminchit chumpa tuk vlhkocha yash im ishi tok.

50. Israel im vlla vhleha tikba vtta hak o tvli holisso im ai eshi tok; vlhtipo holitopa ai vlhpisa shekel iakaya hosh shekel tahlepa sipokni achvfa cha tahlepa tuchina pokoli hannali akucha tahlapi tok.

51. Mihma Chihowah im anumpa mak o Chihowah yvt Moses a im apesa hatuk mak o falvmminchit chumpa tuk vlhtoba kash ishi cha, Alon micha ushi vhleha aiena ka ima tok.

CHAPTA IV.

MIHMA Chihowah hvt Moses micha Alon a im anumpulit,

2. Kohalh ushi vhleha Lefai ushi vhleha ai iti takla aiasha ka iki vhleha in chuka achvfa vlhpisa, micha in chuka achvfa vlhpisa ho holhtina ka ish ishashke.

3. Afvmmi pokoli tuchina ai vhlit vba mayvt afvmmi pokoli tahlapi ont ai vhlit okla moma i binah nana a toksvli isht ai ahanta chi hosh okla ho ibafohka moma kak ashke.

4. Ilvppak osh Kohalh ushi vhleha nana isht aiahashwa ya chi hoke, okla moma i binah anukaka, naholitopa moma i shahli ak achi hoke.

5. Atuk osh binah hvt tikba iakma, Alon micha ushi vhleha aiena kvv vla cha, isht ompoholmo on hlipia ya akvchi cha, nan isht atokowa afohka itombi holitopa ya isht ompohomashke.

6. Micha bacha hakshup isht ompoholmo yo isht om patali cha nantvna okchamali bieka ho om patali cha in tvbi a apitta chi hoke.

7. Micha pvska otvni im ai impa paknaka ya nantvna okchamali yo isht ompohomo cha, ampo, micha isht impa puta, micha ampo puta micha isht ompoholmo aiena ompohoma chi hosh on ashacha chi hoke; mikma pvska talaya bilia yvt on aiasha chi hoke.

8. Micha nantvna tishepa ya isht ompohoma cha, yvma bacha hakshup isht ompoholmo yo isht ompohomokmvt in tvbi a apitta chi hoke.

9. Micha pva ai o hikia, micha pva i bila ai vlhto, micha in tobaksi isht kiseli, micha i pva tuptua ai vlhto, micha bila ai vlhto puta im isht ai ahanta chatuk a nantvna okchamali ho ishi cha isht ompohoma chi hoke.

10. Micha yvma, micha nan ai vlhto moma ka bacha hakshup isht ompoholmo anukaka ashachi cha, iti fabvssa ya on talala chi hoke.

11. Micha tvli holisso lakna alta ya nantvna okchamali yo om patali cha, bacha hakshup isht ompoholmo yo isht ompohomokmvt, in tvbi ya apitta chi hoke.

12. Micha nan isht plesa puta vlhtipo holitopa ya ishit atoksvli chatuk moma ka eshi cha nantvna okchamali ho

apitta cha, bacha hakshup isht ompoholmo cha iti fabvssa ya on talala chi hoke.

13. Micha hituk chubbi alta ya on asha ka ishit kanchi cha nantvna humma ho om patala chi hoke.

14. Micha nan aivlhto puta, isht toksvli chatuk puta, na balama a hukmi, micha nipi isht okhawi, micha luak isht pehli, micha ampo mahaia chipunta, micha alta i nan aivlhto puta aiena ka on ashacha chi hoke, micha bacha hakshup isht ompoholmo yo isht ompohoma chi hoke, micha in tvbi apitta chi hoke.

15. Atuk o Alon micha ushi vhleha aiena kvv vlhtipo holitopa, micha vlhtipo holitopa i nan ai vlhto puta aiena ka ompohomot ont im vlhtaiyaha na, binah hvv iakma, yohmikma Kohalh ushi vhleha hvv shala chi hosh vla chi hoke; amba nana holitopa ya potola he keyu, yohmikmvt illa chi hoke. Ilvppa puta kak osh okla moma i binah aiasha kvv Kohalh ushi vhleha i shapoh ha chi hoke.

16. Mihma naholitompa isht vttta Alon ushi Eleasa nan vlhtoka kvv, pula ha chi bila, micha na balama champuli, micha nitak moma ilhpak im issa, micha ahvmmi bila, micha binah moma, micha vlhtipo holitopa micha nana aiasha moma, micha aivlhto aiasha aiena ka apistikela chi hoke, achi tok.

17. Mihma Chihowah yvt Moses, micha Alon a im anum-pulit,

18. Kohalhait vhleha in chukachvfa puta apvhlhichi ka Lefait vhleha ai ishit tvblit hvv ik kanchi kashke.

19. Amba ilvppak o ish i yvmihchi na, naholitompa moma i shahli bilika onakmvt okchaya cha ik illo kashke; Alon micha ushi vhleha aiena kvv iba chukowa cha, isht ai vttta, micha i shapoh alyuka ka im anola chi hoke.

20. Yohmi kia naholitopa puta kvv ompoholmo takla ka chukowvt pisa he keyu, yohmikmvt illa hi oke, achi tok.

21. Mihma Chihowah yvt Moses micha Alon a im anum-pulit,

22. Keshon ushi vhleha ha iki vhleha in chuka achvfa puta hlopullit chukachvfa vlvhisa ho holhtina ka ish ishashke.

23. Afvmmi pokoli tuchina ai vhlit vba mayvt afvmmi pokoli tahlapi ont vhli kak o ish hohtenashke; nan isht ahanta chi hosh okla moma i binah atoksvli isht ahanta chi hosh chukowa moma kak a chi hoke.

24. Nan isht ahanta ilvppak osh Keshonait in chuka-achvfa puta isht ahanta, micha i shapoh ha chi hoke.

25. Micha binah nantvna takali puta micha okla moma i binah, micha im isht ompoholmo, micha bacha hakshup isht ompoholmo paknaka ompoholmo tuk, micha okla moma i binah okhissa ya in takali,

26. Micha wanuta ya in takali puta, micha wanuta i holihta okhissa in takali, yvmmvt binah ha i bilika, micha alta ya bilika apakfoyupa, micha im isht talakchi, micha isht pilesa i moma, micha nan im ikbi tuk moma kak a hi oke, yvmohmi hosh isht ahantashke.

27. Alon micha ushi vhleha aiena kak osh Keshonait ushi vhleha nan im isht aiahanta he moma, i shapoh moma micha im isht aiahanta he moma aiena kvit im vlhpisashke i shapoh, nan isht aiahanta moma hvsh im apesa hi oke.

28. Ilvppak osh Keshonait ushi vhleha in chuka achvfa puta okla moma i binah ha isht aiahanta ya chi hoke; mihma naholitompa isht vta Alon ushi Ihlama ak osh pehlichia chi hoke.

29. Melali ushi vhleha hano iki vhleha in chuka achvfa, in chuka achvfa vlhpisa ho ish hohtenashke.

30. Afvmmi pokoli tuchina ai vhlit vba mayvt afvmmi pokoli tahlapi ont vhli nan isht aiahanta okla moma i binah atoksvli isht aiahanta chi hosh iba chukowa ya ish hohtenashke.

31. Mikma okla moma i binah nan im isht aiahanta moma i shapoh aiena kvit ilvppak achi hoke; binah im iti bvsha, micha im iti okhowat kvchi micha in tonik, micha ai o hikia im puta,

32. Micha wanuta apakfoyupa tonik puta, micha im ai o hikia puta, micha im isht ahonahla puta, micha im isht talakchi puta, nan im isht pilesa puta; micha nan im isht aia-

hanta puta aiena kak achi hoke; micha i shapoh ieshi nan isht plesa puta ka hochifo hosh ish hohtena chi hoke.

33. Nan isht ahanta ilvppak o naholitompa isht vta Alon ushi Ihlama yvt pehlichu ho Melali ushi vheha in chuka achvfa puta kvv okla moma i binah nan im isht aiahanta moma ka isht ahashwa chi hoke, achi tok oke.

34. Mihma Moses micha Alon micha okla moma i shahli aiena kvv Kohalhait a in chuka achvfa vlvpsa ho micha iki vheha in chuka achvfa vlvpsa ho hohtena tok.

35. Afvmmi pokoli tuchina ai vhlit vba mayvt afvmmi pokoli tahlapi ont vhlis isht aiahanta okla moma i binah atoksvli iba chukowa tuk puta kak a tok.

36. Mihma in chuka achvfa vlvpsa ho holhtina kvv tahlepa sipokni tuklo cha tahlepa untuklo pokoli tahlapi tok.

37. Ilvppa puta kak osh Kohalhait vheha in chuka achvfa puta, okla moma i binah atoksvli isht aiahanta vlvpsa, Chihowah hvv Moses a tohvvv apesa na, Moses micha Alon ita tuklo kvv hohtena na holhtina tok.

38. Mikma Keshon ushi vheha in chuka achvfa puta hlopullit iki in chuka achvfa vlvpsa hosh,

39. Afvmmi pokoli tuchina ai vhlit vba mayvt afvmmi pokoli tahlapi ka ont vhlis nan isht aiahanta okla moma i binah atoksvli iba chukowa puta,

40. In chuka achvfa puta hlopullit iki in chuka achvfa vlvpsa hosh holhtina tuk vt tahlepa sipokni tuklo cha tahlepa hannali pokoli tuchina tok,

41. Ilvppa puta kak osh Keshon ushi vheha in chuka achvfa puta okla moma i binah ha nan isht aiahanta hinla moma ka, Chihowah hvv apesa tuk mak o, Moses micha Alon ita tuklo kvv hohtena na holhtina tok.

42. Mihma Melali ushi vheha in chuka achvfa puta holhtina kvv chuka achvfa puta hlopullit iki vheha in chuka achvfa vlvpsa hosh,

43. Afvmmi pokoli tuchina ai vhlit vba mayvt afvmmi pokoli tahlapi ont vhlis nan isht ahanta okla moma i binah atoksvli iba chukowa puta,

44. In chuka achvfa puta vlhpisa hosh holhtina tuk vt tahlepa sipokni tuchina cha tahlepa tuklo tok.

45. Ilvppa puta kak osh Melali ushi vhleha in chuka achvfa puta, Chihowah hvt Moses a tohnot apesa tuk mak o, Moses micha Alon ita tuklo kv̄t hohtina na holhtina tok,

46. Lefait vhleha moma ka Moses micha Alon micha Israel i shahli vhleha aiena kv̄t in chuka achvfa puta vlhpisa, micha iki vhleha in chuka achvfa puta vlhpisa ho hohtena na holhtina tok.

47. Afvmmi pokoli tuchina ai vhlit vba mayvt afvmmi pokoli tahlapi ont vhli moma hosh nan isht aiahanta isht vtta chi, micha okla moma i binah shapoh ai asha ka isht vtta chi hosh vla tuk vt,

48. Holhtina tuk vt tahlepa sipokni untuchina cha tahlepa tahlapi pokoli untuchina tok.

49. Chihowah hvt Moses a tohnot apihisa tuk mak o, isht aiahanta aiyukali vlhpisa hosh micha i shapoh aiyukali vlhpisa hosh holhtina tok, yakohmi hosh Chihowah yvt Moses a im apesa tuk mak o holhtina tok.

CHAPTA V.

MIHMA Chihowah hvt Moses a im anumpulit,

2. Israel im vlla vhleha hvt lepa puta, micha hayihchi yunahanli puta, micha kv̄na hosh illi isht liteha tuk puta aiena ka binah ha akochicha chi ka ish im apesashke.

3. Nakni micha tek aiena hv̄sh kohchashke; binah kohchit kocha ya isht hv̄sh onashke; yvmohmi hosh i binah ai iklv̄nna aiahanta li ka ik litehlo kashke, achi tok,

4. Mihma Israel im vlla vhleha hvt yvmihchi tok; micha binah ha kohchit kocha isht ona tok; Chihowah yvt Moses a im anumpuli tuk mak o, Israel im vlla vhleha hvt yvmihchi tok.

5. Mihma Chihowah hvt Moses a im anumpulit,

6. Israel im vlla vhleha ha ish im anumpulashke, Hatak okma, ohoyo hokma nana hosh nanashvchi hatak ayvmoh-

mi chatuk a yvmohmit Chihowah i yoshoba yumihchi cha hatak yvmmt onvtoyulakma.

7. Yvmohmikma nana ashvchi yvmohmi tuk vt okla il ai anola hi oke, micha i yoshoba tuk a nana hatuk o i falvminchi cha ishit tahlapi ho im apotola hi oke.

8. Amba i yoshoba tuk vt i falvmincha he vlhpesa i kanomi vt iksho hokmvno, yoshoba tuk vt Chihowah yak o i falvminchit naholitompa isht vta ya imashke, nan ashvchi tuk vt isht i kashofa chi kvv isht vlhtoba chukfi nakni aiena ho ima hi oke.

9. Micha nan im issa puta Islael im vlla vhleha i nana holitopa puta moma naholitompa isht vta isht im vla kvv immi ha hi oke.

10. Micha hatak puta i nahullochi puta kvv immi ha chi hoke; hatak nana hosh nana ho naholitompa isht vta ya imakma, immi ha chi hoke; achi tok.

11. Mihma Chihowah yvt Moses a im anumpulit,

12. Islael im vlla vhleha im anumpulit, Hatak kvna kia tekchi yosh naksika onvt nayoshoba i yoshobakma,

13. Yohmikma hatak vt iba tvshkit itin lumakakma, i hatak vt ik peso, yohmi na ik otano, mihma liteha, mihma i sanalit atokola he vt iksho, micha yvmohmi ka ik peso,

14. Mikma hatak ash chukvsh nuktvhla yvt onvtoyula cha, tekchi yash i nuktvhla, mikma ohoyo hvv litehakma, keyukmvv chukvsh nuktvhla yvt onvtuyula cha tekchi yash i nuktvhla kia ohoyo hvv liteha keyu,

15. Yohmikma hatak ash osh tekchi ya naholitompa isht vta isht im ona he, mikmvv ohoyo hash nan im issa bali pushi efah ishit pokoli ho isht im vlashke; bila on hlatvbla he keyu, micha flakinsen onocha he keyu; yvmmt nuktvhla nan im issa, isht ithaiyana nan im issa yosh nan ashvchi ithvnanchi yoka.

16. Mikma naholitompa isht vta yvt bilika isht vlvv Chihowah itikba binilecha hi oke.

17. Micha naholitompa isht vta yvt oka hullochi ya lukfi ampo vnit isha hi oke, micha lukfi pushi vlhtipo holitopa asha ka ishi cha, oka yash vna hi oke.

18. Micha naholitompa isht vtta yvt ohoyo hash Chihowah itikba binilechit, ohoyo noshkobo ompoholmo im ai ishi cha isht ithaiyana nan im issa yash, yummvt nuktuhla nan im issa yash ibbak fohka hi oke, micha naholitompa isht vtta yvt oka homi, nan ik achukmo tobachi yvt ibbak fohka chi hoke.

19. Micha naholitompa isht vtta yvt anumpa kullo anumpulit, ohoyo hash atokolit i mihvt, Hatak nana kia chiba tvshki tuk keyu, micha naksika onvt chi hatak ak keyu, amba inla yo na liteha iti yvmohmi ya chik yvmohmo tuk mvt oka homi ilvppa nan ik achukmo tobachi ya nan isht ik chi kanihmo kashke.

20. Amba naksika onvt inla ho chi hatak ak keyu ho ish im ona tuk osh chi litehakma, micha chi hatak keyu, hatak nana hosh chiba tvshki tuk ma,

21. Yohmikma naholitompa isht vtta yash osh ohoyo hash anumpa kullo anumpulit atokolit i miha hi oke, micha naholitompa isht vtta yvt ohoyo hash, Chihowah yvt chiyubi ya shuachikmvt micha chikfoka ya shatvblichikmvt chim okla ai ititakla ya nan ik achukmo onvtonla, anumpa kullo onvtonla Chihowah yvt chikbashke.

22. Mikma nan ik achukmo tobachi oka ilvppvt chikfoka ya shatvblicha chi hosh micha chiyubi ya shuacha chi hosh chi takoba ya chukowa chi hoke, im acha hi oke. Mikma ohoyo hash ot Amen, Amen, acha hi oke.

23. Mikma naholitompa isht vtta yvt nan ik achukmo ilvppa puta ka holisso ho aholissochi cha oka homi yash ishit kashoffa hi oke.

24. Micha ohoyo hash nan ikachukmo tobachi oka homi ya ishkochecha hi oke, mihma nan ikachukmo tobachi oka yvt chukowakmvt homa hi oke.

25. Yohmikma naholitompa isht vtta yvt nuktuhla nan im issa ohoyo ibbak foyuka kash ishi cha nan im issa yash Chihowah itikba ya wali cha alta onochit im issa hi oke.

26. Mihma naholitompa isht vtta yvt nan isht ithaiyana nan im issa yash, ibbak alota achvfalit ishi cha, alta onochit

hukma hi oke, yumihi ha yosh oka yash ohoyo hash o ishkochecha hi oke.

27. Atuk o oka ya ishkochechikma, yohmikma yakohma hi oke, liteha tuk okma, micha i hatak a i yoshoba tuk okma nan ik achukmo tobachi oka yash osh chukowakmvt homa hi oke, micha ikfoka yvt shatvblikma iyubi vt shua hi oke, mikmvt ohoyo hash osh im okla ai iti takla ya nan ika-chukmo onvtuyula yosh ahanta hi oke.

28. Amba ohoyo hash osh liteha hatuk keyu, amba kash-ofa hatuk okmvt yohmikmvt nan ik i kaniohmo ka he, micha vlla shala hi oke.

29. Ohoyo hvt i hatak ak keyu inla ho im onvt naksika ona cha litehakma nuktvhla nan vlhpisa ilvppak a hi oke.

30. Keyukmvt chukvsh nuktvhla vt onvttoyula cha tekchi ya i nuktvhlakmvt, Chihowah itikba binilecha na, naholiotomp isht vttta yvt nan vlhpisa ilvppa moma ka onocha hi oke.

31. Yohmikma hatak ash osh nan ashvchi ik onvtoyulo ho, ohoyo ilvppak osh nan ashvchi vt onvttoyula hi oke, ish im achashke, im achi tok.

CHAPTA VI.

MIHMA Chihowah yvt Moses a im anumpulit,
2. Israel im vlla vhleha ha im anumpulit, Hatak okma, ohoyo hokma, nana hosh ila filvmmichit Chihowah ya il im issa chi hosh Nasalait anumpa il onochi ya anumpa il onochikmvt,

3. Oka paki micha nan ishko kullo ya ila filvmmichi cha, oka paki hauwvshko, micha nan ishko kullo hauwvshko ya ik ishko ka hi oke, micha oka paki okchi nana kia ik ishko kashke, micha paki nuna, keyukmvt paki shila yoh kia ikpo kashke.

4. Ile filvmmichit ahanta nitak moma ka nana hosh pakupi atohomba, nihi vttvt hakshup ont vhli atoba ka vpa he keyu hoke.

5. Ile filvmmichit anumpa ilonochit ahanta nitak moma ka nutakhish isht vlmo nana kia noshkobo ha ik onvtoyulo ka hi oke, ile filvmmichi Chihowah ya im il issa tok nitak vt ik taho kisha ka holitopa cha noshkobo pashi ya apoacha hi oke.

6. Ile filvmmichit Chihowah ya im il issa nitak takla kut nipi illi ya bilika ik ono ka hi oke.

7. Iki atuk oh kia, keynkmvt ishki atuk oh kia, itibapishi atuk oh kia, keyukmvt in tek atuk osh illi kia, isht ile litehla he keyu hoke, Chitokaka ya im ile hullochi tuk vt noshkobo ha onvtoyula hoke.

8. Ile filvmmichit ahanta nitak moma hokvt Chihowah ya i holitopa hoke.

9. Atuk o yakosi itin takla fehna ho bilika ho hatak vt illi na ile hullochi noshkobo onvtonla kash litehli tukmvt ile kashoffi nitak akinli hosh noshkobo ha shafa hi oke, nitak isht untuklokma shafa hi oke.

10. Atuk osh nitak isht untuchinakma pvchi yoshoba tuklo, Keyukmvt pvchi himita tukloho na holitompa isht vtta isht im onvt okla moma i binah okhissa ya isht ona hi oke.

11. Mikma naholitompa isht vtta yvt achvfa ka nan ashvchi im issa yo im issakmvt, achvfa ya hukmit im issa yo im issa cha i kashoffashke, illi yo ishit yoshoba hoka, micha nitak yvmmakinli ho noshkobo ha hullocha hi oke.

12. Mikma ile filvmmichit ahanta he nitak puta ka Chihowah ya i hullocha hi oke; micha yoshoba tuk im issa ya chukfi ushi afvmmi vmmona yo isht ona hi oke; Yohmi kia nitak tikba hatuk vto kvnia chi hoke, ile filvmmichi tuk vt liteha hatuk oka, achi tok.

13. Michi ilvppak osh Nasalait i nanvlhpisa hoke; ile filvmmichi nitak vt ont tahakma, okla moma i binah okhissa ya isht vla hi oke.

14. Mikma Chihowah nan im issvt hukmit im issa ya chukfi ushi nakni afvmmi vmmona aiokpuloka iksho achvfa micha nanashvchi im issa yo chukfi ushi tek afvmmi vmmona ai okpuloka kut iksho, achvfa micha iti nanaiyvchit im issa yo chukfi nakni aiokpuloka kut iksho achvfa ho,

15. Micha pvska ik shatvmmo kishi achvfa, bota tohbi lipehbi pvska lumbo bila itaiyoma, micha pvska ikshatvmmo tapvski bila ahama, micha ilhpak im issa, micha nan ishkot im issa aiena ho im issa hi oke.

16. Mikma naholitompa isht vtta yvt Chihowah itikba isht vla cha, nanashvchi im issa, micha hukmit im issa ya im issa hi oke.

17. Micha chukfi nakni ya itin nanaiyvchi im issa vbit im issa mak o, pvska ik shatvmmo kishi achvfa aiena ka Chihowah im issa hi oke. Naholitompa isht vtta yvt ilhpak im issa micha nan ishko im issa ak kia im issa hi oke.

18. Mikma Nasalait ash osh ile filvmmichi noshkobo ha okla moma i binah okhissa ya a shafa hi oke, mikmtv ile filvmmichi noshkobo pashi yash luak yvmmvt itin nanaiyvchi im issa vbit isht aiokpvchi nutaka asha tuk a itvcha hi oke.

19. Mikma naholitompa isht vtta yvt chukfi nakni yash fullup honni ya, micha pvska ikshatvmmo lumbo achvfa ho, kishi ha akohchit, micha pvska ik shatvmmo tapvski achvfa aiena ho, ishi cha ile filvmmichi pashi vt vlmo ha yo ibbak fohka hi oke.

20. Micha naholitompa isht vtta yvt walit im issa yo Chihowah itikba ya walashke, ilvppak okvt ikkishi wali, micha fullup wali aiena kvv naholitompa isht vtta ya i hullocha hi oke, mikma i himmakmvno Nasalait ash ot oka paki ishka hinla hoke.

21. Ilvppak osh Nasalait yvmmvt anumpa ilonochi tuk i nan vlhpisa hoke, micha ile filvmmichit Chihowah nan im issa, micha ibbak vt ishi tuk aiena hoke; anumpa ha il onochi tuk mak ash yakohmit ile filvmmichi nan vlhpisa iakaiyvt yvmihchi pulla hi oke, ish im achashke im achi tok.

22. Mihma Chihowah yvt Moşes a im anumpulit,

23. Alon micha ushi vhleha ha im anumpulit, yakohmichi hosh Israel im vlla vhleha ha yukpali anumpa ha hvsh onochashke.

24. Chihowah yvt hvchi yukpalashke, micha hvchi halanlashke.

25. Chihowah yvt i nashuka ya hvchi on tohwikelichashke; micha hvchi kanashke.

26. Chihowah yvt i holhponayo hanta hvchi onochi cha a nuktaiyala hvch imashke, hvsh im achashke, ish achashke, im achi tok.

27. Micha sa hohchifo ha Israel im vlla vhleha ha onocha hi oke, mikma yukpali la hi oke, achi tok.

CHAPTER VII.

ATUK o yakohmi tok, Moses vt vlhtipo ha hilechit taiyahli cha, nan ahvmmit hullochit, micha nan isht pilesa aiasha moma, micha alta, micha nan aivlhto aiasha moma aiena ka nan ahvmmit hullochi tok, nitak akinli ka.

2. Israel i holitopa vhleha iki vhleha in chuka achvfa i noshkoboka, yvmmt avehlichy puta ka i holitopa vhleha, micha holhtina tuk a vehlichy yatuk osh, im issa tok.

3. Micha nan im issa yvt itichanvlli ompoholmo hannali, micha wak toksvli auaktuklo ho Chihowah itikba ya isht vla tok, i holitopa tuklokma itichanvlli achvfa, mikma aiyukali ka wak achvfa bicka tok, micha vlhtipo itikba isht vla tok.

4. Mihma Chihowah yvt Moses a im anumpulit,

5. Ish im ai ishashke, mikma okla moma i binah ha isht in toksvlashke, micha Lefait vhleha hak o hatak vt isht aiahanta aiyukali vlvpsa ho ish imashke.

6. Mihma Moses vt itichanvlli micha wak aiena kash ishi cha Lefait vhleha ha ima tok.

7. Itichanvlli tuklo micha wak ushta aiena ka Keshon ushi vhleha hak o isht aiahanta vlvpsa mak o ima tok.

8. Micha itichanvlli ushta micha wak untuchina aiena ka Melali ushi vhleha hak o isht aiahanta vlvpsa mak o ima na, naholitompa isht vta Alon ushi Ihlama ibbak foyuka tok.

9. Amba Kohalh ushi vhleha hano ik emo, vlhtipo holitopa ak o isht aiahanta ak osh immi hosh tahchi onochit shoyula chi hatuk oka.

10. Mihma holitopa vhleha hvt alta ya hullochit nan ahvmmi nitak ma nan im issa tok; holitopa vhleha hvt nan im issa ya alta itikba ya ai im issa tok.

11. Mihma Chihowah yvt Moses a, I nan im issa ya alta hullochi hosh holitopa aiyukali kv̄t i nitak ont v̄lhpesakmvt im issashke, im achi tok.

12. Atuk o nitak vmmona i nan im issa im issa kv̄t Chutah ap ehlich i ai achvfa Amminatab ushi Nahshon ak atok.

13. Micha i nan im issa yvt tvli hvta ampo chito achvfa, weki kv̄t shekel tahlepa achvfa cha pokoli tuchina, tvli hvta ampo achvfa shekel pokoli untuklo v̄lhtipo holitopa i shekel v̄lhpisa hatok; ita tuklo kv̄t bota tohbi lipehbi bila itaiyoma ilhpak im issa ya chi hosh alota bika tok.

14. Isht impa achvfa tvli holisso lakna shekel pokoli yosh na balama alota,

15. Hukmit im issa ya chi ka wak hobvk himita achvfa, chukfi v̄lhpoa nakni achvfa, chukfi v̄lhpoa ushi afvmmi vmmona achvfa;

16. Nan ashvchi im issa yvt issi kosoma ushi achvfa,

17. Micha isht itinnanaiyvchi im issa ya chi ka wak hobak tuklo, chukfi nakni tahlapi, issi kosoma nakni tahlapi, chukfi ushi afvmmi vmmona tahlapi aiena tok. Ilvppak puta kak osh Amminatab ushi Nahshon nan im issa yatok.

18. Nitak atukla ka Sua ushi Nehlaneel Issaka ai achvfa hi olitopa ak osh im issa tok.

19. Micha i nan im issa yvt tvli hvta ampo chito achvfa, weki kv̄t shekel tahlepa achvfa cha pokoli tuchina, tvli hvta ampo achvfa shekel pokoli untuklo v̄lhtipo holitopa i shekel v̄lhpisa hatok; ita tuklo kv̄t bota tohbi lipehbi bila itaiyoma, ilhpak im issa ya chi hosh alota bika tok.

20. Isht impa achvfa tvli holisso lakna shekel pokoli hosh na balama alota;

21. Hukmit im issa ya chi ka wak hobvk himita achvfa, chukfi nakni achvfa, chukfi ushi afvmmi vmmona achvfa;

22. Nan ashvchi im issa yvt issi kosoma ushi achvfa;

23. Micha isht itinnanaiyvchi im issa ya chi ka wak hobvk tuklo, chukfi nakni tahlapi, issi kosoma nakni tahlapi, chukfi

ushi afummi vmmona tahlapi aiena tok. Ilvppa puta kak osh Sua ushi Nehlaneel nan im issa ya tok.

24. Nitak atuchina ka Helon ushi Eliab Sebulon im vlla vhleha holitopa ak osh im issa tok.

25. Micha i nan im issa yvt tvli hvta ampo chito achvfa, weki kvv shekel tahlepa achvfa cha pokoli tuchina, tvli hvta ampo achvfa shekel pokoli untuklo, vlhtipo holitopa i shekel vlhpisa hatok; ita tuklo kvv bota tohbi lipehbi bila itaiyoma ilhpak im issa ya chi hosh alota bika tok.

26. Isht impa achvfa tvli holisso lakna shekel pokoli hosh na balama alota;

27. Hukmit im issa ya chi ka wak hobvk himita achvfa, chukfi nakni achvfa, chukfi ushi afummi vmmona achvfa;

28. Nan ashvchi im issa yvt issi kosoma ushi achvfa;

29. Micha isht itin nanaiyvchi im issa ya chi ka, wak hobvk tuklo, chukfi nakni tahlapi issi kosoma nakni tahlapi, chukfi ushi afummi vmmona tahlapi aiena tok. Ilvppak osh Helon ushi Eliab nan im issa ya tok.

30. Nitak ont ai ushta ma, Sheteu ushi Elisu, Luben im vlla vhleha i holitopa ak osh im issa tok.

31. Micha i nan im issa yvt tvli hvta ampo chito achvfa, weki kvv shekel tahlepa achvfa cha pokoli tuchina tvli hvta ampo achvfa, shekel pokoli untuklo, vlhtipo holitopa i shekel vlhpisa hatok; ita tuklo kvv bota tohbi lipehbi bila itaiyoma ilhpak im issa ya chi hosh alota bika tok.

32. Isht impa achvfa tvli holisso lakna shekel pokoli hosh na balama alota;

33. Hukmit im issa ya chi ka wak hobvk himita achvfa, chukfi nakni achvfa, chukfi ushi afummi vmmona achvfa,

34. Nan ashvchi im issa yvt issi kosoma ushi achvfa;

35. Micha isht itin nanaiyvchi im issa ya chi ka, wak hobvk tuklo, chukfi nakni tahlapi, issi kosoma nakni tahlapi, chukfi ushi afummi vmmona tahlapi aiena tok, Ilvppak osh Sheteu ushi Elisu nan im issa ya tok.

36. Nitak ont ishit tahlapi ma Sulishattai ushi Shelumiel, Simeon im vlla vhleha i holitopa ak osh im issa tok.

37. Micha i nan im issa yvt tvli hvta ampo chito achvfa,

weki kvt shekel tahlepa achvfa cha pokoli tuchina, tvli hvta ampo achvfa shekel pokoli untuklo, vlhtipo holitopa i shekel vlhpisa hatok; ita tuklo kvt bota tohbi lipehbi bila itaiyoma ilhpak im issa ya chi hosh alota bika tok.

38. Isht impa achvfa tvli holisso lakna shekel pokoli hosh na balama alota;

39. Hukmit im issa ya chi ka wak hobvk himita achvfa chukfi nakni achvfa, chukfi ushi afvmmi vmmona achvfa,

40. Nan ashvchi im issa yvt issi kosoma ushi achvfa,

41. Micha isht itin nanaiyvchi im issa ya chi ka, wak hobvk tuklo, chukfi nakni tahlapi, issi kosoma nakni tahlapi, chukfi ushi afvmmi vmmona tahlapi aiena tok. Ilvppak osh Suli-shattai ushi Shelumiel nan im issa ya tok.

42. Nitak ont ishit hannali ma Teuel ushi Eliasaf, Kat im vlla vhleha i holitopa ak osh im issa tok.

43. Micha i nan im issa yvt tvli hvta ampo chito achvfa, weki kvt shekel tahlepa achvfa cha pokoli tuchina, tvli hvta ampo achvfa shekel pokoli untuklo vlhtipo holitopa i shekel vlhpisa hatok; ita tuklo kvt bota tohbi lipehbi bila itaiyoma, ilhpak im issa ya chi hosh alota bika tok.

44. Isht impa achvfa tvli holisso lakna shekel pokoli hosh na balama alota.

45. Hukmit im issa ya chi ka wak hobvk himita achvfa, chukfi nakni achvfa, chukfi ushi afvmmi vmmona achvfa;

46. Nan ashvchi im issa yvt issi kosoma ushi achvfa;

47. Micha isht itin nanaiyvchi im issa ya chi ka, wak hobvk tuklo, chukfi nakni tahlapi, issi kosoma nakni tahlapi, chukfi ushi afvmmi vmmona tahlapi aiena tok. Ilvppak osh Teuel ushi Eliasaf nan im issa ya tok.

48. Nitak ont ishit untuklo ma Ammihvt ushi Elishama Eflaim im vlla vhleha i holitopa ak osh im issa tok.

49. Micha i nan im issa yvt tvli hvta ampo chito achvfa, weki kvt shekel tahlepa achvfa cha pokoli tuchina, tvli hvta ampo achvfa shekel pokoli untuklo, vlhtipo holitopa i shekel vlhpisa hatok; ita tuklo kvt bota tohbi lipehbi bila itaiyoma, ilhpak im issa ya chi hosh, alota bika tok.

50. Isht impa achvfa tvli holisso lakna, shekel pokoli hosh na balama alota.

51. Hukmit im issa ya chi ka wak hobuk achvfa, chukfi nakni achvfa, chukfi ushi afvmmi vmmona achvfa;

52. Nan ashvchi im issa yvt issi kosoma ushi achvfa;

53. Micha isht itin nanaiyvchi im issa ya chi ka, wak hobuk tuklo, chukfi nakni tahlapi, issi kosoma nakni tahlapi, chukfi ushi afvmmi vmmona tahlapi aiena tok. Ilvppak osh Am-mihvt ushi Elishama nan im issa ya tok.

54. Nitak ont ishit untuchina ma Petashu ushi Kamaliel, Manasseh im vlla vhleha i holitopa ak osh im issa tok.

55. Micha i nan im issa yvt tvli hvta ampo chito achvfa, weki kv shekel tahlepa achvfa cha pokoli tuchina, tvli hvta ampo achvfa, shekel pokoli untuklo, vlhtipo holitopa i shekel vlhpisa ha tok: ita tuklo kv bota tohbi lipehbi bila itaiyoma, ilhpak im issa ya chi hosh alota bika tok.

56. Isht impa achvfa tvli holisso lakna shekel pokoli hosh na balama alota;

57. Hukmit im issa ya chi ka wak hobuk himita achvfa, chukfi nakni achvfa, chukfushi afvmmi vmmona achvfa;

58. Nan ashvchi im issa yvt issi kosoma ushi achvfa;

59. Micha isht itin nanaiyvchi im issa ya chi ka wak hobuk tuklo, chukfi nakni tahlapi, issi kosoma nakni tahlapi, chukfushi afvmmi vmmona tahlapi aiena tok. Ilvppak osh Petashu ushi Kamaliel nan im issa ya tok.

60. Nitak ont ishit chakkali ma Kiteoni ushi Abitan, Benchamin im vlla vhleha i holitopa ak osh im issa tok.

61. Yohmi kv i nan im issa yvt tvli hvta ampo chito achvfa, weki kv shekel tahlepa achvfa cha pokoli tuchina, tvli hvta ampo achvfa shekel pokoli untuklo, vlhtipo holitopa i shekel vlhpisa ha tok; ita tuklo kv bota tohbi lipehbi bila itaiyoma ilhpak im issa ya chi hosh alota bika tok.

62. Isht impa achvfa tvli holisso lakna shekel pokoli hosh nabalama alota;

63. Hukmit im issa ya chi ka wak hobuk himita achvfa, chukfi nakni achvfa, chukfushi afvmmi vmmona achvfa;

64. Nan ashvchi im issa yvt issi kosoma ushi achvfa;

65. Micha isht itin nanaiyvchi im issa ya chi ka, wak hobvk tuklo, chukfi nakni tahlapi, issi kosoma nakni tahlapi, chukfushi afummi vmmona tahlapi aiena tok. Ilvppak osh Kiteoni ushi Abitan nan im issa ya tok.

66. Nitak ont ishit pokoli ma Ammishattai ushi Ahiesa, Tan im vlla vhleha i holitopa ak osh im issa tok.

67. Yohmi kv̄t i nan im issa yvt tvli hvta ampo chito achvfa, weki kv̄t shekel tahlepa achvfa cha pokoli tuchina, tvli hvta ampo achvfa shekel pokoli untuklo, vlhtipo holitopa i shekel vlhpisa ha tok; ita tuklo kv̄t bota tohbi lipehbi bila itaiyoma ilhpak im issa ya chi hosh alota bika tok.

68. Isht impa achvfa tvli holisso lakna shekel pokoli hosh nabalama alota;

69. Hukmit im issa ya chi ka wak hobvk himita achvfa chukfi nakni achvfa, chukfushi afummi vmmona achvfa;

70. Nan ashvchi im issa yvt issi kosoma ushi achvfa;

71. Micha isht itin nanaiyvchi im issa ya chi ka, wak hobvk tuklo, chukfi nakni tahlapi, issi kosoma nakni tahlapi, chukfushi afummi vmmona tahlapi aiena tok. Ilvppak osh Ammishattai ushi Ahiesa nan im issa ya tok.

72. Nitak ont ishit auachvfa ho Oklan ushi Pachel, Asha im vlla vhleha i holitopa ak osh im issa tok.

73. Yohmi kv̄t i nan im issa yvt tvli hvta ampo chito achvfa weki kv̄t shekel tahlepa achvfa cha pokoli tuchina, tvli hvta ampo achvfa shekel pokoli untuklo, vlhtipo holitopa i shekel vlhpisa hatok; ita tuklo kv̄t bota tohbi lipehbi bila itaiyoma ilhpak im issa ya chi hosh alota bika tok.

74. Isht impa achvfa tvli holisso lakna shekel pokoli hosh nabalama alota;

75. Hukmit im issa ya chi ka wak hobvk himita achvfa chukfi nakni achvfa, chukfushi afummi vmmona achvfa;

76. Nan ashvchi im issa yvt issi kosoma ushi achvfa;

77. Micha isht itin nanaiyvchi im issa ya chi ka, wak hobvk tuklo, chukfi nakni tahlapi, issi kosoma nakni tahlapi, chukfushi afummi vmmona tahlapi aiena tok. Ilvppak osh Oklan ushi Pachel nan im issa ya tok.

78. Nitak ont ishit auah tuklo ho Enan ushi Ahila, Naf-tali im vlla vhleha i holitopa ak osh im issa tok.

79. Micha i nan im issa yvt tvli hvta ampo chito achvfa weki kvv shekel tahlepa achvfa cha pokoli tuchina, tvli hvta ampo achvfa shekel pokoli untuklo, vlhtipo holitopa i shekel vlhpisa hatok; ita tuklo kvv bota tohbi lipehbi bila itaiyoma ilhpak im issa chi hosh alota bika tok.

80. Isht impa achvfa tvli holisso lakna shekel pokoli hosh nabalama alota;

81. Hukmit im issa ya chi ka, wak hobvk himita achvfa, chukfi nakni achvfa, chukfushi afvmmi vmmuna achvfa;

82. Nan ashvchi im issa yvt issi kosoma ushi achvfa;

83. Micha isht itin nanaiyvchi im issa ya chi ka, wak hobvk tuklo, chukfi nakni tahlapi, issi kosoma nakni tahlapi, chukfushi afvmmi vmmuna tahlapi aiena tok. Ilvppak osh Enan ushi Ahila nan im issa ya tok.

84. Ilvppak osh Israel holitopa vhleha nan avvmmmit alta ya (ahama nitak ma) hullochi mak atok oke, tvli hvta ampo chito auah tuklo, micha tvli hvta ampo auah tuklo, tvli holisso lakna isht impa auah tuklo.

85. Tvli hvta ampo chito vt shekel tahlepa achvfa cha pokoli tuchina bieka tok, micha ampo vt pokoli untuklo bieka tok; tvli hvta nan avvlhto moma kvv vlhtipo holitopa shekel vlhpisa hosh shekel tahlepa sipokni tuklo cha tahlepa ushta tok.

86. Tvli holisso lakna isht impa na balama alota yash vto auah tuklo hosh vlhtipo holitopa shekel vlhpisvt shekel pokoli bieka tok, tvli holisso lakna isht impa moma kvv shekel tahlepa achvfa cha pokoli tuklo tok.

87. Hukmit im issa wak moma kvv wak hobvk auah tuklo, chukfi nakni auah tuklo, chukfushi afvmmi vmmuna auah tuklo, ilhpak im issa aiena; micha nan ashvchi im issa issi kosoma ushi vt auah tuklo tok.

88. Micha isht itin nanaiyvchi vbit im issa wak hobvk moma kvv pokoli tuklo akucha ushta, chukfi nakni pokoli hannali, issi kosoma nakni pokoli hannali, chukfushi afvmmi vmmuna pokoli hannali tok. Ilvppak osh alta nan ahama ha yo hullochi mak atok.

89. Atuk o Moses vt itim anumpula chi hosh okla moma i binah ha ont chukowa mvt, achufa hosh ai i nukhaklo nan itim apesa afohka itombi holitopa paknaka ompoholmo chelubim tuklo ka iti takla et ai im anumpohonli na haklo tok, mihma im anumpuli tok.

CHAPTA VIII.

MICHA Chihowah yvt Moses a im anumpulit,
2. Alon a im anumpulit, Pula ha ish pulalikma, pula untuklo kvv pulai o hikia ichapaka ya on tohwikelashke, ish im achashke, im achi tok.

3. Mihma Alon vt yvmihchi tok; Chihowah yvt Moses a im apesa tuk mak o, pula ai o hikia ichapaka ya pula ha pulali tok.

4. Pula ai o hikia vlhtaha ilppvt tuli holisso lakna lulla atok, vpi ont vhli, micha ai in chuwa ont vhli kvv tuli holisso lakna lullvt vlhtaha ya tok; holvt toba Chihowah yvt Moses a im anoli tuk mak o, yohmi hosh pula ai o hikia ya ikbi tok.

5. Mihma Chihowah yvt Moses a im anumpulit,

6. Lefait vhleha ha Israel im vlla vhleha i filvmmichit ish ishi cha ish kashoffashke.

7. Micha ish kashoffi kvv ish yakohmichashke, Oka ishit kashofa ish o fimdashke, mihma nipi ya moma shafashke, micha i nafohka ya achefashke, yvmohmi hosh ile kashofashke.

8. Yohmikmvt wak hobvk himita, micha ilhpak im issa, yvmvt bota tohbi lepehbi bila aiyoma aiena ishashke, mihma wak hobvk himita inla nan ashvchi im issa yo ish ishashke.

9. Micha Lefait vhleha ha okla moma i binah itikba ya isht ish onashke; micha Israel im vlla vhleha moma ka hoyot ish itvnashke.

10 Micha Lefait vhleha ha pehlichit Chihowah itikba ya isht ish onashke: mihma Israel im vlla vhleha hvv Lefait vhleha ha ibbak onochashke.

11. Mihma Alon vt Israel im vlla vhleha nan im issa mak o, Lefait vhleha ha, yvmmvt Chihowah nan isht im aiahanta isht ahanta chi ho Chihowah itikba ya im issa hi oke.

12. Mihma Lefait vhleha hvt wak hobuk himita puta kash noshkobo ha ibbak onochashke, mihma achvfa ka nan ashvchi im issakmvt achvfa kano hukmit im issvt, Chihowah ish im issvt Lefait vhleha ha ish i kashoffashke.

13. Micha Lefait vhleha ha Alon micha ushi vhleha itikba ish hilechi cha, Chihowah nan im issa yo ish im issashke.

14. Yakohmichi hosh Lefait vhleha ha Israel im vlla vhleha ish ai i filvmmichashke; mikma Lefait vhleha hvt vmmi ha chi hoke.

15. Atukma i himmak mak o, Lefait vhleha hvt iba chukowvt okla moma i binah nan ai isht ahanta ya yvmihcha hi oke: mihma ish kashoffi cha nan im issa yo ish im issashke.

16. Israel im vlla vhleha ai iti takla ka aiokluhvt vmmi toba hoka; im oshvto puta tiwi vmmona chatuk Israel im vlla vhleha vttahpi moma chatuk a atobbichit il ai ishi li tuk oke.

17. Israel im vlla vhleha vtta ahpi moma kv, hatak micha nan vllhpoa aiena kv vmmi hoka. Echip yakni ya vttahpi ya issot kanchi li nitak mvt hullochit il ai eshi li tok oke.

18. Micha Lefait vhleha hak o Israel im vlla vhleha vttahpi moma tuk a atobbichit ishi lishke.

19. Micha Lefait vhleha hvt okla moma i binah nan a toksuli isht ahantvt Israel im vlla vhleha i kashoffa chi ho Israel im vlla vhleha ai i filvmmichit, Alon micha ushi vhleha aiena ka na hvlbina ohmi ho ima li tuk oke. Yvmohmi ho Israel im vlla vhleha hvt vllhtipo holitopa bilika onakma, Israel im vlla vhleha ai iti takla ya ililli okpulo vt iksho kashke, achi tok.

20. Mihma Moses micha Alon micha Israel im vlla vhleha okla moma kv Lefait vhleha ha i yvmihchi tok. Lefait vhleha pulla ka Chihowah yvt Moses a im apihisa tuk mak o, yohmi ho Israel im vlla vhleha hvt i yvmihchi tok.

21. Mihma Lefait vhleha hvt kashofa cha i nafohka ya achéfa tok: mihma Alon vt nan im issa y_o, Chihowah itikba im issa tok; micha Alon vt kashofa chi hosh i kashoffi tok.

22. Atuk o i himmak ak o Lefait vhleha hvt Alon micha ushi vhleha aiena itikba ya okla moma i binah a toksvli yvmihcha chi hosh iba chukowa tok; Lefait vhleha pulla ka Chihowah yvt Moses a im apesa tuk mak o, okla hvt i yvmihchi tok.

23. Mihma Chihowah yvt Moses a im anumpulit,

24. Iluppak osh Lefait vhleha immi mak oke; afummi pokoli tuklo akucha tahlapi kak o vhlit vba maya kak osh iba chukowvt okla moma i binah a toksvli ya, isht aiahan-tashke.

25. Mich a afummi pokoli tahlapi ont vhli kak osh atoksvli isht ahanta kv_t issa cha himmakma isht ik ahanto kashke;

26. Yohmi kia itibapishi vhleha takla okla moma i binah isht aiahanvt apistikeli cha na toksvli hano ik yvmihcho ka hi oke. Apistikeli yummak okvno Lefait vhleha ha ish i yvmihchashke, achi tok.

CHAPTA IX.

MIHMA Chihowah yvt Moses a yakni haiaka Sinai ya Echip yakni ya kohcha tok afummi ont atukla micha hvshi vmmona ho im anumpulit,

2. Israel im vlla vhleha hvt vbanvblit ont ia vlpisa vt ont vlpesakma holitoblashke.

3. Himak hvshi nitak ont isht auahushta kv_t opiakma vlpisa hvt ont vlpesakma, hvsh holitoblashke; nan vlpisa moma hatuk o, micha nan akaniohma he moma vlpisa ya-tuk mak o, hvsh holitoblashke, im achi tok.

4. Mihma Moses vt Israel im vlla vhleha hvt vbanvblit ont ia ya holitoblich a chi ho im anumpulit tok.

5. Mihma hvshi vmmona nitak ont isht auahushta opia ma, yakni haiaka Sinai ya vbanvblit ont ia ya isht aiasha

tok; Chihowah yvt Moses a im apesa tuk moma kak o, Israel im vlla vhleha hvt yvmihchi tok.

6. Atuk o hatak kaniohmi kv̄t hatak illi nipi ishit liteha tuk osh, nitak yv̄mma vbanv̄blit ont ia isht asha he keyu tok; micha nitak yv̄mma Moses itikba micha Alon itikba ona tok.

7. Micha hatak yv̄mmak ash osh, Hatak illi nipi yo ishit pi litehv̄shke, nanta katiohmi kak o pi katv̄bli na Israel im vlla vhleha ai itin takla ya Chihowah nan im issa ya v̄lhpisa vt ont ai v̄lhpiesakma kil im isso ka ch̄i cho? im achi tok.

8. Mihma Moses vt, Lumvt hv̄sh hinlashke, mikma hv̄chishno pulla ka Chihowah ak osh nan apesa he, haklo lashke, im achi tok.

9. Mihma Chihowah yvt Moses a im anumpulit,

10. Israel im vlla vhleha ha im anumpulit, Hatak chi kanima hosh, keyukmvt hv̄chi aionchuloli yosh nipi illi yo ishit litehakma, keyukmvt yakni hopaki nowvt aya tuk okma, nana kia, vbanv̄blit ont ia ya Chihowah isht im aia-sha hi oke.

11. Hv̄shi atukla nitak ont isht auahushta opiakma isht ai asha cha pv̄ska ik shatv̄mmo, micha haiyukpulo homi aiena it ai impucha hi oke.

12. Ilatombvt bohli na ik onno kashke; micha foni nana kia ik kobafo kashke, vbanv̄blit ont ia nan v̄lhpisa moma hatuk mak o isht aiashashke.

13. Amba hatak vt liteha keyu, micha nowvt aya keyu hosh vbanv̄blit ont ia ya isht ik ahantokmvt, yv̄mmak okvt im okla ai itin takla ya fiopa tv̄pashke, Chihowah nan im issa ya v̄lhpisa tok vt ont v̄lhpiesakma; isht iklo hokvt, hatak yv̄mmvt ilap nan ashv̄chi vt onv̄toyulashke.

14. Okla inla yosh hv̄chi takla ahanta tuk osh, vbanv̄blit ont ia ya Chihowah isht im ahanta he ahnikmvt, vbanv̄blit ont ia nan v̄lhpisa mak o, micha nan akaniohmi mak o yv̄mihchashke; okla inla, hv̄chi yakni yash ai v̄tta tuk aiena kv̄t nan v̄lhpisa hv̄chim achv̄fashke, ish im achashke, im achi tok.

15. Atuk o binah hvt hikia nitak ma, hoshonti hvt binah

yummvt isht atokowa binah hā onvtoyula tok, atuk osh opia ma luak holba hosh binah ha onvtoyula na onnahinli tok.

16. Yumohmi na bilia beka tok, hoshonti hosh nitak ma onvtoyula tuk osh ninak ma luak ahoba hosh onvtoyula tok.

17. Atuk o hoshonti hosh binah paknaka ai ishit vba isht iakma, Israel im vlla vhleha hvt nowvt ia beka tok; atuk osh kanima ho hoshonti hvt hikiakma, Israel im vlla vhleha hvt yummak o binachi beka tok,

18. Chihowah hvt im apesa hō Israel im vlla vhleha hvt nowvt ia beka tok; atuk osh Chihowah hvt im apesa hō binachi beka tok; hoshonti hvt binah onvtola takla im vlhtipo fohvt asha beka tok.

19. Atuk o hoshonti hvt hopaki micha nitak laua hō binah paknaka onvtoyulakma, Israel im vlla vhleha hvt Chihowah nan isht im ahanta kā holitobli cha ik ayo beka tok.

20. Atuk o yakohmi beka tok, nitak kanohmi takla hō hoshonti hvt binah hā onvtoyulakma, Chihowah im anumpa hatuk mak o, im vlhtipo puta aiasha beka tok; atuk osh Chihowah im anumpa mak o nowvt ia beka tok.

21. Atuk osh yakohmi beka tok, hoshonti hvt talaia na opiaka vttvt onnahinli ont vhlakma, atuk osh onnahinlikma hoshonti hā vba isht iakma nowvt ia beka tok; nitak okmá, ninak okmá nana hō vba isht iakma nowvt ia beka tok.

22. Keyukmvt nitak tuklo hokmá, keyukmvt hvshi achvfa hokma, keyukmvt afvmmi achvfa hokma, nana hō hoshonti hvt binah paknaka talaia cha on talaia momakma, Israel im vlla vhleha hvt im vlhtipo aiasha cha, nowvt ik aiyo tok; amba vba isht iakma nowvt ia beka tok.

23. Chihowah im anumpa pulla hō im vlhtipo fohvt ai asha tok, anonti Chihowah im anumpa pulla hō nowvt ia beka tok; Chihowah nan isht im ahanta hā holitoblit Chihowah yvt Moses a nan im apesvt tohno tok a ieshi beka tok.

CHAPTA X.

MIHMA Chihowah yrt Moses a im anumpulit,
2. Tvli hvta isht pufa tuklo ho ish ikbashke; ita chakvchi keyu hosh ish ikbashke: yvmmak o okla moma isht ish i howashke, micha binah puta kvv ia chi isht ish im apesashke.

3. Atuk o ita tuklot isht olachikma okla moma kvv okla moma i binah okhissa ya chim ai itvnahashke.

4. Atuk osh isht pufa achvfa bano ho olachikma, holitopa vhleha yvmmvv Israel tahlepa sipokni puta i noshkoboka vt chim ai itvnahashke.

5. Nuktahla he ish olachikma, binah puta hvshi akochaka in tvnnvp asha kvv tikba iashke.

6. Atukla ma nuktahla he ish olachikma, binah puta oka mahli pilla in tvnnvp aiasha kvv, nowvt iashke; nowvt ia chi puta ka nuktahla hi ya okla olahanchashke.

7. Amba okla moma kvv itvnaha chi hokma ish olachi hoh kia, nuktahla hano chik olacho kashke.

8. Mikma naholitompa isht asha Alon ushi vhleha hak osh isht pufa ya olachashke; micha chim ai itishali puta hlopulli ka chi nan vllhpisa bilia ha chi hoke.

9. Atuk osh chi yakni ya, hvchin tvnvp vt hvch ilbvshali na, in tanampit hvsh iakmvv nuktahla he isht pufa hvsh olachashke; yohmikma hvchin Chitokaka itikba ya hvch ithana hi oke, mikma hvchin tvnvp a hvchi hlakoficha hi oke.

10. Michi hvchi yukpa nitak, micha nitak hvchi holitopa, micha hvchi hvshi isht ia vmmona puta ka, na hukmit im issa, micha isht itin nanaiyachi im issvt vbi puta ka paknaka isht pufa hvsh ai olachashke: yohmi na yvmmvv isht ithana bilia yosh Chihowah itikba itoyulashke, Chitokaka hvchin Chihowah sia hoke, achi tok.

11. Atuk o yakohmi tok, afvmmi ont atuklahvshi atukla kvv nitak ishit pokoli tuklo ma, hoshonti ha nan isht atokowa binah paknaka ya ai ishit vba isht ia tok.

12. Yohmi ma Israel im vlla vhleha hvv Sinai yakni haia-

ka isht ia tok; atuk o Pelan yakni haiaka yak o hoshonti hvt ont talaia tok.

13. Micha Chihowah hvt Moses a tohno tuk mak o, tikba ia tok:

14. Tikba fehna ya Chutah im vlla vhleha i binah na hvta shali ak osh okla vlhpisa mak osh ia tok; mikma in tvshka moma pehlichy vt Amminatab ushi Nahshon ak atok.

15. Mikma Issaka im vlla vhleha apehlichy tvshka moma pehlichy vt Sua ushi Nehlaneel ak atok.

16. Micha Sebulon im vlla vhleha apehlichy okla ha pehlichy vt Helon ushi Eliab ak atok.

17. Mihma binah ha akvchi ma, Keshon ushi vhleha, micha Melali ushi vhleha aiena kak osh binah ha sholi cha iakaiyvt ia tok.

18. Mihma Luben i binah na hvta shali ak osh okla ha vlhpisa mak osh wakayvt ia tok, mihma Sheteu ushi Elisu ak osh in tvshka vhleha ha pehlichy ak atok.

19. Mikma Simeon im vlla vhleha apehlichy tvshka vhleha pehlichy vt Sulishattai ushi Shelumiel ak atok.

20. Mikma Kat im vlla vhleha apehlichy tvshka vhleha pehlichy vt Teuel ushi Eliasaf ak atok.

21. Mihma Kohalhait vhleha hvt vlhtipo holitopa yo shaiyalit wakayvt ia tok; mikma ik ono kisha ho inlaka yvt binah ha hilechi tok.

22. Mihma Eflaim im vlla vhleha i binah nahvta shali okla ha vlhpisa mak osh wakayvt ia tok; mihma in tvshka vhleha ha pehlichy kv Ammihvt ushi Elishama ak atok.

23. Mikma Manasseh im vlla vhleha apehlichy tvshka vhleha pehlichy vt Petashu ushi Kamaliel ak atok.

24. Mikma Benchamin im vlla vhleha apehlichy tvshka vhleha pehlichy vt Kiteoni ushi Abitan ak atok.

25. Mikma Tan im vlla vhleha i binah nahvta shali vt yummak osh tvshka vhleha puta i binah puta moma hlopulli ka ashaka yatuk osh wakayvt ia tok; mihma in tvshka vhleha pehlichy kv Ammishattai ushi Ahiesa ak atok.

26. Mikma Asha im vlla vhleha apehlichy tvshka vhleha pehlichy vt Oklan ushi Pachiell ak atok.

27. Mikma Naftali im vlla vhleha apehliche tvshka vhleha pehliche vt Enan ushi Ahila ak atok.

28. Yakohmi hosh Israel im vlla vhleha hvt okla puta ka vllhpisa hosh wakaiyvt iakmvt itvnowa beka tok.

29. Mihma Moses vt Lekuel ushi Hobab Mitianait Moses ipochi yash, Yakni yvmma Chihowah yvt chima lashke, achi tok a ia hosh il itvnowa; pi awant ish iakma, nana achukma ka e chi yvmihchashke; Chihowah yvt Israel pulla ka achukma ho anumpuli tuk oka, im achi tok.

30. Mihma, Ia la he keyu, amba ivt a yakni akinli micha a kanomi ak o im ona la chi hoke i im achi tok.

31. Mihma, Chik pisso kashke, chim asilhha lishke; yakni haiaka yo binachit il itvnowa chi ka ish ithana hokvt, pi nishkin a he tuk a chishno ak ashke.

32. Mikma yakohmi hi oke, pi awant ish iakma ahli, yakohma hi oke; nana achukma nana ho Chihowah yvt piyvmihchikma, yvmmak inli ho e chi yvmihcha chi hoke, achi tok.

33. Mihma Chihowah i nvni ha issvt nitak tuchina anowa okla ona tok; mihma Chihowah nan itim apesa afohka itombi holitopa ak osh nitak tuchina anowa yvmma im afoha hoyot im ahayucha chi hosh tikba ia tok.

34. Mihma binah kochevt ia nitak ma, Chihowah i hoshonti hvt onvtoyula beka tok.

35. Atuk o yakohmi tok, itombi holitopa yvt wakayvt iakma, Moses vt Wakaya, Chihowah ma, mikma chin tvnvp puta kv ita fimimpashke; micha chi nukkilli vhleha hvt chi tikba yihlepashke, achi tok.

36. Atuk osh talaiakma, Israel tahlepa sipokni laua ka falamvt ish im vlashke, Chihowah ma, achi tok.

CHAPTA XI.

ATUK o okla hvt na mihvt anumpuli ma, Chihowah yvt ik im vllhpieso tok; micha Chihowah yvt haklo tok; mihmvt anukhobela yvt libbi tok, mihma Chihowah in luak vt luachit binah vlli puta aiasha tuk a hukmit tahli tok.

2. Mihma okla hvt Moses a i pahaya tok; mihma Moses vt Chihowah im asilhha ma luak vt mosholi tok.

3. Mihma yakni yumma Tabelah hochifo tok, Chihowah in luak vt ai itin takla ka hukmi tuk oka.

4. Mihma okla laua itaiyokoma takla asha tuk vt pushkvnot wakaya tok; micha Israel im vlla vhleha hvt anonti yaiya mut, kuta hosh nipi ya pipeta chi cho?

5. Echip a nvni, kukumba, micha shukshi puta, micha leek, micha shachuna puta, micha kalik puta laua ho epa fehna beka tok vt il ithaiyanvshke.

6. Yohmi tok kia himak ano pim ishilombish vt shilvt kvnivshke; nana kv iksho kmohmi, manna ilvppak illa pi nishkin itikba aiashvshke, achi tok.

7. Mihma manna yvt kolianta nihi ak o chohmi hosh pisa hokvto tellium ak o holba tok.

8. Mihma okla kohchvt itvnowvt aiowa cha afotoha a fotohli, keyukmut kiti a hosi cha, ampmahaia fohkit pvskacha pvskalumbo ikbi beka tok; mikma vpvtpisa ka bila himona chohmi beka tok.

9. Michaninak o fichak vt binah ha onvtolakma mannavt onvtola beka tok.

10. Mihma Moses vt okla hvt in chuka achvfa puta hlopulli kv i binah okhissa ya, hatak moma kv yahaya nahaklo tok; mihma Chihowah im ai i nukkilli vt libbi fehna tok; Moses ak kia ik im vhpieso tok.

11. Mihma Moses vt Chihowah ya, nanta katiohmi ho chin tishu ha ish ilbvshali cho? nanta katiohmi ho chim isht i kana ak chi ahayucho ho, okla illvppa moma na weki is sinochi cho?

12. Okla ilvppa moma ka shali li tuk oh cho? vno ak osh tobachi li tuk o, iki yosh vlla pishi ya shoyuli chohmit, chishakba fohkit shoyulit iki vhleha anumpa ilonochit yakni im issa li tok a isht ona, is svm acha hinla cho?

13. Okla ilvppa moma ka katima ak o nipi ai isht ima la hinla cho? a yaiyvt, Nipi ish pima na epashke, ahanchi hoka,

14. Vno ak illa hosh okla ilvppa moma ka shali la hekeyushke, a weki fehna hokvt.

15. Micha ilvppa o is sa yumiha chi hokmvt vmohmi-chit is subashke; na i kana chi tikba ai ahayuchi likma chim asilhha lishke, mikma a sulvsha kv ak peso kashke, im achi tok.

16. Mihma Chihowah yvt Moses a Israel im asvnonchi pokoli untuklo, yvma im asvnonchi, micha nan vltoka ya ish ithana kv, vm itunahlit okla moma i binah isht ish ona na chi apehvt yvma hielashke.

17. Mikma akowa lish yvmak o a chim anumpule lashke; micha shilombish chi onvtoyula ka ishi lish yvmak o ono-chi lashke; mikma okla pehlich i weki ka chiba shaiyalashke, mikma chishno ak bano hosh chik shaiyalo kashke.

18. Micha onnaha takla ka hvsh ile hullochashke; atuk osh nipi ya hvshpa chi hoke; hvsh yahayvt kvta hosh nipi ya pipeta chi cho? Echip ano pim aiachukma tok oka; hvsh achi ho Chihowah yvt haklo tuk oka; yvmohmi hoka, Chihowah yvt nipi hvch ima na, hvsh pa chi hoke,

19. Nitak achvfa ho hvsh pa he keyu, micha nitak tuklo keyu, micha nitak tahlapi keyu, micha nitak pokoli keyu, micha nitak pokoli tuklo keyu,

20. Amba hvshi achvfa ont hlopulli hok kia hvsh aham-pakma, polaka hvch ibishakni a kohchakmvt nan isht hvchi yuwala ya chi hoke; Chihowah hvchi takla ahanta ka hvsh shitilema cha, itikba ya ayaiyvt, Nanta katiohmi ho Echip a e kohcha tuk oh cho? hvsh achi hokvt, ish im achashke, achi tok.

21. Mihma Moses vt okla takla aya li, hatak aka aya yvt tahlepa sipokni bat tahlepa hannali hoke; mihma nipi ima likma, hvshi achvfa hlopulli kia vpashke, ish achishke

22. Ulhpoa chipunta aya kanohmi kia, micha vllhpoa hochito aya kanohmi kia im vbi na fihopa chi cho? ak cho? okhvta nuni aiasha moma hoyot im itvahlit fihobla hinla cho? achi tok.

23. Mihma Chihowah yvt Moses a Chihowah ibbak vt ik-falaiot taha hoh cho? vm anumpa hvvt chim aiahlikma ke-yukma nanakma ish pisa chi hoke, im achi tok.

24. Mihma Moses vt kohchvt ia cha, Chihowah im anum-

pa hash okla ha im anoli tok; micha okla im asvnonchi pokoli untuklo kash hoyo cha binah ha afolublichit hiohlechi tok.

25. Mihma Chihowah yvt hoshonti ishit akowa cha, im anumpuli tok, micha shilombish onvtoyula tuk a ishi cha, im asvnonchi pokoli untuklo kash onochi tok, atuk o yakohmi tok, shilombish vt onvtoyula ma tikbanli nana anolit Chihowah ya aiokpahanchi cha ik isso tok.

26. Yohmi kia hatak tuklo kvv achvfa hohchifo kvv Eltat, mikma achvfa hohchifo Metat osh binah ha ahashwa moma tok; mihma shilombish vt yvmmak o onvtoyula tok, yvmmak okvt holisso ka ibafoka tuk kia, kohchvt binah ha ik ono tuk atok, binah ahashwa hak inli kia tikbanli nana anolit Chihowah ya aiokpvchi tok.

27. Mihma hatak himita yosh malelit ivt Moses a im anolit, Eltat micha Metat ak kia binah ha ashvvt tikbanli nana anolit Chihowah ya aiokpvchishke, achi tok.

28. Mihma Nvn ushi Choshua Moses in tishu hvv hatak himithoa im asha achvfa yvt afalaminchit A shahli Moses ma! ish im olvbashke achi tok.

29. Mihma Moses vt, Uno ak atuk mak o ish potvno cho? Chihowah yvt vvhpesa ahni na, Chihowah im okla moma kvv tikbanli nana anolit Chihowah ya aiokpvchi hokbano, micha Chihowah hvv shilombish a onochi hokbano, im achi tok.

30. Mihma Moses micha Israel im asvnonchi aiena kvv binah ha ona tok.

31. Atuk o Chihowah hvv mahli ha kohchichi na, kofi ha okhvta ha ai isht vlvv okla i binah ilvppa in tvnnvp nitak achvfa anowa, mihmvt in tvnnvp a nitak achvfa anowa chohmi ho ai eshit binah ha apakfoyupa cha yakni paknaka ya kubit tuklo chohmi ho aiasha tok.

32. Mihma okla hvv nitak yvmmvv hlopulli ka, micha ninak yvmmvv hlopulli ka, micha nitak atukla kvv hlopulli ka hielit aiowa tok; moma ik alauwo ho aiowa kvv homa pokoli ho aiowa tok micha binah ha a mominchit apakfoyuplit patali tok.

33. Atuk o nipi ash o noti ya ishit kiseli moma ik hopa-so kisha ho Chihowah im ai i nukkilli vt okla ha i sanalit libbi tok; micha Chihowah yvt okla ha illilli okpulo fehna ho isht isso tok.

34. Mihma yakni yvmma Kiblohl hattaafah hochifo tok; yvmmak o pushkvno tuk okla hvv ahollohpi tok oka.

35. Mihma okla hvv Kiblohl hattaafah ya ashvt ia hosh Haselohl a ona tok: micha Haselohl ak o aiasha tok.

CHAPTA XII.

ATUK o Miliam micha Alon ita tuklo kvv Moses vt Ehliopian ohoyo yvmma itauwaya tuk ak o na mihachit anumpuli tok. Ehliopian ohoyo ho itauwaya tok atuk oka.

2. Michā Chihowah yvt Moses ak illa ho tohnot anum-puli tuk oh cho? pishno ak kia pi tohnot anum-puli tuk ak inli keyu cho? achi tok. Mihma Chihowah yvt haklo tok.

3. Yohmi ka hatak Moses vt chukvsh yohbi kvv hatak moma yakni paknaka aiasha ka i shahli tok.

4. Mihma Chihowah yvt yakosi itin takla ho Moses micha Alon micha Miliam aiena ka im anumpulit, Hvsh tuchina kvv kohchvt okla moma i binah ha hvshlashke. Mihma yvmma tuchina kvv kohcha tok.

5. Mihma Chihowah yvt hoshonti tonik ibafokvt akowa cha, binah holitopa okhissa ya hikia cha, Alon micha Miliam a i howa tok; mihma ita tuklot kohcha tok.

6. Mihma Himak a vm anumpa ha hvsh haklashke; hvch itin takla ya hopaii vt ahantakma, Chihowah sia hvv nan otvni yo im ile haiakvchi lashke, micha holhpokna ho itim anumpule lashke.

7. Yohmi kia an tishu Moses vt yohmi keyu, yvmmak okvt an chuka ya nana aiasha moma ka aiahli hoke.

8. Yvmmak okvno itih bika itim anumpohonli chohmit itim anumpule la chi hoke: micha anumpa luma ha chi keyu hoke; mikma Chihowah holba pisa chi hoke; yohmi

ka nantihmi ho an tishu Moses a na mihachit anumpuli ka ik hvchi nukwio tuk oh cho? im achi tok.

9. Mihma Chihowah im ai i nukkilli vt i sanalit libbi tok; mihmvt ia tok.

10. Mihma hoshonti hvt binah holitopa yash issvt ia tok; mihma yakeh, Miliam vt leplosi vbit tohbi kvv okti chiyuhmi tok; mihma Alon vt Miliam a pisa ma, yakeh, leplosi vbi tok.

11. Mihma Alon vt Moses a Ikkikkeh! a shahli ma! chim asilhha lishke, im anukfila iksho pi yvmohmi tuk a micha nanashvchi a pi yvmohmi tuk, nan ashvchi ya chik pi onochokashke.

12. Illi tuk osh ishki im oshvto ya kohcha mvt nipi vt iklvnna kvv taha yo ik chohmo kashke, im achi tok.

13. Mihma Moses vt Chihowah ya i payvt, Chitokaka ma, himak a ish hlakoffichashke, chim asilhha lishke, achi tok.

14. Mihma Chihowah yvt Moses a Iki vt nashuka ya on tofa illa tuk okma, nitak untuklo ho hofahya hinla keyu cho? nitak untuklo ho binah ha kohchichashke, yohmi ha yosh anonti falvmminchit ishashke, achi tok.

15. Mihma Miliam vt nitak untuklo ho binah ha kocha ahanta tok; mihma Miliam a falvmminchit isht iklo kisha ka okla hvt nowvt ik aiyo tok.

16. Atuk osh i himak ak o, okla hvt Haselolh asha tuk vt kanvllit Palan yakni haiaka ak o abinanchi tok.

CHAPTER XIII.

MIHMA Chihowah hvt Moses a im anumpulit,
2. Hatak pit ish tihleli na, Kenan yakni ya yvmma Israel im vlla vhleha ima li tok a, pisashke; iki vhleha apehlichiaiyukali ka hatak achvfa aiachvfa pehlichia yo ish pilashke, achi tok.

3. Mihma Moses vt Chihowah ak osh anumpuli ho yakni haiaka Palan a a tihleli tok; hatak yvmma puta kvv Israel im vlla vhleha ha i noshkoboka bieka tok.

4. Micha ilvppa puta kak osh hohchifo: Luben apeli-chika Sakka ushi Shammua ak atok.
5. Simeon apelihi ka Holi ushi Shafat ak atok.
6. Chutah apelihi Chefunneh ushi Kaleb ak atok.
7. Issaka apelihi Chosef ushi Ikal ak atok.
8. Eflaim apelihi, Nvn ushi Oshea ak atok.
9. Benchamin apelihi Lafu ushi Palti ak atok.
10. Sabulon apelihi Soti ushi Kattiel ak atok.
11. Chosef apelihi yummvt Manasseh apelihi Susi ushi Katti ak atok.
12. Tan apelihi Kemalli ushi Ammiel ak atok.
13. Asha apelihi, Mikael ushi Selhu ak atok.
14. Naftali apelihi Fofsi ushi Nahbi ak atok.
15. Kat apelihi Maki ushi Keuel ak atok.
16. Hatak hohchifo ilvppa puta kak osh yakni ya pisvt hlopulla chi ho Moses vt tihleli tok. Micha Nvn ushi Oshea vt Chehoshua hohchifo tok.
17. Micha Moses vt Kenan yakni pisa chi ka pit tihlelit Oka mahli imma ilvppak o ivt nvnih ha ont hvsh chukowashke:
18. Micha yakni vt kaniohmi ka hvsh pisashke, micha okla hv aiasha aiena ka, kullo hokma, ik kullo hokma, iklauo hokma, laua hokma nana ka;
19. Micha yakni vt kaniohmi ho aiasha ka achukma hokma, keyukmvt okpulo yokma; micha tmaha holihta puta ho aiashakma, vlhtipo yokma, keyukmvt holihta kullo yo aiasha hokma:
20. Micha yakni vt kaniohmi hokma, nia hokma, keyukmvt, chunna hokma, iti vt asha hokma keyukma, nana hvsh pisashke; Micha hvchi nakni achukma cha yakni ya nana a waya ka isht hvshlashke, im achi tok. Yohmi ka nitak yummak okvt paki waya vmmona nitak atuk atok.
21. Yohmi ho ia cha yakni yash ahopokoyot Sin yakni haiaka vttvt hatak vt Hamalh pit ai itvnowvt Lehob a ont vlihi tok.
22. Micha oka mahli imma oiyvt ia cha Heblon a vla tok: yummak oka Ahiman, Sheshai micha Talmai aiena

Anak im vlla vhleha hvt asha tok. Yohmi ka Heblon vt Soan Echip talaia yvt ik tobo kisha afvmmi untuklo mak o, toba tok atok.

23. Atuk osh Eshkol bokushi ya ona mvt, yvmma paki lokoli achvfa takali ho naksish achvfa ho chanlit akvchi cha tuklo hosh tvbi takalichit sholi tok; micha pomeklanit, micha fik aiena ka ai isht vla tok.

24. Israel im vlla vhleha hvt yakni yvmma paki lokoli achvfa achanlit akvchi tuk ak osh bokushi Eshkol hochifo tok.

25. Atuk osh nitak pokoli ushta kvv ont taha ma, yakni ya a hopokoyvt itvnowa tuk vt falamvt vla tok.

26. Micha ivt Moses micha Alon micha Israel im vlla vhleha okla moma kvv Palan yakni haiaka Katesh ak o asha tuk o im ona tok; micha anumpa falama isht im ona cha, yakni yash nana a waya ka okla moma ka i haiakvchi tok.

27. Micha im anolit, Pit ish pi pila tuk yakni ya il ona tuk, mihma pishukchi micha foi bila aiena a yanahanli kvv aiahlishke; yohmi ka ilvppak osh nan awaya mak oke.

28. Yohmi kia okla yakni ya aiasha kvv kulloshe, mikma tumaha holihta puta kvv aholihta hosh chito fehvshke, micha Anak im vlla vhleha hvt yvmma asha na, e pisa tuk oke.

29. Amalekait vhleha hvt oka mahli yakni ak o aiashvshke; mikma Hittait vhleha micha Chebusait vhleha, micha Amolait vhleha aiena kvv nvni foka ak o aiasha hoke; mikma Kenanait vhleha hvt okhvta bilika micha Chatan aivhli aiena kak o aiasha hoke, achi tok.

30. Mihma Kaleb vt okla hvt Moses itikba aiasha ka nuktalali cha, Yakosi iti takla ivt iloh ishashke, il imaiya he vhpesa fehna hokvt, achi ok.

31. Amba apihvt ia tuk vto, Okla ha itibit il ia he pi vhpesa keyushke, kullo kvv pi shahli hoka.

32. Micha yakni ya ahopokoyo tuk vt ik achukmo ho Israel a anumpa isht im vlv; Yakni yash il a hopokoyo kvv okla ha tahli yakni chohmishke; micha yvmma aiasha na e pisa ka hatak chaha fehvshke.

33. Micha ymma hatak hofaloha Anak ushi vhleha, yummvt hatak hofaloha vhleha a kohcha tok a e pisa tuk oke: mikmvt pishno ile pisa kvt hatvfo ak o pi chohmi tuk; mikma yummvt pi pesa ka yummak inli il in chohmi tuk oke: achi tok.

CHAPTA XIV.

MIHMA okla moma kvt chitolit yaiya tok; micha ninak ymma okla yaiya tok.

2. Micha Israel im vlla vhleha moma kvt Moses micha Alon ita tuklo ka na mihachit anumpuli tok; micha okla moma kvt, Chihowah yvt vlhpesa ahni na Echip yakni ak inli ho a pilli tok okbano; keyukmvt Chihowah yvt vlhpesa ahni na, yakni haiaka a pilli tuk okbano;

3. Nanta katiohmi ho bvshpo falaia ishit pi akakoha na, pi tekchi micha pim vlla aiena kvt nawehpoa toba chi ka, Chihowah yvt pi pehlichit yakni ilvppa pishit vla tuk oh cho? Echip yakni falamvt il ona ka achukma kvt pim i shahla hinla keyu cho? ahanchi tok.

4. Micha ilap bika itim achit, Pi kupitvni iloh ikbi cha, falamvt Echip a il onashke, itim achi tok.

5. Yohmi ma Moses micha Alon ita tuklo kvt Israel im vlla vhleha okla moma itvnahvt aiasha tuk a itikba ya, nashuka aka ishit hlipkaiyvchi tok.

6. Mihma Nvn ushi Choshua micha Chifvnnah ushi Kaleb ita tuklo yummvt yakni yash ahopokoyo aiena tuk osh i nafohka ya hlilvffi tok.

7. Micha Israel im vlla vhleha moma ka im anumpulit, yakni yash ymma hopokoyvt a hlopulli tuk vt yakni achukma atampvshke.

8. Chihowah yvt pi ahninchit hokmvt, yohmikmvt yakni ilvppa pisht ona cha pima chi hoke; yakni pishukchi micha foi bila ayanahanli yoke.

9. Peh, Chihowah ya i yoshobvt hvchik i filvmmo kashke, micha okla yakni ai asha ka hvchik i nukshopo kashke; yummvt pi pvska yoka; ymma ai atukko yvt i kunia hoke,

mikma Chihowah yvt piba foyuka hoke; hvchik i nukshopo kashke, im achi tok.

10. Yohmi kia okla moma kvv tvli ishit bola chi ka miha tok. Mihma Israel im vlla vhleha itikba ya Chihowah im aholitopa yvt okla moma i binah holitopa ya ahaiaka tok.

11. Mihma Chihowah yvt Moses a katiohmi foka ho okla ilvppvt sa nukowahancha chi cho? micha katiohmi fokak mak o nan isht atokowa puta im iti takla ai otvnihin-chi li kak o a yimma chi cho?

12. Ililli okpulo isht issot kanchi lish, ai isha he vlhpesa im ishi lashke, micha chishno ak o oklushi chito micha kvullo yvmma i shahli ka chi ai ikbi lashke, achi tok.

13. Mihma Moses vt Chihowah ya, Yohmikma Echip okla hvv hakla chi hoke (nan isht chim ai ahli pulla hosh okla ilvppa im ai iti takla ya akohchit isht ishla tuk oka;)

14. Michi yakni ilvppa okla aiasha ka im anola chi hoke: Chihowah chia hvv okla ilvppa ish iba foyuka ka haklo tuk, Chihowah ya nashuka bika iti pisa tuk, chi hoshonti hvv o wakayvt hikia tuk, nitak ma hoshonti tonik, atuk osh ni-nak ma luak tonik o isht ish pehlichu ka haklo tok oka.

15. Himak a okla ilvppa moma ka hatak achvfa chiyuh-michit vbit ish tahlukma, oklushi puta chi annoa ka hahaklo tuk vt anumpulit,

16. Chihowah yvt yakni ya ima he mihv anumpa kvullo il onochi tuk vt pehlichit ishit chukowa he tuk vt, nanihma he keyu hatuk osh, yakni haiaka ai vbit tahlukhe, acha hi oke.

17. Yohmi ka himak a chim asilhha lishke, ish anumpulit,

18. Chihowah yvt nuktaiyala na hopaki, micha isht i nukhaklo vt chinto hosh, nan ashvchi micha yoshoba ya i kashoffi, micha nan ashvchi im ahli ya hlakoffichi keyu, micha iki vhleha nan ashvchi tuk a im vlla vhleha ai iti shali ont atuchina, micha ont ai ushta hoh kia, nana palvmmi ish onocha he ish miha tok mak osh, an Chihowah nan isht im aiahi vt chitashke.

19. Nan isht ish i nukhaklo chito hatuk mak osh, micha okla ilvppa ish i kashoffi na Echip ashvt mintit himak a ant

aivhli hatuk mak osh okla nan ashvchi ya ish i kashoffashke, chim asilhha lishke, achi tok.

20. Mihma Chihowah yvt, chim anumpa hatuk mak o i kashoffi lishke.

21. Yohmi kia si okchaya pulla ka yakni moma kvv Chihowah isht im aholitopa alotowa pulla chi hoke.

22. Hatak yvmma puta moma kvv vm isht aholitopa, micha nana afehna puta Echip a micha yakni haiaka ya a yvmihchi ka pihisa tuk osh ilvppvt ont ishit pokoli mak o, sasht imomaka pisa cha vm anumpa ha ik haklo tuk okvto,

23. Iki vhleha anumpa kvllo il onochit im issa li tok yakni ya pisa he keyu; micha sa nukowvchi tuk puta hokvto pisa chi keyu pulla hoke.

24. Amba an tishu Kaleb yvmmak okvto shilombish inla ieshi cha siakaiya ahli tuk oka, yvmmak okvno yakni a achukowvt aya tuk a isht ona la hi oke; mihma im isht atiaka yvt abinila hi oke,

25. (Yohmi ka Amalekait micha Kenanait vhleha aiena kvv okfa ha aiasha tok.) Onnaha ma fullolvv yakni haiaka okhvta humma pilla hak o hvsh iashke, achi tok.

26. Mihma Chihowah yvt Moses micha Alon a im anum-pulit,

27. Katiohmi foka ho okla ik achukmo ilvppvt a sanalit namihachit anumpuli ka, peh ik ashah im ahni la chi cho? Israel im vlla vhleha na miha anumpuli puta yvmmvt a sanalit na miha ka haklo lishke.

28. Sa okchaya pulla kvv anumpulit sa haksobish a hvsh haklochi pulla mak o hvchi yvmihchi la chi hoke, Chihowah yvt achishke, hvsh im achashke.

29. Hvchi haknip vt yakni haiaka ilvppa akakoha chi hoke; mikma a sanalit na miha tuk, hvchi holhtina tuk moma, afvmmi pokoli tuklo vttvt vba mavvt hvchi holhtina tuk moma mak osh.

30. Yakni yvmma hvchi ashachi la he, anumpa kvllo il onochi li tok a hvsh chukowa chi keyu pulla hoke, Chennah ushi Kaleb micha Nvn ushi Choshua ak illa chi hoke.

31. Amba hvchim vlla vhleha na wehpoa ya chi, hvsh

achi tuk, yummak okno ishit chukowa likma, yakni hvsh shitilema tuk a ithana chi hoke.

32. Amba hvchishno ak okvto, hvchi haknip illi vt yakni haiaka ilvppa akakoha chi hoke.

33. Mikma hvchim vlla vhleha hvv afvmmi pokoli ushta ho yakni haiaka ya ai itvnowvt hvsh haui puta kvv vt onvtoyula na hvchi haknip vt yakni haiaka ya ataha chi hoke.

34. Nitak kaniohmi ho yakni ya hvsh a hopokoyo tuk; yummvt nitak pokoli ushta tuk a vlvhpisvt (nitak achvfa kvv afvmmi achvfvv ia hosh) afvmmi pokoli ushta ho na hvsh ashvchi vt hvchi onvtoyula chi hoke; mikma nana im issa li tok vt kovvffi li ka hvsh ithaiyana chi hoke.

35. Chihowah sia hvv okla ik achukmo ilvppvt iti hoyot a sanali tuk a moma ka i yvmihchi li pulla chi hoke; yakni haiaka ilvppak o ataha chi hoke, micha yummak o okla ai illa chi hoke, achi li hatuk oke, im achi tok.

36. Atuk o yakni ya ahopokoya chi ho Moses vt pila tuk hatak vhleha, yummvt falamvt vla mvt, yakni ya kalakshi anumpa onochit isht vla cha okla moma ka i sanalechit na miha ka anumpolechi tuk vt,

37. Yakni ya anumpa ik achukmo onochit isht vla tuk pulla kvvto Chihowah itikba ililli okpulo isht illit taha tok.

38. Amba Nvn ushi Choshua, micha Chevnnneh ushi Kaleb yummvt yakni ya ahopokoyvt ia ka ai achvfa tuk vt okchaya tok.

39. Mihma anumpa ilvppa puta ka Moses vt Israel im vlla vhleha moma ka im anoli tok; mihma okla moma kvv yaiya fehna tok.

40. Atuk osh onnahinli fehna moma ho okla hvv wakaya cha nvnih oiyvt paknaka ona mvt, Yakeh, ilvppa e hielishke, micha yakni Chihowah yvt pim issa tok a il ia chi hoke, pi yoshoba tuk okvt, achi tok.

41. Mihma Moses vt, Nanta katiohmi ho himaka Chihowah im anumpa hvsh kovvffi cho? yohmi kia nana kvv im ahla he keyu hoke.

42. Hvchik aiyo kashke, Chihowah yvt hvchiba fokke-

yu hoka; yohmi hosh hvchin twnvp itikba hvch ik akakoho kashke.

43. Amalekait micha Kenanait aiena kv̄t hvchi tikba yvmma a₂sha hoka; mikma bv̄shpo falaia ishit hvsh akakoha chi hoke; Chihowah ya hvsh i filvmmi hatuk oka, yohmi hoka Chihowah yvt hvchiba foka he keyu hoke, achi tok.

44. Yohmi kia ilapunlv̄t ivt nv̄nih paknaka ya ona tok; yohmi kia Chihowah nan itim apesa afohka itombi holitopa micha Moses aiena kv̄to binah ha ik kohcho tok.

45. Yohmi ma Amalekait micha Kenanait aiena nv̄nih yv̄mma aiasha tuk vt akowvt mintit fahama cha imaiyvt yuhlit Holmah ya ont vhlichī tok.

CHAPTA XV.

MIHMA Chihowah yvt Moses a im anumpulit,
2. Israel im vlla v̄hleha ha im anumpulit, Hvsh aiasha chi yakni hvch ima li tok a hvsh onakmvt,

3. Micha il onochi tok osh yvmihchi hosh hukmit im issa, keyukmvt vbit im issa, keyukmvt ilap ahnit nan im issa, keyukmvt v̄lhpoa hochito, keyukmvt v̄lhpoa chipunta ai ishit Chihowah ya na balama im ikbit impv̄chi holitopa isht asha hosh luak ishit hukmit Chihowah ya im issakmvt:

4. Yohmi hosh Chihowah nan im issa im issakma ilhpak im issa bota tohbi kv̄shkoa ishit pokoli, bila hin kv̄shkoa ai ushta itaiyoma hō isht vlashke.

5. Micha oka paki hin kv̄shkoa ai ushta chukfv̄lhpoa ushi achv̄fa hō hukmit im issa, keyukmvt vbit im issa hokmá aienint ish atahlashke.

6. Keyukmvt chukfi nakni yokma ilhpak im issa yō bota tohbi kv̄shkoa ishit pokoli tuklo hō bila yvt hin kv̄shkoa atuchina itaiyoma hō ish atahlashke.

7. Micha nan ishko im issa ya Chihowah nan i balama yō oka paki hin kv̄shkoa isht atuchina hō ish im issashke.

8. Micha anumpa il onochi tuk osh yvmihchi hosh huk-

mit im issa, keyukmvt vbit isht aiokpvchi, keyukmvt itin nanaiyvchit im issa y_o wak hobvk im atahlikmvt,

9. Yohmit wak hobvk isht vlakmvt ilhpak im issa bota tohbi kvshkoa ishit pokoli tuchina, bila hin iklvnna itaiyoma h_o isht vlashke.

10. Micha nan ishko im issa Chihowah i balama y_o luak ishit hukmit im issa y_a oka p_aki hin iklvnna h_o isht ishlashke.

11. Yakohmichi hosh wak hobvk achvfakma, keyukmvt chukfi nakni achvfakma, keyukmvt chukfulhp_oa ushi achvfakma, keyukmvt issi kosoma ushi achvfakma hvsh yvmih-chashke.

12. Holhtina kaniohmi h_o hvsh atahli tuk mvt, holhtina hatuk mak _o yohmi bieka h_o hvsh yvmihcha ch_i hoke.

13. Yakni y_a aivtta tuk moma kv_t nan im issa y_a Chihowah i balama luak ishit hvkmit im issakmvt ilvppa puta kak _o chohmichit iakaiya hosh yvmihcha hi oke.

14. Micha okla inla yosh hvchi takla ahanta hosh, keyukmvt hvch isht atiaka puta k_a kvna hosh ahanta cha nan im issa y_a Chihowah i balama luak ishit hukmit im issakmvt, hvsh yvmihchi kak _o yvmmak kia yvmihcha hi oke.

15. Okla hvchia, micha okla inla hvchi takla ahanta hvsh aiena kv_t hvch_i nan vlhpisa achvfa yosh hvch isht atiaka puta k_a nan vlhpisa bilia ya ch_i hoke; hvsh kaniohmi k_a okla inla ak kia Chihowah itikba y_a yvmohma he ak inli hoke.

16. Hvchishno micha okla inla hvchi takla ahanta aiena kv_t nan vlhpisa achvfa, micha nana akaniohmi hvchim achvfa hi oke, achi tok.

17. Mihma Chihowah yvt Moses _a im anumpulit,

18. Israel im vlla vhleha h_a im anumpulit, Yakni hvch isht ona la ch_i yvmma hvsh onakmvt,

19. Yohmikmvt yakohma hi oke, yakni yash pvska y_a hvshpakmvt i walit im issa y_a Chihowah hvsh im issa hi oke.

20. I walit im issa y_a onush bota yvmmvska vmona pvska lumbo hvsh im issa hi oke: a nihechi y_a ai i walit hvsh im issa chatuk vt yvmihchi hosh hvsh i wala hi oke.

21. Hvch isht atiaka puta k_a onush bota yvmmvska vmona y_a i walit im issa y_o Chihowah hvsh im issa hi oke.

22. Atuk o hvsh ashvchi, micha nan v_lhpisa ilvppa puta k_a Chihowah yvt Moses a tohnot anumpuli tuk isht hvchik ahanto tok mvt,

23. Chihowah yvt Moses a im apesa tok nitak vttvt hvch-im isht atiaka ai itin takla himaka pilla mahaya k_a Chihowah yvt Moses a tohnot apihisa tok fehna k_a ik yvmohmo tuk mvt,

24. Yvmohmikmvt yakohmashke, okla moma kv_t ik ithano nan ik ithano hosh nana kia yvmihchikma, okla moma kv_t wak hobvk himita achvfa h_o hukmit im issa Chihowah i balama, micha ilhpak im issa, micha nan ishko im issa, ai yvmihchi mak o, micha nan ashvchi im issa y_o issi kosoma ushi achvfa aiena h_o im issashke.

25. Mikma naholitompa isht vtta yvt Israel im vlla v_hleha okla moma k_a isht i kashoffi na i kashofa hi oke; nana ik ithano yoka: mikma nan im issa vbit im issvt luak ishit hukmi y_a Chihowah isht ima hi oke, micha nana ik ithano tuk vt nan ashvchi im issa y_a Chihowah itikba isht ona hi oke,

26. Mikma Israel im vlla v_hleha okla moma, micha okla inla apehvt aiasha tuk aiena kv_t i kashofa hi oke, okla moma kv_t nana ik ithano hatuk oka.

27. Atuk o hatak nana hosh ik ithano hosh yoshobakmvt nan ashvchi im issa y_o issi kosoma tek afvmmi vmmona isht onashke.

28. Mikma naholitompa isht vtta yvt hatak nan ik ithano hosh ashvchi kash nan ik ithano hosh Chihowah itikba ai ashvchi a i kashoffashke, mikma i kashofa hi oke.

29. Nan ik ithano hosh ashvchi k_a Israel im vlla v_hleha takla ai vtta tuk, micha okla inla yosh takla ahanta tuk aiena nan v_lhpisa hvchim achvfashke.

30. Amba hatak nana hosh, peh ilapunla hosh nana akaniohmikmvt, yakni yash inli ai vtta tuk okma keyukmvt okla inla yokmá nana kia, yummak okvt Chihowah ishit yopoma hoke: mikmvt hatak yvmmv_t im okla ai iti takla y_a fiopa t_rpa hi oke.

31. Chihowah im anumpa h_a shitilema cha im anumpa

vlhpisa ha kobvffi hokvt, hatak yvmma im ilhflopak vt tvpvt vmohma chi hoke; nan ashvchi vt ilap ak inli ho onvtoyula chi hoke, achi tok.

32. Atuk o Israel im vlla vhleha hvv yakni haiaka asha moma mvt, hatak vt nitak hullo nitak o iti tvptua aiowa hosh anta na pisa tok.

33. Micha iti tvptua aiowa hosh anta na pisa tok vt Moses micha Alon micha okla moma aiena ka isht im ona tok.

34. Mihma kaniohma he miha kvv iksho hatuk o ai atoni okla fohki tok.

35. Mihma Chihowah yvt Moses a, Hatak okvt illi pulashke: binah kocha yo okla moma kvv tvli isht a bolashke, im achi tok.

36. Mihma Chihowah yvt achi tuk mak o, okla moma kvv binah ha kocha isht ona cha tvli ishiti boli na illi tok.

37. Mihma Chihowah yvt Moses a im anumpulit,

38. Israel im vlla vhleha ha ish im anumpuli na, im isht atiaka hlopulli ka i nafohka ai hvli ya imposhota ya i fullolechashke; micha i nafohka im poshota ya sita lapushki okchamali lapalechashke,

39. Mikma hvchim poshota yosh hvsh pihisakmvt Chihowah im anumpa moma ka ithaiyanvt hvsh yvmihcha chi hoke; mikmvt hvchi chukvsh akinli, micha hvchi nishkin akinli iakaiyvt havit hvsh itnowa beka tuk vt hvchik yvmohmo kashke.

40. Yvmohmi ho hvsh ithaiyana cha vm anumpa ha moma hvsh yvmihchi cha Chitokaka ya hvsh i holitopashke.

41. Uno ak osh hvchin Chihowah Chitokaka sia hosh hvchin Chitokaka sia ha chi hosh Echip yakni ya a hvchi pehlichit kohchi li tok oke, Chihowah hvchin Chitokaka sia hoke, ish im achashke, achi tok.

CHAPTER XVI.

MIHMA Kolah, yvmmvt Isha ushi, yvmmvt Kohalh ushi, yvmmvt Lefai ushi atok, micha Eliab ushi, vhleha

Tahlan micha Abilam, micha Pelelh ushi On, Leuben ushi vhleha hv̄t hatak kaniohmi ka ishi tok.

2. Micha Israel im vlla vhleha aiachvfa yummvt okla moma itvnahvt chieya ka i holitopa, hatak ithana tahlepa tuklo cha pokoli tahlapi hatak holitopvt annoa ai itapeha hosh, Moses itikba ya wakayvt hielit

3. Moses micha Alon a i sanalit iti hoyot itvnaha cha, Atablit hv̄sh il onochishke, okla moma kv̄t holitopa hoka, moma kv̄t, mikmvt Chihowah yvt ibafoka hoka. Yohmi ka nanta katihmi ho Chihowah im okla ha i shahlechit hv̄sh ile hilechi cho? achi tok.

4. Atuk o Moses vt haklo mvt nashuka ishit aka hlipia tok.

5. Micha Kolah micha im apeha tuk moma ka im anum-pulit, Onnaha fehnak mak o kv̄na hosh immi hokma micha kv̄na hosh holitopa hokma Chihowah yvt otvnincha chi hoke; micha ilap a bilika isht ona chi hoke; ilapvt atokoli tuk pulla kak osh bilika isht ona chi hoke.

6. Ilvppak o hv̄sh yvmihchashke. Kolah micha hv̄sh ai itapeha moma kv̄t, na balama a hukmi hv̄sh ishashke.

7. Micha onnaha ma Chihowah itikba ya luak hv̄sh fohki cha na balama hv̄sh fohkashke; atukma yakohma chi hoke, Chihowah yvt hatak nana ho atokolikma, yvmmak osh holitopa chi hoke. Lefai ushi vhleha hv̄chia hv̄t, atablit hv̄sh ilonochishke, achi tok.

8. Mihma Moses vt Kolah ya Lefai ushi vhleha ma! hv̄sh haklashke, hv̄chim asillha lishke.

9. Israel in Chitokaka yvt Israel okla moma ka hv̄chi i filvmminchit Chihowah i binah nan isht hv̄sh ai ahanta chi ho, micha okla moma nan isht hv̄sh im ahanta chi hosh itikba hv̄sh hiel a chi ho ilap i bilika hv̄ch isht ona tuk a nan isht ik hv̄chim ahobo cho?

10. Micha chishno, micha Lefai ushi vhleha, chitibapishi vhleha moma aiena ka bilika hv̄chi hv̄chisht ona tuk oke, micha naholitompa isht ai vtta aiena hv̄chi bv̄nna cho?

11. Yv̄mma pulla kak osh chishno micha ish ai itvpeha aiena kv̄t Chihowah ya i sanalit iti hoyvt hv̄sh itvnahv̄shke;

micha Alon ak osh kvta hatuk o yvmma i sanalit namiha-chit hvsh anumpuli cho? im achi tok.

12. Micha Moses vt Eliab ushi tuklo Tahlan micha Abilam a pit hoyot anumpa i pila tuk o yvmmak ash osh, Il ona he keyu, achi tok.

13. Micha yakni pishukchi micha foibila aiena a yanahanli ya a pehlichit ish pi kohchi kv, yakni haiaka ai vbit ish pi tahla chin tuk vt nana iskitini ho amba pi shahli, pi miko ish il ikbi cho?

14. Micha pishukchi, micha foi bila ayanahanli yakni isht chik pimoshke, micha osapa micha pakvpi ahollokchi ibai asha he a chik pimo kishvshke; hatak ilvppa puta nishkin a ish kocha wehla hinla cho? il ona he keyu hoke, achi tok.

15. Mihma Moses vt nukowa fehna cha, Chihowah ma! nana chim ihisa ka chik aiokpacho kashke: issuba nashoba achvfa kia im ishi li tuk keyu hoke, micha achvfa kia okpuni li tuk keyu hoke, achi tok.

16. Micha Moses vt Kolah ya, Chishno micha ish aiitvpeha aiena kv. Chihowah itikba, chishno micha yvmma, micha Alon aienvt onnakma hvsh onashke.

17. Micha hatak hvsh moma kv na balama im aivlhto ai-yukali ka na balama fohkit hatak moma kv na balama im ai vlhto aiyukali na balama ai vlhto aiyukali na balama ai vlhto tahlepa tuklo cha pokoli tahlapi ho ieshit Chihowah itikba isht hvsh onashke; Chishno micha Alon hvsh aiena na balama ai vlhto hvsh ieshi biekashke, im achi tok,

18. Mihma hatak puta kv na balama im aivlhto luak fohki cha na balama onochit ieshi cha Moses micha Alon a apehvt okla moma i tabenakel okhissa ya hiel tok.

19. Mihma Kolah vt okla moma ka im itvnahlit okla moma i tabenakel okhissa ya isht ona tok, mihma Chihowah im aholitopa yvt okla moma ka i haiaka tok.

20. Mihma Chihowah yvt Moses micha Alon a im anum-pulit,

21. Okla ilvppa hvsh il i filvmmichashke, Yohmikma yakosi itin takla vbit lushummi lashke, achi tok.

22. Mihma nashuka ishit hlipkaiyachi cha Chitokaka ma!

Nipi moma ini shilombish in Chitokaka ma! hatak achvfa hosh yoshoba na okla moma ka ish i nukkillla chi cho? achi tok.

23. Mihma Chihowah, yvt Moses a im anumpulit,

24. Okla moma ka im anumpulit, Kolah. Tahlan micha Abilam i binah apakfoyupa ka issvt hvsh wakayashke, ish im achashke, im achi tok.

25. Mihma Moses vt wakaya cha Tahlan micha Abilam a im ona tok, mihma Israel im asvnonchi vhleha hvv iakaiya tok,

26. Michā okla moma ka im anumpulit, Hatak haksi puta ilvppa i binah ha issvt hvsh iashke, hvchim asilhha lishke; micha nana immi puta ka hvsh potoli na, keyu hosh nan ashvchi moma ka takla illit hvchi taiyaha nah, achi tok.

27. Yvmohmi ma, Kolah, Tahlan micha Abilam i binah apakfoyupvt fullota tuk vt wakayvt i filvmmi tok, mihma Tahlan micha Abilam vt tekchi vhleha, micha ushi vhleha, micha im vlla chipunta vhleha aiena kvv kohchvt i binah okhissa ya ont hiel tok.

28. Mihma Moses vt, Ilvppak o na toksuli ilvppa puta yvmihchi la chi ho Chihowah yvt sa tohno tuk a, ishit hvsh ithaiyana chi hoke; vno ak inli vm anukfila hosh yvmihchi li tuk keyu hoka.

29. Hatak ilvppa puta kvv hatak moma illi chatuk mak o illikma, keyukmvt hatak moma im akaniohmi chatuk mak o i yvmohmikma, yohmikma Chihowah yvt sa tohno tuk keyu ka chi hoke.

30. Amba Chihowah hvv nana himona ho ikbi na, yakni yash osh itakpashali cha, yvmma micha nana im aiasha moma ka ishit nanvbli na, okchaya hosh illi aiasha ka pit tam-oakma, hatak ilvppa puta kvv Chihowah ya nukovchi tuk a hvsh ithaiyana chi hoke.

31. Atuk o yakohmi tok, anumpa ilvppa moma anumpuli kvv ont tahli ma, yakni vt nutaka fehna ita pvhkata tok.

32. Michā yakni vt itakpashali cha yvmma micha in chuka puta micha hatak moma Kolah apeha tuk, micha im ilayak moma ka ishit nanvbli tok.

33. Yumma micha nana im aiasha tuk moma kvt okchaya moma hosh illi aiasha ka pit tvmoa na, yakni vt itafamvt ompohomo tok, mihma okla moma ka i filvmmmit illit taha tok.

34. Mihma Israel moma apakfoyupvt aiasha tuk vt yvm-mvt yaiya kak o yihlepa tok. Pishno ak kia yakni vt ishit pi nanvbli mak, achi hatuk okvt.

35. Mihma luak vt Chihowah ya akohchvt minti cha hatak tahlepa tuklo cha pokoli tahlapi, na balama im issa kash o hukmit tahli tok.

36. Mihma Chihowah yvt Moses a im auumpulit,

37. Naholitompa isht vtta Alon ushi Eleasa ya ish im anumpuli na, na balama ai vlhto puta ka alua ya akoh-chashke, micha luak a yumma pit ish fimmashke, hullochi tuk oka.

38. Ilap imi shilombish akinli i yoshoba vhleha ilvppa na balama im aivlhto ya alta ompoholmo ya chi ho patvssv-lit okla pvrhchashke; Chihowah itikba ai im issa tuk oka, hullochi hatuk oke, mihma Israel im vlla vhleha ha nan isht atokowa ya chi hoke, ish im achashke, im achi tok.

39. Yvmohmi ma naholitompa ishit vtta Eleasa yvt asonak lakna na balama ai vlhto luvt taha tuk vt ai im issa kash ishi tok, mihma patvssa pvtha alta ompoholmo toba tok.

40. Okla inla Alon isht atiaka keyu kvt bilika onvt Chihowah itikba na balama ik im isso pulla hosh Kolah micha ai itvpeha yatuk a ik chohmo ka hi vt Chihowah vt Moses a tohnot im achi tuk mak o isht ithaiyana bilia hi atok.

41. Yohmi tuk kia onna ma Israel im vlla vhleha moma kvt Moses a i sanalit micha Alon a i sanalit na mihachit Chihowah im okla ha vbit hvsh tablishke, achi tok.

42. Atuk o yakohmi tok, okla moma kvt itvnahvt Moses a i sanalit micha Alon a i sanali mvt okla moma in tabenakel a pit hopokoyo tok mihma Yakeh! hoshonti hv ompohomo tok, micha Chihowah im aholitopa yvt haiaka tok.

43. Mihma Moses micha Alon vt okla moma in tabenakel a itikba ona tok.

44. Mihma Chihowah yvt Moses a im anumpulit,

45. Okla moma ilvppa wakayvt ish i filvmmashke mikma yakosi iti takla chohmi ho vbit lushummi lashke, achi tok. Mihma nashuka ya aka ishit hlipkaiyachi tok,

46. Mihma Moses vt Alon a nabalama ai vlhto ishi cha alta ya luak ai ishit fohkit nabalama onochi cha tushpvt ivt okla moma ya im onvt ish i kashoffashke; im ai i nukkilli vt Chihowah ya a kohchvt ia hoka, ililli okpulo vt isht ivshke, im achi tok.

47. Mihma Moses vt im apesa tuk mak o, Alon vt ishi cha malelit okla moma yash iklvnna ona tok; mihma yakeh! ililli okpulo vt okla ai iti takla ya ai ishit wakaya tuk atok; mihma nabalama onochi cha okla ha i kashoffi tok.

48. Micha illi micha okchaya aiena iti takla ya hikia tok, mihma ililli okpulo vt yokopa tok.

49. Yohmi ka Kolah nan im akaniohmi isht illi tuk vto asha na, ililli okpulo isht illi kvv tahlepa sipokni auahushta cha tahlepa untuklo hosh illi tok.

50. Mihma Alon vt falamvt Moses a im onvt okla moma in tabenakel a ona tok: mihma ililli okpulo vt yokopa tok.

CHAPTA XVII.

MIHMA Chihowah yvt Moses a im anumpulit,
2. Israel im vlla vhleha ha ish im anumpuli cha, iki vhleha in chuka achvfa vlhpisa ho tvbi achvfa bieka ho im ai ishit, iki vhleha in chuka achvfa vlhpisa ho holitopa puta ka tvbi auahutuklo ho ish ishashke, micha hatak hohchifo aiyukali ka in tvbi ya ish atakalichashke.

3. Micha Alon hohchifo ha Lefai in tvbi ak o ish a takalichashke; iki vhleha in chuka achvfa i noshkoboka yvt tvbi im achvft ia chi hoke.

4. Micha okla moma in tabenakel anyukaka a chi afama la chi, isht atokowa itikba ak o ish ashachashke.

5. Atukma yakohma hi oke, hatak mihi yo atokoli la chi in tvbi vt pakanla chi hoke; micha Israel im vlla vhleha hvv

namihachit anumpuli ishit hvchi sanalit na mihachi ka issvchi li a kvnia chi hoke, achi tok.

6. Mihma Moses vt Israel im vlla vhleha ha im anumpuli ma, i holitopa vhleha puta kvv tvbi achvfa bieka ho ima tok, holitopa achvfa kvv achvfa bano tok, iki vhleha chuka achvfa vllhpisa hosh tvbi auahduklo tok, mihma Alon in tvbi vt in tvbi puta ka ibafoyuka tok.

7. Mihma Moses vt tvbi puta kash Chihowah itikba nan isht atokowa tabenakel ak o ashachi tok.

8. Atuk o onna ma yakohmi tok, Moses vt nan isht atokowa tabenakel a ont chukowa tok; mihma yakeh! Lefai in chuka achvfa ya Alon in tvbi ak osh bokobli tuk atok, micha bokoblit kohcha mvt pakanli cha almont o waya tok.

9. Mihma Moses vt tvbi puta Chihowah itikba aiasha tuk ishit kohchvt Israel im vlla vhleha ha isht im ona tok: mihma okla pisa cha hatak puta kvv in tvbi aiuyukali ka ishi tok.

10. Mihma Chihowah yvt Moses a I filummit i sanali vhleha isht atokowa yosh itoyula chi ho Alon in tvbi ya anonti isht ish la cha nan isht atokowa itikba ya ish boh-lashke; micha na mihachit anumpuli ya a kanvlelchit isht ish kanchashke, mihma ik illo kashke, im achi tok.

11. Mihma Moses vt yvmihchi tok, Chihowah yvt im achi tuk mak o, yvmihchi tok.

12. Mihma Israel im vlla vhleha hvv Moses a yakeh! pillishke, ilbvshvt pillishke, moma ilbvshvt pillishke,

13. Kvna hosh Chihowah in tabenakel a bilika kanima onakmvt illa chi hoke; illit ont pi taha chi cho? im achi tok.

CHAPTA XVIII.

MIHMA Chihowah yvt Alon a, Chishno micha chiso vhleha, micha in chuka achvfa chi apeha kvv vllhtipo holitopa nan ai ashvchi vt hvchi onvtoyula chi hoke; micha chishno micha chiso vhleha aiena kvv naholitompa isht hvsh ai vttta ya ai ashvchi kvv hvchi onvtoyula chi hoke.

2. Micha chitibapishi vhleha apehlichu ai achvfa chiki

apehlichy yak kia chy apehvchit isht ish lashke, mikma chy-bafoyuka cha nan isht chim ahantashke; amba chishno micha chiso vhleha aienvt chy apeha hokvto nan isht atokowa tabenakel itikba ak o nan isht hvsh ai ahashwa chy hoke.

3. Mikma nan isht ish ahanta ya ieshy cha, tabenakel ai atony moma ka ieshashke; peh nan aivlhto holitopa aiasha micha alta bilika aiena ka iklo kashke. Yohmy hosh yvma micha hvchishno aiena kvv ik hvch illo kashke.

4. Michay okla chybafoyukashke, micha okla moma in tabenakel ai atony; tabenakel nan ai isht ahanta puta ka ieshashke, mikma okla inla yokvt hvchy bilika ona he keyu hoke.

5. Mikma vlhtipo holitopa ai atony, micha alta ai atony aiena ka hvsh iesha chy hoke; yvmohmy ho himakma ai i nukkilli vt Israel im vlla vhleha ha ik onvtoyulo kashke.

6. Mikma vno, yakeh! vno vt hvchitibapishy Lefait vhleha, Israel im vlla vhleha ha i filvmmichit ishy li tuk oke; Chihowah immy hosh okla moma in tabenakel nan isht ai ahanta chy ho na hvlbina yo chohmit hvchima lishke.

7. Yvmohmy hoka chishno micha chiso vhleha hvsh ai itapeha hokvto, alta isht ahalaya nana puta, micha im ompoholmo anukaka aiena isht hvsh ai ahanta chy hosh naholitompa isht ai vttay ya hvsh ieshashke, naholitompa isht hvsh ai vttay ya na hvlbina nan isht vttay yo hvchima li hatuk oke: Yohmy ka okla inla yosh bilika onakmvt illi pulla hy oke, achy tok.

8. Mihma Chihowah yvt Alon a im anumpulit, Yakeh! Israel im vlla vhleha i nahullochy puta, i walit im issa puta atony yay chima lishke: bila ahamvt chy vlhtoka yatuk mak o chima lishke, micha nan vlhpisa kvllo bilia mak o chiso vhleha ima lishke.

9. Naholitompa i shahly luak a ilatomba tuk ilvppak osh chimmy ha chy hoke, im isht aiokpvchy puta, ilhpak im issa puta, micha nan ashvchy im issa puta, micha yoshoba im issa puta, yvma vm ihissa tuk puta kvv chishno micha chiso vhleha aiena kvv hvchy holitopa moma i shahly yay chy hoke.

10. Aholitopa i shahly ak o hvsh ai vpay chy hoke, nakny puta kak osh vpay chy hoke, hvchy holitopa yay chy hoke.

11. Micha ilvppak osh chimmi ha chi hoke, Israel im vlla vhleha na hvlbina i walit im issa, micha i fahfolit im issa moma aiena ak oke; nana vlhpisa bilia yo chishno, micha chiso vhleha, micha chiso tek vhleha chibafoka aiena ka chima lishke; chin chuka ya kashofa aiasha puta kut vpa chi hoke.

12. Micha bila achukma i shahli moma, micha oka paki achukma i shahli moma, micha onush aiena nawaya vmmona, Chihowah im issa tuk a ymma puta chima lishke.

13. Micha yakni ya nana hosh tikba waya na Chihowah ya isht im onakma, chimmi ha chi hoke, kashofa hosh chin chuka ahanta moma kut ai vpa chi hoke.

14. Nana puta kut Israel a ahullochi kut chimmi ha chi hoke.

15. Nana moma nipi puta ai achvfa hosh ushvto ya tiwi na Chihowah ya isht im vla puta, hatak okmá, nana vlhpo-ba yokmá nana kia chimmi ha chi hoke: Yohmi kia hatak osh vta vmmona yokvno falvminchit ish chumpa pulla chi hoke; micha nan vlhpoa ik kashofa vta vmmona aiena kvno falvminchit ish chumpa hi oke.

16. Falvminchit chumpa chi hokvto hvshi achvfa vli kak o ish apesa mak o, tvli holisso shekel tahlapi, vlhtipo holitopa shekel iakaiya hosh, ymmvt kelah pokoli tuklo hoka, falvminchit ish chumpa hi oke.

17. Amba wak chelahpi, keyukmvt chukfi chelahpi keyukmvt issi kosoma chelahpi aiena hokvno, falvminchit ish chumpa he keyu hoke, holitopa hoka, im issish a alta ya ish o fimmi cha, Chihowah i balama ya chi ho, luak ishit hukmit im issa yo i nia ya luak isht ish hukmashke.

18. Micha ikkishi fahfuli, micha fulup isht impakimma yvt chimmi ka ymmak inli chohmit i nipi vt chimmi ha chi hoke.

19. Pit i walit im issa holitopa Israel im vlla vhleha hvv Chihowah ya im issa tuk moma ka chishno, micha chiso vhleha, micha chiso tek vhleha chibafoka aiena ka, nan vlhpisa bilia yo chima lishke; Chihowah itikba hvpi nan

itim apesa kut chishno, micha chim isht atiaka aiena bilia ya chi hoke, achi tok.

20. Micha Chihowah yvt Alon a im anumpulit, Chishno vto i yakni ya ish isha he keyu hoke, micha ibatakvt chi kashapa ish isha he keyu hoke; vno ak osh Israel im vlla vhleha ai itin takla ya chi kashapa, chimmi sia hoke.

21. Micha yakeh! Lefai im vlla vhleha hvv nan isht ai ahanta isht ahashwa tuk okla moma i tabenakel isht ai ahanta tuk vt ai isha he vhpesa yvt Israel a ishit pokoli moma kak o ima li hoke.

22. Micha himak a pilla hoka Israel im vlla vhleha hvv okla moma in tabenakel a bilika vla he keyu, yohmit nan ashvchi shaiyali cha illi yoba nah.

23. Amba Lefait vhleha ak osh okla moma in tabenakel a nan ai isht ahanta chi hoke: micha yvmmak osh ilap nan ashvchi ya shaiyala chi hoke, chim isht atiaka hlopulli puta ka Israel im vlla vhleha ai itin takla ka ai isha he vhpesa yvt ik im iksho nan vhpisa bilia ya chi hoke.

24. Amba Israel im vlla vhleha nan im isht i pokoli, yvma i walit im issa yo Chihowah im ihisa yak o, ai isha he vhpesa mak o Lefait vhleha ima li hoke. Yohmi kak o Israel im vlla vhleha ai itin takla ya ai isha he vhpesa yvt ik im iksho ka chi hoke, im achi li tuk oke, achi tok.

25. Micha Chihowah yvt Moses a im anumpulit,

26. Yakohmichit Lefait vhleha ha im anumpulit, Hvsh ai isha he vhpesa yo hvch ima li tuk a Israel im vlla vhleha ha ishit pokoli ya hvsh im ai ishikvut ishit pokoli kash ishit pokoli ka walit im issa yo Chihowah ya hvsh im issashke.

27. Mikma i walit ish im issa ilvppak okvt a nihechi i patvlhpo onush asha tuk, micha paki a okbushli alota atuk chim itilaua hi oke.

28. Hvchishno ak kia yakohmichit Israel im vlla vhleha hvsh im ai ishi tuk, ishit hvchi pokoli moma kut walit im issa yo Chihowah hvsh im issashke, micha walit Chihowah im issa yash, naholitompa isht vta Alon a hvsh ima hi oke.

29. Na hvchi hvlbina moma ka akohchit walit Chihowah

im issa achukma i shahli moma hullochi kashapa ka akohchit hvsh im issashke.

30. Yumohmi hoka achukma i shahli ka akohchit hvsh walikma, yohmikma yummvt anihechi patvlhpo onush awaya asha tuk, micha paki ai okbushli awaya tuk ak inli, Lefait vhleha im itilaua hi oke.

31. Mikma kanima moma ka hvchishno micha hvchin chuka achvfa hvsh aiena kvv hvsh ai vpa hi oke; okla moma in tabenakel nana isht hvsh ai ahashwa tuk hvchim vlhtoba mak oke.

32. Michu achukma i shahli ka ai ishit hvsh walikma, yummak atuk mak o, nan ashvchi ya hvsh shaiyala he keyu hoke; micha Israel im vlla vhleha i naholitompa puta ka hvsh litehla he keyu hoke, hvsh yohmi cha hvch illi nah, ish im achashke, im achi tok.

CHAPTA XIX.

MIHMA Chihowah yvt Moses micha Alon a im anumpulit, 2. Ilvppak osh nan vlhpisa Chihowah yvt anumpulit, Israel im vlla vhleha ha ish im anumpuli na, wak tek himita homma, inlvv takali iksho, ik ai ono kvv iksho, yummak oka ikunla abana yvt onvtoyula tuk keyu ho isht chim vlashke.

3. Mikma naholitompa isht vttu Eleasa ya ish ima na, binah ha kocha isht onakma, achvft nashuka itikba ya ai vbashke.

4. Mihma Eleasa naholitompa isht vttu yvt im issish a ibbak ushi isht ishi cha im issish a okla moma in tabenakel itikba fehna untuklo ha a fimmashke.

5. Mihma p'sa ho achvft wak tek himita yash hukma hi oke; hakshup micha nipi micha im issish, i yvlhki aiena ka hukma hi oke.

6. Mihma naholitompa isht vttu yvt chuahla iti, hissop, micha natishepa aiena ka ishi cha, wak tek himita lua ka iklvnna pit pila hi oke.

7. Yohmikma naholitompa isht vttu yvt i nafohka ya

achefa cha nipi ya oka isht achifashke, atuk osh i himmak a yo binah ha ont chukowashke, micha naholitompa isht vtta yvt liteha na opiashke.

8. Mikma hukmi tuk vt i nafohka ya oka isht achefashke, micha nipi ya oka isht achefashke, micha liteha na opiashke.

9. Mikma hatak kashofa hosh wak tek himita hituk chubbi ya aiowa cha binah puta ka kocha akashofa ho ashashke; atuk o Israel im vlla vhleha okla moma kvv ila filvmmminchi oka yosh im aiasha hi oke, nanashvchi ishit kashofa yoke.

10. Mikma wak tek himita hituk chubbi aiowa tuk vt i nafohka achifa cha liteha na, ont opia hi oke; micha Israel im vlla vhleha, micha okla inla yosh takla ahanta aiena kvv i nan vlhpisa bilia hi oke.

11. Hatak kvna kia illi nipi yo potolikmvt nitak untuklo ho liteha hi oke.

12. Nitak ont isht atuchinakma isht ile kashoffashke, micha nitak ont isht untuklokma kashofa chi hoke; amba nitak ont isht atuchina ka ik ile kashoffokmvt nitak ont ishit untuklo ka kashofa he keyu hoke.

13. Kvna hosh hatak kvna illi nipi illi tuk o potoli tuk osh, ik ile kashoffokmvt Chihowah in tabenakel a litehlishke; mikmvt shilombish yummvt Israel a i filvmmmit fiopa tupa hi oke, ile filvmmmichi oka yvt ik o fimmo tok okvt, liteha hi oke, im a liteha kvv onvtonla moma hoke.

14. Hatak osh vlhtipo ai illikma nan vlhpisa hvv ilvppak oke; bina hash ont chukowa tuk moma, micha binah aiasha tuk aiena kvv nitak untuklo ho liteha hi oke.

15. Mikma nan ai vlhto tiwa tuk puta on hlipia isht ompoholmo tuk keyu kvv liteha hi oke.

16. Mikma kvna hosh achvvt ashahbika yo bvshpo falaia isht illi tuk o, keyukmvt illi nipi, keyukmvt hatak foni, keyukmvt ahollohpi yo potoll tuk mvt nitak untuklo ho liteha hi oke.

17. Mikma hatak liteha ka, nan ashvchi ishit kashofa, wak tek himita yash hituk chubbi ya, micha oka yanvlli ya ishi cha ai vlhto itibanashke.

18. Mikma hatak kashofa yosh hissop ishi cha oka yash okuchi cha binah hash, micha nan ai vlhto puta moma micha hatak yvmma aiasha tuk, micha foni, keyukmvt vbi na illi tuk, keyukmvt illi, keyukmvt ahollohpi potoli tuk a o fim mashke.

19. Micha hatak kashofa yvt ik kashofa yosh nitak ont isht atuchina, micha ont isht untuklo ka o fimma hi oke; mikma nitak ont isht untuklokma ile kashoffi cha i nafohka ya achifakmvt oka yupi cha opiakma kashofa hi oke.

20. Amba liteha hoh kia hatak yvmmvt ile kashofa he keyukmvt shilombish yvmmvt okla moma ka ai i filvmmmit fiopa tupa hi oke; Chihowah im vlhtipo holitopa ya litehli tuk okvt, ile filvmmminchi oka yvt o fimimpa tuk keyu hoka; liteha hoke.

21. Ile filvmmmichi oka o fimmi tuk vt i nafohka ya achifa he, micha ile filvmmmichi oka ya potoli tuk vt liteha na ont opia hi vt hvchi nan vlhpisa bilia hi oke.

22. Micha nana ho hatak liteha kvv potolikma liteha hi oke, micha shilombish vt potolikmvt liteha na ont opia hi oke.

CHAPTA XX.

YOHMI ma Israel im vlla vhleha okla moma kvv hvshi vmona ho Sin yakni haiaka ya ona tok; mihma okla hvv Katesh ak o aiasha tok; atuk o Miliam vt yvmmak o ai illi cha yvmmak o a hollohpi tok.

2. Atuk o okla moma kvv oka ik im iksho tok, mihmvt Moses micha Alon a i sanalit iti hoyot itahoba tok.

3. Micha Moses a i nukovvt anumpulit, Chihowah hvv vlhpesa ahni na pitibapishi vhleha hvv Chihowah itikba illit taha ka takla pilli tuk okbano.

4. Micha nanta katiohmi ho Chihowah im okla hvv yakni haiaka ilvppa pishno, micha pi wak aiena kvv pi ai illa he a pisht ish la tuk oh cho?

5. Micha nanta katiohmi ho ik ai achukmo ilvppa pisht ishla chi kvv Echip a ish pi kohchechi tok oh cho? nanihi,

micha fik, micha pakupi, micha pomeklanit aiasha keyushke; micha oka ishka hi vt ikshoshke, achi tok.

6. Mihma Moses micha Alon vt okla ha itikba ai i filummit okla moma in tabenakel okhissa ya ona cha, nashuka ishit hlipkaiyachi tok. Mihma Chihowah im aholitopa yvt i haiaka tok.

7. Mihma Chihowah yvt Moses a im anumpulit,

8. Tubi ya ishi cha okla hoyot ish itvnashke, chishno micha chitibapishi Alon ita tuklo kv, micha nishkin itikba tvi chito ya hvsh im ai anumpulashke; mikma im oka ya kohchicha chi hoke; mihma tvi chito ak o akohchit oka ish imashke; yohmi hosh okla moma, micha i nan vhpoba aiena ka nan ishko hvsh imashke, im achi tok.

9. Mihma im achi tuk mak o, Moses vt tubi yash Chihowah itikba itoyula tuk a ishi tok.

10. Atuk osh Moses micha Alon vt okla moma ka hoyot tvi chito yash itikba ya ai itvnahli tok, micha Ila filummit i sanali vheha hvchi ma! ho haklo, tvi chito ilvppa oka e hvchim akohcha chi cho? im achi tok.

11. Micha Moses vt ibbak a vba pit weli cha tvi chito ya in tubi yash hitukla ha isht isso tok; mihma oka laua fehna hosh et kohcha tok, mihma okla moma, micha i nan vhpoba aiena kv ishko tok.

12. Mihma Chihowah yvt Moses micha Alon a im anumpulit, Hvchik sa yimmot Israel im vlla vheha itikba ya hvchik sa holitoblo tuk okvt, yvmohmi tuk okvt okla ilvppa pehlichit yakni ima li tok a isht hvsh chukowa chi keyu hoke, im achi tok.

13. Ilvppak osh Melibah oka mak oke, Israel im vlla vheha hv Chihowah ya i kullo na isht aholitopa tuk oka.

14. Mihma Moses vt Katesh a vttvt anumpa shali vheha ha Etom i miko ya pit i pivt, Chitibapishi Israel vt yak achishke, nan isht ilvsha pi onvtoyula moma ka ish ithavnshke.

15. Piki vheha hv Echip a ona tok, atuk o Echip a il aiasha na hopaki, mihma Echip okla hv pishno, micha piki vheha aiena ka pivvshali tok.

16. Atuk o Chihowah ya il i pahaya ma, pim anumpa haklo cha, enchil o et pila cha pehlichit Echip a ai ishit pi kohchichi tuk oke; atuk o yakeh! chim ai vhli fehna tv-maha holihta Katesh ak o il ai ashvshke.

17. Chi yakni ya ke hlopullih, chim asilhha lishke, osapa puta, micha paki ahollokchi puta ka e hlopulla he keyu; micha kuli hofobi puta ka oka il ai ishka he keyu hoke; mi-ko i hina ak o il ia cha isht impakimma, micha vlhfubek-imma pit ke fulloto hosh chim ai vhli ya e hlopulla chi hoke, achi tok.

18. Mihma Etom vt, A bilika ont hvsh ia he keyu, yoh-mikma bvshpo falaia isht hvchi afama la chi hoke, achi tok.

19. Mihma Israel im vlla vhleha hv, Hina ak o il ia chi hoke, atuk o vno, micha a nan vlpoa yvt chim oka ya ish-kokma atobbi lashke, peh, nan inla ka ak yvmihcho hosh, aka ayvt hlopulli lashke, im achi tok.

20. Mihma, Ish hlopulla he keyu, achi tok. Mihmvt Etom vt okla laua ho ieshi hosh, micha ibbak kullo hosh kohchvt afamvt minti tok.

21. Yakohmi hosh Israel vt im ai vhli hlopulla chin tuk a vlpesa ik im ahno tok, yvmohmi ho Israel vt i filvmmi ia tok.

22. Micha Israel im vlla vhleha hv okla moma kv Katesh a asht ia hosh hvnih Ho ya ona tok.

23. Mihma Chihowah yvt nvni Ho Etom yakni ai vhli bilika yo Moses micha Alon a im anumpulit,

24. Alon vt im okla ha ont ibafohka chi hoke, oka Melibah ya vm anumpa ha i sanalit hvsh filvmmi tuk oka, yakni Israel im vlla vhleha ima li tok a chukowa he keyu hoke.

25. Alon micha ushi Eleasa ya ish ishi cha nvni Ho ya oiyvt isht ish onashke.

26. Micha Alon i nafohka ya ish i shufi cha, ushi Eleasa ak o ish fohkvchashke; mikma Alon vto im okla ha ont ibafohka chi hoke, micha yvmmak o ai illa chi hoke.

27. Mihma Chihowah yvt apesa tuk mak o, Moses vt yvmihchi tok; micha okla moma kv pisa ho nvni Ho ya pit oiya tok.

28. Mihma Moses vt Alon a i nafohka ya i shufi cha ushi Eleasa ak o fohkvchi tok: mihma Alon vt nvni^h paknaka yvmmak o ai illi tok: mihma Moses micha Eleasa ita tuklo kv^t nvni^h ha akowa tok.

29. Atuk o okla moma kv^t Alon vt illi tuk a ithana mv^t, Israel in chuka achvfa moma kv^t Alon a ishit yahaya na nitak pokoli tuchina tok.

CHAPTA XXI.

ATUK o Kenanait miko Alat oka mahli pilla v^tta tuk vt yakni pisa v^hleha ataya tuk ak o, Israel vt minti ho anoli na haklo tok, mihmv^t Israel a itibi cha kanohmi ka ynkachi tok.

2. Mihma Israel vt anumpa il onochi Chihowah ya im il onochit, okla ilvppa svbbak a ish fohki ho mv^hlikma, yohmikma in tmaha holihta puta moma ka okpvⁿit tahlit vmohmichi lashke, achi tok.

3. Mihma Chihowah yvt Israel im anumpa ha haklo cha, Kenanait v^hleha ha ibbak fohki tok; mihma yv^umma, micha in tmaha holihta puta aiena ka okpvⁿit taiyahli tok; mihma yakni yash Homah hochifo tok.

4. Mihma Etom yakni ya apakfopa chi hosh nvni^h Ho ya ashvt Okhvta Humma pilla hina yo ia tok: mihma okla hv^t hina pulla kak o chukvsh isht ielli tok.

5. Mich^a okla hv^t Chitokaka ya i sanalit, micha Moses a i sanalit anumpulit, Nanta katiohmi ho yakni haiaka ai illit pi taha chi ho Echip a pi pehlichit ish pi kohchi tuk oh cho? pv^ska yvt iksho, micha oka yvt iksho, micha pv^ska okpulo iluppano pi yuwalvt tahvshke, achitok.

6. Mihma Chihowah yvt sinti luak o okla ai itin takla on tihleli na okla ha kopoli tok, mihma Israel okla laua kv^t illi tok.

7. Yvmohmi ho okla hv^t Moses a im vla cha, Pi yoshobvshke, Chihowah ya micha chishno ya e chi sanalit il anum-puli tuk okvt, Chihowah ya ish im asilhha na, sinti ya pi

kanvllichit ishit kanchashke, achi tok. Mihma Moses vt okla ha asilhhvt isht anumpuli tok.

8. Mihma Chihowah hvt Moses a Sinti luak o ish ikbi cha, iti fabvssa wishakchi ish ontalalashke: atuk o yakohma hi oke, sinti vt kopoli tuk aiyuka hokvt yvmma pisakmvt okchaya hi oke, achi tok.

9. Mihma Moses vt asonak lakna yo sinti ikbi cha iti fabvssa wishakchi on talali tok, atuk o yakohmi tok, sinti vt hatak nana ho kopoli tuk ma, asonak lakna sinti yash pisakmvt okchaya beka tok.

10. Atuk osh Israel im vlla vhleha hvt tikba ivt Obolh ak o abinanchi tok.

11. Atuk osh Obolh a ashvt ia mvt yakni haiaka Iche-abalim, yvmmt hvshi akochaka pilla Moab itikba ya talaia kak o a binanchi tok.

12. Yvmma ashvt kanvlli mvt Salet okfa ak o a binanchi tok.

13. Yvmma ashvt kanvlli mvt, Anon mishtvnnvp yvmmt Amolait im ai vhli et kocha yakni haiaka ak o a binanchi tok. Moab micha Amolait ititakla ya Anon ak osh Moab im aivhli yatuk oke.

14. Yvmohmi hatuk o Chihowah itin tanampi tok holisso ha, Okhvta Humma micha Bokushi Anon.

15. Micha bokushi yanvlli A aivtta pilla ia, micha Moab im aivhli bachaya aiena ka a yvmihinchit tok achit a holi-hiso hoke.

16. Micha yvmma ashvt ia mvt Bee ya ona tok, yvmmt kvli hofobi yvmmak o Chihowah yvt Moses a ai im anum-pulit, Okla hoyot ish itvnahli na oka ipeta lashke, achi tok.

17. Yohmi ma Israel vt taloa ilvppa taloa tok. Kvli hofobi ma! ish mitafashke; hvsh in taloashke.

18. Hatak i shahli vhleha ak osh kulli; okla holitopa vhleha ak osh nan apesa yak osh miha ho in tvbi ishit kulli tok oke. Atuk osh yakni haiaka ashvt ia mvt Mattanah ya ona tok.

19. Atuk osh Mattanah ashvt ia mvt Nahaliel ona tok-atuk osh Nahaliel a ashvt ia mvt Bemolh ona tok.

20. Atuk osh okfa talaia Bemolh yummvt Moab i yakni ya talaia ka ashvt ia mvt Piskah paknaka yummvt Cheshimon pit talaia ka ona tok.

21. Mihma Israel vt Amolait vhleha i miko Sihon a anumpa shali pit i pilvt,

22. Chi yakni ya e hlopullashke, fullotvt chim osapa puta, micha chi pakupi ahollokchi puta ka e chukowa he keyu; micha kuli hofobi ya oka il ai ishka he keyu hoke, amba miko i hina ak o ayvt chim aivhli ya ont ivt e hlopullashke, achi tok.

23. Mihma Sihon vt im ai vhli ya Israel vt ik hlopullih, ik im ahno tok; amba Sihon vt im okla moma ka hoyot itvnahli cha, yakni haiaka Israel ai itiba chi hosh kohchvt ia tok; atuk osh Chahas a vla cha Israel a itibi tok.

24. Mihma Israel vt bvrshpo falaia halupa ishit fahamvt kanchi tok, micha i yakni ya im eshit Anon vttvt ia hosh Chabbok ont aivhli, Ammon im vlla vhleha im ai vhli ya isht ona tok. Ammon im vlla vhleha im ai vhlh vt kullo fehna hatuk oka.

25. Michu Israel vt tumaha holihta ilvppa puta moma ka ishi tok; mihmvt Israel vt Amolait in tumaha holihta puta Heshbon aiasha ka, micha chuka im a lokoli moma aiena ka aiasha tok.

26. Heshbon ak osh Amolait okla i miko Sihon yummvt chashpo ka Moab i miko ya itibi cha i yakni moma Anon ont vhlh ha ibbak ai ishi tok a, in tumaha holihta yatuk oke.

27. Yvmohmi hatuk o nan achi anumpuli kvv Heshbon a hvsh lashke, Sihon in tumaha holihta yvt tovt vlhta-hashke.

28. Luak vt Heshbon a kohchvt ia hoka, luak libbi kvv Sihon in tumaha kohchvt ia hoka; Moab talaia A, micha Anon achahaka puta hochitoka vhleha ha hukmit tahlshke.

29. Na palvmmi chi onvtolvshke, Moab ma! okpulokvt hvchi tavrshke, Chemosh okla ma! ushi vhleha micha ushetik vhleha aiena kvv hlakofi tuk a Amolait i miko Sihon yuka ikbit im issvshke.

30. E husa tuk oke; Heshbon vt illit taha kvv Tibon a

ont vhlishe, micha chukilissvchit Nefah yummvt Meteba ona ka isht il onvshke, achi hoke.

31. Yakohmi hosh Israel vt Amolait i yakni ya aiasha tok.

32. Mihma Chaasa ya pisa chi ho Moses vt yakni pisa ya pit pila tok, micha in chuka lokoli puta ishi eha Amolait yumma aiasha tuk a tihlelit kocha wehli tok.

33. Mihmvt fullotvt ivt Bashan pilla ho pit fullota tok; mihma Bashan i miko Ok, yumma micha im okla moma aiena kv Etlei ya ai itiba chi hosh i sanalit kohevvt ia tok.

34. Mihma Chihowah yvt Moses a Ish i nukshopa nah, yumma micha im okla moma, micha i yakni aiena ka chibbak fohki li hoke; mikma Amolait i miko Sihon Heshbon ai vttat yatuk a ish i yumihechi tok vt chohmichit ish yumiha chi hoke, im achi tok.

35. Yumohmi hosh yumma, micha ushi vhleha, micha im okla moma ka issot kanchi na, okchayvt im anta kv iksho tok, micha i yakni ishit abinili tok.

CHAPTER XXII.

MIHMA Israel im vlla vhleha hv tikba ia mvt, Moab yakni patali chatan ola in tnnvp Cheliko bilika ak o abinanchi tok.

2. Mihma Sippo ushi Balak vt Israel vt Amolait a kaniohmichi tok moma ka pisa tok.

3. Mihma okla hv laua fehna hatuk oka, Moab vt i nukshopa fehna tok; mihma Israel im vlla vhleha pulla kak o Moab vt komunta tok.

4. Michas Moab vt Mitian im asvnonchi vhleha ha Himak a okla ilvppvt pi afolublit asha tuk moma ka, wak osh osapa hushuk asha ho holakshit ishi chatuk ak o chohmit holakshit pisha chi hoke, im achi tok. Michas Sippo ushi Balak vt nitak yumma Moabait okla i miko yatok.

5. Yumohmi hatuk osh Beo ushi Balaam, Pehlo yummvt im okla im vlla vhleha i yakni okhina bilika talaia ka anta tuk o hoyas chi hosh, anumpa shali pit i pilt, Yakeh! Okla

hosh Echip a akohchvt mintit vlvshke; Yakeh! yakni paknaka ya ompohomoshke, micha sa chapaka yak o okla ai ashvshke.

6. Yvmohmi hoka, minti cha himak a okla ilvppa anumpa kalakshichi onochit ant is sa mihashke, a kullo kvv atupa hoke: imaiya likma issot e kanchikma, tihlelit yakni ya kocha wehli li yoba ná; kvna ho na yukpali anumpa ish onochikma, na yukpa ka, micha kvna ho anumpa kalakshichi ish onochikma kalakshi ka ithaiyana li hoke.

7. Mihma Moab im asvnonchi vhleha, micha Mitian im asvnonchi vhleha aiena kvv isht ahullo na habenvchi vt ibbak foyuka hosh ilhkoli tok; atuk osh Balaam a im vla mvt, Balak im anumpa hatuk a im anumpuli tok.

8. Mihma Himak ninak a ilvppak o hvchi nusashke, atuk o Chitokaka yvt kaniohmit vm anumpulikma, anonti isht hvchim vla la chi hoke; mihma Moab holitopa vhleha hvv Balaam a takla asha tok.

9. Mihma Chitokaka yvt Balaam a im vla cha, Hatak nanta hosh ilvppa chi apehvt aiasha cho? im achi tok.

10. Mihma Balaam vt Chitokaka ya Moab i miko Sippo ushi Balak vt et sa hoyot,

11. Yakeh! okla hvv Echip a a minti hosh vla cha yakni paknaka ya ompohomoshke; himak a ishla cha anumpa kalakshichi onochit ant is sa mihakma, im aiya lish tihlelit kocha weli li yoba na; achishke, im achi tok.

12. Mihma Chihowah hvv Balaam a, Awant ish ia he keyu; anumpa kalakshichi ish onocha he keyu; holitopa hoka, im achi tok.

13. Atuk o onnahnli ma Balaam vt wakaya cha Balak i holitopa vhleha ha, Hvchi yakni ya ont hvsh chukowashke; hvchi awant ia la he ya Chihowah yvt vm olubi hoka, im achi tok.

14. Mihma Moab holitopa vhleha hvv wakaya cha Balak a im ona mvt, Balaam vt pi awant minti ik bvnnohke, achi tok.

15. Mihma Balak vt anonti holitopa vhleha laua i shahli, micha holitopa kvv i shahli ho pila tok.

16. Mihma Balaam a im vla cha, Sippo ushi Balak vt

yak achishke, Nana kia is svm vla chi ka ik chi ataklvmmo kashke, chim asilhha lishke.

17. Holitopa chinto fehna ho chi hilechi la hi oka, micha nana ho is sa mihakma yvmihchi la chi; yvmohmi hoka, minti cha okla ilvppa kalakshichi, ant vm onochih, chim asilhha lishke, achishke, im achi tok.

18. Mihma Balaam vt afalamichit, Balak in tishu vhleha ha, Balak vt tvli hvta, micha tvli holisso lakna ya im aboha alota achvfa ho ik svma chi hok mak o, Chitokaka an Chihowah im anumpa ha ont ivt, ola takla, micha i shahli hoh kia yvmihchi la he keyu hoke.

19. Yvmohmi hoka himak a ashvt himak ninak ak kia ilvppa hvchi nusashke, hvchim asilhha lishke; Yohmi na himakma Chihowah hvv nana ho vm acha hinla ka akostinichi lashke, im achi tok.

20. Atuk o ninak o Chitokaka yvt Balaam a im vla cha, Hatak vhleha hash osh chi hoyot aya tuk ma, ish wakaya cha, awant ish iashke; yohmi kia anumpa chim achi la chi yvmmak o, ish yvmohma chi hoke, im achi tok.

21. Atuk o onnahinli ma Balaam vt wakaya cha, im issuba nashoba ya om patali mvt Moab holitopa vhleha ha awant ia tok.

22. Mihma ia kak o Chitokaka im ai i anukkilli vt libbi tok: mihma Chihowah im enchel vt in tanampi hosh hina ya i sanalit hikia tok. Mihma im issuba nashoba ya om binilit aya ma, in tishu tuklo kvv takla aya tok.

23. Mihma issuba nashoba yvt Chihowah im enchel vt hina takla hikia mvt, bvshpo falaia shufa ibbak foyuka hosh hikia na pisa tok; micha issuba nashoba yvt fullotvt hina ya kohchvt osapa ont chukowa tok; mihma Balaam vt hina ya pit fohkvchi hosh issuba nashoba ya isso tok.

24. Yohmi kia Chihowah im enchel vt pakvpi a hollokechi hina ya hikia ma, holihta chaha yvt ilvppa bachaya ma, anonti holihta chaha yvt yvma bachaya tok.

25. Atuk o issuba nashoba yvt Chihowah im enchel pisa mvt holihta kvvlo ont nvhli cha Balaam iyi ya holihta kvvlo ya akatanlechit litoli tok, mihma anonti isso tok.

26. Mihma Chihowah im enchel vt mishema ona cha ai atukonofa, isht impakimma ia he, micha vlhfubekimma ia he kia, iksho ho a hikia tok.

27. Atuk o issuba nashoba yvt Chihowah im enchel a pisa mvt Balaam nutaka itula tok; mihma Balaam im ai i nukkilli vt libbi mvt issuba nashoba yash tubi isht isso tok.

28. Mihma Chihowah yvt issuba nashoba im itih ha w-kummi na, Balaam a, Nanta chi katiohmichi li ho ilvppa ont isht atuchina mak o issusso cho? im achi tok.

29. Mihma Balaam vt issuba nashoba yash, Isht is sa yopula hoka; bvshpo falaia yvt subbak a foka tuk okbano, ahni lishke, himak a chibe la he tuk okvt, im achi tok.

30. Mihma issuba nashoba yash osh Balaam a Chim issuba nashoba sia ho chimmi sia hatok ititakla himak nitak ant ai vhli ka is si ombinili chatuk keyu cho? himonna kia chi ayvmohmi li cha tuk oh cho? im achi tok, Mihma, Keyu, achi tok.

31. Yohmi ma Chihowah yvt Balaam nishkin fatummi na, Chihowah im enchel vt bvshpo falaia shufa ibbak afoyuka hosh hina ya hikia ho pisa tok: mihmvt noshkoba ha akachunolechit nashuka ya aka ishit hlipia tok.

32. Mihma Chihowah im enchel vt, Nanta katiohmi ho ilvppvt ont isht atuchina mak o chim issuba nashoba ya ish isso cho? Yakeh! sa tikba ya ish ataya kv ai vlhpesa keyu kak o, chi sanali la chi hosh kohchvt ia li tuk oke.

33. Mihma issuba nashoba yvt sa pisa cha, ilvppvt ont isht atuchina mak o a shanaiya tuk oke; ik sa shanaiyo tuk okma, himak a chohmi ka chibe li pulla cha, yummvno okchalinchi la he tuk oke, im achi tok.

34. Mihma Balaam vt Chihowah im enchel a sai yoshoba tuk oke, a sanalit sa tikba hina ya ish hikia ka ak ithano tuk okvt; yvmohmi hoka, himak a ik chim vlhpesokma anonti falamvt ia lashke, im achi tok.

35. Mihma Chihowah im enchel vt Balaam a Hatak ash awant ish iashke; yohmi kia, peh, anumpa chim anumpuli li illa kak o ish anumpula chi hoke, im achi tok; yohmi ma Balaam vt Balak i holitopa vhleha ha awant ia tok.

36. Atuk o, Balaam vt vla na Balak vt haklo mvt afamvt ivt, Moab in tumaha holihta yummvt Anon vhli yummvt ont vhli fehna hatuk o ona tok.

37. Mihma Balak vt Balaam a, Ahli hosh pit chi pilvt chi hoyo li tuk keyu cho? nanta katiohmi ho chik svm alo tuk oh cho? chi holitoblichu la he vt si vhpesa mvhli keyu cho? im achi tok.

38. Mihma Balaam vt Balak a, Yakeh! chim vla lishke; nan isht im aiahli nana ho ishi li kak osh nana achi la hinla cho? anumpa nana ho Chihowah yvt svtih ha fohkikma yummak o anumpuli la chi hoke, achi tok.

39. Mihma Balaam vt Balak a awant ia ma Kichalh-hu-solh a onvt okla tok.

40. Mihma Balak vt wak micha chukfi aiena ka im issa mvt, Balaam micha holitopa vhleha apeha aiena ka pit i pila tok.

41. Atuk osh ont onna ma yakohmi tok, Balak vt Balaam a ilauehi cha Baal achahaka puta isht ona tok, yummak o hikia cha okla hash aiasha ont vhli fehna ka pisa chi hatok.

CHAPTA XXIII.

MIHMA Balaam vt Balak a, Ilvppa alta untuklo ho is svm ikbashke, micha wak untuklo, micha chukfi untuklo aiena ho is svm atahlashke, im achi tok.

2. Mihma Balak vt Balaam vt anumpuli tuk mak o yv-mihchi tok; mihma Balak micha Balaam ita tuklot alta puta wak hobvk achvfa, micha chukfi nakni achvfa aiyukali ho onochit im issa tok.

3. Mihma Balaam vt Balak a, Na hukmit ish im issa ilvppa bilika ish hikia na, ia lashke: Chihowah yvt si afamvt vla hinla yoba kah; atuk o nana ho vm otv'ninchikma chim anoli lashke; im achi tok. Mihmvt achaha ka yo ona tok.

4. Mihma Chitokaka yvt Balaam a afama tok; mihma Alta untuklo ho atahli lishke, micha alta puta ka wak hobvk

achufa micha chukfi nakni achufa biekā hō onochit im issa lishke, achi tok.

5. Mihma Chihowah yvt Balaam itih hā anumpa fohki mvt, Falamvt Balak a im ona cha yakohmi hosh ish im anumpulashke, im achi tok.

6. Mihma falamvt im ona tok, mihma, yakeh! hukmit isht aiokprchi ya bilika, yvmma, micha Moab i holitopa vhleha moma aienvt hielī tok.

7. Mihma nan isht vhlpisa ya ishi mvt, Moab i miko Balak vt Alam ont ai ishit hvshi akōchaka nvni h foka ya akohchit svst vla cha, Minti cha, Chekob a anumpa kallakshichit ant vm onochī, micha Israel a ant a pafi; achishke.

8. Katiohmichi kak osh Chitokaka yvt kallakshichi tuk keyu kā, anumpa kallakshichi onochi la hinla cho? micha Chihowah yvt nan ik achukmo im anukfilli tuk keyukma, katiohmichi kak osh nan ikachukmo im anukfilli la hinla cho?

9. Tvli hochito paknaka hiki vt pisa li, micha nvni h puta hiki vt pisa li hokvt, Yakeh! okla hash osh ila aiasha chi hoke, micha oklushi puta kā iba holhtina he keyu hoke.

10. Kvta hosh Chekob lukfi pushi ya, micha Israel kvshkoā ont isht aiusha hoh kia hohtina hinla cho? Aivlhpiesa illi kak o chohmit svllashke, micha vm ai isht aiopikmvt yvmmak o chohmashke, achi tok.

11. Mihma Balak vt Balaam a, Nanta mak o is si yvmihchi cho? an tvnvp vhleha hā anumpa kallakshichi ish onocha chi hō chi hoyo li kash o, anonti yakeh! anumpa yukupali a ish onochi kak biekvshke, im achi tok.

12. Mihma afalaminchit, Ahah! ahni lish Chihowah yvt svtih hā fohki tuk ak o anumpuli la he vhlpesa keyu cho? im achi tok.

13. Mihma, Balak vt, Mintih, chim asilhha lishke, inla hō si awant ish ona cha yvmmak o ish a pisashke, ont vhli fehna kak illa hō ish pisa chi, moma ish pisa he keyu hoke, micha yvmmak o hiki vt anumpa kallakshichi is svv onochashke, achi tok.

14. Mihmvt Sofim osapa Piskah tabokaka ya isht ona cha

alta untuklo ho ikbi mvt, alta achvfa ka wak hobuk achvfa micha chukfi nakni achvfa bieka ho onochit im issa tok.

15. Mihma Balak a, Chihowah ya afamvt yvmma ia li takla ka hukmit ish im issa ilvppa bilika ish hikiashke, im achi tok.

16. Mihma Chihowah yvt Balaam a afama cha itih ha anumpa fohkit, Anonti Balak a ish im ona cha yak ish im achashke, im achi tok.

17. Atuk o im vla ma, Yakeh! hukmit im issa bilika hikia ma, Moab holitopa vhleha hvt apeha tok. Mihma Balak vt Chihowah hvt nanta ho anumpuli cho? achi tok.

18. Mihma nan isht vlhpisa ishi cha, Balak ma, wakaya cha haklo, Sippo ushi chia hvt is sa haponaklashke.

19. Chitokaka yvt hatak atuk osh holaba he keyu hoke; micha hatak ushi atuk osh im anukfila inlvv nukhakla he keyu hoke: miha tuk vt ik yvmihcho ka hinla cho? anumpuli tuk vt ik ahlecho ka hinla cho?

20. Yakeh! yukpali la chi ho anumpa vma tuk oka: micha yukpali tuk oke, atuk o inlvchi la he keyu koke.

21. Chekob a nanashvchi asha ik peso tuk, micha Israel a nan ai vlhpiesa keyu ka ik peso tuk oke; Chihowah in Chitokaka yvt ibafohka hoke; micha im itin takla ya miko shakapa hosh takali hoke.

22. Chitokaka ak osh Echip a pehlichit kohchi tok, imi hlampko hvt lapish achvfa ak o chohmi hoke.

23. Chekob a i sanalit ishit yushpakvmma he vt iksho hoke; micha Israel a i sanalit isht ahulla he vt iksho hoke: himak a chohmi ka Chekob a micha Israel a Chitokaka yvt nan atahli hoke, acha hi oke.

24. Yakeh! okla hvt koi chito chohmit wakaya hi oke, micha koi chito himita chohmit ile tanicha hi oke; nawehpoa ya ik ai vpo kisha kvv, micha illi tuk im issish a ik ai ishko kisha kvv tvshka he keyu hoke.

25. Mihma Balak vt Balaam a, Anumpa kallakshichi chik onochi pullakmvt, anonti anumpa yukpali chik onochi pulashke, achi tok.

26. Yohmi kia Balaam vt afalamichit Balak a chim ano-

lit, Chihowah yvt nana anum̄puli yv̄mma·moma ka yv̄mih-chi la chi hoke, achi li tuk keyu cho? achi tok.

27. Mihma Balak vt Balaam a Mintih, chim asilhha lishke, inla ho chisht ona lashke; Chitokaka yvt vlhpesa ahni na, yv̄mma hiki vt anumpa kallakshichi is sv̄m onochi yoba na, achi tok.

28. Mihmvt Balak vt Balaam a Peo paknaka Cheshimon pit talaia isht ona tok.

29. Mihma Balaam vt Balak a alta untuklo ho ilvppa is sv̄m ai ikbi cha, wak hobyk untuklo, micha chukfi nakni untuklo ilvppa is sv̄m atahlashke, im achi tok.

30. Mihma Balak vt Balaam vt achi tuk mak o, yv̄mihchi tok, micha alta puta ka wak hobyk achvfa micha chukfi nakni achvfa bieka onochit im issa tok.

CHAPTA XXIV.

ATUK o Balaam vt Chihowah yvt Israel a yukpali kak osh im aivlhpiesa, pisa mvt, ivt yushpakv̄mmi tikba hoyo beka tuk a ik chohmo hosh, amba nashuka ya yakni haiaka pilla pit talali tok.

2. Atuk osh Balaam vt akachakali mvt Israel vt apehlichika vlhpisa i binah puta aiasha na pisa tok, mihma Chihowah im ishilombish vt onvtola tok.

3. Mihmvt nan isht im vlhpisa ya ishi cha, Beo ushi Balaam vt micha hatak nishkin i fatuma yosh achishke.

4. Chitokaka im anumpa ha haklo tuk, micha nan im aiahli i nan otvni ya pisa tuk, holhpokunna kia nishkin vt fatuma tuk vt achishke.

5. Chi binah puta kv̄t aiyukpv̄shke, Chekob ma! micha chim vlhtipo puta kv̄t, Israel ma!

6. Okfa hosh pataya ka chohmishke, osapushi yosh okhina bilika talaia ka chohmishke, aloes iti yo Chihowah yvt hokehi tuk ak o chohmishke, micha chuahla iti puta hosh oka apotovt hielikak o chohmishke.

7. Im ishtochi puta ka oka ya a kohchit hlatv̄bla hi oke,

mikma im ishtatiaka yvt oka laua ho aiasha hi oke: micha i miko vt chaha kv Akak a i shahla hi oke, micha im apelihchika yvt chaha hi oke.

8. Chitokaka yvt Echip a pehlichit kohchi tuk oke; imi hlampko hvt lapish achvfa yak o holba hoke, oklushi in tvnvp puta ka tahla hi oke, micha foni ya kobahlichit tahli cha im iti naki ya ishit nvhlit hlopullecha hi oke.

9. Hlipia hoke, koi chohmit micha koi chito chohmit tvshki hoke, kvta hosh ilhkolecha hinla cho? kvna hosh anumpa yukpali chi onochikmvt, yukpa hoke: mikma kvna hosh anumpa ka llakshichi chi onochikmvt kalakshi hoke, achi tok.

10. Mihma Balak im ai i nukkilli vt Balaam a i sanalit libbi mvt, ibbak a isht itai issochi tok: micha Balak vt Balaam a, An tvnvp a anumpa kallakshichi is svm onocha chi ho chi hoyo li tuk, mihma yakeh! ilvppa ont isht atu-china mak o anumpa yukpali ish onochi biekvshke.

11. Yvmohmi hokvt, himak a malelit, ish ai vtta ya ona; holitopa fehna chikbi la he ahni li tuk oke; yohmi tuk kia yakeh! Chihowah yvt a holitopa ya chi katvblishke, im achi tok.

12. Mihma Balaam vt Balak a chim anumpa shali vhleha et is sam pila tuk ak kia im anumpulit,

13. Balak vt tvli hvta, micha tvli holisso lakna ya im aboha alota ho ik suma chi hoh kia, vno vm anukfila ak-inli kv, achukma hokma, keyukmvt ika chukmo hoh kia yvmohmit Chihowah im anumpa ha ont ia la he keyu hoke; amba Chihowah yak osh nana achikma, yvmmak o yvmih-chi la chi hoke, achi li tuk keyu cho?

14. Atuk osh yakeh! himak a vm okla aiasha ka ona la chi; inta! yohmi hoka, nitak ont ishtaiyopikma, okla ilvp-vt chim okla ha nana akaniohmicha he ya, chim anoli lashke, achi tok.

15. Mihmvt nan isht vlpisa ya ishi cha, Beo ushi Balaam vt, achi, micha hatak nishkin i fatuma yvt achishke.

16. Chitokaka im anumpa ha haklo tuk, micha Chaha i shahli ai ithvna ka ithana tuk, micha nan im aiahli im otvni

ya pisa tuk, holhpokunna hoh kia nishkin fatuma tuk vt achishke.

17. Pisa la hi oke, yohmi kia himak ak keyu: Pisa la hi oke, yohmi kia olanlosa he keyu hoke: Chekob a fochik vt a kohcha hi oke, micha Israel a miko in tibi vt a kohcha hi oke, micha Moab in chukbika puta ka issot kancha hi oke, micha Shelh im vlla vhleha moma ka tabla hi oke.

18. Mikma Etom vt i yakni ya hi oke; Sei ak kia in tinvp puta i yakni ya hi oke, mikma Israel vt chilita hi oke.

19. Mikma apehlichika im asha chi kvv Chekob a akolcha hi oke, micha tmaha holihta aiasha tuk atampaka vbit tahla hi oke, achi tok.

20. Atuk osh Amalek a pisa mvt, nan isht vlpisa ya ishi cha, Amalek ak osh oklushi puta ka tikba tuk oke, yohmi tuk kia ont im ishtaiyopi hokvto illit ai okpulokvt taha hi oke, achi tok.

21. Atuk osh Kenait a pisa mvt, nan isht vlpisa ya ishit, Ish aiahanta yvt kulloshe, micha chim vlpichik a teli chito yo ish ai ikbishke.

22. Yohmi kia Kenait vt tahvt ia hi oke, atuk o Assha vt yukachit chisht ia hi oke, achi tok.

23. Mihmvt nan isht vlpisa ya ishi cha, Ikikkeh! Chitokaka yvt iluppa yumihchikma kvta hosh okchayvt ahanta hinla cho?

24. Michi peni hochito vt Chittim ai vli minti kvv vla cha Assha ya ilbvshala hi oke, micha Eba ya ilbvshalikma, yummvt ai okpuloka vt taha hi oke, achi tok.

25. Mihmvt Balaam vt wakaya cha falamvt ivt ai vttia ya ona tok, mihma Balak ak kia im atiya ya ia tok.

CHAPTA XXV.

MIHMA Israel vt Shittim ak o ahanta tok, mihma oklavvt Moab ushetik vhleha ha iti havit isht ia tok.

2. Mihma i naholbvt toba puta ka nan vbit isht aiokpv-

chi mvt okla hash hoyo tok; mihma okla hash osh impa cha i naholbvt toba puta ka im akachunoli tok.

3. Mihma Israel vt Baal-pio ya ibafohka tok; mihma Chihowah im ai i nukkilli yvt Israel a i sanalit libbi tok.

4. Micha Chihowah yvt Moses a okla hash noshkobo pnta moma ish ishi cha hvshi ya ichapaka Chihowah itikba ya iti a ish atakohlehashke, Yvmohmi ho Chihowah im ai i nukkilli libbi kv Israel a i filvmmashke, im achi tok.

5. Mihma Moses vt Israel nan im apesa vhleha ha, Baal-pio ya ibafohka tuk hatak hvchim asha aiyukali kv hvsh bashke, im achi tok.

6. Atuk o yakeh! Israel im vlla vhleha aiachvfa hosh vlvvt Mitianait ohoyo ho itibapishi vhleha aiasha ka, Moses micha okla moma aiena kv okla moma in tabenakel okhissa itikba yaiya hosh aiasha tuk osh pisa ho isht vla tok.

7. Atuk o naholitompa isht vta Alon ushi Eleasa ya ushi Finehas vt pisa mvt okla moma takla binili tuk vt tvli halupa isht husa ishi cha wakaya tok.

8. Micha Israel hatak a iakaiyvt ivt binah ha ont chukowa cha Israel hatak ash bahlit hlopullechi mvt, ohoyo hash ikfoka ya bahlit hlopullechi tok; Yvmohmi ho ililli okpulo vt Israel im vlla vhleha itin takla ya yokopa tok.

9. Mihma ililli okpulo isht illi kv tahlepa sipokni pokoli tuklo akucha ushta tok.

10. Mihma Chihowah yvt Moses a im anumpulit,

11. Naholitompa isht vta Alon ushi Eleasa ushi Finehas vt vno pulla kak o amosholi cha vm ai i nukkilli ya Israel im vlla vhleha im itin takla ya kanvllichi na, sa nuktahta kak osh Israel im vlla vhleha vbit ak tahloshke.

12. Yvmohmi hoka, yakeh! iti nanaiya nan itim apesa li ya ima lishke.

13. Atuk o naholitompa isht aiahanta bilia fehna ka yvma, micha im isht atiaka aiena kv iesha hi oke; in Chitokaka ya im amosholi cha Israel im vlla vhleha ha im atobbi tuk okvt, ish achashke, im achi tok.

14. Mitianait ohoyo pulla ho Israelait vt awant illi tuk hohchifo kv Salu ushi Simli atok, yvmmvt Simeonait vhle-

ha im itin takla ya chuka achvfa i shahli i holitopa yatok.

15. Mikma Mitianait ohoyo illi tuk vt Su ushetik osh hohchifo kv̄t Kosbi atok, yvmmvt okla i noshkoboka yosh Mitian a chuka achvfa ya i shahli yatok.

16. Mihma Chihowah yvt Moses a im anumpulit,

17. Mitianait vhleha ha ilbvshalechit hvsh fahamashke;

18. Nan isht haksichi in tek Mitian i holitopa ushetik Kosbi pulla ho, micha Pio pulla ka hvchi haksechit hvch ilbvshali tuk oka, yvmmvt Pio pulla kak o ililli okpulo vt itonla nitak ma illi tuk oka, achi tok.

CHAPTA XXVI.

ATUK osh ililli okpulo vt asha ha ya, yakohmi tok, Chihowah yvt Moses micha naholitompa isht v̄tta Alon ushi Eleasa ya im anumpulit,

2. Israel im vlla vhleha okla moma afvmmi pokoli tuklo vhli vba mayvt iki vhleha in chuka achvfa hlopullit Israel aiasha kv̄t tv̄nv̄p itibit ia hinla moma holhtina ka hvsh ishashke, im achi tok.

3. Mihma Moses micha naholitompa isht v̄tta Eleasa ita tuklo kv̄t, Chatan a Moab yakni patali Cheliko bilika ya ai im anumpulit,

4. Afvmmi pokoli tuklo vhli vba maya holhtina ka, Chihowah yvt Moses micha Israel im vlla vhleha Echip yakni ya kohcha ia tok aiena, im achi tok mak o ish ishashke, im achi tok.

5. Israel ushi akni Luben: Luben im vlla vhleha; Hanok, yvmmak o Hanokait in chuka achvfa akohcha tok: Pallu, Palluait chuka achvfa:

6. Heslon a, Heslonait chuka achvfa: Kamai ya, Kamait chuka achvfa:

7. Ilvppa pnta kak osh Lubenait chuka achvfa vhleha ho-ke, atuk osh holhtina kv̄t tahlepa sipokni pokoli ushta aku-

cha tuchina mēna tahlepa untuklo cha pokoli tuchina aiena tok.

8. Mikma Pallu ushi; Eliab.

9. Mikma Eliab ushi vhleha; Nemuel micha Tahlan micha Abilam atok. Tahlan micha Abilam ilvppvt Kolah ai itvpeha kv̄t Chihowah kv̄llot i sanali ma, ibafokv̄t Moses micha Alon ita tuklo ka kv̄llot i sanalit okla moma im ai anohowa tok mak oke.

10. Mihma yakni vt itakpashali cha Kolah ya ai itapeha hō ishit nanvbli tok, ai itapeha yv̄mma, yv̄mmvt illi ma luak vt hatak tahlepa tuklo cha pokoli tahlapi aiena hō hushmit tahli tok; yohmi mvt yv̄mmvt nan isht atokowa yō toba tok.

11. Yohmi kia Kolah im vlla vhleha hv̄t ik illo tok.

12. Simeon ushi vhleha hv̄t in chuka achvfa v̄lhpisa hatok: Nemuel a, Nemuelait chuka achvfa: Chamin a, Chaminait chuka achvfa: Chakin a, Chakinait chuka achvfa:

13. Selah ya Sahait chuka achvfa: Shaul a, Shaulait chuka achvfa yatok.

14. Ilvppa puta kak osh Simeonait chuka achvfa vhleha hoke: tahlepa sipokni pokoli tuklo akucha tuklo cha tahlepa tuklo tok.

15. Kat im vlla vhleha in chuka achvfa puta v̄lhpisa hosh, Sefon a, Sefonait chuka achvfa ak atok: Hakki ya Hakkait chuka achvfa ak atok: Shuni ya, Shunait chuka achvfa ak atok:

16. Osni ya, Osnait chuka achvfa ak atok: Eli ya, Elait chuka achvfa ak atok:

17. Alot a, Alotait chuka achvfa ak atok: Aleli ya, Alelait chuka achvfa ak atok.

18. Ilvppa puta kak osh Kat im vlla vhleha in chuka achvfa hatok; micha holhtina tuk mak osh tahlepa sipokni pokoli ushta cha tahlepa tahlapi tok.

19. Chutah im vlla vhleha hv̄t El micha Onan ak atok, micha El micha Onan ita tuklo kv̄t Kenaan yakni ya ai illi tok.

20. Mihma Chutah im vlla vhleha in chuka achvfa v̄lhpisa hosh: Shelah ya, Shelanait chuka achvfa ak atok: Fales

a, Falesait chuka achvfa ak a tok: Selah ya, Salait chuka achvfa ak atok.

21. Mihma Fales ushi vhleha: Heslon a, Heslonait chuka achvfa ak atok: Hamul a, Hamulait chuka achvfa ak atok:

22. Ilvppa puta kak osh Chutah im vlla vhleha; chuka achvfa puta hatok, micha holhtina mak osh tehlepa sipokni pokoli untuklo akucha hannali cha tahlepa tahlapi tok.

23. Issaka ushi vhleha chuka achvfa vlhpisa; Tola ya, Tolait chuka achvfa ak atok: Pua ya Punait chuka achvfa ak atok:

24. Chashob a, Chashobait chuka achvfa ak atok: Shimlon a, Shimlonait chuka achvfa ak atok.

25. Ilvppa puta kak osh Issaka im vlla vhleha chuka achvfa hatok; micha holhtina mak osh tahlepa sipokni pokoli hannali akucha ushta cha tahlepa tuchina tok.

26. Sebulon ushi vhleha chuka achvfa vlhpisa: Selet a, Satait chuka achvfa ak atok: Elon a Elonait chuka achvfa ak atok: Chahleel a, Chahleelait chuka achvfa ak atok.

27. Ilvppa puta kak osh Sebulonait chuka achvfa hatok; micha holhtina mak osh tahlepa sipokni pokoli hannali cha tahlepa tahlapi tok.

28. Chosef ushi vhleha chuka achvfa vlhpisa hosh Manasseh micha Eflaim ak atok:

29. Manasseh ushi vhleha: Makil a, Makilait chuka achvfa ak atok: micha Makil vt Kileat a tobachi tok: Kileat a Kileatait chuka achvfa akohcha tok.

30. Kileat ushi vhleha hvt ilvppak atok: Cheesa ya Cheesalait chuka achvfa: Helek a, Helekait chuka achvfa:

31. Micha Asliel a Aslielait chuka achvfa: Shekem a, Shekemait chuka achvfa ak atok.

32. Micha Shemita ya, Shemitait chuka achvfa: micha Hefe ya, Hefalait chuka achvfa ak atok.

33. Mihma Hefe ushi Selofehat vt ushi ik im iksho, amba ushetik vt im asha tok: micha Selofehat ushetik vhleha hohchifo kvv Mahlah, micha Noah, Hoklah, Milkah micha Tisah ak atok:

34. Ilvppa puta kak osh Manasseh chuka achvfa hatok;

micha holhtina mak osh tahlepa sipokni pokoli tahlapi akucha tklo cha tahlepa untuklo tok.

35. Ilvppak osh Eflaim ushi vhleha chuka achvfa vlhpisa hatok: Shuhlelah ya, Shuhlalhait chuka achvfa: Beka ya Baklait chuka achvfa: Tahan a, Tahanait chuka achvfa akatok:

36. Mihma Shuhlelah ushi vhleha hvt ilvppak atok, Elan a Elanait chuka achvfa ak atok.

37. Ilvppak osh Eflaim ushi vhleha chuka achvfa vlhpisvt holhtina mak osh tahlepa sipokni pokoli tuchina akucha tuklo cha tahlepa tahlapi tok: Ilvppa puta kak osh Chosef ushi vhleha chuka achvfa vlhpisa hatok:

38. Benchamin ushi vhleha chuka achvfa vlhpisa; Bela ya, Belait chuka achvfa: Ashbel a, Ashbelait chuka achvfa: Ahilam a, Ahilamait chuka achvfa:

39. Shufam a, Shufamait chuka achvfa: Hufam a Hufamait chuka achvfa ak atok.

40. Mihma Bela ushi vhleha hvt At micha Naaman ak atok: At a Atait chuka achvfa: Naaman a Naamanait chuka achvfa ak atok.

41. Ilvppa puta kak osh Benchamin ushi vhleha chuka achvfa vlhpisa hatok: micha ymma holhtina mak osh tahlepa sipokni pokoli ushta akucha tahlapi cha tahlepa hannali tok.

42. Ilvppak osh Tan ushi vhleha chuka achvfa vlhpisa: Shuham a Shuhamait chuka achvfa ak atok. Ilvppak osh Tan in chuka achvfa puta, chuka achvfa vlhpisa hatok.

43. Shuhamait chuka achvfa moma holhtina mak osh tahlepa sipokni pokoli hannali akucha ushta cha tahlepa ushta tok.

44. Asha im vlla vhleha chuka achvfa vlhpisa: Chimna ya, Chumnait chuka achvfa: Chesui ya, Chesuait chuka achvfa: Beliah ya, Belait chuka achvfa ak atok.

45. Beliah ushi vhleha: Heba ya, Hebalait chuka achvfa: Malkiel a, Malkielait chuka achvfa ak atok.

46. Mihma Asha ushetik vt hohchifo kvt Selah ak atok.

47. Ilvppa puta kak osh Asha ushi vhleha chuka achvfa

hatok, micha yvmma holhtina mak osh tahlepa sipokni pokoli tahlapi akucha tuchina micha tahlepa ushta tok.

48. Naftali ushi vhleha chuka achvfa vhlpisa : Chahseel a, Chahseelait chuka achvfa : Kuni ya Kunait chuka achvfa :

49. Chesa ya, Chesalait chuka achvfa : Shillem a. Shillemait chuka achvfa ak atok.

50. Ilvppa puta kak osh Naftali in chuka achvfa chuka achvfa vhleha vhlpisa hatok, micha yvmma aholhtina kv̄t tahlepa sipokni pokoli ushta akucha tahlapi micha tahlepa ushta tok.

51. Ilvppa puta kak osh Israel im vlla vhleha hosh holhtina mvt tahlepa sipokni bat tahlepa hannali cha tahlepa sipokni achvfa, micha tahlepa untuklo pokoli tuchina aiena tok.

52. Mihma Chihowah yvt Moses a im anumpulit,

53. Ilvppa puta kak osh hohchifo holhtina ka vhlpisa i yakni ya chi hosh yakni yash osh i kvshkoashke.

54. Laua ka i yakni ya ishahlechit ish imashke, micha ik lauo ka i yakni ik lauo hvsh imashke, i yakni aiyukali kv̄t holhtina tuk ak o vhlpisa ho ish imashke.

55. Yohmi kia nashoeli hosh yakni ya itikvshkoashke, iki vhleha apehlichy hohchifo kak o ai ishashke.

56. Laua micha ik lauo aiena kv̄t na shoeli hosh yakni ya itakvshkoashke.

57. Atuk o chuka achvfa puta vhlpisa hosh Lefait vhleha hv̄t holhtina ilvppa puta kak atok, Keshon a, Keshonait chuka achvfa ak atok : Kohalh a, Kohalhait chuka achvfa ak atok : Melali ya Melalait chuka achvfa ak atok.

58. Ilvppa puta kak osh Lefait chuka achvfa vhleha hatok : Lebnaait chuka achvfa, Heblonait chuka achvfa, Mahlait chuka achvfa, Mushait chuka achvfa, Kolahlait chuka achvfa ak atok. Atuk o Kohalh vt Amlam a tobachi tok.

59. Mihma Amlam tekchi vt hohchifo kv̄t Chokebet osh Lefai ushetik, ishki vt Lefai ya Echip im ai eshi tok. Atuk osh Alon micha Moses micha in tek Miliam aiena ka Amlam a im eshi tok.

60. Atuk o Alon vt Natab micha Abihu, Eleasa micha Ihlama aiena kvt im vtta tok.

61. Atuk o Natab micha Abihu ita tuklo kvt, luak inla Chihowah itikba ai im issa mvt illi tok.

62. Micha holhtina mvt nakni bieka hosh hvshi achvfa vba maya kvt tahlepa sipokni pokoli tuklo akucha tuchina. Israel im vlla vhleha ha takla yakni ik emo hatok. Israel im vlla vhleha ha takla holhtina tok keyu hokvt.

63. Ilvppa puta kak osh Moses micha naholitompa isht vtta Eleasa ita tuklo kvt Israel im vlla vhleha Chatan a Moab yakni patali Cheliko bilika a holhtina tok, holhtina tok mak oke.

64. Yohmi kia Moses micha naholitompa isht vtta Alon itatuklo kvt Israel im vlla vhleha ha yakni haiaka Sinai ya a hohtena tok a, hatak achvfa kia ilvppa puta ka itin takla ya iksho tok.

65. Chihowah yvt, Yakni haiaka ai illit taha pulla chi hoke, achi tok oka. Mihma hatak achvfa kia hlakofi kvt iksho tok. Chefynneh ushi Kaleb micha Nvn ushi Choshua ak illa tok.

CHAPTA XXVII.

YOHMI ma Selofehat yummvt Hefe ushi, mikma yummvt Kileat ushi, mihma yummvt Maki ushi, mihma yummvt Manasseh chuka achvfa Manasseh ushi, mihma yummvt Chosef ushi atok yumma ushetik vhleha hvv ona tok, micha ushetik vhleha hohchifo kvt ilvppak atok, Mahlah, Noah micha Hoklah micha Milkah micha Tisah atok.

2. Atuk osh Moses, micha naholitompa isht vtta Eleasa, micha holitopa vhleha micha okla moma aiena itikba, okla moma in tabenakel okhissa bilika hiel cha,

3. Piki vt yakni haiaka ai illi tok oke, micha Kolah ai itapeha kvt Chihowah ya i sanalit itihoyvt itvnaha ka ibafohka tok keyushke : yohmi kia ilap nanashvchi isht illi tok oke; micha ushi ik im iksho tok oke.

4. Nanta katiohmi ho ushi iksho hatuk ak osh piki hoh-

chifo kut in chuka achufa ai itin takla ya kunia hinla cho? Yumohmi hoka, piki itibapishi vhleha takla yakni ish pimashke, achi tok.

5. Mihma Moses vt nan isht im akaniohmi ka Chihowah itikba isht ona tok.

6. Mihma Chihowah yvt Moses a im anumpulit,

7. Selofehat ushetik vhleha hut vhpesa ho anumpuli hoke: iki itibapishi vhleha takla yakni ai eshi ya ish ima pulashke: micha iki i yakni yash tosholit ish im onachashke.

8. Micha Israel im vlla vhleha im anumpulit, Hatak vt ushi iksho hosh illikma i yakni yash tosholit ushetik ak o hvsh im onachashke.

9. Atuk o ushetik vt ikshokma i yakni yash itibapishi vhleha hak o hvsh imashke.

10. Atuk o itibapishi vt ik im ikshokma i yakni yash iki itibapishi vhleha hak o hvsh imashke.

11. Atuk o iki vt itibapishi vhleha hut ikshokma i yakni yash in chuka achufa ai achufa i kanomi pit i bilika yak o hvsh ima na ieshashke, mikma yummak osh Israel im vlla vhleha, Chihowah yvt Moses a im apesa tuk mak o, i nan vllipisa ai apihisashke, im achi tok.

12. Micha Chihowah yvt Moses a, Nvni Abalim ilvppa oiya cha Israel im vlla vhleha yakni ima li tok a pisah.

13. Atuk osh ish pisa ha mut chishno ak kia chitibapishi Alon vt iba holhtina chohmit chim okla ha ish iba holhtina chi hoke.

14. Chukushmi Sin ash okla moma kut itachowa ma, nishkin itikba ya oka yumma is si aholitobla he tuk vt ila filummit vm anumpa ha ish i sanali tuk oka, yummvt Melibah oka Katesh talaia yakni haiaka Sin ak atok, im achi tok.

15. Mihma Moses vt Chihowah ha im anumpulit,

16. Chihowah yvt nipi puta moma imi shilombish in Chitokaka yvt okla moma pehliechi hatak atokoli na,

17. Yummak osh itikba kohchvt ihiya, micha yummak osh itikba ont chukohowa, micha yummak osh pehlichit kohoncha, micha yummak osh pehlichit chukowvt ahantashke,

yvmohmi h_o Chihowah im okla moma yvt chukfi yosh apis-tikeli iksho y_o ik chohmo kashke, im achi tok.

18. Mihma Chihowah yvt Moses a im anumpulit, Nvn ushi Choshua hatak shilombish nukfoka yvmmak o ish ishi cha chibbak ish onochashke.

19. Micha Eleasa naholitompa isht v_tta itikba, micha okla moma itikba y_a ish hilechashke; micha yvmmak osh p_i-sa h_o, anumpa ish imashke.

20. Micha chim aholitopa kaniohmi k_a ish onochashke; yvmohmi h_o Israel im vlla v_hleha okla moma kvt im antia achukmashke.

21. Micha naholitompa isht v_tta Eleasa itikba hikia na yvmmak osh Chihowah itikba Ulim ai isht apesa yak o isht im asilhv_hcha hi oke: im anumpa h_o kohchvt ia hi oke, micha im anumpa h_o ont chukowa hi oke, yvma micha Israel im vlla v_hleha apiha aiena kvt okla moma puta kvt yvmohma hi oke, im achi tok.

22. Mihma Moses vt Chihowah yvt im achi tuk mak o yvmihchi tok: micha Choshua y_a ishi cha naholitompa isht v_tta Eleasa itikba, micha okla moma itikba y_a hilechi tok.

23. Micha ibbak a onochi mvt anumpa ima tok, Chihowah yvt Moses a tohvt im apesa tuk mak o yvmihchi tok.

CHAPTER XXVIII.

MIHMA Chihowah yvt Moses a im anumpulit,
2. Israel im vlla v_hleha h_a im anumpulit, Nan vm issa micha am p_uska vbit isht aiokpv_hchi luak isht hullukmi, a nabalama y_a ithaiyanvt ont ai v_hlpiesakma vm issashke, ish im apesashke.

3. Micha luak ishit hukmit im issa ilvppak o Chihowah y_a hvsh im issa hi oke; Chukfi ushi tuklo h_o afvmmi v_m-mona hosh, ik aiono takali kvt iksho hukmit im issa bilia y_o onna hosh onnakma hvsh yvmihinchashke.

4. Chukfi ushi achvfa kash onnahinli ish im issa tukmvt, chukfushi achvfa y_a ont opiakma, ish im issa hi oke:

5. Micha ilhpak im issa yo bota tohbi lipchbi efah isht pokoli, bvt bila toba hin kvshkoa ai ushta kv itaioma hi oke.

6. Chihowah i nabalama vbit luak ishit hullukmit im issa, hukmit im ihisa bilia yosh Sinai nvnih ha ai vlhpisa tok mak oke.

7. Micha nan ishko im issa ya chukfi ushi achvfakma hin kvshkoa ai ushta hi oke : nan ishko im issa ya aholitopa ak o oka paki kullo ya Chihowah ish im afohoblichia hi oke.

8. Mikma chukfi ushi achvfa yano, opiakma ish im is-sashke : onnahinli ilhpak im issa mak o, micha nan ishko im issa mak o, chohmit ish im issa hi oke, vbit luak ishit hukmit im issa Chihowah i balama ya hi oke.

9. Nitak hullokma chukfi ushi tuklo afummi vmmona ik ai ono takali kv iksho, micha bota tohbi ishit pokoli kvshkoa tuklo, bila itaioma ho ilhpak im issa mak o micha nan ishko im issa aiena hi oke.

10. Hukmit im issa bilia, micha nan ishko im issa aiena kv ashakma, ilvppak osh nitak hullo moma hukmit im issa yoke.

11. Micha hvshi puta isht hvchim ia vmmona ka hukmit im issa ya Chihowah hvsh im issa hi oke ; wak hobuk himita tuklo, micha chukfi nakni achvfa, chukfi ushi untuklo afummi vmmona ik ai ono takali kv iksho aiena yashke.

12. Micha wak hobuk achvfakma ilhpak im issa mak o bota tohbi ishit pokoli kvshkoa tuchina bila aioma yashke ; micha chukfi nakni achvfakma ilhpak im issa mak o bota tohbi ishit pokoli kvshkoa tuklo bila aioma yashke.

13. Micha chukfi ushi achvfakma, ilhpak im issa mak o bota tohbi kvshkoa ishit pokoli bano ho bila aioma, nabalama hukmit im issa, micha vbit hukmit Chihowah im issa ya hi oke.

14. Micha ishkot im issa yvt wak hobuk achvfakma, oka paki hin iklvna ; micha chukfi nakni achvfakma, hin kvshkoa atuchina, micha chukfi ushi achvfakma, hin kvshkoa isht ai ushta ya hi oke. Ilvppak osh afummi hlopulli, hvshi puta kv hvshi talalikma, hukmit im issa yoke.

15. Hukmit im issa bilia, micha nan iksho im issa aiena

kv̄t ashakma, nan ashv̄chi im issa mak o issi kosoma ai ishit issi kosomushi achv̄fa hō Chihowah im issa hi oke.

16. Micha hv̄shi v̄mmona nitak ont isht auahhushta kv̄t Chihowah im v̄banv̄blit ont ia yoke.

17. Atukma hv̄shi ilv̄ppa nitak ont ishit anahtahlapik mak o, impv̄chi yoke: nitak untuklo hō pv̄ska ik shatv̄mmo v̄pa hi oke.

18. Nitak v̄mmona hokv̄no itv̄naha holitopa asha hi oke; yv̄mmak oka tishu atoksv̄li nana kia hv̄chik yv̄mihcho ka hi oke.

19. Amba Chihowah ya hukmit im issa ya v̄bit luak ishit hukmit im issa ya hv̄sh im issa hi oke; wak hobv̄k himita tuklo, micha chukfi nakni achv̄fa micha chukfi ushi afv̄m̄mi v̄mmona untuklo aiena hi oke; yv̄mmv̄t ik ai ono takali kv̄t ik hv̄chim iksho ka hi oke.

20. Micha im ilhpak im issa yv̄t bota tohbi yosh bila itaioma hi oke; wak hobv̄k achv̄fakma ishit pokoli kv̄shkoa tuchina, micha chukfi nakni achv̄fakma ishit pokoli kv̄shkoa tuklo hō hv̄sh im issa hi oke.

21. Chukfi ushi achv̄fakma, kv̄shkoa ishit pokoli biekv̄t chukfi ushi untuklo hlopulla hi oke.

22. Micha nan ashv̄chi im issa ya issi kosoma achv̄fa hō ishit hv̄chi kashofa ya hi oke.

23. Onnahinli moma hukmit im issa, yv̄mmv̄t hukmit im issa bilia yv̄t ashakma, ilv̄ppa puta hv̄sh im ih̄isa hi oke.

24. Ilv̄ppak o yohmi hosh nitak untuklo hlopulli k̄a onakma hv̄sh im issa hi oke, v̄bit luak ishit hukmit aiokpv̄chi nipi, Chihowah i balama ak a hi oke: hukmit im issa bilia, micha nan ishko im issa aiena kv̄t ashakma, yv̄mma aiena im issa hi oke.

25. Atuk osh nitak ont isht untuklokma itv̄naha holitopa hv̄chim asha hi oke; tishu a toksv̄li nana kia hv̄sh yv̄mihcha he keyu hoke.

26. Micha nan awaya v̄mmona nitak, ilhpak im issa himona Chihowah isht hv̄sh im onakmv̄t, nitak hullo puta kv̄t ont hv̄chin taha ha yv̄t, itv̄naha holitopa hv̄chim asha hi oke: tishu atoksv̄li nana kia hv̄sh yv̄mihcha he keyu hoke.

27. Amba Chihowah i balama yvt hukmit im issa hvsh im issa hi oke : wak hobvk himita tuklo, micha chukfi nakni achvfa, chukfi ushi afummi vmmona untukla hi oke.

28. Michā ilhpak im issa yvt bota tōhbi bila itaioma yosh wak hobvk achvfakma ishit pokoli kvshkoa tuchina, chukfi nakni achvfakma ishit pokoli kvshkoa tuklo,

29. Chukfi ushi achvfakma kvshkoa ont ishit pokoli biekt chukfi ushi untuklo hō hlopulla hi oke.

30. Michā isht hvchi kashofi vt issi kosoma ya ushi achvfa hi oke.

31. Hukmit im ihisa na bilia. micha ilhpak im issa (yvm-mvt ik ai ono takali kv̄t ik hvchim iksho ka hi oke) micha nan ishko im issa aiena kv̄t aiasha ma, ymma puta ka hvsh im issa hi oke.

CHAPTA XXIX.

ATUK osh hvshi ont isht untuklo, hvshi nitak vmmo-nakma, itvnaha holitopa hvchim asha hi oke : tishu atoksvli nana kia hvsh yvmihcha he keyu : isht pufa olachi hvchi nitak oke.

2. Michā Chihowah i balama yō hukmit im issa hvsh im issa hi oke : wak hobvk himita achvfa, chukfi nakni achvfa, micha chukfi ushi afummi vmmona untuklo ha hi oke.

3. Mikmvt ilhpak im issa yvt bota tohbi bila itaioma hosh, wak hobvk achvfakma ishit pokoli kvshkoa tuchina, micha chukfi nakni achvfakma, ishit pokoli kvshkoa tuklo,

4. Chukfushi untuklo kv̄t chukfushi achvfakma ishit pokoli kvshkoa achvfa bat hlopulla hi oke,

5. Michā nan ashvchi im issa ishit hvchi kashofa chi kv̄t issi kosoma ya ushi achvfa hi oke,

6. Chihowah i balama vbit im issvt luak ishit hukmit im issa, hvshi ymma, nitak moma luak ishit hukmit im issa, micha ilhpak im issa, micha nan ishko im issa ayvmohmi chatuk mak o yvmihcha hi oke.

7. Michā hvshi isht untuklo ilvppvt nitak ont ishit pokolikma itvnaha holitopa hvchim asha hi oke ; micha hvchi

shilombish a hvsh ilbvshala hi oke; micha yvmma natoksuli nana kia hvsh yvmihcha he keyu hoke;

8. Amba Chihowah i balama yo hukmit im issa ya hvsh im issa hi oke; wak hobuk himita achvfa, chukfi nakni achvfa, micha chukfi ushi afvmmi vmmona untuklo yosh, inlv a takali kv iksho ka hi oke.

9. Micha ilhpak im issa yvt bota tohbi bila itaioma yosh wak hobuk achvfakma ishit pokoli kvshkoa tuchina, chukfi nakni achvfakma ishit pokoli kvshkoa tuklo,

10. Chukfushi untuklo kv chukfi ushi achvfakma ishit pokoli kvshkoa achvfa bat hlopulla hi oke,

11. Nan ashvchi ishit kashofa, micha hukmit im ihisa na bilia, micha ilhpak im issa, micha nan ishko im issa aiena kv asha na, nan ashvchi im issa yo issi kosoma ya ushi achvfa ho im issa hi oke.

12. Atuk osh hvshi isht untuklo kv nitak ont isht auah tahlapikma itvnaha holitopa hvchim asha hi oke; tishu atoksuli nana kia hvsh yvmihcha he keyu, micha Chihowah imvchi isht hvsh im aiasha nitak untuklo ha hi oke.

13. Chihowah i nabalama yo hukmit im issa, vbit luak ishit hukmit im issa hvsh im issa hi oke; wak hobuk himita auah tuchina, chukfi nakni tuklo, micha chukfi ushi afvmmi vmmona auahushta, inlv a takali kv iksho ho hvsh im issa hi oke,

14. Mikma ilhpak im issa yvt bota tohbi bila itaioma yo wak hobuk auah tuchina kash wak hobuk achvfakma ishit pokoli kvshkoa tuchina biekakma, chukfi nakni tuklo kash chukfi nakni achvfakma ishit pokoli kvshkoa tuklo bika,

15. Mikma chukfushi auahushta kv chukfushi achvfakma ishit pokoli kvshkoa achvfa bika hi oke,

16. Hukmit im ihisa bilia, ilhpak im issa, micha nan ishko im issa aiena kv aiashakma, nan ashvchi im issa yo issi kosoma ya ushi achvfa ho hvsh im issa hi oke,

17. Atuk osh nitak atuklakma, wak hobuk himita auah tuklo, chukfi nakni tuklo, micha chukfushi afvmmi vmmona auahushta inlv a takali kv keyu ho hvsh im issa hi oke.

18. Micha ilhpak im issa, micha nan ishko im issa yvt

wak hobuk puta, chukfi nakni puta, chukfushi puta aiena holhtina vlhpisa ho ayvmohmi chatuk mak o hvsh im issa hi oke.

19. Hukmit im ihisa na bilia, micha ilhpak im issa, micha nan ishko im issa aiena kv̄t aiashakma, nanashvchi im issa yo issi kosoma ya ushi achvfa ho hvsh im issa hi oke.

20. Atuk osh nitak ont isht atuchinakma wak hobuk auahachvfa, chukfi nakni tuklo, chukfushi afummi vmmona auahushta ik ai ono kv̄t iksho hashke,

21. Mikma ilhpak im issa, micha nan ishko im issa puta kv̄t wak hobuk puta, chukfi nakni puta, micha chukfushi puta aiena holhtina ka vlhpisa ho ayvmohmi chatuk mak a hi oke.

22. Micha hukmit im ihisa bilia, micha ilhpak im issa, micha nan ishko im issa aiena kv̄t ashakma, nan ashvchi im issa yo issi kosoma achvfa hashke,

23. Micha nitak ont isht ai ushtakma, wak hobuk pokoli chukfi nakni tuklo, micha chukfushi afummi vmmona auah ushta ik ai ono kv̄t iksho yashke.

24. Micha ilhpak im issa, micha nan ishko im issa yvt, wak hobuk puta, chukfi nakni puta, chukfushi puta aiena holhtina ka vlhpisa ho ayvmohmi chatuk mak o i yvmih-chashke:

25. Micha hukmit im ihisa na bilia, micha ilhpak im issa, micha nan ishko im issa aiena kv̄t ashakma, nan ashvchi im issa yo issi kosoma ya ushi achvfa yashke.

26. Micha nitak ont ishit tahlapikma wak hobuk chakkali, chukfi nakni tuklo, micha chukfushi afummi vmmona auahushta ik ai ono kv̄t iksho yashke.

27. Mikma ilhpak im issa, micha nan ishko im issa puta kv̄t wak hobuk puta, chukfi nakni puta, chukfushi puta aiena kv̄t holhtina ka vlhpisa ho ayvmohmi chatuk mak o i yvmih-chashke.

28. Micha hukmit im ihisa na bilia micha ilhpak im issa micha nan ishko im issa aiena kv̄t ashakma, nan ashvchi im issa yo issi kosoma achvfa yashke.

29. Micha nitak ont ishit hannalikma, wak hobuk untu-

china, chukfi nakni tuklo, micha chukfushi afummi ummona auah ushta ik ai ono kut iksho yashke.

30. Micha ilhpak im issa, micha nan ishko im issa puta kut, wak hobvk puta, chukfi nakni puta, micha chukfushi puta aiena kut holhtina ka vlhpisa ho ayvmohmi chatuk mak o i yvmihchashke :

31. Micha hukmit im ihisa na bilia, micha ilhpak im issa micha nan ishko im issa aiena kut ashakma, nan ashvchi im issa yo issi kosoma achvfa yashke.

32. Micha nitak ont isht untuklokma, wak hobvk untuklo, chukfi nakni tuklo, micha chukfushi afummi ummona auah ushta ik ai ono kut iksho yashke :

33. Micha ilhpak im issa, micha nan ishko im issa puta kut, wak hobvk puta, chukfi nakni puta, micha chukfushi puta aiena holhtina ka vlhpisa ho a yvmihchi chatuk mak o i yvmihchashke :

34. Micha hukmit im ihisa na bilia, micha ilhpak im issa, micha nan ishko im issa aiena kut ashakma, nan ashvchi im issa yo issi kosoma achvfa yashke :

35. Micha nitak ont isht untuchinakma itvnaha holitopa hvchim asha hi oke ; nitak yvmma tishu atoksuli nana kia hvsh yvmihcha he keyu.

36. Amba Chihowah nan i balama yo vbit luak ishit hukmit im issa, wak hobvk achvfa, chukfi nakni achvfa, chukfushi afummi ummona untuklo ik ai ono kut iksho aiena ho hukmit im issa yo hvsh im issa hi oke.

37. Ilhpak im issa, micha nan ishko im issa puta kut, wak hobvk puta, chukfi nakni, micha chukfushi puta aiena holhtina ka vlhpisa ho ayvmohmi chatuk mak o i yvmihchashke :

38. Micha hukmit im ihisa na bilia, micha ilhpak im issa, micha nan ishko im issa aiena kut ashakma, nan ashvchi im issa yo issi kosoma achvfa hashke.

39. Anumpa hvsh il onochi puta, micha ilap ahnit nana hvsh im issa puta, luak ishit hukmit nana hvsh im issa puta, micha ilhpak hvsh im issa puta, micha nan ishko hvsh im issa puta, micha itinnanaiyvchit nana hvsh im issa puta aiena hvv ashakma, impvchi hvchim vlhpisa puta ka iluppa puta :

aiena kak o Chihowah ya hush i yumihashke, im achi tok.

40. Mihma Chihowah yvt Moses a im apesa tuk mak o, moma ka Moses vt Israel im vlla vhleha ha im anoli tok.

CHAPTA XXX.

MIHMA Israel im vlla vhleha puta ka, Moses vt apehliche i noshkoboka puta ka isht im anumpulit, Ilvppak o Chihowah yvt apesvshke.

2. Hatak vt anumpa il onochit Chihowah im il onochi tukmvt, keyukmvt anumpa kello anumpulit imishilombish a anumpa ho isht ile takchi tuk mvt, im anumpa ha kobuffa he keyu, itih ha akohcha tuk moma kvv yumiha hi oke.

3. Ohoyo hvv himita yosh iki in chuka ahantvt anumpa il onochi cha, Chihowah im il onochit anumpa isht ile takchi mvt,

4. Mikma anumpa il onochi, micha anumpa isht ile takchi yo imishilombish a ishit takchi ka, iki vt haklo, mihmvt iki yash osh nana ik im achokma; yohmikma anumpa il onochi tuk moma kvv aiahla hi oke; michaanumpa isht ile takchi imishilombish ishit takchi puta kvv aiahla hi oke.

5. Amba iki vt haklo nitak akinli hosh vlvpesa ik im ahno tukma, anumpa il onochi, micha anumpa moma isht iletakchi imishilombish a ishit takchi tuk vt ik aiahlo ka hi oke, mihma iki ak osh vlvpesa ik im ahno hatuk o, Chihowah yvt i kashoffa hi oke.

6. Micha i hatak vt asha tuk osh anumpa il onochi ma, itih ha nana kia kohchit im ishilombish a ishit takchi ma.

7. Yohmi ma i hatak vt haklo, mihmvt haklo nitak vt na. ik im achokma: yohmikma anumpa il onochi tuk vt aiahla hi oke, micha anumpa isht ile takchi im ishilombish a ishit takchi tuk vt aiahla hi oke.

8. Amba i hatak vt haklo nitak vt vlvpesa ik im ahno tuk mvt, yohmikmvt anumpa il onochi il onochi tuk a, micha itih ha kohchichit imishilombish anumpa isht ile takchi tuk

a ik ahlecho kashke, mikma Chihowah yvt i kashoffa hi oke.

9. Amba ohoyo vlhtakla, micha ohoyo i hatak vt i kunia hokvto anumpa il onochi ilap imishilombish ishit takchi tuk vt moma kv̄t ahlit takala hi oke.

10. Mikma i hatak in chuka anta hosh anumpa il onochi, keyukmvt anumpa isht ile takchi imishilombish a anumpa kullo ishit takchi tuk ma,

11. Yohmi ma i hatak vt haklo kia nana ik acho, micha vlhpesa ik im ahno: yohmikma anumpa il onochi tuk moma kv̄t aiahla hi oke; micha anumpa isht ile takchi imishilombish ishit takchi tuk vt aiahla hi oke.

12. Amba i hatak vt haklo nitak vt im akshochit kanchikma, yohmikma nana hosh anumpa il onochi tuk, keyukmvt imishilombish a anumpa ishit takchi itih ha kohcha tuk vt ik ahlo ka hi oke; i hatak vt im akshochi hoke; mikma Chihowah yvt i kashoffa hi oke.

13. Anumpa il onochi puta, micha anumpa kullo isht iletakchi imishilombish isht ilbv̄shali puta ka, i hatak vt ahlecha hinla, keyukmvt i hatak vt akshocha hinla hoke.

14. Amba i hatak vt onna hosh onna ka nan ik acho kash osh imomakvt; yohmikmvt anumpa il onochi tuk moma, micha anumpa isht ile takchi onvtola tuk moma ka kullochi hoke; haklo nitak vt nana ik im acho tuk okvt, kullochi hoke.

15. Amba haklo ha ya tuk osh kaniohmit akshochikmvt, yohmikmvt i nanashv̄chi ya shaiyala hi oke, im achi tok oke.

16. Nan vlhpisa ilv̄ppa puta kak osh hatak micha tekchi ita tuklo iti takla ya itoyula he, micha iki micha ushetik himita moma hosh iki in chuka ahanta iti takla ka itoyula hi yo Chihowah yvt Moses a im apesa tok oke.

CHAPTA XXXI.

MIHMA Chihowah yvt Moses a im anumpulit,
2. Israel im vlla vhleha ha Mitianait okla ha ish im

il ai okha pullashke, i himmak o chim okla ha ish iba holh-tina hi oke, im achi tok.

3. Mihma Moses vt okla ha im anumpulit, Hvsh kanioh-mi kv̄t t̄nvp hvsh ia chi kv̄t na halupa isht hvsh il atahlash-ke, micha ivt Mitianait okla ha ont in tanampashke, micha Mitian ak o Chihowah ya im il ai okhashke.

4. Israel ap ehlich i puta moma hlopulli ka tahlepa sipokni achvfa bieka ho, t̄nvp a hvsh ai i pilashke.

5. Yohmi ho Israel tahlepa sipokni puta ka akohchvt ap ehlich i achvfakma, tahlepa sipokni achvft ia hosh tahle-pa sipokni auahtuklo kv̄t ai i filvmm̄it na halupa isht im v̄lh-taha tok.

6. Yohmi ma Moses vt t̄nvp a pila tok, ap ehlich i achv-fakma tahlepa sipokni achvfa ho, yv̄mma micha naholitom-pa isht v̄tta Eleasa ushi Finehas aiena kv̄t naholitopa isht asha, micha olacha chi ho isht p̄fa yvt ibbak foyuka yo t̄nvp a pila tok.

7. Mihma Chihowah yvt Moses a im achi tuk mak o, Mi-tianait okla ha in tanampi tok; micha nakni moma ka v̄bit tahli tok.

8. Mich a illi tuk vt ashakma, Mitian i m̄iko v̄hleha ha v̄bi tok; ilv̄ppa puta kak atok, Efi, Lekem, micha Su, mi-cha Hu micha Leba, Mitian i m̄iko tahlapi hatok; micha Beo ushi Balaam a b̄vshpo falaia isht v̄bi tok.

9. Mich a Israel im v̄lla v̄hleha hv̄t Mitian ohoyo moma, micha im v̄lla v̄hleha aiena ka yukachi m̄vt, na wehp̄oa yo wak moma, micha v̄lhp̄oba chipunta moma, micha im ilayak moma aiena ka ishi tok.

10. Mich a in t̄maba holihta puta aiasha yatuk moma, micha i holihta moma ka luak ishit hukmit tahli tok.

11. Mihm̄vt hatak, micha nan v̄lhp̄oa aiena, na wehp̄oa moma, micha nan v̄lhp̄oa moma ishi tok.

12. Mich a yuka v̄hleha hash micha v̄lhp̄oba na wehp̄oa yash micha namp̄oa yash, Moses micha naholitompa isht v̄tta Eleasa micha Israel im v̄lla v̄hleha okla moma aiena ka isht im onvt, binah Moab yakni matali ya yv̄mm̄vt Chatan bilika micha Cheliko bilika talaia ka isht ona tok.

13. Mihma Moses micha naholitompa isht vtta Eleasa, micha okla moma i holitopa vhleha aiena kut binah ha ko-cha afamvt ia tok.

14. Mihma Moses vt tvshka chipota i pehlich i vhleha ha micha tahlepa sipokni puta i kupitvni vhleha, micha tahlepa puta i kupitvni vhleha aiena kut tvnvp ayvt vla tuk a i nukli-bishla tok.

15. Mihmvt Moses vt, Ohoyo moma hvsh okchalinchi tuk oh cho?

16. Yakeh! ilvppa puta kak osh Balaam vt i miha na, Israel im vlla vhleha Pio pulla ka Chihowah ishit i yoshoba tok; micha ililli okpulo vt Chihowah im okla moma ai ititakla ya itoyula tok.

17. Yvmohmi hoka, himak a vlla vhleha nakni moma ka hvshbashke, micha ohoyo hvv iba tvshki cha hatak ithana tuk moma aiena ka hvshbashke.

18. Amba ohoyo-vlla moma, iba tvshki cha hatak ithana tuk keyu kano, hvchimmi ha chi hosh okchalinchit hvsh ishaskhe.

19. Micha bina ha kucha hvsh aiasha na nitak untuklashke; kvna hosh hatak vbi tukmvt, micha kvna hosh illi ya haleli tukmvt, hvchishno, micha hvchi yuka aiena kut, nitak ont isht atuchina, micha nitak ont isht untuklo ka hvsh ile kashoffashke.

20. Micha hvchi nafohka moma, micha nahakshup osh toba, micha issi kosoma hishi yosh toba moma, micha iti yosh nana toba moma ka hvsh kashoffashke, im achi tok.

21. Mihma naholitompa isht vtta Eleasa vt hatak tvnvp aya tvnvp ia tuk a, Ilvppak osh nan vlhpisa mak o Chihowah yvt Moses a im apesa tuk mak oke.

22. Peh tuli lakna, micha tuli hvta, asonak lakna, tuli, asonak hvta micha naki,

23. Nana hoh kia lua he keyukma, luak o hvsh hlopullechikma kashofa hi oke; yohmi kia filvmmichi oka ya ishit kashofa hi oke: micha lua hinla moma ka oka yak o hvsh hlopullecha hi oke.

24. Micha nitak ont isht untuklokma hvchi nafohka ya

hush achefa cha huchi kashofa hi oke ; yohmi ha yosh binah ha ant hush chukowa hi oke, im achi tok.

25. Mihma Chihowah yvt Moses a im anumpulit,

26. Chishno, micha naholitompa isht vttā Eleasa, micha okla moma iki ishahli vhleha aienvt, hatak, micha nan vhlpoa nawehpoa tuk holhtina ka hush ishashke.

27. Micha na wehpoa kashapa tuklo ita kvshvplit, tvnvp ilonochit tvnvp ia tuk, micha okla moma ka hush im ita-kashvblashke.

28. Hatak tvnvp aya puta tvnvp ia tuk a noshkobo atobbi Chihowah immi ya chi ho hush onochashke ; hatak puta kash, micha wak puta kash, micha issuba nashoba puta kash, micha chukfi puta kash aiena ka tahlepa tahlapikma shilombish achvfa,

29. Im iklvnna hush ai ishi cha, Chitokaka i walit im issa chi ho, naholitompa isht vttā Eleasa ya hush imashke.

30. Mikmvt Israel im vlla vhleha im iklvnna ya hatak puta kash, micha wak puta kash, micha issuba nashoba puta kash, micha nan vhlpoba chipunta kash micha nan vhlpoba ilaiyuka moma kash pokoli tahlapikma, achvfa ho ai ishit Lefait vhleha, yvmmvt Chihowah in tabenakel nan isht ai ahanta ka apistikeli chatuk a hush imashke, im achi tok.

31. Mihma Chihowah yvt Moses a im apesa tuk mak o Moses micha naholitompa isht vttā Eleasa ita tuklo kvv yv-mihchi tok.

32. Mihma nawehpoa tvnvp aya hatak vhleha hvv yuka-chi tuk atampa mak osh chukfi tahlepa sipokni bat tahlepa hannali, tahlepa sipokni pokoli untuklo, micha tahlepa sipokni tahlapi tok,

33. Micha wak tahlepa sipokni pokoli untuklo akucha tuklo tok,

34. Micha isuba nashoba tahlepa sipokni pokoli hannali akucha achvfa tok,

35. Micha iba tvshkit hatak a ithana tuk keyu moma kvv ohoyo tahlepa sipokni pokoli tuchina akucha tuklo tok.

36. Micha iklvnna kvv, yvmmvt kohchvt tvnvp ia tuk i kashapa holhtina kvv chukfi tahlepa sipokni bat tahlepa tu-

china, micha tahlepa sipokni pokoli tuchina akucha untuklo, micha tahlepa tahlapi tok.

37. Micha noskobo Chihowah im atobbi vt chukfi tahlepa hannali, micha pokoli untuklo akucha tahlapi tok.

38. Mikma wak vt tahlepa sipokni pokoli tuchina akucha hannali tok; ymma noshkobo Chihowah im atobbi akohcha kvt pokoli untuklo akucha tuklo tok.

39. Mikma issuba nashoba yvt tahlepa sipokni pokoli tuchina micha tahlepa tahlapi tok; ymma noshkobo Chihowah im atobbi vt akohcha kvt pokoli hannali akucha achvfa tok.

40. Mikma hatak ohoyo hvt tahlepa sipokni auahannali tok; ymma noshkobo Chihowah im atobbi vt akohcha kvt ohoyo pokoli tuchina akucha tuklo tok.

41. Mihma Chihowah yvt Moses a im apesa tuk mak o Moses vt noshkobo atobbi yash, ymmvt Chihowah i walit im issa yatuk o naholitompa isht vta Eleasa ya ima tok.

42. Mihma Israel im vlla vhleha im iklvna, ymma Moses vt hatak tanampi tuk ash im ita kashvbi tok.

43. Yohmi ka okla moma ka im iklvna kvt chukfi tahlepa sipokni bat tahlepa tuchina micha tahlepa sipokni pokoli tuchina akucha untuklo, micha tahlepa tahlapi tok,

44. Micha wak tahlepa sipokni pokoli tuchina akucha hannali tok,

45. Micha isuba nashoba tahlepa sipokni pokoli tuchina micha tahlepa tahlapi tok,

46. Micha hatak ohoyo tahlepa sipokni auahannali tok.

47. Israel im vlla vhleha im iklvna ka Moses vt, hatak micha nan vllhpoba aiena pokoli tahlapikma achvfa ho ai ishi cha Lefait vhleha, ymmvt Chihowah in tabenakel nan isht aiahanta apistikeli yatuk o Chihowah yvt Moses a im apesa tuk mak o ima tok.

48. Mihma okla tahlepa sipokni puta i nan vlhtoka vhleha, micha tahlepa sipokni puta i kvpitvni vhleha, micha tahlepa puta i kvpitvni vhleha aiena kvt Moses a bilika im ona tok.

49. Micha Moses a, Chin tishu vhleha hvt tvnvp aya ha-

tak vhleha e pehlichy tuk aiyukali holhtina ka il ishi ma, hatak achvfa kia iksho kv̄t ikshoshke.

50. Yvmohmi hatuk osh Chihowah isht aiokpvchi isht elvshke, pim ishilombish isht atobbi Chihowah itikba il ai ikba ch̄i hosh hatak il aiyukali kv̄t nana il ishi tuk, tv̄li lakna isht shema, itatakvi, micha shakba abeha, chvnaha, micha haksobish atakali chvnaha, micha tv̄li lakna inochi aiena ka isht e lvshke, im achi tok,

51. Mihma Moses micha naholitompa isht v̄tta Eleasa ita tuklo kv̄t tv̄li lakna isht il akshema moma ka im ishi tok.

52. Michā tv̄li lakna im 'issa, tahlepa sipokni puta i kv̄pitv̄ni vhleha, micha tahlepa puta i kv̄pitv̄ni vhleha aiena kv̄t Chihowah im issa tuk moma kv̄t shekel tahlepa sipokni auahhannali micha tahlepa untuklo pokoli tahlapi tok.

53. Tv̄nv̄p aya hatak puta kv̄t nawehpoa ya ilap aiyukali kv̄t ishi tok okv̄t.

54. Mihma Moses micha naholitompa isht v̄tta Eleasa ita-tuklo kv̄t tv̄li lakna yash, tahlepa sipokni puta i kv̄pitv̄ni vhleha, micha tahlepa puta i kv̄pitv̄ni vhleha ha im ai ishi cha, Israel im vlla vhleha isht ithana bilia hosh Chihowah itikba itoyula ch̄i h̄o okla moma in tabenakel a ont fohki tok.

CHAPTA XXXII.

YOHMI ma Luben im vlla vhleha, micha Kat im vlla vhleha hv̄t wak im apakna chinto fehna tuk atuk osh Chaasa yakni micha Kiliat yakni ya pisa ma, yakeh, yvm-mv̄t wak aiasha ya achukma tok.

2. Yohmi mv̄t Kat im vlla vhleha, micha Luben im vlla vhleha hv̄t Moses micha naholitompa isht v̄tta Eleasa, micha okla moma i holitopa vhleha aiena kash im ona cha.

3. Ataloh, micha Tibon, micha Chaasa, micha Nimlah, micha Heshbon, micha Elealah, micha Shebam, micha Nebo, micha Beon.

4. Israel okla moma itikba ya Chihowah yv̄t issot a kan-

chi tok yakni pulla kut wak i yakni achukma hoke, mihma hvchin tishu vhleha hut wak im ashvshke,

5. Okla achi mut, yvmohmi hoka chim isht i kana ya, e chi ai ahaiyuchi tuk ma, yakni ilvppak o chin tishu vhleha i yakni ya chi ho ibbak fohkashke, micha Chatan a chik pi hlopullecho kashke, im achi tok.

6. Mihma Moses vt Kat im vlla vhleha, micha Luben im vlla vhleha, Hvch itibapishi vhleha hut tvnvp ia na, lumvt ilvppa hvsh chieya chi cho?

7. Micha nanta katiohmi ho Israel im vlla vhleha hut yakni Chihowah yvt ima tok a chukowa he tuk o chukvsh hvsh illechi cho?

8. Hvch iki vhleha hut yakni ya pisa chi ho Katesh-bania vttvt pila li ma, yakohmi tok.

9. Eshkol okfa ha ona cha yakni ya pisa mut, Israel im vlla vhleha chukvsh a illechi na, yakni Chihowah ima tok a ik chukowo tok.

10. Atuk o mih makinli ma Chihowah im ai i nukkilli vt libbi mut, anumpa kullo anumpulit,

11. Afvmmi pokoli tuklo ishtvt vba maya hosh Echip yakni ya kohchvt minti tok vt, hatak achvfa kia, anumpa kullo anumpulit, Ebleham, Aisaak, micha Chekob a im issa li tok yakni ya pisa chi keyu pulla hoke; aioklvhvt vm antia tuk keyu hokvt,

12. Kenesait Chevnnneh ushi Kaleb, micha Nvn ushi Choshua ak illa hi oke; yvmmak okvto aioklvhvt Chihowah im antia tuk okvt, achi tok.

13. Micha Chihowah im ai i nukkilli vt libbi mut yakni haiaka itvnowvchi na afvmmi pokoli ushta ma, ai unchololi yvmma moma Chihowah itikba nan ik achukmo yvmihchi tuk vt taha tok.

14. Atuk o yakeh! hvch iki vhleha vlhtobvt, Chihowah im ai i nukkilli vt Israel a i sanalit libbit isht i shalit isht ia chi ho hatak nanashvchi ai iti shali hvsh wakaiyvshke.

15. Hvsh iakaiya tuk vt hvsh i flvmmikma, himakma anonti yakni haiaka ya akancha chi hoke; mikma okla ilvppa moma ka vbit hvsh tahla chi hoke, im achi tok.

16. Mihma okla hash ot bilika, im ona cha, Pi nan vllhpoa aiasha he chukfi-holihta, micha pim vlla vhleha aiasha he tmaha holihta ilvppa il ai ikba chi hoke.

17. Amba pishno vto na halupa pim vlhtaiyaha hosh Israel im vlla vhleha itikba e mahaya cha, aiasha chi ka isht il onashke: mikma pim vlla vhleha hv̄t yakni ya okla aiasha pulla kak o tmaha aholihta puta ho aiasha chi hoke.

18. Israel im vlla vhleha moma kv̄t i yakni aiyyukali kv̄t ik abinilo kisha hokvno, falamvt pin chuka ela he keyu hoke.

19. Chatan tv̄nvp yv̄mma, micha tikba pilla hokvno yakni ya il ibai isha he keyu; pi yakni vt Chatan ola tv̄nvp hv̄shi akohcha ka pilla kak o pin talaia hokvt, im achi tok.

20. Mihma Moses vt, Nana ilvppa hv̄sh yvmihchi hokmvt, na halupa hv̄chim vlhtaiyaha cha Chihowah itikba ya tv̄nvp hv̄sh iakmvt.

21. Micha hv̄sh moma kv̄t na halupa hv̄chim vlhtaiyaha cha Chatan a hlopullit Chihowah itikba ya hv̄sh ia na, in tv̄nvp vhleha ha itikba a tihlelit kocha weh̄lit tahlikma.

22. Mikma yakni vt Chihowah itikba ya ai i nutaka, yohmikma i himmak a yo Chihowah itikba ya micha Israel itikba ya nanashv̄chi vt onvtola keyu hosh hv̄sh falamashke, mikma yakni ilvpput Chihowah itikba ya hv̄chi yakni ya chi hoke.

23. Amba hv̄sh yvmohma he keyukmvt, yakeh! Chihowah ya hv̄sh i yoshobv̄shke, yohmi ka oh ithana na hv̄sh ashv̄chi vt hv̄chi ahayucha chi hoke.

24. Hv̄chim vlla tmaha holihta hv̄sh im ikbashke; micha hv̄chin chukfi ha holihta hv̄sh im ikbashke; micha hv̄ch itih ha kohcha tuk mak osh hv̄sh yvmihchashke, im achi tok.

25. Mihma Kat im vlla vhleha, micha Luben im vlla vhleha hv̄t Moses a im anumpulit, A shahli hv̄t anumpuli tuk mak o chin tishu vhleha hv̄t yvmihcha chi hoke.

26. Pim vlla vhleha, pin tekchi vhleha, pi nanvllhpoa chipunta, micha pi wak moma aiena kv̄t Kiliat tmaha holihta puta yv̄mmak o aiasha chi hoke.

27. Amba a shahli hvt achi tuk mak o, chin tishu vhleha hatak moma kv̄t tanampa chī kv̄t na halupa im vlhtaha hosh hlopullit Chihowah itikba ya tanampit ia chī hoke, im achi tok.

28. Yohmi ho yv̄mma pulla ka Moses vt naholitompa isht v̄tta Eleasa, micha Nvn ushi Choshua, micha Israel im vlla vhleha ap ehlichī puta iki vhleha i shahli aiena ka im apesa tok.

29. Michā Moses vt, Kat im vlla vhleha, micha Luben im vlla vhleha aiena hatak puta kv̄t na halupa im vlhta ha hosh hv̄chi awant Chatan a hlopullit Chihowah itikba tv̄nv̄p ia na, yakni vt hv̄chi tikba ya nutaka hokma; yohmikma ai ahanta chī ka Kiliat yakni ak o hv̄sh ima hi oke.

30. Amba nahalupa im vlhtaha hosh hv̄chi awant hlopulla he keyukma, Kenaan yakni ak o hv̄ch ibai asha hi oke, im achi tok.

31. Mihma Kat im vlla vhleha, micha Luben im vlla vhleha aiena kv̄t afalaminchit, Chihowah yvt in tishu vhleha ha im achi tuk mak o e yvmihcha chī hoke.

32. Na halupa pim vlhtaha hosh hlopullit Chihowah itikba ayvt Kenaan yakni ya e chukowa chī hoke; yohmi hosh yakni il isha chī kv̄t Chatan ola in tv̄nnv̄p ak osh pimmi ha chī hoke, achi tok.

33. Mihma Moses vt Kat im vlla vhleha, micha Luben im vlla vhleha, micha Chosef ushi Manasseh ap ehlichī iklv̄na aiena ka, Amolait okla i miko Sihon im ap ehlichika, micha Bashan i miko Ok im ap ehlichika, yakni yash, micha im ai vhli tv̄maha holihta puta ai iti eshi, micha yakni kucha apakfoyupa tv̄maha holihta puta ka ima tok.

34. Mihma Kat im vlla vhleha hvt Tibon micha Ataloh, micha Aloe,

35. Michā Atloh, Shofan, micha Chaasa, micha Chokbehah,

36. Michā Belh-nimbah, micha Belh-halan tv̄maha holihta, micha chukfi i holihta aiena ai ikbi tok.

37. Mihma Luben im vlla vhleha hvt Heshbon micha Elealah micha Kichalh-chealim,

38. Micha Nebo, micha Baal-meon (hohchifo inla hochifo hosh) micha Shibmah aiena ka ikbi tok: micha tvmaha holihta ikbi tuk vt hohchifo inla ima tok.

39. Mihma Manasseh ushi Maki im vlla vhleha hvt Kiliat a ona cha ishi tok; micha Amolait vt yvmma asha tuk a im ai ishi tok.

40. Mihma Moses vt Kiliat a Manasseh ushi Maki ya ima na, abinili tok.

41. Mihma Manasseh ushi Chai vt ivt in tvmaha ushi puta ka ishi cha Hafolh-Chai hochifo tok.

42. Mihma Nobah hvt ivt Kenalh, micha in chuka lokeli aiena ishi cha, ilap hohchifo kak o ahochifochit Nobah hochifo tok.

CHAPTA XXXIII.

ISLAEL im vlla vhleha Echip yakni ya okla moma kvv Moses micha Alon ita tuklo kvv pehliechi ho kohchvt itvnowvt aya tuk vt ilvppa puta kak atok.

2. Mihma Chihowah yvt im apesa mak o, Moses vt kohchvt nowvt itvnowa tok a holissochi tok: yohmi kvv ilvppa puta kak osh kohchvt itvnowa kvv ai itvnowa tok mak oke.

3. Mihmvt hvshi vmmona, micha hvshi vmmona kvv nitak ont ishit auahtahlapi ma, Lameses a asht ia tok; vbanvblit ont ia yatuk a onna ma, Israel im vlla vhleha hvt Echip okla moma kvv pisa ho ibbak kvvlo hosh kohchvt ia tok.

4. Echip okla hvt im vlla vttahpi moma, Chihowah yvt issot i kanchi na hohpit tahli tuk atuk okvt: micha Chihowah yvt i naholbvt toba puta kak kia napalvmmi onochi tok.

5. Mihma Israel im vlla vhleha hvt Lameses a kanvlli mvt Sukkolh a abinachi tok.

6. Atuk osh Sukkolh a kanvlli mvt, Ehlam, yvmmvt yakni haiaka vhli talaia ka abinachi tok.

7. Atuk osh Ehlam a kanvlli mvt fullotvt anonti Pi-hahiloh, yvmmvt Baal-sefon itikba talaia ka ona tok, micha Miktol itikba yak o binachi tok.

8. Atuk osh Pi-hahiloh itikba asht ia mvt okhuta iklvna hlopulli cha yakni haiaka pit chukowut Ehlam yakni haiaka nitak tuchina a nowa y_o ona tok, micha Malah ya binachi tok.

9. Atuk osh Malah ya kanvlli mvt Elim a ona tok, mihma Elim a kvli auahtuklo kv hiohmaya tok, mihma pam iti pokoli untuklo kv hinli tok, mihma yummak o binachi tok.

10. Atuk osh Elim a asht kanvlli mvt okhuta Homma bilika binachi tok.

11. Atuk osh okhuta Homma ya asht kanvlli mvt Sin yakni haiaka ya binachi tok.

12. Atuk osh yakni haiaka Sin a asht ia mvt Tofkah ya binachi tok.

13. Atuk osh Tofkah ya asht ia mvt, Alush a binachi tok.

14. Atuk osh Alush a asht ia mvt, Lefitim, yumma okla oka ishka hi vt iksho ho binachi tok.

15. Atuk osh Lefitim a asht ia mvt, yakni haiaka Sinai ya binachi tok.

16. Atuk osh yakni haiaka Sinai ya asht ia mvt, Kibloh-hattaafah ya binachi tok.

17. Atuk osh Kibloh-hattaafah ya asht ia mvt, Haseloh a binachi tok.

18. Atuk osh Haseloh a asht ia mvt, Lilhmah ya binachi tok.

19. Atuk osh Lilhmah ya asht ia mvt, Limmon-pales a binachi tok.

20. Atuk osh Limmon-pales a asht ia mvt, Libnah ya binachi tok.

21. Atuk osh Libnah ya asht ia mvt, Lissah ya binachi tok.

22. Atuk osh Lissah ya asht ia mvt, Kehelalah ya binachi tok.

23. Atuk osh Kehelalah ya asht ia mvt, Shafa nvni ha binachi tok.

24. Atuk osh Shafa nvni ha asht ia mvt, Halatah ya binachi tok.

25. Atuk osh Halatah ya asht ia mvt, Makhelolh a bina-chi tok.

26. Atuk osh Makhelolh a asht ia mvt, Tahalh a binachi tok.

27. Atuk osh Tahalh a asht ia mvt, Talah ya binachi tok.

28. Atuk osh Talah ya asht ia mvt, Milhkah ya binachi tok.

29. Atuk osh Milhkah ya asht ivt, Hashmonah ya bina-chi tok.

30. Atuk osh Hashmonah asht ivt, Moselolh a binachi tok.

31. Atuk osh Moselolh a asht ivt, Bene-chaakan a bina-chi tok.

32. Atuk osh Bene-chaakan a asht ivt, Hol-hakitkat a binachi tok.

33. Atuk osh Hol-hakitkat a asht ivt, Chotbahlah ya binachi tok.

34. Atuk osh Chotbahlah ya asht ivt, Eblonah ha bina-chi tok.

35. Atuk osh Eblonah ha asht ivt, Esion-kaba ya binachi tok.

36. Atuk osh Esion-kaba ya asht ivt, Sin yakni haiaka, yummvt Katesh a binachi tok.

37. Atuk osh Katesh a asht kanvlli mvt, Ho nvniH Etom yakni vHli ya binachi tok.

38. Mihma naholitompa isht vtta Alon vt Ho nvniH ha Chihowah yvt im apesa ho oiya tok, Israel im vlla vHleha hvT Echip yakni ya kohcha tuk a afvmmi pokoli ushta ho hvshi ont ishit tahlapi nitak vmmona ma yummak o, ai illi tok.

39. Mihma Alon vt afvmmi tahlepa achvfa cha pokoli tuklo akucha tuchina hosh Ho nvniH ha ai illi tok.

40. Atuk o miko Alat Kenaanait, Kenaan yakni oka mahli pilla ahanta kvT, Israel im vlla vHleha hvT minti ka pit haklo tok.

41. Atuk o Ho nvniH ha asht ivt, Salmonah ha binachi tok.

42. Atuk osh Salmonah ha asht ivt, Punon a binachi tok.
43. Atuk osh Punon a asht ivt, Obolh a binachi tok.
44. Atuk osh Obolh a asht ivt, Iche-abalim Moab im ai vhlī ka binachi tok.
45. Atuk osh Iim a asht ivt, Tibon-kat a binachi tok.
46. Atuk osh Tibon-kat a asht ivt, Almon-tiblahlaim a binachi tok.
47. Atuk osh Almon-tiblahlaim a asht kanvlli mvt, Nebo itikba Abalim nvnih chaha foka yak o binachi tok.
48. Atuk osh Abalim nvnih foka ya asht ia mvt, Chatan a Cheliko bilika Moab yakni matali ak o binachi tok.
49. Atuk osh Chatan bilika Belh-chesimolh a ashvt ia mvt, Moab yakni matali Abel-shittim a abinachi tok.
50. Atuk o Chihowah yvt Moses a Moab yakni matali Chatan bilika micha Cheliko bilika ya ai im anumpulit,
51. Israel im vlla vhleha im anumpulit, Chatan a hlopulit Kanaan yakni ya ont hvsh chukowakmvt,
52. Yohmikmvt yakni yash okla aiasha tuk a hvchi tikba atihlelit hvsh kohchashke, micha i naholbvt toba puta mo-ma ka okpvnit, bilvt akmot naholbvt toba puta ka okpvnit hvsh tahlashke, micha im achahaka puta akvchit hvsh vmohmichashke.
53. Micha okla aiasha tuk a yakni hvsh im ishi cha hvsh aiasha chi hoke, yakni ya hvsh isha chi ho hvchima li hatuk oka.
54. Micha yakni ya nashoeli hosh i yakni ya chi ho hvchin chuka achvfa vllpisa ho hvsh im ita kvsho lashke: micha laua i shahlikma yakni ya i shahlechit hvsh imashke, micha iklauokma yakni vt iklauo ho hvsh imashke; hatak i yakni aiyukali kv kanima itulakma yvmmak o i yakni ya chi hoke; hvch iki vhleha apehlichī vllpisa ho yakni ya hvsh isha chi hoke.
55. Amba yakni yash okla aiasha tuk a hvchi tikba hvchik kocha wehlo tuk ma; atukma yakohma hi oke, hvsh ashanchi tuk vt nahalupa yosh hvchi nishkin a shamvlli ya hi oke, micha kvti chohmit hvchi naksi ya shimowoa ya yakni ya hvsh aiasha ka hvchilbvshala hi oke.

56. Micha yakohma hi oke, yumma i yvmihchi la he aiahni li tuk vt, hvchishno ya hvchi yvmihchi la hi oke, ish im achashke, im achi tok.

CHAPTA XXXIV.

MIHMA Chihowah yvt Moses a im anumpulit,
2. Islael im vlla vhleha ha im apesvt, Kenaan yakni ya ont hvsh chukowakmvt, hvsh aiasha he vt ilvppak osh Kenaan yakni, micha aivhli fullota yakni hvsh ai isha chi mak oke,

3. Yohmikma hvchim oka mahli kashapa kvv yakni haia-ka Sin ak o vttvt ia hosh Etom ai vhli ak o vhlit aya hi oke; micha oka mahli hvchim ai vhli vt okhvta hvpi hvshi akocha ka ont ai vhli fehna ak a hi oke,

4. Atuk osh hvchim ai vhli vt oka mahli ya vttvt fullota kvv Aklabbim atuya onakmvt hlopullit Sin a ona hi oke: micha ont akohcha vt oka mahli ha vttvt ia hosh Katesh-bania ya onakmvt, ont ayvt Hasa-atta ona cha, ont ayakmvt Asmon a ona hi oke.

5. Atuk osh ai vhli vt Asmon a vttvt et fullotakmvt Echip okhina ya ona hi oke, micha akohcha yvt okhvta yak a hi oke.

6. Mihma hvshi ai okatula ai vhli hokvto okhvta ak inli kak osh hvchim ai vhla hi oke: ilvppak osh hvshi ai okvtula hvchim ai vhla hi oke.

7. Mihma ilvppak osh falvmmi hvchim ai vhla chi hoke: okhvta chito ya vttvt nvni Ho ya ona ka hvsh apesashke.

8. Ho nvni ha vttvt, Hamalh ont achukowa ont vhli ho hvchim ai vhli ya hvsh apesashke, micha ai vhli ont a kohcha kvv Setat ak o ona hi oke,

9. Micha ai vhli vt ont ayvt Siflon a ona hi oke, micha ont akohcha kvv Hasa-enan ak a hi oke: ilvppak osh falvmmi hvchim ai vhla hi oke.

10. Micha hvshi akochaka hvchim ai vhli ya Hasa-enan a vttvt ia hosh Shefam ont vhli ka hvsh apesashke.

11. Micha ai vhli vt Shefam vttvt okvtahvt ia hosh Ain hvshi akochaka in tvnnvp ayvt Liblah ya onashke; mihmvt ai vhli vt okvtahvt iakmvt okhvta Chinnelolh lapalika hvshi akochaka pilla kak o onashke.

12. Mikmvt ai vhli vt okvtahvt ivt Chatan a ona hi oke: mikma ont akohcha vt okhvta hvpi yak a hi oke. Ilvppak osh ai vhlit apakfoyupa aiena kv̄t hvch̄i yakni ya ch̄i hoke, ish im achashke, achi tok.

13. Mihma Moses vt Israel im vlla vhleha ha im apesvt, Yakni ilvppak o na shoeli hosh hvsh abinila ch̄i ho apehlich̄i hvsh chakkali cha iklv̄nna aiena kak o hvchima he Chihowah yvt apesa tuk oke,

14. Luben apehlich̄i im vlla vhleha vto iki vhleha in chuka achvfa vlhp̄isa hosh, micha Kat apehlich̄i im vlla vhleha iki vhleha in chuka achvfa vlhp̄isa hosh i yakni ya ishi tuk oka; mikma Manasseh apehlich̄i iklv̄nna aiena kv̄t i yakni ishi tuk oka,

15. Apehlich̄i tuklo, micha apehlich̄i iklv̄nna kv̄t i yakni ya Chatan ola in tvnnvp hvshi akochaka pilla, Cheliko bilika hvshi akochaka ak o ai ishi tuk oke, im achi tok.

16. Mihma Chihowah yvt Moses a im anumpulit,

17. Hatak ilvppa puta hohchifo kak osh yakni ya hvchim ita kvshkola ch̄i hoke: naholitompa isht v̄tta Eleasa, micha Nvn ushi Choshua ita tuklo kak a ch̄i hoke.

18. Micha apehlich̄i puta ka holitopa achvfa ho hvsh atokoli na ai isha he vlhp̄esa vlhp̄isa ho yakni yash ita kvshkolashke.

19. Micha hatak vhleha hohchifo hv̄t ilvppak oke; Chutah apehlich̄ika Chefv̄nneh ushi Kaleb ak a hi oke.

20. Simeon im vlla vhleha apehlich̄ika Ammihvt ushi Shemuel ak a hi oke.

21. Benchamin apehlich̄ika Chislon ushi Elitat ak a hi oke.

22. Mihma Tan apehlich̄ika ai achvfa holitopa Chokli ushi Bukki ak a hi oke.

23. Chosef im vlla vhleha ai achvfa holitopa Manasseh im vlla vhleha apehlich̄ika Efot ushi Hanniel ak a hi oke.

24. Mihma Eflaim im vlla vhleha afehlichika aiachvfa holitopa vt Shiftan ushi Kemuel ak a hi oke.

25. Mikma Sebulon im vlla vhleha afehlichi aiachvfa holitopa vt Panak ushi Elisafan ak a hi oke.

26. Mikma Issaka im vlla vhleha afehlichi aiachvfa holitopa yvt Assan ushi Paltiel ak a hi oke.

27. Mihma Asha im vlla vhleha afehlichi aiachvfa holitopa vt Shelomi ushi Ahihvt ak a hi oke.

28. Mihma Naftali im vlla vhleha afehlichi aiachvfa holitopa vt Ammihvt ushi Petahel ak a hi oke.

29. Ilvppa puta kak osh Israel im vlla vhleha ha Kenaan yakni ya im ita kvshkola chi ho Chihowah hv apesa tuk mak oke.

CHAPTA XXXV.

MIHMA Chihowah yvt Moses a Moab yakni matali Chatan bilika, micha Cheliko bilika ya ai im anumpulit,

2. Israel im vlla vhleha hv Lefait vhleha hv aiasha chi ka ai isha he vlhpesa yakni ya tmaha holehta puta ka isht ima he, ish im apesashke; micha Lefait vhleha ha tmaha holihta puta a bilika fullota ka hvsh imashke.

3. Micha tmaha holihta puta aiasha chi kv im ashashke; mikma a bilika puta ka i wak, im ilayak micha i nan vlhpoa moma aiena kv aiashashke.

4. Micha tmaha holihta puta bilika apakfoyupa Lefait vhleha hvsh ima chi kv holihta ya hiki vt kocha pilla ia hosh kubit tahlepa sipokni achvfa banot apakfoyupa chi hoke.

5. Mikma tmaha holihta ymma vttvt kocha ia kv hvshi akochaka in tvnnvp, kubit tahlepa sipokni tuklo, micha oka mahli in tvnnvp vt kubit tahlepa sipokni tuklo, micha hvshi ai okatula in tvnnvp vt kubit tahlepa sipokni tuklo, micha falvmmi in tvnnvp vt kubit tahlepa sipokni tuklo ho hvsh apesashke: mikma tmaha holihta yvt ai iklvnna hikiashke: ilvppak osh in tmaha holihta ya im a bilika a puta yashke.

6. Micha Lefait vhleha h̄a t̄maha holihta puta hvsh ima k̄a t̄maha holihta a hlakofi yvt hannalashke, yummak oka hatak b̄ika vbi yvt om malela hi yō hvsh im apesashke : mi-cha ymma t̄maha holihta pokoli ushta akucha tuklo hō hvsh im aienvchashke.

7. Yohmi hō Lefait vhleha h̄a t̄maha holihta hvsh ima moma kv̄t pokoli ushta akucha untuchina hi oke, yummak oka abilika fullota aiena hō hvsh imashke.

8. Micha t̄maha holihta puta hvsh ima kv̄t Israel im vlla vhleha i yakni ak o hvsh im ai ishashke : in lauakma, im ai ishit laua hō hvsh imashke ; amba ik in lauokma im ai ishit ik lauo hō hvsh imashke : moma kv̄t ai isha he v̄lhpesa ya īshi kak osh v̄lhpisa hō Lefait vhleha h̄a t̄maha holihta ya imashke, im achi tok.

9. Mihma Chihowah yvt Moses a im anumpulit,

10. Israel im vlla vhleha im anumpulit, Chatan a hlopulit Kenaan yakni ya ont hvsh chukowakmvt,

11. Yohmikmvt t̄maha holihta, yummvt t̄maha holihta ahlakofi ya ch̄i hō hvsh apesashke ; mikma hatak nana hosh ik nuktaḥlo hosh kv̄na h̄a vbikmvt, yummak o nan vbi vt pit mallelashke.

12. Mikma yummvt il aiokha hvsh im ahlakoffit aiokchaya t̄maha holihta puta hashke ; yvmohmi na hatak vbi vt okla moma itikba hikivt nan ik im v̄lhpiso k̄isha kv̄t ik illo kashke.

13. Micha t̄maha holihta puta hvsh ima ch̄i kv̄t t̄maha holihta hannali kv̄t hvsh ahlakofi ya ch̄i hoke.

14. Chatan ola in t̄vnnv̄p a t̄maha holihta tuchina hō hvsh imashke, miha Kenaan yakni ya t̄maha holihta tuchina hō hvsh imashke, yummvt ahlakofi t̄maha holihta yashke.

15. T̄maha holihta hannali ilvppak osh Israel im vlla vhleha, miha okla inla, miha nowvt aya tuk osh takla ahanta aiena k̄a ahlakofi ya ch̄i hoke : yvmohmi k̄a kv̄na hosh ik nuktaḥlo hosh hatak vbikmvt yummak o malelit onashke.

16. Atuk o tv̄li ishit toksvli yō isht isso na illikma, yummvt hatak vbi yoke : hatak vbi vt illi pullashke.

17. Micha tuli yo pila hosh isso na isht illa he vlhpesa tuk o illikma, hatak vbi yoke: hatak vbi vt illi pulla hi oke.

18. Keyukmvt iti, ibbak isht itibi yosh isht illa he vlhpesa ho isht isso na illikma, hatak vbi yoke: hatak vbi vt illi pullashke.

19. Issish hlatapa ka il aiokha hvv ilap akinli hosh hatak vbi yash vbashke: itafamakmvt vbashke.

20. Amba i nukkilli hosh ishit bahli na illi, keyukmvt in luma tuk osh pit ishit bahli na illi;

21. Keyukmvt i nukkilli hosh ibbak isht isso na, illikma, isso tuk vt illi pullashke; hatak vbi yokvt; issish hlatapa tuk il aiokha yvt afamakmvt hatak vbi yash vbashke.

22. Amba i nukkilli keyu hosh yakosi itin takla ho ishit bahli, keyukmvt im aiehchi tuk keyu hosh nana kia pit om pila,

23. Keyukmvt tuli yosh hatak isht illa he vlhpesa ho pisa keyu hosh pit om pila na illikma, mikma in tenvp atuk keyukma, micha hotopali bunna hatuk keyukma:

24. Yohmikma okla moma kvv hatak vbi micha im issish hlatapa il aiokha ita tuklo nan vlhpisa ilvppak o iakaiya hosh nan im apesashke:

25. Micha okla moma kvv hatak vbi yash issish hlatapa il aiokha ibbak ash akohchit hlakoffichashke, micha okla moma kvv tmaha holihta ai okchaya malelit ai ona tuk, falvminchit fohkashke: mikma yvma ahanta na naholitomp isht vta moma ishahli bila holitopa ahama tuk vt illashke.

26. Yohmi tuk kia hatak vbi yash osh nitak kaniohmi ho in tmaha holihta aiokchaya malelit ona tuk vt kocha aya hokma,

27. Atuk o issish hlatapa il aiokha yvt in tmaha holihta aiokchaya kocha ya ai ahayuchi cha, issish hlatapa il aiokha yvt hatak vbi yash vbi kia: issish hlatvbli kvv im vlhpisa he keyu hoke.

28. In tmaha holihta aiokchaya anukaka ahanta na, naholitomp isht vta moma i shahli vt illi ha yak a hi atuk

oka: amba naholitompa isht v_tta moma i shahli v_t illi ha-yokm_vno, hatak v_bi v_t falamv_t i yakni ya ona hi oke.

29. Yvmohmi hoka, ilv_ppa puta kak osh nan v_lhpisa isht apesa yosh hv_{ch}i aionchuloli puta hlopulli ka hv_{sh} aiasha moma ka itoyula ch_i hoke.

30. Kv_na hosh hatak vbikm_vt nishkin pisa itih pulla h_o hatak v_bi v_t illa hi oke: amba witness achv_fa hosh hatak nana h_o i sanalit atokoli na illa he keyu hoke.

31. Micha hatak v_bi v_t illa he v_lhpesa ka im ilhfiopak a nan aiv_lli hv_{sh} isha he keyu hoke: amba illi pulla hi oke.

32. Micha malelit tvmaha holihta aiokch_ya ont chukowatuk, nan aiv_lli hv_{sh} ishi na, naholitompa isht v_tta yv_t ik illo k_isha h_o anonti i yakni ai v_tta ch_i hosh v_la he keyu hoke.

33. Yvmohmi hosh yakni hv_{sh} aiasha kv_t hv_{ch}ik litehlo kashke: issish yvmmak osh yakni ya litehli hoka: micha yakni v_t issish on hlatapa tuk v_t kashofa he keyu, amba hlatv_bli tuk im issish ak o ishit kashofa hi oke.

34. Yvmohmi hoka yakni hv_{sh} aiasha ch_i, micha ai ahanta li ya hv_{ch}ik litehlo kashke: Ūno, Chitokaka sia hv_t Israel im v_lla v_hleha takla ahanta li hoka, ish im achashke, im achi tok.

CHAPTA XXXVI.

MIHMA Chosef ushi v_hleha in chuka achv_fa puta ka ai-achv_fa Manasseh ushi Maki ushi Kileat im v_lla v_hleha in chuka achv_fa puta i_ki ishahli v_hleha hv_t bilika ona cha, Moses, micha holitopa v_hleha, Israel im v_lla v_hleha i_ki i shahli v_hleha itikba anumpulit,

2. Micha a shahli hv_t Israel im v_lla v_hleha i yakni ya ch_i h_o, yakni ya na shoeli hosh ima he ya Chihowah yv_t im apesa tok oke; micha a shahli hv_t il itibapishi Selofehat i yakni yatuk a ushetik v_hleha hak o ima hi a Chihowah yv_t apesa tok.

3. Atuk o Israel im v_lla v_hleha ap ehlich_i inla ushi kani-ma h_o auwayakma, i yakni yash p_iki v_hleha i yakni ya ai ishi cha, ishi tuk ash ap ehlich_i i yakni ak o ibafohka hi oke:

yohmi hosh nashoelit il ishi tuk, p_i yakni yash pim ai isha hi oke.

4. Micha Israel im vlla vhleha in chubili vt vlakma, i yakni yash, ishi tuk ash ap ehlich i yakni ya ibafohka chi hoke; yvmohmi h_o i yakni yash p_iki vhleha im ap ehlich i h_a im ai isha hi oke, im achi tok.

5. Mihma Moses vt Chihowah im anumpa hatuk mak o Israel im vlla vhleha h_a im apesvt, Chosef ushi vhleha ap ehlich i hvt vlhpesa h_o achishke.

6. Nana ilvppak o Selofehat ushetik vhleha pulla ka Chihowah hvt apesvshke, k_vna h_o vlhpesa ahnikmvt auwayashke: yohmi kia i_ki ap ehlich i chuka achvfa yak o auwayashke.

7. Yvmohmi h_o Israel im vlla vhleha i yakni vt kanvllit ap ehlich i achvfa vttvt ap ehlich i inla onvt ik mahayo kashke: Israel im vlla vhleha hvt ilap i_ki vhleha ap ehlich i aiyukali kak o ibafoyuka chi hoka.

8. Mihma ushetik aiyukali kv_t Israel im vlla vhleha ap ehlich i kanima h_o yakni ai ishi tuk mvt, ilap i_ki ap ehlich i ai achvfa ya aiauwaya hi oke; yvmohmikma Israel im vlla vhleha hatak puta kv_t i_ki vhleha i yakni aiyukali h_o ai isha hi oke.


9. Micha i yakni vt ap ehlich i achvfa vttvt ap ehlich i inla onvt mahaya he keyu hoke; amba Israel im vlla vhleha ap ehlich i aiyukali kv_t ilap i yakni ak inli h_o ibafoyuka hi oke, achi tok.

10. Chihowah yvt Moses a im apesa tuk mak o, Selofehat ushetik vhleha hvt yvmihchi tok.

11. Mahlah, Tisah micha Hoklah micha Milkah micha Noah, Selofehat ushetik vhleha hvt i_ki itibapishi ushi vhleha h_o auwaya tok okvt:

12. Micha Chosef ushi Manasseh ushi vhleha chuka achvfa vhleha ai auwaya tok, micha i_ki in chuka achvfa ap ehlich i ak o i yakni vt ibafoyuka moma tok.

13. Nan vlhpisa, micha ai vlhpiesvt im apesvt yvmihchi ilvppa puta kak o Chihowah yvt Moses a tohnot Moab yakni matali Chatan bilika, micha Cheliko bilika ya Israel im vlla vhleha h_a ai im apesa tok oke.



TUTELONOMI HOLISSO.

MOSES I HOLISSO ISHT TAHLAPI KUT TUTELONOMI HOHCHIFO HOKE.

CHAPTA I.

ANUMPA ilvppa puta kak o Moses vt Israel moma ka Chatan ola in tnnvp, yakni patali, yakni haiaka okhvta humma ichapaka ya, Palan micha Tofel, micha Laban, micha Haselolh, micha Tisahab iti takla ya ai im anumpohonli tok.

2. Holeb a vttvt Sei nvniha ont ia hosh Katesh-banea ona ka nitak auahchvfa ka anowa yoke.

3. Atuk o yakohmi tok; afvmmi ont ishit pokoli ushta, hvshi ont ishit auahachvfa, nitak vmmona ma, Moses vt Israel im vlla vhleha ha, Chihowah yvt nanvlpisa imma ima tuk mak o, moma ka im anumpuli tok.

4. Amolait okla i miko Sihon Heshbon ai vttatok, micha Bashan i miko Ok Etlei talaiia Ashtalolh vttat yvbi ha yvt:

5. Chatan ola in tnnvp Moab yakni ya, Moses vt nan vlpisa ilvppa ai im anumpulit ishtivt,

6. Pin Chitokaka Chihowah yvt Holeb a a pim anumpulit, Nvnih ilvppa hvsh ahanta tok a hopaki kut vlpesvshke.

7. Hvsh fullota cha, itvnowvt avvt, Amolait okla i nvniha, micha bilika taloha moma, yakni patali, micha nvniha foka, micha okfa, micha okamahli, micha okhvta lapalika aiena, Kananait okla i yakni, micha Lebanon aiena ka onvt okhina chito Eufalates okhina ya hvsh onashke.

8. Yakéh, yakni ya hvchi tikba talali lishke; chukowvt yakni ya Chihowah yvt hvchiki vhleha Eblaham, micha Aisaak, micha Chekob, micha im ishtiaka iakaiyvt mihinti aiena ka anumpa kvllo anumpulit, ima tok a hvsh ishashke, achi tok oke, achi tok.

9. Mihmvt nitak ymma hvchim anumpulit, Uno ak bano kv̄t hv̄chi laue la he keyushke, achi li tok.

10. Hv̄chin Chitokaka Chihowah yvt hv̄chi apaknv̄chi tuk oke; atuk o yakeh, hv̄chi apakna kv̄t himak nitak a v̄ba fochik puta ka hv̄sh chohmishke.

11. Hv̄chiki v̄hleha in Chitokaka Chihowah yvt himak a hv̄sh kaniohmi ka laua kv̄t tahlepa sipokni hoh kia i shahli ha hv̄ch ikbashke; yvmihcha he hv̄chi miha tok mak osh, hv̄chi yukpalashke.

12. Katiohmi kak osh v̄no ak bano kv̄t nan isht hv̄sh atakl̄ma, micha na hv̄chi weki, micha hv̄sh itachowa aiena ka shaiyali la hinla cho?

13. Hatak hopoyuksa, nan ithana hv̄chim apelh̄chi vt ithana hoka, hv̄sh ishi na, hv̄chi pehlich̄a he a ikbi lashke, achi li tok.

14. Mikma hv̄chishno ak osh afalaminchit, Nana ish anumpuli ka e yvmihchikmvt pim achukma hinlv̄shke, hv̄s sv̄m achi tok.

15. Yohmi ho hv̄chim apelh̄chi puta ka i shahli v̄hleha hatak hopoyuksa, ithana v̄hleha ha ishi lish, hv̄chi noshkoboka puta ikbit tahlepa sipokni puta i kv̄potv̄ni, micha tahlepa puta i kv̄potv̄ni, micha pokoli tahlapi puta i kv̄potv̄ni, micha pokoli puta i kv̄potv̄ni hv̄chim ikbi li tok: micha hv̄chim apelh̄chi puta ai itin takla ya nan v̄lhtoka puta ka ikbi li tok oke.

16. Mich̄a nitak ymma hv̄chi nan apesa v̄hleha ha atokolit i mihvt, Hv̄chitibapishi v̄hleha itin takla nan iti kaniohmi ya hv̄sh im ahaponaklashke; micha hatak puta, micha itibapishi nan iti kaniohmi, micha okla inla takla āsha tuk aiena ka ai v̄lhpiesa ho hv̄sh im apesashke.

17. Nan apesa kv̄t, hatak yohmi hoka, ish ahna he keyu hoke: amba chipunta kak kia hochito ka iti lauechit hv̄sh i haponaklashke; hatak nashuka ya hv̄chik i nukshopo kashke; nan im apesa yvt Chitokaka immi hoka; atuk osh nana kv̄t hv̄chi kullo fehnakmvt, isht hv̄s sv̄m ala na, v̄no ak osh haponaklo lashke, im achi li tok.

18. Micha nitak yvmma nana moma hvsh yvmohma chi ka hvchim apesa li tok.

19. Atuk o Holeb a ashvt il ia mvt, yakni haiaka chito, micha palvmmi, hina takla Amolait okla i nvniha hvsh a pisa chash pin Chitokaka Chihowah yvt pim apesa tuk mak o mominchit e hlopulli tok; mihmvt Katesh-banea ya ela tok.

20. Mihma Amolait okla i nvniha, yvmmak oka pin Chitokaka Chihowah yvt pima tuk mak o hvshlvshke, hvchim achi li tok.

21. Yakeh, Chin Chitokaka Chihowah yvt yakni yash chi tikba talalishke: hvchike vhleha in Chitokaka Chihowah yvt chim achi tuk mak o, ivt ishi: chi nukshopa na, micha chi chukvsh vt ik ello kashke, chim achi li tok.

22. Mihma hvsh moma kvta bilika hvshla tok; micha, Hatak ak o pi tikba e pilakma, yvmmak osh yakni ya pim ahopokoyot tahli cha, hina kanima ho il ia hinla, micha tmaha holihta kanima ho il ona chi ka, anonti anumpa ishit pim vlashke, hvsh achi tok.

23. Mihma nana hvsh achi ka vm vhpesa tok; mihmvt hatak hvsh auahtuklo, apchilichia achvfakma achvft ia ho ishe li tok.

24. Mihma fullotvt nvniha ia tok; atuk osh okfa Eshkol a ona cha, ahopokoyot tahli tok.

25. Micha yakni nana awaya ai ishit ibbak a ishit pim vla mvt, anonti anumpa isht pim vlt, Yakni achukma pin Chitokaka Chihowah yvt pimvshke, achi tok.

26. Yohmi hak inli kia hvsh ia he keyu tok; amba hvchin Chitokaka Chihowah im anumpa ha hvsh kobuffi tok.

27. Mihmvt hvchi bina puta ashvt na mihvt anumpulit, Chihowah yvt pi nukkilli kak osh Echip yakni ya pi kohchit pisht vla cha, Amolait ibbak a pi fohki na, vbit pi tahla chi ha tuk oke.

28. Katima hak o il ia chi cho? pitibapishi vhleha hvta, Okla hatak hochito, micha chaha kvta shahli hoke; tmaha holihta vt hochito, micha aholihta kvta shutik a ona

hoke; micha Anakim ushi vhleha ha yvmma il apisa tuk oke, achit pi chukvsh a iellichishke, hvsh achi tok.

29. Yohmi ma, Hvsh i komunta na, micha yvmmak o hvsh i nukshopa na,

30. Hvchin Chitokaka Chihowah ak osh hvchi tikba ivt hvsh pisa ho, Echip a hvchim a yvmihchi tok moma ka chohmit hvchim itiba chi hoke.

31. Micha yakni haiaka hvsh ataya moma ka, hatak osh ushi shoyuli ka chohmit, hvchin Chitokaka Chihowah yvt kaniohmit chi shoyuli ho pihisvt ilvppa hvshla tuk oke.

32. Yohmi kia nana ilvppa hvchin Chitokaka Chihowah ya hvsh i yimmi tok keyu hoke.

33. Yvmmak osh hina ya hvchi tikba aya tok, micha binah hvsh ahilecha chi ka hoyot hvchim ahayuchi tok; ninak ma, hvsh atia chi ka hvchim anola chi kv luak a tok; atuk osh nitak hoshonti ha tok.

34. Mihma Chihowah yvt hvchim anumpa ola ka haklo cha, nukhobela mvt, anumpa kullo anumpulit,

35. Hatak ilvppa puta aionchuloli haksi ilvppa ai achvfa tuk vt achvfa kia iki vhleha ima la he, mihvt anumpa kullo anumpule li tok, yakni achukma ilvppa pisa chi keyu pulla hoke.

36. Chevnnneh ushi Kaleb ak illa chi hoke: yvmmvt pisa hi oke: yvmmak osh yakni anowa tuk a ima la hi oke, micha yvmma im vlla puta ka ima la hi oke: Chihowah ya aiokluhvt im antia tuk oka, achi tok.

37. Micha Chihowah yvt hvchishno pulla kak o a nukowa cha, yvmma ish chukowa he keyu, ak inli.

38. Amba Nvn ushi Choshua chi tikba hikia kak osh yvmma chukowa chi hoke; ish ai i yimitvchashke, yvmmak osh Israel a abinilicha chi hoke, vm achi tok.

39. Mikma hvchin chipunta vhleha yvmmak osh wehpoa chi, hvsh achi tok vto, micha hvchim vlla yvmmvt nitak yvmmvt nan achukma micha ik achukmo aiena ka ik ithano tok, yvmmak okuto yvmma chukowa chi hoke; yvmma ima la chi hoke, mikma binila chi hoke.

40. Amba hvchishno vto fullotvt yakni haiaka Okhvta humma ak o aiitvnovvt hvsh iashke, achi tok.

41. Yohmi ma afalaminchit hvs svm achi mvt, Chihowah ya il i yoshoba tuk oke; pin Chitokaka Chihowah yvt nana moma pim achi tuk mak o il ia cha, il itibashke, hvs svm achi tok, Atuk osh hatak hvsh moma kv̄t in tv̄np na halupa aiyyukali hvsh il apakshv̄nnichi mvt, nv̄nih bokko hvsh ia chi kv̄t hvchim v̄lhtaha tok.

42. Mihma Chihowah yvt vm achi mvt, Hvsh ia ná, micha hvsh itibi ná, hvchiba foka li keyu hoke; keyukmvt hvchin tv̄np v̄hleha h̄a itikba hvchi akakoha na, ish im achashke, vm achi tok.

43. Yohmi h̄o hvchim anumpule li tok; yohmi ma hvsh haponakla he keyu tok; amba Chihowah im anumpa h̄a i filv̄mmit hvsh i sanali cha, ilapunlv̄t nv̄nih foka hvshla tok.

44. Mihma Amolait v̄hleha nv̄nih foka yv̄mma āsha tuk vt kohchvt hvchi sanali cha hvchi tihlelit foishki chohmi tok, micha Sei ya hvchibit Homah ya hvchishtona tok.

45. Mihma hvsh falama cha, Chihowah itikba ya hvsh yahaya tok; yohmi kia Chihowah yvt hvchim anumpa h̄a hakla he keyu tok; micha hvchi haponakla he keyu tok.

46. Yohmi h̄o Katesh a hvsh aiasha na nitak laua kv̄t, yv̄mma hvsh aiasha atok mak atok.

CHAPTA II.

YUOHMI h̄o e fullota cha, Chihowah yvt vm anumpuli tuk mak o; yakni haiaka pilla, Okhvta humma aiitvnovvt il ia tok: mihmvt nitak laua nv̄nih Sei ya il apakfoyupa tok.

2. Mihma Chihowah yvt vm anumpulit,

3. Nv̄nih ilv̄ppa hvsh apakfoyupa tok a hopaki kv̄t v̄lhpesv̄shke: falv̄mmi pilla h̄o hvsh fullotashke.

4. Micha okla h̄a im apesvt, Hvsh itibapishi v̄hleha Esau im v̄lla v̄hleha Sei aiasha k̄a im aiv̄hli ont hvsh hlopulla chi

hoke; mikma hvchi nukshopa chi hoke; yvmohmi hoka, ahah, hvsh il ai ahni fehnashke.

5. Micha hvsh in tanampi na, i yakni peh iyi putta ahabli achufa chohmi kia, hvchima la chi keyu hoka; qvnihi Sei ya Esau vt aiasha he a ima li hatuk oka.

6. Ilimpa ya tuli holisso ya isht hvsh in chumpa hosh hvsh impa chi hoke; micha oka aiena ka tuli holisso ya isht hvsh in chumpa hosh hvsh ishka chi hoke, achi tok.

7. Hvchin Chitokaka Chihowah yvt chibbak na hvsh toksuli puta ka na hvchi yukpali tuk oka: yakni haiaka chito ilvppa hlopullit hvsh itvnohova ka ithana hoke; afvmmi pokoli ushta ilvppak ash chin Chitokaka Chihowah yvt chiba foyuka tuk oke: nana ik chim iksho kit iksho tuk oke, achi tok.

8. Atuk osh il itibapishi vhleha Esau im vlla vhleha, yvm-mvt Sei ya asha ka issvt ant il ivt, Elalh micha Esion-kaba vttvt aiaa, yakni patali hlopulli ya il ona mvt, e fullota cha, Moab yakni haiaka hina ya ont il ia tok.

9. Mihma Chihowah yvt vm achi mvt, Moabait vhleha ha ish ilbvshali na, micha in tanampi hosh ish itibi na: chi yakni ya chi ho, i yakni a chima la he keyu hoka; Lot im vlla vhleha hvv i yakni ya chi ho Ah ya ima li tuk oka.

10. Chashpo ma, yvmmak o Emim vhleha hosh okla chito, micha laua, micha chaha kvv Anakim ak o chohmi hosh aiasha tok.

11. Yvmmak kia Anakim ak inli chohmit hatak chaha hohchifo tok; amba Moabait vhleha hvv Emim hochifo tok.

12. Holim vhleha hoh kia chashpo ka Sei ya asha beka tok; yohmi tok kia Esau im vlla vhleha ak osh itikba ya ai ishik kanchi ha yvt, iakaiya tok; micha Israel vt yakni aiasha Chihowah yvt ima tuk a yvmihinchi tuk a chohmichi cha vltobvt aiasha tok.

13. Himak a hvsh wakaya cha, bok ushi Selet a hvsh hlopullashke, achi li tok; mihma bok ushi Selet a e hlopulli tok.

14. Mihma Katesh-banea ashvt e minti tok, vttvt bok ushi Selet a e hlopulli tok, ant vhli ka iti takla kvv, afvmmi pokoli tuchina akucha untuchina tok; polaka hatak

tnvvp aya ai iti shali moma kv̄t Chihowah yvt anumpa kv̄llo im anumpuli tuk mak o, okla itin takla ya akohchvt ont taiyaha tok.

15. Chihowah yvt okla chito ai iti takla ai ishit kahanchi na, ont moshola chī kā ibbak vt i sanali hō mvhli ha tuk oka.

16. Yohmi hō yakohmi tok, hatak tnvvp aya moma kv̄t okla ai iti takla yā kohchvt ont mosholit illit taiyaha ma,

17. Chihowah yvt vm̄ anumpulit,

18. Himak nitak ā Moab im ai vhli Ah yā hvsh hlopulla chi hoke.

19. Atuk osh Ammon im vlla vhleha ha ichapa ka, bilika ish onakmvt ish ilbvshala he keyu, micha ish ataklvmma he keyu, Ammon im vlla vhleha ī yakni a binila he ā chima la he keyu hoka; Lot im vlla vhleha ī yakni ya chī ho ima li tuk okvt, achi tok.

20. Yvmmak kia hatak chaha ī yakni hohchifo tok; nitak chashpo kā hatak chaha yvt yvmmak ō aiasha tok. Mihma Ammonait vhleha hv̄t Samsvmmim okla yoke, achi tok.

21. Okla chito, micha laua, micha chaha kv̄t Anakim ak ō chohmi tok; yohmi tuk kia Chihowah yvt itikba yā ai ishit kanchi tok; mihma iakaiya cha, vlhtobvt aiasha tok.

22. Holim vhleha hash Esau im vlla vhleha hv̄t Sei aiasha tuk itikba yā ai ishit kanchi ma, yvmmak inli chohmichi tok; mikma okla iakaiya cha, vlhtobvt aiasha tuk vt himak nitak ā ant ai vhli hoke.

23. Mihma Afim vhleha yvmmvt Haselim ā aiashvt Assa ont vhli tuk ā, Kaftolim yvmmvt Kafto ashvt kohcha tuk vt ai ishit kanchi cha, vlhtobvt aiasha tok.

24. Hvsh wakaya cha nowvt iv̄t Anon okhina yā hvsh hlopullashke, yakeh, Amolait Sihon Heshbon ī miko, micha ī yakni yā chibbak fohki lishke; abinilit ish wakayashke, itibi yak ō ish ī kvllashke.

25. Himak nitak ā oklushi puta shutik nutaka aiasha kv̄t, chi annowa kā haklo puta kā chī komunta, micha chī nuk-

shopa onochit ishtia likma, chishno pulla kak o wunihinchi cha, komihincha chi hoke, achi tok.

26. Mihma anumpa shali vhleha ha Katemolh yakni haia-ka ya akohchit Heshbon i miko Sihon a anumpa iti nanaiya ya pit i pilvt.

27. Chi yakni ya ak hlopulli, is svm ahni, hina ak o aya la chi hoke, ishtimpakimma, micha vlfubekimma pit fullota la he keyu hoke.

28. Upa la chi ka tvli holisso vlhtoba ho ilhpak is sv-mashke; ishko la chi ho tvli holisso vlhtoba ho oka is sv-mashke, peh aka hikia hosh chi yakni ya hlopulli lashke.

29. (Esau im vlla vhleha, yvmmt Sei aiasha kvt, micha Moabait vhleha Ah aiasha kvt si yvmihchi tuk oka;) yv-mohmi na, Chatan a hlopullit pin Chitokaka Chihowah yvt yakni pima tok a ona lashke, achi li tok.

30. Yohmi tuk kia Heshbon i miko Sihon vt ant ik hlopulli, ik pim ahno tok; Chin Chitokaka Chihowah yvt imi shilombish a kvlochi tok, micha chukvsh a kvlochi tok oka; yvmmt chibbak a fohka chi kak atok, himak nitak kia yvmohmishke.

31. Mihma Chihowah yvt, yakeh, Sihon micha i yakni ya chitikba a chimvt isht ia lishke, a binilit ish wakayashke; yohmi cha, i yakni ya ish ishashke, vm achi tok.

32. Yohmi ma Sihon micha im okla moma aiena kvt pi sanalit, pitiba chi hosh kohchvt Chahas ak o vltok.

33. Mihma pin Chitokaka Chihowah yvt pi tikba ya pibbak a fohki tok; mihma ymma micha ushi vhleha, micha im okla moma aiena ka issot e kanchi tok.

34. Mich a nitak ymma in tmaha holihta puta moma ka il ishi cha, tmaha holihta puta hatak, micha ohoyo, micha vlla aiena ka ishit kanchit il vmohmichi tok; achvfa kia kil apoancho tok.

35. Peh nan vhpoe ak illa ho, na wehpoe il il aieshi tok; micha tmaha holihta il ishi ha tuk a na wehpoe aiena ak a tok.

36. Aloe yvmmt Anon okhina ont alaka, micha tmaha holihta yvmmt okhina bilika a talaia ka vttvt ia hosh Ki-

leat ont vhli ka, tmaha holihta achvfa kia kullo kv̄t pī shahli tok keyushke; pin Chitokaka Chihowah yvt mominchit pibbak a fohki tok.

37. Peh Ammon im vlla vhleha i yakni, micha okhina Chabbak atalaia kanima yoh kia, micha nv̄nih foka tmaha holihta puta ka, micha nana ho pin Chitokaka Chihowah yvt pim alv̄mmi tuk ma, chik ona tok.

CHAPTA III.

YOHMI ma e fullota cha, Bashan hina ia kak o il ia tok mihma Bashan i miko Ok yv̄mma, micha im okla moma aiena kv̄t pī sanalit pitiba chī hosh, kohchvt Etlei ya v̄la tok.

2. Mihma Chihowah yvt, Ish i nukshopa na, yv̄mma micha im okla moma, micha i yakni ya chibbak fohki la chī hoke; mikma Amolait vhleha, yv̄mmvt Heshbon aiasha tuk i miko Sihon a ish yvmihchi tuk vt ish chohmicha chī hoke, v̄m achi tok.

3. Yohmi hosh pin Chitokaka Chihowah yvt Bashan i miko Ok ak kia micha im okla moma ka pibbak fohki tok; atuk o issot e kanchi na, i hlakofi kv̄t iksho tok.

4. Micha nitak yv̄mma in tmaha holihta moma ka il ishi tok; tmaha holihta kil im esho tuk achvfa kia iksho tok, Bashan i miko Ok im ap ehlichika Akob aiv̄hli fullota moma ka tmaha holihta pokoli hannali tok.

5. Tmaha ilv̄ppa puta kv̄t holihta chaha isht aholihta hosh holihta okhissa, micha im okhowatkv̄chi yokma, tmaha ushi ik aholihto laua fehna tok.

6. Micha Heshbon i miko Sihon a tok a chohmichit ishit kanchit, il vmohmichi tok, tmaha holihta puta hatak, micha ohoyo, micha vlla vhleha aiena ka ishit kanchit il vmohmichi tok.

7. Amba nanv̄lhpoa moma, micha tmaha holihta puta na welhpoa yo il il ai ishi tok.

8. Micha nitak yv̄mma Amolait okla i miko tuklo ka i

yakni Chatan ola in twnvp Anon okhina vttvt ia hosh nvnih Hemon ont vhli ka ibbak a akohchit il im ishi tok;

9. Hemon yvmma Sitionian vhleha hvt Silion achikma, Amolait vhleha hvt Shen i achi chatuk;

10. Yakni patali tvmaha holihta moma, micha Kileat moma, micha Bashan moma, Bashan vttta Ok im apehlichika, in tvmaha holihta Salkah micha Etlei ont vhli tuk a il ishi tok.

11. Hatak chaha vhleha asha hatuk a Bashan i miko Ok ak bano hosh okchayvt ahanta tok; yakeh, in topa hvt tvli topa hatok; Ammon im vlla vhleha aiasha Labbah hikia keyu cho? hatak i kubit vllhpisa hosh falaia kvv kubit chak-kali tok, micha auahata kvv kubit ushta tok.

12. Mihma yakni ilvppa nitak yvmma, Aloe yvmmvt Anon okhina bilika talaia ka vttvt ia hosh Kileat nvnih iklvna vhli kvv in tvmaha holihta puta aiena il ishi tuk a Lubenait vhleha, micha Katait vhleha aiena kak o ima li tok.

13. Mikma Kileat atampa ka, micha Bashan moma, yvmmvt Ok im apehlichika ya Manasseh ishtatiaka iklvna ya ima li tok; Akob aivhli moma, Bashan aiena moma, yvmmvt hatak chaha yakni hohchifo ha tok.

14. Manasseh ushi Chai vt Akob yakni moma Cheshuli micha Maakahli ont vhli ka ishi cha, ilap hohchifo ya aho-chifochit Bashan-hafolh-Chai, achi tok, himak nitak a moma hoke.

15. Mihma Kileat a Maki ak o ima li tok.

16. Lubenait vhleha micha Katait vhleha ha, Kileat a vttvt ia hosh Anon okhina ont vhli okfa iklvna, micha aivhli Chabbak okhina yvmmvt Ammon im vlla vhleha im aivhli ya ont vhli;

17. Mich a yakni patali, micha Chatan, micha im aivhli Chinnelelh a vttvt ia hosh yakni patali okhvta, hvpi okhvta, Ashtolh-piskah nvnih nuta hvshi akochaka imma ont vhli ka ima li tok.

18. Mich a nitak yvmma hvchim anumpohonli li mvt, hvchin Chitokaka Chihowah yvt yakni ilvppa hvsh binila chi ka, hvchima tukoke; twnvp aya hinla moma kvv, nahalupa

huchim vlhtaha hosh, hvchitibapishi vhleha Isael im vlla vhleha ha itikba hvsh hlopulla chi hoke.

19. Amba hvchi tekchi vhleha, micha hvchim vlla vhleha, micha hvchi nanvlhpoa (nanvlhpoa hvchin laua ka ithana li hoka) aiena kvv hvchin tumaha holihta puta hvchima li tuk a asha na,

20. Chihowah yvt hvchishno a hvchi yvmihchi tuk vt chohmichit, hvchitibapishi vhleha ha fohvchashke: micha yummak kia yakni ya hvchin Chitokaka Chihowah yvt Chatan mish-tvnnvp a ai ima tuk a abinilashke: yohmikka hvchima li tuk hvchi yakni a hatak aiyukali kvv falamvt hvsh onashke, hvchim achi li tok.

21. Micha nitak yummak inli ka Choshua ya im anumpu-lit, Chin Chitokaka Chihowah yvt miko tuklo ilvppa kanioh-michi tuk moma ka, chi nishkin vt pisvshke; apehlichika puta kanima yo ish hlopullikma Chihowah yvt yvmihcha hi oke.

22. Hvsh i nukshopa he keyu: Chin Chitokaka Chihowah yummak osh chim itiba chi hoke, chim achi li tok.

23. Micha nitak yumma Chihowah ya im asilhhvt,

24. Chitokaka Chihowah ma, a chi chito, micha chibbak akullo ka chin tishu ha im otvnnichit ish wakaya tuk oke: Chitokaka nanta hak osh vba ahantakmvt, keyukmvt yakni ahanta kvv a chi kullo ka yvmohmit, ish a toksvli ya yvmihcha hinla hotuma?

25. Chim asilhha lishke, ak hlopulli cha, yakni achukma yummvt Chatan mish tvnnvp talaia ka, nvnihi aiokli, micha Lebanon yumma ak pesa, achi li tuk.

26. Yohmi kia Chihowah yvt hvchishno ak a tuk pulla mak o, a nokowa cha, a haponakla he keyu tok: micha Chihowah yvt, Ik chim vlhpesa, himakma nana ilvppa isht chik svv anumpulo kashke.

27. Oiyvt, Piskah paknaka ya ish onashke, micha hvshi aiokatula pilla, micha falvmmi pilla, micha oka mahli pilla, micha hvshi akochaka pilla pit ish hopokoyashke, micha chi nishkin a isht ish pisashke: amba Chatan ilvppa ish hlopulla chi keyu hokvt.

28. Yohmi kia Choshua ya atokolit im anumpulit, aiyi-mitvchit, ish hlampkochashke; yummak osh okla ilvppa itikba tanvbli cha, yakni ish pisa chi ka a binilicha chi hoke, vm achi tok.

29. Yohmi ho Belhpeo ichapaka okfa hak o il aiasha tok.

CHAPTA IV.

YUMOHMI hoka Islael ma, himak a nan vlhpisa, micha aivlhpiesa yvmihinchichi hvchim abvchi li ka hvsh yvmihcha chi kv, hvsh haklashke; yvmohmi hosh hvchi okchaya cha, hvchiki vhleha in Chitokaka Chihowah yvt yakni chimatok a chukowvt hvsh a binilashke.

2. Anumpa hvchim apesa li tuk a hvsh ibafohka he keyu, micha hvsh ola taklvcha he keyu; yvmohmi hosh hvchin Chitokaka Chihowah i nan vlhpisa puta hvchim apesa li tuk a hvsh holitoblashke.

3. Baal-peo pulla ho Chihowah yvt kaniohmichi tuk a hvchi nishkin vt pisa tuk oke; chin Chitokaka Chihowah yvt hatak Baal-peo iakaiya tuk moma ka hvch itin takla ya ai ishit kanchi tuk oka.

4. Amba hvchin Chitokaka Chihowah ya hvsh asitia tok vto hvsh moyuma kv himak nitak a hvchi okchayvshke.

5. Yakeh, yakni ymma hvsh ia kv, hvsh binilikmv, hvsh yvmihcha chi ho, an Chitokaka Chihowah yvt vm apesa tuk mak o, chohmit, nan vlhpisa, micha aivlhpiesa yvmihchi puta ka hvchim abvchi li tuk oke.

6. Yvmohmi hoka hvsh holitobli cha, hvsh yvmihchashke; ilvppak osh oklushi puta nan vlhpisa ilvppa hahaklokmv, Oklushi chito ilvppv okla hopoyuksa, micha nan ithana ahli yoke, chi acha he, itikba ya hvsh apoyuksa, micha na hvsh ithaiyana hokv.

7. Oklushi nanta hak osh holitopa kv yakohmi hotuma? ymma in Chitokaka yvt pin Chitokaka Chihowah ya nana moma ka il im asilhha chatuk a i bilinchi hv chohmi hotuma?

8. Micha oklushi nanta hak osh holitopa kut yakohmi cha, nan vlhpisa, micha aivlhpiesa yvmihchi aiena kut vlhpesa fehna, nan vlhpisa ilvppa moma himak nitak a chi tikba hilechi li ka chohmi kut in tonla hotuma?

9. Peh ahah, hvsh il ahni cha, hvchimi shilombish a achunanchit hvsh ieshashke, keyukmut, nana puta hvchi nishkin vt pisa tuk vt hvchim ahaksi ná, micha chi okchaya nitak moma ka hvchi chukvsh a akohchvt knia na: amba chiso puta, micha chiso ha ushi puta ka ish im avchashke.

10. Micha Holeb a hvchin Chitokaka Chihowah itikba ya hvsh hiel tok nitak fehna ka hvsh ithanashke; Chihowah yvt vm achi mvt, Okla ha is svm ai itvnashke, mikma vm anumpa ha haklochi lashke, yohmi ho nitak moma okchayvt yakni paknaka aiasha takla kut, a nukwia he osh ithana cha, im vlla vhleha ha im avchashke, achi tok.

11. Mihma bilika onvt, nvni nutaka ya hvsh hiel tok; mihma nvni hv luak ishit lua hosh shutik iklvna ona ma, okhlili, hoshonti, micha okhlili sukko aiena tok.

12. Mihma Chihowah yvt luak iklvna et a hvchim anum-puli tok; anumpa ola hokvno hvsh haklo tok, yohmi kia na holba ka hvchik peso tok; peh ola kak illa ho hvsh haklo tok.

13. Micha i nan itim apesa hvsh yvmihcha chi ho hvchim apesa tok, nan vlhpisa pokoli ka hvchim anoli tuk oke; micha tvli patvssa tuklo ho ai o holissochi tok.

14. Mihma nitak yvma nan vlhpisa, micha aivlhpesa yvmihchi ya yakni yvma onvt hvsh a binilikmut hvsh yvmihcha he yo hvchim avchi la chi ka, Chihowah yvt vm apesa tok.

15. Yvmohmi hoka, ahah, hvsh ibai ahni fehnashke; nitak yvma Chihowah yvt Holeb a luak iklvna ho et hvchim ai anum-puli ma, na holba nana kia hvsh pisa tok keyu hokvt;

16. Keyukmut hvsh il okpni cha, tvhvt na holvt toba ikbit na pisa kaniohmi, nakni, keyukmut, tek nana kia holba;

17. Nampoa yakni paknaka aiasha holba, hushi sanachi asha helit vba itanowa holba,

18. Nana kia yakni pakna om balahanli holba, nuni nana kia yakni nutaka oka ai itanowa holba ya hvchik bo kashke;

19. Micha keyukmut, hvchi nishkin a shutik pilla aka chakalichi cha, hvshi micha hvshi ninak aya, micha fochik puta, vba nana moma fehna ka hvsh pisakmut, yummak oka chin Chitokaka Chihowah yvt oklushi puta vba moma nuta ka im ita kashvbi tok a, yoshoba cha aiokpuchit hvsh im antia na.

20. Amba Chihowah yvt hvchishno ya hvch ishi cha, tuli abila Echip fehna ka hvchi kohchi kv̄t, okla immi ha chi ha tok o, himak nitak a hvsh yvmohmishke.

21. Micha Chihowah yvt hvchishno ak a tuk pulla mak o, a nukhobela cha, anumpa kv̄llo anumpulit, Chatan a ak hlo-pullo ka he, micha yakni achukma ymma hvchi yakni ya chi ho chin Chitokaka Chihowah yvt hvchima tok a ak chu-kowo ka chi miha tok,

22. Amba yakni ilvppak o a salla chi hoke, Chatan a hlo-pulli la he keyu hoke; amba hvchishno vto hvsh hlopulli cha, yakni achukma ymma hvsh iesha chi hoke.

23. Ahah, hvsh il abnashke; keyukmut nan itim apesa ymma hvchin Chitokaka Chihowah yvt hvch itim apesa tok a hvchim a haksi cha, tvhlvt na holvt toba, keyukmut nana kia holba ymma chin Chitokaka Chihowah yvt hvchim olvbi tok a hvsh ikbi ná,

24. Chin Chitokaka Chihowah yvt luak na hushmit tahli, Chitokaka nuktaḡahla yoka.

25. Hvchim vlla vhleha hv̄t, micha vlla vhleha hash im vlla vhleha hv̄t hvchim aḡsha cha, yakni ya hvsh aḡsha hopa-kit taiyahakmut, hvsh il okpv̄nit tvhlvt na holvt toba, keyukmut nana kia holba hvsh ikbi cha, chin Chitokaka Chihowah itikba ya nana ik achukmo ka yvmohmit hvsh nokowvchikmut;

26. Yakni ya hvsh isha chi hosh Chatan a hvsh hlopulla chi kv̄t, chekusi a chukillissvt, hvsh vmohma he ya; himak nitak a vba yakni, micha yakni aiena kv̄t hvchi atokola chi

ho pit hoyo lishke ; nitak falaiachit, hvsh o aiasha he keyu, amba mosholit, hvsh vmohma hi oke.

27. Mikma Chihowah yvt oklushi puta ka a hvchi ita fimma hi oke : mikma Chihowah ik ithano okla ai iti takla ymma Chihowah yvt hvch isht aya ka holhtina kv̄t ik lauo hosh hvsh aiasha hi oke.

28. Mikmvt ymma na holba puta hatak ibbak osh toksuli tuk, iti, micha tvli, na pisa he keyu, micha hakla he keyu, micha impa he keyu. micha huwa he keyu aiena yak o hvsh im antia hi oke.

29. Yohmi tuk kia ymma ashvt chin Chihowah Chitokaka ya ish hoyokmvt, chi chukvsh a mominchit, micha chi shilombish a mominchit hvsh hoyokmvt, hvsh ahayucha hi oke.

30. Chilbrshakmvt nitak ishtaiopi fehna ka nana ilvppa puta kv̄t hvchi onvtolakmvt, falamvt chin Chitokaka Chihowah ya ish im ona cha, im anumpa ha ish im antiakma :

31. (Chin Chitokaka Chihowah yvt nan i nukhaklo Chitokaka yokvt) chi kancha he keyu hoke, micha ishit chi vmohmicha he keyu hoke, micha hvchiki vhleha ha anumpa kv̄llo im il onochit nan itim apesa tuk vt im a haksa he keyu hoke.

32. Himak a nitak ant ia tok, yummvt chi tikba ya tuk, Chitokaka yvt hatak ikbit yakni paknaka ya o hilechi tok, nitak vhlit mihinti ka ish a ponaklashke ; micha shutik in tvnnvp achvfa vttvt ia hosh in tvnnvp ont vhli ka ish aponaklashke, nana chito ilvppa chiyuhmi kv̄t aiasha tok oh cho? keyukmvt nana ilvppa chiyuhmi ka haklo tok oh cho?

33. Okla hv̄t himonna kia hvsh haklo tuk a chohmit Chitokaka yvt luak iklvna ho et im anumpohonli na, haklo mvt okchaya tuk oh cho?

34. Ak cho? Chitokaka yvt oklushi achvfa ho oklushi inla iklvna a kohchit il isha chikmvt im onvt imomaka pisvt, nan isht atokowa, micha na fehna, micha tvnnvp, micha ibbak kv̄llo hosh, micha shakba ashatapv̄t nan isht nukhlakancha chinto, hvchin Chitokaka Chihowah yvt hvchi

nishkin itikba Echip a hvchi yvmihchi tok, chiyuhmichi tok oh cho?

35. Hvchishno vto Chihowah ak osh Chitokaka yoke, hvsh ithaiyana chi ho hvchi haiakvchi tok; yvmma inla kv iksho hoke.

36. Micha hvsh ithaiyana chi hosh im anumpa ha vba pit a chi haklochi tuk oke: micha yakni paknaka in luak chito chi pesvchi tuk oke; mihma im anumpa luak iklvna minti ka ish haklo tuk oke.

37. Micha hvchiki vhleha ha holitobli ha tuk osh yvmma iakaiya im isht atiaka atokoli tok: micha isht im aiahli kvlllo hosh itikba ya Echip a a kohchit chisht aya tok;

38. Oklushi hochito micha kvlllo kv hvchi shahli ho i yakni vt hvchimmi ha chi ho hvch isht chukowvchi mv, hvchi tikba tihlelit a kohchi tok a himak nitak a yvmohmi hoke.

39. Yvmohmi hoka, himak nitak a ish ithaiyanashke, micha chi chukvsh a isht ish anukfillashke; Chihowah ak osh vba yakni, micha nutaka yakni aiena ka yvmmak osh Chitokaka yoke, inla kv iksho hoke.

40. Yvmohmi hoka i nanvlhpisa bilia, micha im anumpa puta himak nitak a chim anumpohonli li puta ka ish ieshashke: yvmohmi ho chishno micha chim vlla vhleha et chi akaiya aiena kv chim achukmakvt mahayashke; micha chin Chitokaka Chihowah yvt yakni chima tok a ish aiasha kv nitak ish falaiachi na, biliashke, achi tok.

41. Yvmohmi ma, Moses vt Chatan ola in tvnrv hvshi akochaka pilla ha tvmaha holihta tuchina ho iti flvmmichi tok;

42. Yvmmak o hatak bika vbi yvmmv ik nuktahlo hosh chashpo ka i nukkilli chatuk keyu hosh in chuka a bilika hatak o vbikmv, yvmma malelit ona chi ha tok; micha malelit tvmaha holihta puta ilvppa achvfa ka onakmv okchaya he a tok.

43. Hokchifo kv Bese, yakni haiaka talaia, Lubenait vhleha i yakni patali a talaia; micha Katait vhleha i yakni

Kiliat talaia Lamolh; micha Manassait vhleha i yakni Bashan talaia, Kolan aiena kak atok.

44. Micha nan vlhpisa ilvppak o Moses vt Israel im vlla vhleha ha itikba takalichi tok.

45. Micha nan isht atokowa, micha nan vlhpisa bilia, micha anumpa ilvppa puta aiena kak o Moses vt Israel im vlla vhleha hv Echip yakni ya kohcha ha ya im anumpuli tok.

46. Moses micha Israel im vlla vhleha aiena kv Echip yakni ya kohcha ha yvt issot kanchi tok, Amolait i miko Sihon, yummvt Heshbon a aivtta tok, i yakni Belh-peo ichapaka bachaya okfa Chatan ola in tvnnvp ak a tok:

47. Micha i yakni micha Bashan i miko Ok i yakni aiena a binili tok, Amolait i miko tuklo, yummvt Chatan ola in tvnnvp hvshi akochaka pilla ho aiasha tok.

48. Aloe yummvt Anon okhina ontalaka bilika talaia ka vttvt ia hosh Sion nvni yummvt Hemon a ont vhli,

49. Micha Chatan ola in tvnnvp hvshi akochaka pilla yakni patali moma, okhvta yakni patali Piskah kvli puta nutaka ont vhli tok a abinili tok.

CHAPTA V.

MIHMA Moses vt Israel moma ka hoyo cha, Israel ma, nan vlhpisa bilia puta, micha aivlhpiesa yvmihinchiputa hvsh haklo ho, himak nitak a anumpohonli li ka hvsh haklashke; yvmohmi hosh hvsh ithana cha, ieshit hvsh yvmihinchashke.

2. Pin Chitokaka Chihowah yvt pishno ak o Holeb a nan a pitim apihisa tok oke.

3. Chihowah yvt piki vhleha ilvppa nan itim apihisa tok keyu; amba pishno ya pishno fehna kak a tok o, himak nitak a pi okchaya hosh momvt ilvppa il aiashvshke.

4. Chihowah yvt nashuka iti sanali hosh nvni ha luak iklnna et hvchim ai anumpohonlit,

5. (Luak pulla kak o hvchi nukshopa cha, nvni ha hvsh oiya he keyu ma, vno ak osh nitak yvma Chihowah mi-

cha, hvchishno ya hvch itin takla hikivt Chihowah im anum-
pa ha hvchim anohonli li tok oke,)

6. Ūno ak osh chin Chitokaka Chihowah sia hosh, Echip yakni, micha aboha a yuka chi pehlichit a kohchi li tok oke.

7. Sa tikba ya Chitokaka inla yvt ik chim iksho kashke.

8. In chuvt na holvt toba, micha nana kia, vba yakni a_{sha}, keyukmvt nutaka yakni a_{sha}, keyukmvt yakni nutaka oka aiasha yvmma holba kia chik ik bo kashke.

9. Aka pit ish im akachunola he keyu, micha ish im antia he keyu: Chitokaka chin Chihowah sia hv_t, Chitokaka nukta_hahla sia hosh, i_{ki} v_hleha nan ashvchi yash im vlla v_hleha hv_t ai iti shali ont isht atuchina, micha ont isht ai ushta kia a nukkilli ka im aya li hoke.

10. Michā tahlepa sipokni hoh kia sa holitobli cha, vm anumpa ha vm antihiya ya i nukhaklo li hoke.

11. Yvmmakfokalechit chin Chitokaka Chihowah hohchifo ka ish hochifa he keyu hoke; hohchifo ha yvmmakfokalechit hochifo tukma nan ik ashacho, Chihowah yvt ahna he keyu hoka.

12. Chitokaka chin Chihowah chim achi tuk mak o, nitak hullo nitak a holitoblit ish hullochashke.

13. Nitak hannali ho ish toksuli cha, chi na pilesa moma ka ish yvmihchashke.

14. Amba nitak isht untuklo hokvto Chitokaka chin Chihowah i nitak hullo yoke: yvmmak okvno chishno, micha chiso, micha chiso tek, micha hatak chin tishu, micha ohoyo chin tishu, micha chi wak toksuli, micha chim issnba nashoba, micha chi nan v_hhp_oa nana kia, micha hatak ik ithano yosh chi holihta okhissa chi hikia kia na pilesa nana kia yvmihcha he keyu; yvmohmi ho hatak chin tishu, micha ohoyo chin tishu aiena kv_t chishno ak inli chohmit fohashke.

15. Michā chishno yak kia Echip yakni ya tishu chia ha tok, atuk o Chitokaka chin Chihowah yvt ibbak kullo, micha shakba ashatapa hosh yvmma chi kohchi tok a ish ithaiyanashke: yvmohmi hatuk osh Chitokaka chin Chihowah yvt nitak hullo nitak a ish holitobla he a chim apesa tok oke.

16. Chitokaka chin Chihowah yvt chim achi tuk mak o,

chiki, micha chishki ya ish holitoblashke; yvmohmi ho yakni Chitokaka chin Chihowah yvt chima tok a ish aiahanta he a nitak vt chin lauashke, micha chim ai achukmakashke.

17. Kvna kia ish bi ná,

18. Micha kvna kia ish itin lumaka ná,

19. Micha ish hukopa ná,

20. Micha chin chuka a bilika hatak ahanta ka anumpa ahli keyu ka isht chik atokolo kashke.

21. Micha chin chuka a bilika hatak tekchi ya ish ahni na, micha chin chuka a bilika hatak in chuka, im osapa, keyukmvt in tishu hatak, keyukmvt in tishu ohoyo, i wak toksuli, im issuba nashoba, keyukma nana kia chin chuka a bilika hatak immi hokma, hvchik im anushkunno kashke, ahanchi tok.

22. Anumpa ilvppa puta kak o Chihowah yvt chim okla moma ka nvniha, luak, micha hoshonti, micha okhlili sukko ka ai iklvna chitoli hosh et ai im anumpohonli tok; mihmvt himakma ik achakalo tok, Mihmvt tvli patvssa tuklo ho ai oholissochi cha, svbbak fohki tok.

23. Atuk o yakohmi tok ai okhlilika iklvna ya et ai anumpa na ish haklo mvt, (nvniha hvv luak ishit lua tuk oka,) yohmi ma hvchim apehlichika noshkoboka vhleha, micha hvchim asvnonchi vhleha aiena kvv a bilika hvshla tok.

24. Micha, Yakeh, pin Chitokaka Chihowah yvt im aholitopa, micha nan isht im aiahli ataha ikshio pi pesvchi hoke; mikma luak iklvna ya im anumpa ha il a hahaklo tukoke; Chitokaka yvt hatak a im anumpuli kia okchaya hinla ka himak nitak a e pisvshke.

25. Yvmohmi hoka nanta katiohmi ho himak a pilla hinla cho? luak chito ilvppvt hukmit pi tahla chi hoke. Himak ma Chitokaka pin Chihowah im anumpa ha e haklokmvt pilla chi hoke.

26. Hatak nipi moma ka kvta hosh Chihowah okchaya yosh luak iklvna et ai anumpohonli na haklo pishno chohmi mvt okchaya chatuk atuma?

27. Chishno ak osh bilika ish ona cha, Chitokaka pin

Chihowah yvt nana achi moma ka ish haklashke; micha Chitokaka pin Chihowah yvt nana chim achi moma ka ish pim anumpulashke; mikma e haklo cha, e yvmihchashke, hrs svm achi tok.

28. Mihma Chihowah yvt chim anumpa hrs svm anum-puli ka haklo tok; micha Chihowah yvt, Okla ilvppvt anum-pulit chim anumpuli ha haklo lishke: nana moma achi kv̄t vlhpesa bano h̄o achishke.

29. Chukv̄sh vt yakohmi nukfoyuka tuk okbano, yohmi hosh a nukwia cha, vm anumpa vlhpisa moma ka ieshi na, bilia cha, yv̄mma mihcha im vlla vhleha aiena kv̄t im ai achukma na, biliakbano ahnit vm achi tok.

30. Ia cha, anonti hv̄chi bina im aiyukali hv̄sh onashke, ont ish im achashke,

31. Amba chishno vto a bilika ilvppa ish hikiakma, anumpa moma micha nan vlhpisa bilia, aivlhpiesa yvm̄ihin-chi puta ka chim anumpohonli likma, yv̄mmak oka ish im av̄rchikma aiasha ch̄i ka, yakni ima li tok a aiashvt yvm̄ihinchashke, im achi tok.

32. Yvmohmi hoka, Chitokaka hv̄chin Chihowah yvt hv̄chim apesa tuk mak o hv̄sh ithaiyana cha, hv̄sh yvm̄ihinchashke; fullotvt naksika isht impakimma, micha vlhf̄vbek-imma pit hv̄sh fullota he keyu hoke.

33. I hina puta Chitokaka hv̄chin Chihowah yvt hv̄chim ap̄ihisa tuk mak o hv̄sh ai itanowa cha, hv̄chi okchayashke, micha hv̄chim ai achukmashke, micha yakni hv̄sh aiasha ch̄i ka, hv̄sh aiasha kv̄t nitak vt hv̄chi falaiashke, achi tok.

CHAPTA VI.

YOHMI ka anumpa puta, micha nan vlhpisa bilia puta, micha ai vlhpiesa yvm̄ihinchi ilvppa puta hv̄chim vlbr-cha he, Chitokaka hv̄chin Chihowah yvt anumpohonli na, yakni hv̄sh aiasha ch̄i hosh hv̄sh ia kv̄t hv̄sh a yvm̄ihincha ch̄i kak a tok oke.

2. Chitokaka hv̄chin Chihowah ya ish i nukwia cha, i

nan v_lhpisa bilia moma k_a, micha im anumpa chim anum-pohonli li k_a, chishno micha chiso, micha chiso h_a iso aiena k_{vt} chi okchayvt ish ahanta nitak moma k_{vt} ish ieshi cha, ch_i nitak vt falaiashke.

3. Yvmohmi hoka Israel ma, ish haiyaklashke, micha ithaiyanvt, ish yvmihchashke; yvmohmi hosh ch_iki v_hleha h_a in Chitokaka Chihowah yvt achit, im issa tok mak o, yakni pishukchi micha foebila ayanahanli y_a aiasha apaknvt isht i shahli fehnvt hvsh mahayashke.

4. Israel ma, hvsh haklashke, Chitokaka pin Chihowah yvt Chihowah achvfa hoke.

5. Yohmi k_a Chitokaka chin Chihowah y_a chi chukvsh a mominchit, micha chi shilombish ma mominchit, m_icha chi kullo y_a mominchit ishit ish holitoblashke,

6. Mikma anumpa ilvppa himak nitak a chim anumpo-honli li k_{vt}, chi chukvsh a foyukashke.

7. Yohmi k_a chim vlla v_hleha h_a achunanchit ish im avrchashke; micha chin chuka ish binilikmvt, micha hina takla ish ayakmvt, micha ish itoyulakmvt, micha ish waka-yakmvt isht ish anumpohonlashke.

8. Micha nan isht atokowa y_o chibbak a isht ish a tak chashke, micha bita hosh chi nishkin itin takla takali k_a chin chiyuhmashke.

9. Micha chin chuka tonik puta k_a micha ch_i holihta ok-hissa puta k_a ish ai o holissochashke.

10. Atukma yakohma hi oke, Chitokaka chin Chihowah yvt yakni y_a ch_iki v_hleha Eblaham, micha Aisak, micha Chekob aiena k_a anumpa il onochit im issa tuk vt chisht onakmvt, tvmaha holihta ho chito, micha hochukma aiokli ish ikbi tok keyu y_o,

11. Micha ish alotoli tuk keyu aboha puta nana achukma moma alota, micha ish kulli tuk keyu h_o kul_i hofobi kula, micha ish hokchi tuk keyu h_o, pakvpi ahollokchi, micha alif iti puta aiena hvchima na aivpvt chikaiyakmvt;

12. Yvmohmikmvt ahah, ish ahnashke, keyukmvt Chihowah ak osh Echip yakni, micha aboha a yuka pehlichit chi kuchi tuk a chim ahaksa hinla hoke.

13. Chin Chitokaka Chihowah ya ish i nukwia cha, ish im antiashke, micha yvmma hochifot anumpa kullo il onochit ish anumpulashke.

14. Naholbvt toba puta, okla hvchi apakfoyupa aiasha ka i naholbvt toba puta ka iakaiyvt hvsh ia he keyu hoke.

15. Chin Chitokaka Chihowah yvt Chitokaka nukta^hla yosh hvchi takla ahanta hoka; keyukmvt, chin Chitokaka Chihowah im ai inukkilli vt chi sanalit libbi na, yakni pakna ya ai okpuloka hvchi taha yoba na.

16. Massah ya ai imoma ka hvsh pisa tuk a chohmit, hvchin Chitokaka Chihowah ya imomaka chik peso kashke.

17. Hvchin Chitokaka Chihowah im anumpa vlhpisa puta, micha i nan isht atokoli puta micha i nan vlhpisa bilia aiena chim anumpuli tuk a achunanchi hosh hvsh ieshashke.

18. Micha Chihowah itikba ya nana ai vlhpiesa micha achukma kak o ish yvmihchashke; yohmi hosh hvchim achukmakashke, micha yohmi hosh Chihowah yvt chiki vhleha ha anumpa kullo ilonochit im issa tok yakni achukma ya chukowvt ish abinilashke,

19. Chihowah yvt anumpuli tok mak osh, chin tvnvp vhleha moma ka chi tikba akohchit kanchashke.

20. Atuk o nitak inla vla ha ya, chiso hvvt chim ponaklot, iban isht atokowa micha nan vlhpisa bilia, micha ai vlhpiesa yvmihinchi ilvppa puta aiena pin Chitokaka Chihowah yvt pim apesa tok, nanta ho miha hoh cho? achikma,

21. Yvmohmikma, chiso hash, Echip yakni a Falaoh i yuka hosh il aiasha tok; atuk o Chihowah yvt ibbak kullo hosh Echip a apehlichit pi kohchi tok.

22. Micha Chihowah yvt nan isht atokowa, micha na fehna chinto micha palvmmi ho, Echip, micha Falaoh, micha in chuka achufa moma aiena ka e pisa ho onochit otvⁿihinchi tok.

23. Micha piki vhleha ha anumpa kullo im ilonhonchi tuk mak osh, pisht vla cha, yakni ya pima chi hosh yvmma pi pehliechit pi kohchi tok.

24. Micha Chihowah yvt pim apesvt, nan vlhpisa bilia ilvppa moma e yvmihcha he ishit pim aiachukmaka na bilia

chi kvt, pin Chitokaka Chihowah ya il i nukshoyupa he a, achi tok; yohmi hosh pi okchalinda he a tok o himak nitak a ayvmohmi hoke.

25. Mikma ilvppa puta moma ka pi miha tok mak o, ithanvt e yvmihinchikmvt, pim ai vllpiesaka ya chi hatok oke, ish im achashke.

CHAPTA VII.

CHIN Chitokaka Chihowah yvt ish a binila chi hosh ish ia ka yakni ya chishtona cha, oklushi laua, Hittait, micha Kikashait, micha Amolait micha Kananait, micha Peli-sait, micha Hifait, micha Chebusait, oklushi untuklo hochito, micha kullo kvt, chishno ya chi shahli ho chi tikba ya akoh-chit kanchikmvt;

2. Micha chin Chitokaka Chihowah yvt chi tikba ya chib-bak fohkikma, issot ish kanchi, mosholichit ish kanchit ish vmohmichashke, nan ish itim apesa he keyu, micha ish i nukhakla he keyu hoke;

3. Micha ish itauwaya he keyu; chiso tek a ushi ya ish i bohla he keyu, micha ushetik a im ai ishit chiso ha ish ima he keyu hoke.

4. Chiso hvt si akaiya ya tuk a fullolichi na, na holbvt toba puta inla yak o ai okpucha chi hoke; yohmi ho Chihowah im ai i nukkilli vt chi sanalit libbi cha, yakosi itin takla kia ishit chi kancha hi oke.

5. Amba yakohmichi hosh hvsh yvmihcha hi oke: im alta puta hoka okpvnit hvsh tahli cha, im in chuwt na holbvt toba puta ka chanlit hvsh kinahlichashke, micha im iti lokoli puta hoka chanlit hvsh kinahlichu cha, im i chuwt na holbvt toba puta ka luak ishit hukmit hvsh tahlashke.

6. Chin Chitokaka Chihowah ya im okla holitopa chia hoka; chin Chitokaka Chihowah yvt okla moma yakni pak-naka aiasha ka i shahlit immi atokowa chia ha chi ho atokolit chishi tok.

7. Laua kvt okla inla ya hvsh i shahli kak o, Chihowah

yvt hvchihullot hvchi atokoli tok keyu; okla laua kv̄t okla moma ka hvchik lauwo ke tuk oka.

8. Amba Chihowah yvt hvchi hullo kak a tok, micha hvchiki vhleha anumpa kv̄llo im ilonochi tok vt ahlich̄a he ahni pulla kak osh, ibbak kv̄llo hosh pehlichit hvchi kohchi tok oke; micha hatak yuka hosh aboha hvsh aiasha tuk a Echip i miko Falaoh ibbak a kohchit hvchi okchalinchi tuk oke.

9. Yvmohmi hoka ish ithaiyana, Chihowah chin Chitokaka ak osh Chitokaka, micha Chitokaka aiahlich̄i vt holitobli cha, im anumpa ha ieshikma, nan itim apesa, micha nan isht i nukhaklo ya ai iti shali tahlepa sipokni hoh kia im iesha hi oke.

10. Micha i nukkilli puta ka pisan̄chi hosh im atobbi cha, ishit kancha hi oke: i nukkilli tuk a i sv̄laha he keyu, pisan̄chi hosh im atobba hi oke.

11. Yvmohmi hoka anumpa vlhpisa puta, nan vlhpisa bil̄ia, ai vlhpiesa yvmihinch̄i, himak nitak a chi miha li ka ish ieshi cha, ish yvmihinchashke.

12. Yvmohmi kak o yakohma hi oke, aivlhpiesa yvmihinch̄i ilvppa puta ka haklot hvsh ieshi cha, hvsh yvmihinchikma, chin Chitokaka Chihowah yvt ch̄iki vhleha anumpa kv̄llo im ilonochi tok vt nan itim apesa, micha isht i nukhaklo aiena ka hvchim iesha hi oke.

13. Micha chi holitobla hi oke, micha chi yukpala hi oke; micha chi apaknv̄cha hi oke; micha chim osh̄oto awaya, micha chi yakni awaya, chim onush, micha chim oka paki, micha chi bila, chi wak awaya, micha chi nanvlhpoa chipunta puta aiena ka, yakni yo chima he yash ch̄iki vhleha ha anumpa kv̄llo im ilonochi tok vt a na chi yukpa lashke.

14. Na yukpa kv̄t okla moma ka ish i shahla hi oke: a hvchiti takla ka nakni yokmá, tek okmá, nana kia, micha hvchi nan vlhpoa ai iti takla ka ushi iksho vt iksho ka hi oke.

15. Mikma Chihowah yvt abeka puta moma ka chim ai ishit kancha hi oke; micha Echip nan ililli okpulo, yv̄mma ish ithana ka chi onocha he keyu hoke; amba chi nukkilli moma kak o onocha hi oke.

16. Micha okla moma chin Chitokaka Chihowah yvt chibbak fohki tuk moma ka mosholichit ish vmohmichashke; chi nishkin vt i nukhakla he keyu, micha i naholbvt toba puta ka ish im antia he keyu hoke; yummak okvt ishit chi nukpullichy ya hi oka.

17. Chi ehukvsh anukaka, Oklushi puta ilvppa laua kvv a shahli hoka: katiohmi li kak osh kanalichi la hinla cho? ish achikmvt,

18. Ish i nukshopa he keyu hoke; amba chin Chitokaka Chihowah yvt Falaoh, micha Echip moma ka i kaniohmichi tok a ish ithaiyana fehna chi hoke;

19. Imomaka pisa puta chi nishkin vt pisa tok, micha nan isht atokowa puta, nan isht a fehna puta, micha ibbak kvullo, micha shakba ashatapa hosh chin Chitokaka Chihowah yvt ishit chi pehlichit kohcha tok a ish ithaiyanashke: yumma chi yuhmi hosh chin Chitokaka Chihowah yvt okla ish i nukshopa puta ka yvmihcha hi oke.

20. Micha chin Chitokaka Chihowah yvt fohkul a i pilakma, hlakoffi tuk, micha chim ile luhmi tuk vt moshola hi oke.

21. Ish i nukshopa he keyu: chin Chitokaka Chihowah yvt Chitokaka kvullo, micha palvmmi hosh hvchi takla ahanta hoka.

22. Micha chin Chitokaka Chihowah yvt oklushi yumma puta ka kanomosichit, micha kanomosichi hosh ishit kancha chi hoke: himona achvfa tahlit ish mosholicha he keyu, yakni haiaka nampoa hvv apaknvt chi sanala hinla hoke.

23. Yohmi kia chin Chitokaka Chihowah yvt chibbak fohka chi hoke; micha okpulot taha chinto ho yvmihchit ishit kanchi na, ont moshola chi hoke.

24. Micha i miko vhleha ha chibbak fohkikma, shutik nutaka ya hohchifo ha mosholichit ish kancha chi hoke: hatak nana kia chi tikba ya hikia he keyu ho, ish mosholicha hi oke.

25. I na holbvt toba, in chuwvt toba puta ka luak ishit hukmit hvsh tahlashke: tvli hvta, micha tvli lakna aiena alapali ka ish ahna he keyu, micha ish il ai isha he keyu,

ish yohmi cha, ishit ish yoshoba na; chin Chitokaka Chihowah nan i yuwala yoka.

26. Micha nan i yuwala ya chim aboha isht ish ona he keyu hoke; ish yohmi na kalakshi yummak inli ish chohmi na: amba shitilemtv ish kaiyanchi cha, yuwalvt ish vmoh-micha hi oka, na kalakshi yoka.

CHAPTA VIII.

ANUMPA vlpisa puta himak nitak a chim anumpo-honli li ka ithaiyanvt ish yvmihchashke, yvmohmi hosh hvchi okchayashke, micha hvsh apakna cha, Chihowah yvt hvchiki vhleha ha anumpa kullo im il onochi tok a yakni yash chukowvt hvsh binilashke.

2. Mikmtv chukvsh akanlosecha chi hosh, micha im anumpa ha ish iesha chi hokma, keyu hokma, nana ka chi chukvsh foyuka ka akostininha chi hosh, imomaka chi pesvt afvmmi pokoli ushta ilvppa yakni haiaka hina hlopulli moma ka chin Chitokaka Chihowah yvt chisht aya tuk a ish ithaiyanashke.

3. Micha chi chukvsh akanlusechit chi hohchvfochi mvt, ish ithana tuk keyu ho, micha chiki vhleha hvv ithana tuk keyu ho, manna ya chipihinta tok; yohmi kvv pska ak illa ho hatak vt okchaya he keyu, amba Chihowah im anumpa itih ha akohoncha puta kak o hatak vt isht okchaya ka, Chihowah yvt chithvnancha chi ha tok.

4. Afvmmi pokoli ushta ilvppa chi na fohka yvt chin taha tok keyu, micha chiyi yvt shatali tok keyushke.

5. Micha hatak osh ushi ya na hotopa onochi cha tuk a chohmi hosh chin Chitokaka Chihowah yvt na hotopa chi onochi tok a, chi chukvsh isht anukfillit ish pihisashke.

6. Yvmohmi hoka chin Chitokaka Chihowah im anumpa vlpisa puta ish ieshi cha, i hina puta ka anohowa cha, ish i nukwiashke.

7. Chin Chitokaka Chihowah yvt yakni achukma, yakni

bok-ushi aiasha, kvli puta, micha oka hofobi puta aiena kv
okfa, micha nvnihi puta ka atohomba;

8. Yakni onush aiasha, micha bali, micha pakvpi, micha
fik iti, micha pomkilanit aiasha; yakni alif bila micha foe-
bila aiasha;

9. Yakni yvmma puska ish aivpa kv chim atikkonofa
nana kia ik chim iksho ka he keyu yoke; yakni yvmma tvli
vt tvli yoke; mikma i nvnihi puta ka asonak lakna ish a
kulla hinla ho isht chisht ona hi oke.

10. Ish impa cha, chi kaiyakmvt, yvmohmikmvt, chin
Chitokaka Chihowah yvt yakni achukma chima tok oka ish
holitoblichashke.

11. Ahah, ish ahni cha, chin Chitokaka Chihowah ya im
anumpa vllhpisa puta, micha im ai vllhpiesa yvmihinchi,
micha i nanvllhpisa bilia, himak nitak a chim anumpohonli li
ka chik ieshot ik chim a hakso kashke.

12. Keyu hosh ish impa cha, chi kaiyakmvt, micha aboha
hochukma ish ikbi cha, ish aiashakmvt,

13. Micha nanvllhpoe chin hochito, micha nanvllhpoe chin
chipunta aiena kv chim apaknakmvt, micha chin tvli hvta,
micha chin tvli holisso lakna vt chim apaknakmvt, micha
nana chim asha tuk moma kv chim apaknakmvt,

14. Yvmohmikmvt chi chukvsh ilfehnvchi cha, chin
Chitokaka Chihowah yvmmak osh Echip yakni akohchvt
aboha yuka ai ishit chi kohchi tuk, a chim a haksu hi oke.

15. Yvmmak osh yakni haiaka chito, micha palvmmi,
micha sinti chilita, micha shushi nokoa, halambia achi aia-
sha, micha achahto, oka ik ai ishko ya pehlichit chi hlo-
pullichit tok oke; yvmmak osh tvli chito tasonak chohmi ya
oka ya a chi kohchi tok oke.

16. Yvmmak osh yakni haiaka ya chiki vhleha hv ithana
tuk keyu ho manna ya chipeta kv, chi chukvsh a akanlose-
chi, micha imoma ka chi pesa cha, ont chim ishtaipikma,
chim achukmala chi hosh yvmihchi ma;

17. Mihma chi chukvsh anukaka, Ūno sa kvlllo, micha
svbbak kvlllo hosh ishit holitopa ilvppa isht vma tok oke,
ish achi yoba na,

18. Amba chin Chitokaka Chihowah ya ish ithaiyanashke: yummak osh holitopa ish aiesha chi ka, nan isht aiahli chima kv̄t, nan itim apesa yummak oka chiki v̄hleha ha anumpa kullo im ilonochi tok a himak nitak a yvmohmi hoka ai ahlich̄a chi kak atok.

19. Atukma yakohma hi oke, chin Chitokaka Chihowah ya peh chim ahaksikm̄v̄t, micha na holb̄v̄t toba inla puta iakaiyv̄t ish it̄v̄nowakm̄v̄t, micha im antīv̄t ish aiokpv̄chikm̄v̄t, ont ish moshola he ya himak nitak a atokolit chim anoli lishke.

20. Oklushi puta ka Chihowah yv̄t chi tikba ai ishit kanchi tok a chohmit ont ish moshola chi hoke; chin Chitokaka Chihowah im anumpa ish im antia he tuk keyu hoke. im achi tok.

CHAPTER IX.

ISLAEL ma, ish haklashke, himak nitak a oklushi hochito, micha kullo kv̄t chi shahli, t̄maha holihta hochito, micha a holihta kv̄t shutik ont v̄hli h̄o, chukowv̄t ish isha chi hosh Chatan a ish hlopullachishke.

2. Okla hochito, micha chaha, Anakim im v̄lla v̄hleha yummak oka ish ithana, micha yummak oka, Keta hosh Anakim im v̄lla v̄hleha ha itikba hikia hinla cho? achi ka ish haklo chatuk oka.

3. Yvmohmi hoka himak nitak a chin Chitokaka Chihowah yummak osh chi tikba hlopullit ia hoke; luak na hukmit tahli chiyuhmit ishit kancha chi hoke, micha chi tikba ya aka isht ona chi hoke. Yvmohmi hoka Chihowah yv̄t chim achi tuk mak o, tihlelit ish kocha wehli cha, chekosi ishit ish kancha hi oke.

4. Chin Chitokaka Chihowah yv̄t chi tikba ya ishit kanchi ha ya, chi chukv̄sh anukaka ya anumpulit, Ai v̄lhpiesa li pulla kak o yakni ilv̄ppa a binili la chi h̄o, Chihowah yv̄t sv̄sht v̄la tuk oke; chik acho kashke; amba oklushi ilv̄ppa puta haksi kak o, Chihowah yv̄t chi tikba a tihlelit kocha weli hoke.

5. Ish ai vlhpiesa, micha chi chukvsh vt ai vlhpiesa kak osh i yakni ya ishit a binilit ish ia keyu; amba oklushi ilvppa puta haksi kak o, micha anumpa kullo ya chiki vhleha Eblaham, Aisak, micha Chekob aiena im il onochi tok anumpa ha aiahlichia chi hosh chin Chitokaka Chihowah yvt chi tikba a tihlelit kocha weli hoke.

6. Yvmohmi hoka chin Chitokaka Chihowah yvt yakni achukma ilvppa ish a binila chi ho chima kv, chi ai vlhpiesa kak o keyu ka ish ithaiyanashke; okla ikunla kullo chia hoka.

7. Yakni haiaka ya chin Chitokaka Chihowah im ai i nukkilli ya ish nokovvchi tok vt, ish ithaiyana cha, ik chim a hakso kashke; Echip yakni ya kohchvt ish minti tok, nitak yvmma vttvt mihintit ilvppa hvshla tuk ant vhli ka Chihowah ya isanalit hvsh i filavvmmi tuk oke.

8. Holeb ak kia, Chihowah im ai i nukkilli ya hvsh nokovvchi tok; yohmi na Chihowah yvt nuklibisha cha, ishit hvchi kancha chi ha tok.

9. Tuli patvssa tuklo nan itim apesa tuli patvssa tuklo Chihowah yvt chitim apesa tuk fehna ka ishe la chi hosh, nvniha ha oiya li mvt; yohmi cha, nvniha ha nitak pokoli ushta, micha ninak pokoli ushta ho anta li tok; pvska ya ak po, micha oka ya ak ishko tok.

10. Mihma tuli patvssa tuklo ka Chitokaka ibbak ushi yosh a holissochi ya, Chihowah yvt svbbak fohki tok; mihma itvnaha chitot aiasha nitak o, Chihowah yvt nvniha ha luak iklvna et ai anumpohonli tuk mak o, anumpa hv moma hosh ai o holisso tok.

11. Atuk o yakohmi tok, nitak pokoli ushta, micha ninak pokoli ushta kv ont taha ma, Chihowah yvt tuli patvssa tuklo, nan itim apesa tuli patvssa fehna kash vma tok.

12. Mihma Chihowah yvt, Wakaya cha tushpvt ilvppa vttvt ish akowashke; chim okla Echip a pehlichit ish kohcha kash osh ile litehlishke; chekosi i miha li kash hina ya kohchvt fullotvt naksika ivshke; bilvt akmot na holvt toba ikbishke, im achi tok.

13. Micha Chihowah yvt vm anumpulit, Okla ilvppa pisa lishke; mihma yakeh, okla ikunla kullo yoke.

14. Is sussa na, ishit kanchi lashke; micha hohchifo ha shutik nutaka ya a kashofit kanchi lashke. Micha chishno ak o oklushi kullo, micha chito aiena kv̄t yv̄mma i shahli ho a chikbi lashke, achi tok.

15. Yohmi ho fullota li mvt, nv̄nih ha akowa li tok; mihma nv̄nih hv̄t luak ishit luh̄wa tok; mihma nana itim apesa tv̄li patv̄ssa tuklo kv̄t sv̄bbak tuklo ka al̄hto tok.

16. Atuk osh pisa li ma, yakeh, chin Chitokaka Chihowah ya i sanalit, yoshobvt, wak ushi bil̄vt akmot toba hv̄sh ikbi tuk a tok: Chihowah yvt hv̄chi miha tuk a chekosi hina ya kohchvt fullotvt naksika ya hv̄sh ia tuk a tok.

17. Mihma tv̄li patv̄ssa tuklo sv̄bbak al̄hto kash hv̄sh pisa ho hv̄chi tikba ya ishit aka pila lish, kobalichi li tok.

18. Micha v̄mmona tuk a chohmit Chihowah itikba ya nitak pokoli ushta micha ninak pokoli ushta ho aka itoyula li tok: hv̄chi yoshoba momá ishit a hv̄chi yoshobvt Chihowah itikba ya hv̄chi haksi fehv̄shke; im ai i nukkilli ya hv̄sh nokowv̄chi ha tuk oka, p̄ska ya ak po, micha oka ya ak ishko tok.

19. (Im ai i nukkilli micha nuklibisha lv̄shpa ho Chihowah yvt ishit nuklibisha cha, hv̄chi sanalit ishit hv̄chi kancha chi kak a sa nukshopa tuk okvt.) Yohmi tuk kia nitak yv̄mmak kia Chihowah yvt a haponaklo tok.

20. Micha Chihowah yvt Alon ak kia im i nuklibisha fehna cha, ishit kancha chin tok: mihma Alon ak kia nitak yv̄mma isht anumpule li tok.

21. Micha na hv̄sh ashv̄chi, wak ushi hv̄sh bi tuk ash ishi lish, luak ishit hukmi li mvt, botolit, boshullichit, lipibichit, lukfi pushi chi yv̄mihchi li tok; micha pushi yash bok ushi nv̄nih et okvtahaka oka hlatv̄bli li tok.

22. Micha Tabelah, micha Massah, micha Kibloh-hattafah ya ia Chihowah im ai i nukkilli ya hv̄sh anokowv̄chi tok.

23. Micha Chihowah yvt Katesh banea ya v̄ttvt hv̄chi pelvt, oh ia cha, yakni hv̄chima li tok a, oh binili, achi tok;

yohmi ma, chin Chitokaka Chihowah im anumpa ha i filummit hvsh i sanali tok; micha hvsh i yimma he keyukmvt, im anumpa ha hvsh i haponakla he keyu tok.

24. Huch ithana li tok aivhlit mihinti ka Chihowah ya i sanalit, hvsh i filahvmmi chatuk oke.

25. Yvmohmi ma vmmona ka, aka itola li tuk a chohmit, Chihowah itikba ya nitak pokoli ushta, micha ninak pokoli ushta ho aka itoyula li tok; Chihowah yvt ishit hvchi kancha chi, miha ha tok oka.

26. Yvmohmi ha tuk o Chihowah ya im ilbvshvt, Chitokaka Chihowah ma, chim okla, micha chimmi, yvmmak oka a chi holitopa pulla hosh ish okchalinchit tuk; micha chibbak kvllo hosh pehlichit Echip a ish kohcha tuk okvt, ishit chik kancha kashke.

27. Chin tishu vhleha Eblaham, micha Aisak, micha Chekob aiena ka ish ithaiyanashke; okla ilvppa chukvsh ilapunla, micha a haksi, micha aiashvchi aiena kano chik peso kashke.

28. Yvmohmikma yakni apehlichit ish pi kohchi tok vt, Chihowah yvt yakni im issa tok vt isht ona he keyu ha tuk osh, micha i nukkilli ha tuk osh, yakni haiaka ai vbit tahla chi hosh pehlichit kohcha tuk oke, achi yoba na.

29. Yohmi kia chim okla hoke, micha chimmi hosh nan isht chim aiahli kvllo, micha chi shakba kvllo ashatapa hosh pehlichit ish kohchi tuk oke, ahanchi li tok: im achi tok.

CHAPTA X.

NITAK yvmma Chihowah yvt, Tuli patvssa tuklo vmmona kash chohmi ho ish tvhli cha, vm vlvst nvnih ha ish oiyashke, micha iti o itombi holitopa ya ish ikbashke.

2. Mikma tuli patvssa tuklo vmmona ish kobvffi chash, anumpa a foka kash o tuli patvssa tuklo ka ai o holissochilashke; mikma itombi holitopa ya ish fohkashke, vm achi tok.

3. Mihma shittim iti yo itombi holitopa ikbi li mvt, tuli

patussa tuklo vmona kash chohmi ho tuhli lish nvniha oia li mvt, tuli patussa tuklo kvv svbbak foyuka tok.

4. Mihma vmona holisso tuk chohmi, nan vhpisa pokoli Chihowah yvt nvniha luak iklvna okla itvna nitak ma, auct hvchim anumpuli tuk vt tuli patussa tuklo ka ai o holissochi tok; micha Chihowah yvt vma tok.

5. Mihma fullota li mvt, nvniha akowa li mvt, patussa tuklo kash itombi holitopa ikbi li tuk ash osh fohki li tok; atuk o Chihowah yvt vm anumpuli tuk mak o, yummak o kaiyaha hoke.

6. Mihma Israel im vlla vhleha hvv Chaakan im vlla vhleha ha immi Beeloh a asht ia mvt, Mosela ya ona tok; yummak o Alon vt illi tok, micha yummak o ahollohpitok: mihma ushi Eleasa ak osh vltobvt naholitompa isht ai vttaya isht ahanta tok.

7. Yvmma asht ia mvt, Kutkotah ya ona tok; atuk osh Kutkotah ya asht ia mvt, okhina puta aiasha yakni Chotbalh a ona tok.

8. Nitak yvmma Chihowah yvt Lefai apchlichika Chihowah nan itim apesa afohka itombi holitopa shola chi ho, Chihowah itikba ya hielicha, nan isht im ahanta chi, micha yvmma hochifot, anumpa yukpuli isht onohoncha chi ho, filvmmihinchihoh himak nitak a yvmohmi hoke.

9. Yvmohmi ha tuk o, Lefai vt itibapishi vhleha iba fohkvv akashapa, micha ai isha he vhpesa vt ik im iksho hoke; chin Chitokaka Chihowah yvt achit im issa tok mak o, Chihowah ak osh ai ishi vhpesa immi yoke.

10. Mihma nvniha vmona tok a chohmit, nitak pokoli ushta, micha ninak pokoli ushta ho ahanta li tok; mihma Chihowah yvt nitak yummak kia a haponaklo cha, Chihowah yvt isht ik chi kancho tok.

11. Micha Chihowah yvt, Wakaya cha, okla ha itikba ia, yvmohmikma ima la chi hosh iki vhleha ha anumpa kvv im ilonochit, anumpule li tok a iba chukowa cha, yakni ya ish ashke.

12. Yohmi ka himak a Israel ma, nanta ho chin Chitokaka Chihowah yvt chim ahoyo cho? amba chin Chitokaka

Chihowah ya i nukwiwt, i hina moma ka anohowa, micha holitoblit, micha chin Chitokaka Chihowah ya chukvsh ai okluhvt, micha chi shilombish ai okluhvt isht ish im antia ho.

13. Chihowah im anumpa, micha i nan vlhpisa bilia puta chishno ak inli isht chim ai achukma he o, himak nitak a chi miha li ka holitoblit ish iesha he ak keyu cho?

14. Yakeh, shutik, micha shutik puta i shutik vt, micha yakni ak kia nana moma yvmma aiasha aiena kvv chin Chitokaka Chihowah ya immi hoke.

15. Peh Chihowah yvt chiki vhleha ha holitobli kvv im achukma tok; micha im ishtiaka pit iakaiya aiena ka okla moma ka im aiyachit atokolit ishi tok o, himak nitak a yvmohmi hoke.

16. Yvmohmi kak o hvchi chukvsh tikba hakshup a hvsh tvbli cha, himakma ikunla hvchik kvvlo kashke.

17. Hvchin Chitokaka Chihowah yvt na holvvt toba puta in Chitokaka, micha Chihowah in Chihowah, Chitokaka holitopa, kvvlo, micha palvmmi yosh yvmmvt hatak yohmi hoka, ahni keyu, na hvlbina ishi keyu hoke.

18. Iki illi, micha i hatak illi nan im vlhpisa ka im ahli-chi kvv, micha okla inla ya ilhpak, micha na fohka ya ima kvv im achukma hoke.

19. Yvmohmi hoka okla inla ya hvsh holitoblashke, Echip yakni ya okla inla yosh hvsh aiasha tok ak inli hokvt.

20. Chin Chitokaka Chihowah ya ish i nukwiashke; yvmmak o ish im antiashke, micha yvmmak o ish asitiashke, micha yvmmak o hochifo hosh anumpa kvvlo ish ilonochashke.

21. Yvmmak osh ishit chi anohowa hi oke, micha chin Chitokaka yoke; yvmmak osh na chito, micha palvmmi puta chi nishkin vt pisa tuk ilvppa puta ka chi yvmihunchi tuk oke.

22. Chiki vhleha hvv hatak pokoli untuklo hosh Echip a ai itvpehvt ona tok; atuk o himak a chin Chitokaka Chihowah yvt chi apaknvchi kvv shutik fochik ak o chi chohmichishke.

CHAPTER XI.

YUMOHMI hoka chin Chitokaka Chihowah ya ish holitobli cha, chi miha tok a, micha i nan vllhpisa bilia, micha im ai vllhpiesa yvmihinchi, micha im anumpa aiena ka ish ieshi na, biliashke.

2. Micha himak nitak a hvsh ithaiyanashke; hvchim vlla vhleha ha im anumpule li keyu hoka; yvmmak osh hvchin Chitokaka Chihowah yvt na hotopa onohonchi tuk, im aholitopa, ibbak a kullo, micha shakba ashatapa,

3. Micha i na fehna, micha i nan yvmihinchi Echip ai ikvnna, Echip i miko Falaoh, micha i yakni moma ka onohonchi tok a;

4. Micha Echip in tvshka chipota, micha im issuba puta micha tvnvp, im iti chanvlli puta ka, kaniohmichi tok a; hvchi hliolit aya ma, okhvta humma ya oka tamovchi tok, micha Chihowah yvt ishit kanchi tok a himak nitak a yvmihinchi hoke;

5. Micha yakni haiaka mihintit ilvppa hvsh la ka ant vhli ka hvchi kaniohmichi tuk a,

6. Micha Luben ushi Eliab ushi tuklo Tahlan, micha Abilam akaniohmichi tok a yakni vt itakpashali cha, yvmma micha in chuka achvfa puta, micha i bina puta, micha i na chokushpa puta ishi tuk puta Israel moma ai itin takla ishit nanvbli tok a puta ka ik ithano ki tok, micha ik peso ha tok oka;

7. Yohmi kia nana isht aiahanta chinto fehna moma ka Chihowah yvt yvmihinchi tuk a hvchi nishkin vt pisvshke.

8. Yvmohmi hoka anumpa ha himak nitak a hvchim anumpohonli li ka hvsh ieshashke; yvmohmi hosh hvsh kullo cha, yakni hvsh isha chi hosh yvmma pilla ia kvnt ont chukowvt hvsh ishashke.

9. Yvmohmi hosh Chihowah yvt hvchiki vhleha, micha im isht atiaka aiena ka ima chi hosh, anumpa kullo im ilonochi tok a nitak hvchi falaia yakni yash pishukchi, micha foe-bila ayanahanli yakni ya hvsh ai ahashwashke.

10. Yakni ya ish isha chi hosh, yvmma pilla ish ia kv̄t, Echip yakni ish a minti tok, yvmmak oka chi na nihi ish hokchi tuk mv̄t, haiyukpolo osapushi chohmichit, chiyi ak o oka isht ish o hlali beka tok a chohmi keyu ho ish ia hoka;

11. Amba yakni hv̄sh isha chi hosh, yvmma hv̄sh ia kv̄t, nvnih, micha okfa, aiena aiasha yosh shutik vt et ai umba oka ak o ishi hoke.

12. Chin Chitokaka Chihowah yvt anukfilli yakni yoke; chin Chitokaka Chihowah i holhponayo yvt onctoyula na, bilia, afv̄mmi ishtia v̄mmona tukmv̄t afv̄mmi ont taha ka ont v̄hli hoke.

13. Atukma yakohma hi oke, achunanchit v̄m anumpa himak nitak a hv̄chim anumpohonli li ka hv̄sh haiyaklo, hv̄chin Chitokaka Chihowah ya hv̄sh holitobli, micha hv̄chi chukv̄sh a mominchit, micha hv̄chimi shilombish ma mominchit hv̄sh im antiakma,

14. Yvmohmikma hv̄chi yakni im umba ont ai v̄lhpiesakma, v̄mmona umba, micha ont ishtaiopi umba ya hv̄chima la hi oke; mikma hv̄chim onush, micha hv̄chim okapaki, micha hv̄chi bila aiena ka hoyot hv̄sh ashacha hi oke.

15. Michā chi nan v̄lhpōa yvt v̄pa chi ka, yvmohmi na, hv̄sh impa cha, micha hv̄chi kaiya chi ka hv̄chim osapa puta hoka hv̄shuk et hv̄chi pila la hi oke.

16. Ahah, hv̄sh ahni na, hv̄chi chukv̄sh vt hv̄chi haksichi na, fullotvt na holbvt toba inla puta hv̄sh im antia cha, hv̄chik aiokpacho kashke.

17. Yvmohmikma Chihowah im ai i nukkilli vt hv̄chi sanalit libbikmv̄t, shutik a okshitakma, umba kv̄t iksho ka he, mikma yakni vt i nan waya puta ka ik a wayo ka hi oke: mikma chekosi Chihowah yvt yakni hv̄chima tuk a hv̄sh a mosholi.na.

18. Yvmohmi hoka v̄m anumpa ilv̄ppa puta ka hv̄chi chukv̄sh, micha hv̄chimi shilombish a fohkit hv̄sh ieshashke, micha nan isht atokowa yo hv̄chibbak ishit hv̄sh takchi na, hv̄chi nishkin itin takla ya bita hosh on talaia ka hv̄chin chohmashke.

19. Micha yumma hvchim aboha hvsh a binilikmvt isht hvsh anumpohonlashke; micha hina takla hvsh ayakmvt, hvsh itoyulakmvt, micha hvsh wakayakmvt, hvchim vlla vhleha ha hvsh im abahanchashke.

20. Micha chin chuka in tonik puta ka, micha chi holihta okhissa puta ka ish ai o holissochashke.

21. Yumohmi ka hvchi nitak, micha hvchim vlla vhleha ha i nitak vt, Chihowah yvt hvchiki vhleha ha ima chi hosh anumpa kullo im ilonochi tok a yakni ya hvchim ai apakna kv, shutik nitak vt yakni in takali kak inli ho chiyuhmashke.

22. Anumpa ilvppa puta moma hvchim anumpohonli li ka achunanchit hvsh ieshi cha, yumihehit hvchin Chitokaka Chihowah ya holitoblit, i hina puta moma ka ai itynowa cha, hvsh im antiakma;

23. Yumohmikma Chihowah yvt oklushi ilvppa puta moma ka hvchi tikba a tihlelit, kocha welikma, oklushi puta hochito, micha kullo kv hvchishahi ya hvsh isha chi hoke.

24. Kanima moma hvch iyi putta yvt anohowa kv hvchimmi ha chi hoke; yakni haiaka, micha Lebanon vttvt okhina Euflates okhina vttvt ia hosh okhvta ont vhli fehna ont vhli kak osh hvchim ai vhli ya chi hoke.

25. Hatak nana kia hvchi tikba ya hikia he keyu ka chi hoke; hvchin Chitokaka Chihowah yvt hvchim achi tuk mak osh, yakni hvsh anohowa moma ka hvchi nukshopa, micha hvchi komunta aiena ka onocha chi hoke.

26. Yakeh, himak nitak a nan isht yukpa, micha nan isht kalakshi ya hvchi tikba takalechi lishke.

27. Nan ishit yukpa, hvchin Chitokaka Chihowah im anumpa himak nitak a hvchim anumpohonli li ka hvsh im antiakmvt;

28. Micha ishit kalakshi, hvchin Chitokaka Chihowah im anumpa himak nitak a hvchim anumpohonli li ka hvchik im antio hosh, hina ya kohchvt naksika pit hvsh fullota cha, na holbvt toba inla puta hvsh ithana tok keyu kv, iakaiyvt hvsh iakma.

29. Atukma yakohma hi oke; yakni ya ish isha chi hosh,

yumma ish ia ka chin Chitokaka Chihowah yvt chisht onakma, Kelisim nvni hā anumpa yukpali ish onochikmvt, Ebal nvni hā anumpa kalakshichi ish onocha hi oke.

30. Yummvt Chatan misha tvnnvp, hvshi pit ai okatula pilla, Kananait okla yummvt Kikal ichapaka yakni shahbi asha ya i yakni Moleh yakni patali bilika hiel keyu cho?

31. Chihowah yvt hvchima tok a yakni ya hvsh isha chi hosh, Chatan a hvsh hlopulla chi hokvt; micha hvsh ishikmvt hvsh ai ahashwa chi hoke.

32. Mikmvt nan vlpisa bilia moma, micha ai vlpiesa yvmihinch hi mak nitak a hvchi tikba ya takalichi ka ithaiyanvt hvsh yvmihchashke.

CHAPTA XII.

NANULHPISA bilia, micha aivlpiesa yvmihinch i lvp pa puta ka chiki vhleha in Chitokaka Chihowah yvt yakni ya ish isha chi ho chima tok a okchayvt yakni paknaka hvsh ahashwa nitak moma kv ithaiyanvt hvsh yvmihchashke.

2. Oklushi puta hvsh ishi puta kv, nvni chaha paknaka, micha nvni paknaka, micha iti okchamali nuta puta ka, i na holvt toba puta aiokpvchit aiasha tuk moma ka ieshit kanchit hvsh vmohmicha hi oke.

3. Micha im alta puta ka hvsh kinahlich hi oke, micha in tonik puta ka kobahlichit, im iti lokoli puta ka luak ishit hvsh hukma hi oke; micha i naholvt toba puta in chuvt na holvt toba ya chanlit hvsh akakohli cha, i hohchifo puta ka yumma ai ishit hvsh kancha hi oke.

4. Hvchin Chitokaka Chihowah ya hvsh i yvmihcha he keyu hoke.

5. Amba hvchin Chitokaka Chihowah ak osh kanima ho hvchim apelihchi puta moma ka ai atokolit, hohchifo ha a bohlikma, ai ahanta ak o hvsh hoy chi hoke; micha yvmak o ish ona chi hoke,

6. Micha yvmak o nahukmit isht hvsh aiokpvchi, micha

nan vbit isht hvsh aiokpvchi, micha ishit hvchi pokoli, micha pit i walit isht aiokpvchi chibbak foyuka ka, micha anumpa hvsh ilonochi, micha ilap ahnit isht hvsh aiokpvchi, micha hvchi nan vlhpoa hochito, micha hvchi nan vlhpoa chipinta chelahpi puta aiena a puta ka isht hvsh ona hi oke.

7. Micha yvmmak o hvchin Chitokaka Chihowah itikba ya hvsh ai impa hi oke; hvchishno, micha hvchin chuka achvfa hvsh aiena kv̄t nana moma ka hvchibbak onochit ishit hvsh ahanta na, Chihowah yvt hvchi yukpali tuk a hvchi yukpashke.

8. Himak nitak a nana ilvppa il akaniohmi ka, hatak moma kv̄t ilap anukfilli kv̄t vlhpesa ahni ka iakaiya ka hvsh yvmohma he keyu hoke.

9. Afoha micha aiasha he vlhpesa hvchin Chitokaka Chihowah yvt hvchima tok a hvchik ono kisha hokvt.

10. Amba Chatan a hvsh hlopulli cha, hvchin Chitokaka Chihowah yvt hvchima yakni ya hvsh aiashakmvt, hvchin tv̄nvp puta apakfoypvt aiasha moma ka i hlakofichit hvchi fohvchi na, achukma ho hvsh aiashakma.

11. Yvmohmikma hvchin Chitokaka Chihowah yvt yvmak o i hohchifo aiahanta chi ka atokola chi hoke; yvmak o nana moma chim ahanchi li tuk mak o, na hukmit ishit hvsh aiokpvchi, micha nan vbit isht hvsh aiokpvchi, ishit hvchi pokoli, micha i walit isht aiokpvchi hvchibbak foyuka aiena, micha achukma i shahli moma, anumpa il onochit Chihowah ya hvsh im ilonochi tuk a puta aiena ka isht hvsh la hi oke,

12. Mikmvt hvchishno, micha hvchiso vhleha, micha hvchiso tek vhleha, micha hvchin tishu hatak vhleha, micha hvchin tishu ohoyo vhleha, micha Lefait vhleha hvchi holihta okhissa anukaka hikia aiena kv̄t, i kashapa micha ai-isha he vlhpesa vt hvchim ai iti takla ya ik im iksho hoka; awant hvchin Chitokaka Chihowah itikba ya na hvchi yukpashke.

13. Ahah ish il ahnashke, yvmohmi hosh kanima moma ish pisakmvt na hukmit isht ish aiokpvchi ya chik ai im isso kashke :

14. Amba chim apehlichī putā k_a achvfa h_o kanima h_o Chihowah yvt atokolikma, yummak o na hukmit isht ish aiokpuchi a ish ai im issa chī hoke, micha yummak o chī miha li tuk moma k_a ish ai yvmihcha chī hoke.

15. Yohmi kia nana h_o chī chukvsh vt bunnakmvt, chī holihta okhissa anukaka moma k_a, chin Chitokaka Chihowah yvt nan isht yukpali chima tuk mak o, ai vbit nipi ish pashke: ik kashofa micha kashofa aiena kv̄t issi holba nakni, micha issi nakni chohmi k_a ai vpa hinla hoke.

16. Peh issish ano hvsh pa he keyu, oka chohmichit, aka hvsh hlatvbla hi oke.

17. Chim onush isht pokoli, micha chim oka paki ishit pokoli, micha chī bila ishit pokoli, micha chī nan vhlpoa hochito vttahpi, micha chī nanvhlpoa chipunta vttahpi, micha anumpa ilonochi ish ilonochi tok, micha ilap ahnūt nan im issa, keyukmvt pit i walit im issa chibbak foyuka aiena k_a chī holihta okhissa anukaka y_a ish aivpa he keyu hoke.

18. Amba chin Chitokaka Chihowah ak osh kanima h_o ai atokolikma, chishno, micha chiso, micha chiso tek, micha chin tishu hatak, micha chin tishu ohoyo, micha Lefait chī holihta okhissa anukaka ahanta aiena kv̄t, chin Chitokaka Chihowah itikba ish ai impa hi oke; micha nana h_o chibbak isht ish ishi moma chin Chitokaka Chihowah itikba na, chī yukpashke.

19. Ahah ish il ahni cha, yakni paknaka ish ahanta moma kv̄t Lefait vhleha h_a chik kancho kashke.

20. Chin Chitokaka Chihowah yvt achit chim issa tuk mak osh, chim aivhli y_a chitolikma, nipi y_a vpa lashke, ish achikmvt, (chī chukvsh vt nipi vpa bunnā ha tuk osh,) nipi nana h_o chī chukvsh vt bunnakmvt ish pa hinla hoke.

21. Chin Chitokaka Chihowah yvt kanima h_o yummak o hohchifo h_a a bohla chī hosh atokoli tuk vt chī hopaki fehnakmvt, yohmikmvt, chī nan vhlpoa hochito, micha chī nan vhlpo chipunta aiena Chihowah yvt chima tuk a chī miha li tuk mak o, nana h_o chī chukvsh vt bunnakmvt chī holihta okhissa anukaka yak o ish ai vpushke.

22. Issi holba nakni, micha issi nakni vpa chatuk mak o,

chohmichit ish pashke, ik kashofu, micha kashofa aiena kv̄t iti lauet ai vpa hi oke.

23. Peh issish ano chikpo pullashke; issish ak osh isht okchaya yoke; isht ai okchaya ya nipi aieninchit ish pa he keyu hoke.

24. Ish pa he keyu; oka chohmichit aka ish hlatvbla hi oke.

25. Ish pa he keyu hoke; yvmohmi hosh Chihowah itikba ya aivlhpiesa hō ish yvmohmikmvt, chishno, micha chim vlla vhleha et chi akaiya aiena kv̄t chim achukmashke.

26. Peh na chī hullochi chim asha, micha anumpa ishi lonochi ak illa hō ish ishi cha, Chihowah yvt kanima yō ai atokoli tukma ish ia hi oke.

27. Michā na hukmit isht ish aiokpv̄chi nipi, micha issish aiena k̄a chin Chitokaka Chihowah im alta ya onochit ish im issa hi oke: micha nan vbit isht ish aiokpv̄chi issish vt chin Chitokaka Chihowah im alta ya o hlatapakma, nipi yano ish pa hi oke.

28. Yohmi ahnit ish anukfilli cha, anumpa ilvppa moma chī miha li k̄a ish haklashke; yvmohmi hosh chishno, micha chim vlla chi akaiya aiena kv̄t chin Chitokaka Chihowah itikba ya achukma hō micha ai vlhpiesa hō ish yvmihchikmvt achukma hosh ish mahaya na biliashke.

29. Ish isha chī hosh ish ia k̄a chin Chitokaka Chihowah yvt oklushi puta kash chi tikba ai ishit kanchi na, ish vlhtoba cha, i yakni ya ish ashakmvt;

30. Ahah ish il ahnashke, yvmohmi hosh chi tikba ai ishit kanchi ha ya iakaiyvt isht ik chi yushobo kashke, micha i naholbvt toba puta k̄a ponaklot, Oklushi ilvppa puta kv̄t i naholbvt toba puta k̄a katiohmit im antia tuk oh cho? vno ak kia yummak o yvmihchi la chī hoke, chik acho kashke.

31. Chin Chitokaka Chihowah ya ish yvmihcha he keyu; Chihowah yvt i yuwala puta moma, micha shitilema ya, i naholbvt toba i yvmihchi tuk oke; ushi vhleha micha ushetik vhleha aiena k̄a i naholbvt toba luak isht i hukmi fehna tuk oke.

32. Nana ho hvchim ahanchi li tukma, ithaiyanvt ish yv-mihchashke: ish iba fohka he keyu, micha ish ola taklvcha he keyu hoke, achi tok.

CHAPTA XIII.

HUCHIM ai iti takla hopaii yosh, keyukmvt, na holhpo-kuna ya holhpokuna yosh wakayvt hikia cha, nan isht atokowa, keyukmvt, na fehna yo chi haiakvchikma,

2. Atuk o nan isht atokowa, keyukmvt na fehna ishit chim anumpuli tuk vt ont aiahlikma, yvmmak oka ish ithana chatuk keyu ka, Naholbvt toba inla iakaiyvt iloh iashke, micha iloh im antiashke, achikma,

3. Hopaii yvmma, micha na holhpokuna holhpokuna yvmma im anumpa ha ish haponakla he keyu; hvchi chukvsh a mominchit, micha hvchimi shilombish ma mominchi hosh hvchin Chitokaka Chihowah ya ishit hvsh holitoblikma, nanakma, isht akostinincha chi hosh imoma ka hvchi pisa hoke.

4. Hvchin Chitokaka Chihowah ya iakaiyvt hvsh itvnowashke, micha i nukwivt im anumpa ha holitoblit, im anumpa ha hvsh im antivt, in toksahanlit hvsh asitiashke.

5. Mikma hopaii yvmmvt, micha holhpokuna holhpokuna yvmmvt illashke; hvchin Chitokaka Chihowah yvmmak osh Echip yakni ya apehlichit hvchi kohchi tok; micha yvmmak osh aboha ayuka ha a hvchi hlakofichi tok a, i filvmmichit hvchisht ia chi hosh, hina hvsh ai itvnowa chi ho hvchin Chitokaka Chihowah yvt hvchi miha tok a nak-sika pit hvchi tobli bvna hosh annmpuli ha tuk oka. Yv-mohmi hosh hvchim ai iti takla ya nan ik achukmo ka isht hvsh kanchashke.

6. Chitibapishi chishki ya ushi yokma, keyukmvt chiso yokma, keyukmvt chisotek okma, keyukmvt chi tekchi chi apotoa tuk ak okma, keyukmvt chi kana yosh chimi shilombish ak inli chiyuhmi tuk okma, nana hosh lumvt chi haksichit, yvmmak oka hvchishno, micha hvchiki vhle-

ha aiena kv̄t ithana tok keyu kia, Kilia cha, naholbvt toba inla,

7. Yvmmvt okla hv̄chi apakfopvt aiasha, hv̄chi bilika hokmá, keyukmvt hv̄chi hopaki hokmá, yakni ataha k̄a in tvnnvp vttvt ia hosh in tvnnvp ont v̄hli k̄a aiasha k̄a i na naholbvt toba kiloh aiokpv̄chi, achikma,

8. Ulhpesa, chik im ahno kashke, micha chik i haponaklo kashke: micha chi nishkin vt ik i nukh̄aklo kashke, ish apoacha he keyu, micha ish luhma he keyu hoke.

9. Amba ish bi pulla hi oke: ilichi k̄a tikbanli hosh chishno ak osh chibbak a ish onocha hi oke; mikma i himmak a yō okla moma kv̄t ibbak onocha hi oke.

10. Tuli o isht ish boli na, illashke; chin Chitokaka Chihowah yvmmak osh Echip yakni, micha aboha a yuka h̄a apehlichit chi kohchi tok a i filvmmichit chi tobli bv̄nna tuk okvt.

11. Mikma Israel moma kv̄t haklo cha, nukshopakmvt, himmakma yoshuba fehna ilvppa chohmi kv̄t a hv̄ch iti takla ya ik a yvmohmho kashke.

12. Chin tv̄maha holihta kanima k̄a yvmmak oka ish aisha chi k̄a chin Chitokaka Chihowah yvt chima tok a ish h̄aklo hō achi kv̄t,

13. Hatak kaniohmi kv̄t Belial im v̄lla v̄hleha hv̄t hv̄chi kohchvt ia cha, in tv̄maha holihta okla hash pehlichit isht ivt, Naholbvt toba inla put̄a hv̄sh ithana tuk keyu ya ia cha, kiloh aiokpv̄chi, achishke, achikma,

14. Yohmikma ish ponaklo cha, silhhit, micha achunan-chit ish asilhhv̄cha hi oke; atuk o, yakeh, na yuwala yv̄mma chohmi hv̄chi ai iti takla ya yvmihchi tuk vt ahlikma, micha nana kv̄t ai ahli fehnakma;

15. Tv̄maha holihta yash okla aiasha k̄a bv̄shpo falaia ishit fahamvt, ishit kanchit hv̄sh v̄mohmichi pullashke; micha anukaka nana aiasha moma k̄a, micha nanv̄lhpoa yv̄mma aiasha k̄a bv̄shpo falaia isht hv̄sh kanchashke.

16. Michā na wehpōa moma k̄a tv̄maha holihta iti takla ai itv̄nowa iklv̄nna hv̄sh itv̄nahli cha, tv̄maha holihta, micha na wehpōa aiena kash ant isht aiopi moma k̄a chin Chitoka-

ka Chihowah itikba ya luak isht hvsh hukmashke; micha chiffikot chieya na biliashke; anonti ikba he keyu hoke.

17. Mikma nana achufa nana kia kvllakshi yash osh chibbak a foyuka he keyu hoke: yvmohmi ho Chihowah yvt chiki vhleha ha anumpa kvllo im il onochi tok mak osh, ai im i nukkilli libbi ka shvnaiachi cha, chi nukhaklot heh chi ahni cha,

18. Chin Chitokaka Chihowah im anumpa ha ish haponaklo cha, im anumpa moma ka himak nitak a chi miha li ka ieshit chin Chitokaka Chihowah itikba ya, aivlhpiesa kak o ish yvmihchikma, chi apaknvchashke, achi tok.

CHAPTA XIV.

HUCHIN Chitokaka Chihowah im vlla hvchia hoke; illi pulla kak o hvsh ile bvshla he keyu, micha hvchi nishkin iti takla ya hvsh yushmilalicha he keyu hoke.

2. Chin Chitokaka Chihowah ya i holitopa okla chia hokvt; micha oklushi puta yakni paknaka aiasha moma ka i shahlechit im okla hosh inla fehna chia ha chi ho Chihowah yvt chi atokoli tok oke.

3. Nana yuwala ya ish pa he keyu hoke.

4. Nampoia ilvppa puta ka hvsh pa hi oke: wak, chukfi, micha issi kosoma.

5. Issa nakni, micha issi tek, micha issi humma, micha issi kosoma nukshopa, micha issi antilop achi, micha issi kasel achi, micha issi shammi achi.

6. Michia nampoia moma hosh iyi akchush a iti flvmmichit pahlvllichi mvt, iyi akchush tuklochi cha, hvshuk vpa tuk vt, falaminchit kohchit hopasa puta kvtt nampoia ai itin takla asha ka yvmmak o hvsh pa hi oke.

7. Yohmi kia ilvppa puta kak osh hvshuk vpa tuk vt kohchit hopasa kia, micha iyi akchush pahlata ya iti flvmminchi ak inli kia; yvmmak o hvsh aivpa he keyu hoke: kamel, micha pvttta kitta, micha chukfi holba, chohmi ka; yvmmvtt hvshuk vpa kohchit hopasa kia, iyi akchush a iti

filvmmichi keyu hoka; yvmohmi hokvt hvchin litiha ya hi oke.

8. Mikma shukha yvt iyi akchush a iti filvmmichi hakinli kia, hvshuk vpa tuk vt kohchit hopasa keyu hokvt, hvchin liteha ya hi oke; nipi ya hvsh pa he keyu, micha yvmma nipi illi ya hvsh potola he keyu hoke.

9. Ilvppa puta kak osh oka aiasha ya hvsh pa hi oke; sanahchi im asha, micha hakshup fachowa im asha aiena kak o hvsh pa hi oke.

10. Micha nana hosh sanahchi ik im iksho, micha hakshup fachowa ik im iksho ka hvsh pa he keyu hoke; hvchin litiha ya hi oke.

11. Hushi kashofa puta moma ka hvsh pashke.

12. Yohmi kia ilvppa puta kak o hvsh pa he keyu hoke; ossi micha ossifilachi, micha ospila.

13. Micha kileti, micha kait, micha fula itiakaiya achvfa puta,

14. Micha fula chito ai iti akaiya ai achvfa puta.

15. Micha opa, micha oksupafohli, micha kuku, micha na hokli hak achi, ai iti akaiya achvfa,

16. Micha opa iskitini, micha opa chito, micha okak,

17. Micha chilantakoba, micha kie ossi, micha komolant,

18. Micha istak, micha itikushayaiya ai iti akaiya achvfa, micha lapwin, micha halambisha,

19. Micha na balahanli hvv heli puta kvv hvchin litiha ha chi hoke, vpa he keyu hoke.

20. Amba hushi kashofa puta hokvno hvsh pa hi oke,

21. Nana hosh ilap ak inli hosh illi tuk ano hvsh pa he keyu: okla inla yosh chi holihta okhissa hikia kak o ish ema na, vpa hi oke; keyukmvt okla inla yo ish i kancha hi oke; chin Chitokaka Chihowah ya alitiha ik im iksho yosh im okla hvchia hokvt. Issi kosoma ushi ya ishki i pishukchi ya isht ish hona he keyu hoke.

22. Osapa yvt chi na nihi ya afvmmi hosh ont afvmmikma, nawayahanchi ka ishit pokoli ho ahli hosh ish onohunchashke.

23. Kanima ho hohchifo a bohla chi hosh atokolikma,

yummak o chim onush, micha chim oka-paki, micha chi bila ishit pokoli, micha chi nan vlhpoa hochito, micha chi nan vlhpoa chipunta ushi vttā ahpi puta aiena kā chin Chitokaka Chihowah itikba yā ish ai vpashke; yummohmi hosh chin Chitokaka Chihowah yā i nukwia bilia kā ish ithanashke.

24. Atuk o hina vt chi falaia fehna cha, isht ish ia he keyukmvt, micha chin Chitokaka Chihowah yvt hohchifo ha yummak o a bohla chi hosh atokoli tuk vt chi hopaki fehnakmvt, chin Chitokaka Chihowah yvt na chi yukpa li mvt;

25. Yohmikmvt tvli holisso isht ish itatoba cha, tvli holisso yash takchit, chibbak ish foyuki cha, chin Chitokaka Chihowah yvt ai atokoli tuk a ish ona hi oke.

26. Micha chimi shilombish vt nana ho bunnakmvt, wak okma keyukmvt chukfi, keyukmvt okapaki, keyukmvt nan ishko kullo, keyukmvt chimi shilombish vt nana ho bunnakmvt, yummak o Chihowah chin Chitokaka itikba yā chishno micha chin chuka achvfa aiena kv̄t na yukpvt impvt hvsh mahaya hi oke.

27. Micha Lefait vt chi holihta okhissa anukaka aiasha ha ish kancha he keyu; yummvt chin takla i kashapa yvt ai isha he ai vlhpiesa yvt ik im iksho hoke.

28. Afvmmi ont a tuchina kv̄t ont taha ma, afvmmi yummak inli ho, chi nawaya ishit pokoli moma kā isht ish kohchi cha, chi holihta okhissa anukaka ish ashacha hi oke.

29. Mikma Lefait vt (yummvt i kashapa, micha ai isha he vlhpesa yvt chiba fokv̄t ik im iksho hokv̄t) micha okla inla, micha iki iksho, micha i hatak illi, chi holihta okhissa anukaka aiasha aiena kv̄t v̄la cha, v̄pvt fihopashke; yummohmi ho chin Chitokaka Chihowah yvt chibbak na toksahanli moma isht ish ahanta kā chi yukpalashke, achi tok.

CHAPTA XV.

AFUMMI untuklo kv̄t ont taha aiyukalikma, nan i hotofi yā ish apesa hi oke.

2. Micha nan i hotofi yvt yakohma hi oke: nan ahekvchi aiyukali hosh in chuka a bilika hatak a, nana kia im pota tuk vt i hotofa hi oke; in chuka abilika hatak, keyukmvt, itibapishi ha i hoya he keyu, Chihowah i hotofa hohchifo hoka.

3. Okla inla yano ish i hoya hi oke; amba chimmi ha tuk a chitibapishi hvt ishi ka chibbak vt i hotofa hi oke:

4. Ilbusha yvt hvch itin takla ya iksho hok mak illa hi oke, ish ai isha he vhpesa yosh ish ai isha chi ho, chin Chitokaka Chihowah yvt yakni chima tok a Chihowah yvt chi yukpali fehna chi hoke.

5. Peh chin Chitokaka Chihowah im anumpa achukma-lit haponaklot, anumpa ilvppa puta moma himak nitak a chim anumpohonli li ka ithaiyanvt ish yvmihchikma.

6. Chin Chitokaka Chihowah yvt chim achi tuk mak osh, chi yukpali hoka: mikma oklushi laua ho ish impota hi oke; yohmi kia chishno vto ish pota he keyu, micha oklushi laua ho ish i mika hi oke; amba chishno ano chi mika he keyu.

7. Chitibapishi vhleha aiachvfa, hatak vt ilbusha hosh hvch itin takla chi holihta okhissa moma anukaka chin Chitokaka Chihowah yvt yakni chima tuk a ahantakma, chi chukvsh a ish i kullocha he keyu, micha chitibapishi ilbusha ya chibbak a ish i pohloma he keyu hoke.

8. Amba chibbak a auatvchi hosh ish i wakvmmi cha, nana bnna tuk yvmma kaniohmi bnna ka laua kvv im vhpesa ho ish im pota hi oke.

9. Ahah ish ai ahni na, Afvmmi isht untuklo afvmmi ai i hotofa he vt olanlosishke, achi, imanukfila hvt chi chukvsh okpulo ya ik chukowo kashke; micha chi holhponayo hvt ik achukmot, chitibapishi ha i sanali cha, nana kia chfk emokma, chi sanalit Chihowah ya im payakma nan ashvchi chi toba na.

10. Ish ima pulla hi oke, micha ish emakmvt, chi chukvsh vt nukhakla he keyu: nana ilvppa pulla kak o, nan ish toksvli puta moma, micha nana moma ho chibbak isht ish ishikma chin Chitokaka Chihowah yvt na chi yukpala hi oke.

11. Yakni yash ilbussha yvt ik ai iksho ka he keyu hoke : yvmohmi kak o chitibapishi ha ilbussha ya, micha nana ik im iksho yakni yash chim ai asha ka chibbak a auatvchit ish i wakumma hi oke, chim achi lishke.

12. Atuk o chitibapishi Heblu hatak, keyukmvt Heblu ohoyo ha chi kanchi tuk o, afummi hannali ho chin toksvlikma, afummi ont isht untuklokma, pilla ho chim ai ia he a, ish im ahnashke.

13. Micha pilla ho ish kohchichikmvt, ibbak bieka hosh ik ia, ish im ahna he keyu hoke.

14. Laua achukma ho chi nan vlhpoa chipunta, micha chim a nihechi, micha chi paki abusha aiena ka ai ishit ish im atahla hi oke : chin Chitokaka Chihowah yvt nan isht chi yukpali tuk a ai ishit ish ima hi oke.

15. Micha hatak yuka hosh Echip yakni ya ish ahanta tuk o, chin Chitokaka Chihowah yvt falvminchit chi hla-kofichi tok a ish ithaiyanashke : yvmohmi kak o himak nitak a nana ilvppa mihvt chim ahanchi lishke.

16. Atukma yakohma hi oke, chishno micha chin chuka achvfa holitobli ha tuk osh, micha chi takla ahanta kvv im achukma ha tuk osh, chissot ia la he keyu, chim achikma,

17. Yohmikma chofak ish ishi cha, haksobish a hlopullichit, okhissa ya ish anvhlichia hi oke : micha chin tishu bilia ya hi oke. Micha chin tishu ohoyo ha ish yvmihechi ak in-la hi oke.

18. Pilla ho ik ia, ish im ahnikmvt chi kvllo, ahoba he keyu ; afummi hannali ho chin toksvli kvv, ilhtono tishu ha inlohmi tuklo ka holitopa tuk vt chim iti laui tuk oke : micha chin Chitokaka Chihowah yvt nana moma ka ish yvmihchikma, chi yukpala hi oke.

19. Chi nan vlhpoa hochito, micha chi nan vlhpoa chipunta aiena ka vttahpi nakni puta ka chin Chitokaka Chihowah ya ish i hullocha hi oke : vttahpi chi wak hobvk a isht ish toksvla he keyu, micha chin chukfi vlhpoa vttahpi hishi ya ish ma he keyu hoke.

20. Afummi hosh ont afummikma kanima ho Chihowah yvt atokolikma, yvmmak o chishno, micha chin chuka achvfa

aiena kvt chin Chitokaka Chihowah itikba ya ish ai vpa hi oke.

21. Atuk o ik ai ono kvt takali cha, hanali okpulo, keyukmvt nishkin lupa, keyukmvt ik ai onot ik achukmo nana hosh takalikma, chin Chitokaka Chihowah ya vbit isht ish ai okprcha he keyu hoke.

22. Chi holihta okhissa anukaka yak o ish ai vpa hi oke: hatak ik kashofo, micha kashofa aiena kvt iti lauit issi, micha lapitta chohmichit ish pa hi oke.

23. Peh issish ano chik po ka hi oke, oka chohmihchit aka ish hlatvbla hi oke, achi tok.

CHAPTER XVI.

HUSHI Abib a ish ithaiyana cha, chin Chitokaka Chihowah ya vbanvblit ontia isht ish im ieshashke: hvshi Abib ak o chin Chitokaka Chihowah yvt ninak o Echip a apchlichit chi kohchi tok oke.

2. Chihowah yvt kanima ho ai atokolit hohchifo a bohlikma, yummak o chi nan vlhpoa chipunta, micha chi nan vlhpoa hochito aiena ka ai ishit vbanvblit ontia ya vbit chin Chitokaka Chihowah ya isht ish ai okprchashke.

3 Pvska shatvmmi ya aieninchit ish pa he keyu; nitak untuklo ho pvska ik shatvmmo, ilbrsha pvska pulla ka aieninchit ish pa hi oke; (anukwaya hosh Echip yakni ya kohchvt ish minti tok okvt:) yvmohmi hosh chi okchaya nitak moma kvt Echip yakni ya kohchvt ish minti tok nitak a ish ithaiyanashke.

4. Hvsh aiasha fullota moma ka pvska shatvmmi nana kia ik a haiako ho nitak untuklashke; micha nitak vmmona opiaka vbit isht ish aiokprchi nipi vt ninak a itonla na onna he keyu.

5. Chi holihta okhissa kanima kia chin Chitokaka Chihowah yvt chima ka anukaka ya vbanvblit ontia ai vbit isht ish aiokprcha he keyu hoke.

6. Amba chin Chitokaka Chihowah yak osh kanima ho

atokolit hohchifo a bohlikma, yummak o opiakma hvshi vt okatula ho Echip a a kohchvt ish minti tok ont vlhpiesakma, vbanvblit ontia ya isht ish aiokpvcha hi oke.

7. Mikmvt chin Chitokaka Chihowah yvt kanima ho ai atokolikma ish ai apushli cha, ish pa hi oke: atuk osh on-nahinlikma falamvt chi bina ha ish ona hi oke.

8. Nitak hannali ho pvska ik shatvmmo ya ish pa hi oke; atuk osh nitak isht untuklo hokuto chin Chitokaka Chihowah im itvnaha holitopa ya hi oke: yummak oka na toksvli nana kia ish yvmihcha he keyu.

9. Nitak hullo untuklo ho ish hotihna hi oke; nitak kaniohmi ho onush a ishit bvsha ya ishit bvshlit, isht ish ia mak inli hosh, nitak hullo untuklo ka hotihnvut isht ish iashke.

10. Micha nitak hullo puta impvchi ya chin Chitokaka Chihowah ya isht ish aiashakmvt, chin Chitokaka Chihowah yvt na chi yukpali tuk pulla mak o ilap ahnit chibbak foyuka im issa ya aieninchit chin Chitokaka Chihowah ya ish imashke.

11. Micha chin Chitokaka Chihowah itikba ya, chishno micha chiso, micha chiso tek, micha chin tishu hatak, micha chin tishu ohoyo, micha Lefait vt chi holihta okhissa anuka aiasha, micha okla inla, micha iki iksho, micha ohoyo vlhtakla hvch itin takla aiasha aiena kvut, kanima ho chin Chitokaka Chihowah yvt hohchifo a bohla chi hosh ai atokoli tukma, yvmma a yukpvut ish aiashashke.

12. Micha Echip a hatak yuka hosh ish aiahanta tuk vt ish ithaiyanashke: micha nan vlhpisa bilia ilvppa puta ka ithaiyanvt, ish yvmihchashke.

13. Chim onush micha chi paki ya hoyot ish tahli ha yvt, tabenakel ai impvchi ya nitak untuklo ho isht ish aiasha hi oke.

14. Micha chim impvchi ya nan isht chi yukpashke, chishno, micha chiso, micha chiso tek, micha chin tishu hatak, micha chin tishu ohoyo, micha Lefait, micha okla inla, micha iki iksho, micha ohoyo vlhtakla chi holihta okhissa anuka aiasha aiena kvut na yukpashke:

15. Chihowah ak osh kanima hō ai atokolikma, chin Chitokaka Chihowah ya nitak untuklo hō impvchi holitopa isht ish im aiashashke: na chī waya moma, micha chibbak na toksahanli tuk moma k_a chin Chitokaka Chihowah yvt na chi yukpala chī hoka; yvmohmi hoka na chi yukpa pulla hi oke.

16. Kanima hō ai atokoli tukma, nakni chim a_asha moma kv_t chin Chitokaka Chihowah ya afvmmi achvfakma, hituchina h_a itikba ya im itvnaha hi oke: pvska ik shatvmmo impvchi, micha nitak hullo puta impvchi, micha tabenakel ai impvchi: micha ibbak bieka hosh Chihowah itikba ya ona he keyu hoke:

17. Chin Chitokaka Chihowah yvt nan ishit yukpali chima tuk pulla mak o, hatak puta kv_t ai ima he v_lhpiesa puta kv_t imashke.

18. Chim apelihchi puta hlopulli, chī holihta okhissa chin Chitokaka Chihowah yvt chima tok a nan apesa v_hleha, micha nan v_lhtoka v_hleha aiena k_a ish ikbashke; mikma okla h_a nan v_lhpisa aiv_lhpiesa hō im apihisa hi oke,

19. Aiv_lhpiesa v_lhpisa k_a ish shanaiyacha he keyu: hahatak yohmi hoka, ish ahna he keyu, micha nahv_lbina ish isha he keyu; na hv_lbina hv_t hopoyuksa nishkin a lvp_lichi hoke; micha aiv_lhpiesa im anumpa h_a shanaiyvchi hoke.

20. Aiv_lhpiesa bieka kak o ish iakaiya hi oke; yvmohmi hosh chin Chitokaka Chihowah yvt yakni chima k_a chi okchaya cha ieshit ish aiasha hi oke.

21. Chin Chitokaka Chihowah im alta bilika yvmma ish ikba chī kv_t itilokoli nana kia ish hokcha he keyu.

22. Michā na holbv_t toba nana kia chin Chitokaka Chihowa yvt shitilema k_a ish hilecha he keyu, (achi tok.)

CHAPTA XVII.

WAK hobvk nana kia, keyukmv_t chukfi vt ik ai ono, keyukmv_t pisa ik achukmo aiena vbit, chin Chitoka-

ka Chihowah ya isht ish aiokpucha he keyu: yummak okvt chin Chitokaka Chihowah ya nan isht i yuwala yoka.

2. Huch itin takla chi holihta okhissa, chin Chitokaka Chihowah yvt chihima aiachvona anukaka ya hatak okma, keyukmut ohoyo hokma nana hosh chin Chitokaka Chihowa itikba ya nan itim apesa ya vbanvli cha yoshuba yvmihchi tuk,

3. Micha ivt na holbut toba inla, hvshi, keyukmut hvsh ninak aya, keyukmut vba nana puta, yummak oka miha li tuk keyu ho im antia tuk, micha aiokpuchi tuk osh haiakakma;

4. Atuk o chim annoa cha, ish haklo mut, achukmalit ish asilhhvchi tuk, atuk o yakeh, ahli ho micha nana kvv atokowa ka na yuwala yumma chiyuhmi kvv Israel a yvmohmi tuk achinikma;

5. Yohmikma hatak, keyukmut ohoyo yummvt na yoshuba yumma yvmihchi kash, hatak yumma, keyukmut ohoyo yumma pulla ka chi holihta okhissa ya isht ish ona cha, tvli ishit ish boli na, illa hi oke.

6. Witnes tuklo, keyukmut tuchina kanima hosh anoli ho, illa he vhpesa kvv illashke, amba witnes achvfa hosh anoli ho, illa he keyu hoke.

7. Vba chi kvv witnes puta ibbak ak osh tikba onvtola hi oke, i himmak a yak o okla moma ibbak vt onvtola hi oke; Yvmohmi hosh nana ik achukmo hvch itin takla itoyula hash ishit hvsh kancha hi oke.

8. Issish hlatapa tuk o issish hlatapa chi, anumpa iti onochi, micha iti fahama puta, anumpa ishit itachowa puta nana kvv chi kullo fehna ho ish im apesa chi, chi holihta okhissa anukaka ya isht chim vlakma, ish wakaya cha, chin Chitokaka Chihowah ak osh ai atokoli tukma yummak o ish onashke.

9. Micha naholitompa isht asha vhleha, Lefait vhleha, micha nan apesa aiena nitak yumma asha tuk a ish im ona cha, ish im asilhha hi oke; mikma yummak osh nan vhpisa anumpa hoka chim anola hi oke.

10. Micha kanima ho chin Chitokaka Chihowah ak osh

ai atokoli tuk a asha yosh anumpa chim anoli tuk mak o, ish yvmihcha hi oke; micha nana chim anoli tuk mak o moma ka ithaiyanvt ish yvmihinchashke,

11. Nan vlhpisa anumpa apesvt chim abvchi tuk mak o, micha anumpa vlhpisa chim anoli tuk mak o ish yvmihchashke: anumpa vlhpisa chim otvninchi tuk a fullotvt isht impakma, keyukmvt vlhfubekimma ish ia he keyu hoke.

12. Mikma hatak kvna hosh ilapunla cha, naholitompa isht vtta yvt chin Chitokaka Chihowah itikba ya hikvt, yvmmak o nan isht ai ahanta ka ik i haponaklo, keyukmvt nan apesa yo ik i haponaklokmt, hatak yvmmtv illi pulla hi oke; micha Israel a nan ik achukmo ya ishit ish kancha hi oke.

13. Mikma okla moma kvv haklokmtv nukshopa cha, himmakma nana ka ilapunlvv ik yvmihcho ka hi oke.

14. Chin Chitokaka Chihowah yvt yakni chima tok a ish onakmvt, ish ishi cha ish aiashakmvt, Oklushi inla puta si apakfoyupa aiasha ka chohmit sa pehlichu chi ka, miko ikbit binilichu lashke, ish achikmvt,

15. Ik kaniohmi hoh kia kanima ho chin Chitokaka Chihowah ak hosh atokolikma, chi pehliechu chi ka, miko ikbit ish binilichu hi oke, chitibapishi vhleha aiachvfa ho chi pehlihchi miko ikbit ish binilichu hi oke, chitibapishi keyu, okla inla yo chi pehliechi ikbit ish binilichu he keyu hoke.

16. Yohmi kia issuba ha apaknvchit il ai asha he keyu; micha issuba ha apaknvcha chi kak osh okla ha falvmminchit Echip a pila he keyu hoke; Chihowah yvt Himak a pilla ha yvma pilla ka falamvt ish ia he keyu chim achi tok oka.

17. Michu chukvsh vt fullotvt naksika ik aiyo ka chi, ohoyo ha hullocha hi oke; vttahpi chi wak hobvk a isht ish toksula he keyu, micha chin chukfi vlhpoa vttahpi hishi ya ish ma he keyu hoke.

18. Atuk osh yakohma hi oke; im apehliechika miko im ai om binili holitompa ya om binilikmvt, nan vlhpisa ilvppvt na holitompa isht vtta Lefait vhleha itikba itoyula ka akohchit hobachit holisso ha a fohkit a holissochashke.

19. Mikma iba itoyulashke, mihma okchayvt ahanta he nitak moma ka yvmma ai itim anumpohonlashke; yvmohmi hosh Chitokaka in Chihowah ya i nukwia he, micha nan vlhpisa ilvppa anumpa puta, micha anumpa vlhpisa bilia ilvppa puta aiena ka yvmihinja chi hosh ithaiya na hi oke.

20. Yvmohmi hosh chukvsh vt vba takalit itibapishi vhleha ha ik i shahlo, micha anumpa hash naksika pit fullotvt ishtimpakimma, keyukmvt vlhfubekimma ik aiyo kashke: yvmohmi hosh Israel ai itin takla ya, yvmma micha im vlla vhleha aiena im apehliechika ieshi nitak falaiachashke. (achi tok.)

CHAPTA XVIII.

NAHOLITOMPA isht vtta vhleha, Lefait vhleha, Lefait apehlichy moma aiena kvv Israel a takla akashapa, micha aiisha he vlhpesa ya isha he keyu; luak ishit hukmit, Chihowah im issa, micha im ai isha he vlhpesa aiena kak o vpa hi oke.

2. Yvmohmi hokvt itibapishi vhleha itin takla ya yakni ik im iksho ka hi oke, im achi tuk mak osh, Chihowah ak o ai isha he vlhpesa yoke.

3. Micha okla ha im ai ishi kvv, wak okma, keyukmvt chukfi hokma nana ho vbit isht aiokpvchi im issakmvt, naholitompa isht vtta ya fulup, itisupi tuklo micha takoba aiena kak o ima hi oke, mikma ilvppak osh naholitompa isht vtta yvt immi ha hi oke.

4. Micha onush chi waya vmona, chim oka-paki, micha chi bila, micha chin chukfi hishi vlmo vmona aiena ka ish ima hi oke.

5. Chihowah hohchifo pulla ho hiki vt nan isht im ahanta chi ho, yvmma, micha ushi vhleha aiena kvv bilia chi ho, chim apehlichy moma ka akohchit chin Chitokaka Chihowah yvt atokoli tuk oke.

6. Yohmi ka Lefait osh Israel a fullota moma holihta okhissa kanima ai vtta tuk osh kohchvt vlakma, micha ka-

nima ho Chihowah yvt ai atokoli tuk a, im anukfila okluhvt
bunna hosh vlakmvt,

7. Yohmikmvt itibapishi vhleha Lefait vhleha hvt Chihowah itikba ya hieli kvt yvmihchi ka chohmit in Chitokaka Chihowah hohchifo pulla ho nan isht ahanta hi oke.

8. In tikba im ilayak knia tuk vlbi ka, ishikmvt, vpa chi kvt tikba asha, i kvshkoa chohmi ka isha hi oke.

9. Chin Chitokaka Chihowah yvt yakni chima tok a ish onakmvt, oklushi ymma puta a yvmihchi nan isht yuwala ya hobachit yvmihcha chi ka ish ithvna he keyu.

10. A hvchi takla ka, ushi, keyukmvt, ushetik a luak hlo-pullichit keyukmvt, nan ithana ilahobi keyukmvt, nitak nan isht ithana ilahobi, keyukmvt, atvlwvchi, keyukmvt ohoyo isht ahullo,

11. Keyukmvt shimohvchi, keyukmvt, nana aholhkunna i ponaklo, keyukmvt, nakni nan ishtahullo, keyukmvt, hatak illi itim anumpulit nan anoli nana kia ik ai iksho ka hi oke.

12. Nana ilvppa puta yvmihinchit moma ka Chihowah yvt nan ishit yuwala yoke: micha nan ishit yuwala ilvppa pulla kak o, Chihowah yvt chi tikba ya akocha wehli tuk oka.

13. Chin Chitokaka Chihowah ya ish im ahlashke.

14. Oklushi ilvppa ish isha chi puta kvt, nitak nan isht ithana ilahobi, micha nan ithanvt anoli ilahobi puta ka i haponaklo tuk oka: yohmi kia chishno ano chin Chitokaka Chihowah yvt ish yvmihcha he ya ik chim ahno tuk oke.

15. Chin Chitokaka Chihowah yvt a hvch itin takla hvsh itibapishi vhleha ai achvfa yosh vno chohmi ho, Hopaii chi hilecha chi hoke; yummak o ish i haponakla hi oke.

16. Holeb a itvnahvt ish aiasha nitak mvt, chin Chitokaka Chihowah ya ish im ahni moma kvt, An Chitokaka Chihowah itih ha anonti ak haklo kashke, micha himakma luak chito ilvppa ak peso kashke, yvmohmi hosh ik svllo kashke, ish achi tok.

17. Mihma Chihowah yvt, Anumpuli kvt, vlhpesa ho anumpulishke, vm achi tok.

18. Itibapishi vhleha im itin takla ya, Hopaii chishno chohmi ho i hilechi la hi oke, micha vm anumpa ha itih ha

fohkalikma, im apesa li tuk mak o, moma ho im anumpula hi oke;

19. Atukma yakohma hi oke, kvna hosh sa hohchifo pulla ho anumpulikma yummvt im anumpa ha hakla he keyukma im a hoyo la hi oke.

20. Amba hopaii vt sa hohchifo pulla ho, ymma anumpula chi im apesa li tuk keyu ho, Anumpule lih mihakmvt, keyukmvt, naholbvt toba hohchifo pulla ho anumpulikmvt, hopaii ymma fehna kv illa hi oke.

21. Yohmi ka chi chukvsh anukaka, Katiohmi kak osh anumpa Chihowah yvt anumpuli tuk keyu ka il akostinincha chi cho? ish achikma,

22. Hopaii vt Chihowah hohchifo pulla ka anumpuli tukma, nana kv ik yvmohmo, micha ik aiahlokmt, ymmak osh nana Chihowah yvt anumpuli tuk keyu; amba hopaii vt ile yimmit anumpuli tuk a hi oke; ymma hvsh i nukshopa he keyu hoke, (achi tok)

CHAPTA XIX.

OKLUSHI puta ka chin Chitokaka Chihowah yvt i yakni ya chima tuk vt ai ishit kanchikma, vlhtobvt in tmaha holihta puta, micha in chuka puta ish aiashakmvt,

2. Ish ai asha chi ho chin Chitokaka Chihowah yvt chima ka chi yakni iklvna tmaha holihta tuchina ho ish ilai atokola hi oke.

3. Hina ish ilai ikba hi oke: micha chi yakni aivhli ish aiasha chi ho, chin Chitokaka Chihowah yvt chima tuk a kvshkoa tuchina ho ish ita kvshkola hi oke: yohmikma hatak bika vbi puta kv ymmak o pit malela hi oke.

4. Hatak vbi vt okchaya chi hosh ymma pit maleli kv yakohma hi oke: Kvna hosh ik akostinincho hosh, ymmak oka chashpo ka i nukkilli chatuk keyu hosh, chuka a bilika hatak o vbi;

5. Yohmi kv hatak osh chuka a bilika hatak o ita tuklo cha iti chanla chi hosh iti anukaka ya itonachi mvt, iti chan-

lit kinvffa chī hosh, iskifa ya ibbak ishit fahama na, noshko-bo vt vpi ya shufa cha, chuka a bilika hatak ash onvtola na, illi; yohmikma tmaha holihta ilvppa puta ai achvfa ka malelit ona cha, okchaya hi oke.

6. Issish hlatapa tuk a il aiokha hvt chukvsh lvshpa. moma hosh, hina vt falaia ha tuk o, hatak vbi yash hliolit sakki cha, vbi yoba na, chashpo i nukkilli ha tuk keyu hokvt, illa he vlhpesa keyu kia,

7. Yvmohmi hoka tmaha holihta tuchina ho ila filvmmi-chit ish atokola chī ka chī miha lishke.

8. Atuk o chin Chitokaka Chihowah yvt chiki vhleha ha anumpa kvllo il onochit im issa tuk mak osh, chim aivhli ya chitoli cha, chiki vhleha ha im issa tok yakni moma ka chimakma,

9. Um anumpa puta ilvppa himak nitak a chim ahanchi li ka holitoblit ish yvmihinchit, chin Chitokaka Chihowah ya ish holitobli cha, i hina puta ka ish anohowa na biliak-mvt: tuchina ilvppak ash, himakma tmaha holihta tuchina ho ish il ibafohkashke,

10. Yvmohmi ho chī yakni ya chimmi ha chī ho chin Chitokaka Chihowah yvt chima tok a, nan ashvchi keyu issish vt ik ahlatapo kashke: micha yohmi ho issish vt ik chī onvtolo kashke.

11. Yohmi kia hatak nana hosh chuka a bilika hatak a i nukkilli cha, im aiehchit itonla tuk osh, i sanalit wakaya cha, isht illa he vlhpesa ho fahama na, illi ma, malelit tmaha holihta ilvppa puta kash achvfa ka onakma:

12. Yohmikma in tmaha holihta im asvnonchi vhleha hvt pit hoyot, ont ishtvla cha, issish hlatapa tuk a aiokha ya ibbak fohkashke, yohmi na illashke.

13. Chi nishkin vt ik i nukhaklo kashke; amba nan ok-pvni keyu issish hlatvbi ya Israel a ai ishit ish kanchashke, yvmohmi ho aivlhpesvt chī mahayashke.

14. Yakni a binilit ish iesha chī chin Chitokaka Chihowah yvt chima tok, chī yakni ya chin chuka abilika i yakni vlhpisa, yvmvmt nitak chashpo ma, a hilechi ha tok a ish kanvllicha he keyu.

15. Witnes achvfa hokvt hatak osh yoshuba tok, keyukmvt nan ashvchi tuk nan ashvchi nana ho ashvchi tuk a i sanalit hikia he keyu; witnes tuklo nana itih ho keyukmvt, witnes tuchina nana itih hok mak o nana kv̄t isht aiaħla hi oke.

16. Witnes ik aħlo yosh hatak nana kia i sanalit nan ik achukmo anola chi hōsh wakayvt hikiakma;

17. Yohmikma hatak ita chowa kash osh ita tuklo hosh Chihowah itikba, na holitompa isht asha, micha nan apesa vħleha aiena kv̄t nitak yv̄mma aiasha tuk a itikba hielā hi oke.

18. Mikma nan apesa vħleha hv̄t achukmalit asilhhv̄cha hi oke: a tuk o, yakeh, witnes vt witnes ik aħlo yosh anum- pa ik aħlo ya itibapishi ħa isht i sanalit anoli tukma,

19. Yohmikma itibapishi ħa nana yvmihcha he im anuk- fila tuk a ilap ak o chohmit ish yvmihcha hi oke: yohmi hosh a hv̄ch iti takla ya nan ik achukmo ka isht ish kancha hi oke.

20. Mikma ĩnla aiasha yvt ħaklo cha, nukshopakmvt, himmakma nan ik achukmo yohmi ka a hv̄ch iti takla ya ik yvmihcho kashke.

21. Micha chi nishkin vt ik i nukħaklo kashke: amba im ilħfiopak atukma im ilħfiopak ashke, nishkin atukma nishkin ashke, noti yatukma noti yashke, ibbak atukma ib- bak ashke, iyi yatukma iyi yashke. (achi tok)

CHAPTA XX.

TANAMPIT kohchvt ish ia tuk osh, issuba puta, micha tenvp iti chunaha puta, micha okla laua kv̄t chi shahli ho, ish pisakmvt chik i nukshopo kashke: chin Chitokaka Chihowah (yv̄mmak) osh Echip yakni ya apehlichit chi koh- chi tok vt chiba foyuka hoka.

2. Atukma yakohma hi oke; itibit bilika hv̄sh onakma, naholitompa isht vtta yvt bilika onvt okla ħa im anumpula hi oke.

3. Micha Israel ma, hvsh haklashke; himak nitak a hvchin tnvvp a hvsh itiba chi hosh bilika hvsh onashke: hvchi chukvsh vt ik ello kashke; hvchi nukshopa na, micha hvchi wvnihinchi na, micha yvmma pulla kak o ik hvchi nukhla-kancho kashke.

4. Hvchin Chitokaka Chihowah ak osh hvchin tnvvp a hvchim itibit, hvchi okchalinya chi hosh hvchi awant ia hoka im acha hi oke.

5. Mikma nan vlhtoka vhleha hvt okla ha im anumpulit, Hatak nanta hosh chuka himmona ikbi tuk osh ik hullocho kisha cho? falamvt in chuka iashke: keyukmvt itin tanampi kvt illi na, hatak inla hosh hullochi na.

6. Mikma hatak nanta hosh pakvpi a hollokchi ya hokchi tuk osh waya ka ik aiapo kisha cho? yvmmak okvt falamvt in chuka iashke, keyukmvt itin tanampi kvt illi na, hatak inla hosh ai vpa na.

7. Mikma hatak nanta hosh ohoyo itim vlhpoa tuk osh, ik esho kisha tuk oh cho? yvmmak okvt falamvt in chuka iashke, keyukmvt itin tanampi kvt illi na, hatak inla hosh ishi na, achashke.

8. Mikmvt vlhtoka vhleha hvt achakalichit okla ha im anumpulit, Hatak nanta hosh nukshopa, micha chukvsh elli cho? yvmmak okvt falamvt in chuka iashke, keyukma chukvsh elli ka chohmit itibapishi vhleha hvt chukvsh elli na, acha hi oke.

9. Atukma yakohma hi oke, nan vlhtoka vhleha hvt okla ha im anumpulit ont tahlikmvt, okla ha pehlicha chi ka tvshka chipota i kapotvni vhleha okla atokola hi oke.

10. Tvmaha holihta ish itiba chi hosh bilika ish onakmvt iti nanaiya anumpa ish im anumpula hi oke,

11. Atukma yakohma hi oke, iti nanaiya anumpa falama chima cha, chin tiwikma, yohmikma yakohma hi oke, yvmma aiasha tuk okla moma kvt chi nutaka cha, chin toksula hi oke.

12. Amba chiti nanaiya he keyukma, amba chin tanampi pulla kak o ahnikma, abinachit ish apakfoyupa hi oke.

13. Atuk o chin Chitokaka Chihowah yvt chibbak foh-

kikma, nakni yvma moma ka bvshpo falaia ishit fahamvt ish kanchashke.

14. Amba ohoyo micha vlla, micha nan vllpoba, micha nana hosh tvmaha holihta ya aiasha kv̄t moma, na wehpoa puta moma fehna ka ish isha hi oke; chin t̄vnp v̄hleha i na wehpoa yvmmak oka chin Chitokaka Chihowah yvt chima tuk oka, ish ai vpa hi oke.

15. Ilvppak o tvmaha holihta chi hopaki fehna puta oklushi ilvppak inli in tvmaha holihta aiachvfa keyu puta ka ish yvmihchashke.

16. Amba okla ilvppa in tvmaha holihta puta chi yakni ya chi ka, chin Chitokaka Chihowah yvt chima tok ano, nana hosh fiopa kv̄t ashakma ish okchalincha he keyu hoke.

17. Amba ishit kanchit ish vmohmicha hi oke: yvmmvt Hittait, micha Amolait, micha Kananait, micha Pelissait, Hifait, micha Chebusait aiena ka, chin Chitokaka Chihowah yvt chi miha tuk mak o ish yvmihcha hi oke.

18. Yvmohmi hosh nan ashvchi ishit yuwala i naholbvt toba i yvmihchi chatuk vt ik hvchik hanancho ho: yohmikmvt hvchin Chitokaka Chihowah ya hvchik i yoshobo kashke.

19. Tvmaha holihta ya abinachit ish aiasha tok hopaki cha, in tanampit ish isha chi kv̄t, iti ya iskifa ishit chanlit ish okpvna he keyu, ish ai vpa hinla hokvt (osapa iti aiasha kv̄t hatak aiokchaya yoka:) abinanchit ish aiasha chanlit akakohlit isht ish i sanala he keyu hoke.

20. Peh iti ai vpa chatuk keyu puta ish ithana kak illa hosh okpvnit chanlit ish akakohla hi oke: tvmaha holihta yosh chin tanampikma, aiatukko holihta ish ikbi cha, ish im aiya hi oke. (achi tok.)

CHAPTA XXI.

YAKNI ish ai isha chi ho chin Chitokaka Chihowah yvt chima tok a achvfa hosh illi cha, osapa ai itonlv̄t haiakakma, micha kv̄na hosh vbi tuk a ik ithanokma,

2. Yohmikma chim asvnonchi vhleha, micha chi nan apesa vhleha aiena kv̄t kohchv̄t ia cha, illi itola kash hikīv̄t ia hosh tvmaha holihta puta apakfoypa kā onv̄t apesa hi oke.

3. Yohmikma yakohma hi oke, hatak illi yash et i bilika tvmaha holihta ak osh tvmaha holihta yv̄mma im asvnonchi vhleha fehna kv̄t wak tek himmita ish̄it toksv̄li chatuk keyu, micha ikunla abanv̄t nana shali chatuk keyu kā ish ashke.

4. Micha tvmaha holihta yv̄mma im asvnonchi vhleha hv̄t wak tek himmita yash oka akinafa okfa nana awaya keyu, micha ahollokchi keyu yō isht ona cha, wak tek himmita yash ikunla yā okfa yv̄mma a chanlit tv̄blashke.

5. Mikma na holitomp̄a isht asha vhleha, Lefai ushi vhleha hv̄t bilika onv̄t (yv̄mmak osh nan isht im ahanta he, micha hochifot aiokpahancha he, chin Chitokaka Chihowah yv̄t atokoli tok oka,) yv̄mmak ash im anumpa hō anumpa itachowa puta, micha isso tok moma aiena kā nana kv̄t v̄lhpesa hi oke.

6. Mikma tvmaha holihta hatak illi tuk et i bilika, yv̄mma im asvnonchi vhleha moma kv̄t okfa yv̄mma wak tek himmita noshkobo atv̄pa tuk ash paknaka yā ibbak ai achefa hi oke.

7. Micha afalaminchit, Issish ilv̄ppa pibbak ak osh hlatv̄bli tuk keyu, micha pi nishkin v̄t pisa tuk keyu.

8. Chihowah ma, chim okla Israel a falv̄mminchit ish chumpa tuk v̄t ish i nukh̄aklashke, micha chim okla Israel apehlich̄i a nan okpv̄ni tuk keyu issish hlatapa yā chik onoch̄o kashke, acha hi oke. Mikma issish hlatapa tuk v̄t i kashofa hi oke.

9. Yvmohmi hosh Chihowah itikba yā ai v̄lhpiesa ish yvmihinchikmv̄t, nan okpv̄ni tuk keyu issish hlatapa yā ish̄it ish kanchashke.

10. Hv̄chin tv̄nv̄p a in tanampit kohchv̄t ish ia tuk a, chin Chitokaka Chihowah yv̄t chibbak a fohki na, yukachit ish ishi tuk osh,

11. Atuk osh yuka vhleha hā ohoyo pisa ai okli kv̄t ibafoypa na, ish pisa cha, itauwaya chi bunnakmv̄t,

12. Yohmikmut ishit chin chuka isht ish ona hi oke; mikma noshkobo ha vmo cha, ibbak ushi akchush a vma hi oke.

13. Mikmut yuka i nafohka ya shufi cha, chin chuka ya ahantvt iki, micha ishki ya ishit yahaya na, hvshi achvfa vhpiesashke; atuk o i himmak a yo ish iba chukowa cha, i hatak ish tobakma, chi tekchi toba hi oke.

14. Atukma yakohma hi oke, chik ahnincho hokmut kanima ho ia brnnakma ik ia, ish im ahna hi oke; amba tvli holisso isht ish chumpa he keyu pulla; vhpoyak nan aivlbi ish ikba he keyu, ish hofahyali hatuk okvt.

15. Hatak osh tekchi in tuklo cha, achvfa kvv i holitopa mvt, achvfa kano ik ahnincho; atuk o holitopa yash osh, micha ik ahnincho yash osh ita tuklot vlla im ashakma, atuk o ik ahnincho ushi yash osh ushi vtta ahpi yokma,

16. Yohmikma yakohma hi oke, ushi vhleha nana im asha tuk vt imakmut holitopa ushi atuk a, ik ahnincho ushi ak osh vtta ahpi yo mvhli tuk a, tikba vtta ahpi ikba he keyu.

17. Amba ik ahnincho yash ushi ak o nan im asha moma kash osh kvshkoa tuklo ho ima cha, yvmmak osh vtta ahpi ya anolashke; yvmmak osh imi hlampko ishtia vmmona yokvt, vtta ahpi ai isha he vhpesa vt immi hoke.

18. Hatak osh ushi vt chukvsh ilapunla, micha anumpa i kobvffi shahli yosh im anta kvv, iki micha ishki im anumpa ha i haponakla he keyu, micha fvmmi kia, im anumpa ha haponakla he keyukma;

19. Yohmikma iki, micha ishki ita tuklo kvv halvllit ishi cha, aivtta holihta okhissa, micha in tmaha holihta im asvnonchi vhleha itikba ya isht im onashke.

20. Micha in tmaha holihta im asvnonchi vhleha, Piso ilvppvt chukvsh ilapunla, micha pim antia he keyu, pim anumpa ha im antia he keyushke, isikopa micha okishko shahli yoke, im acha hi oke.

21. Mikma in tmaha holihta hatak moma kvv tvli ishit boli na illa hi oke: yvmohmi hosh ahvchi iti takla nan ik achukmo ka ishit ish kanchashke, mikma Israel moma kvv haklokmvt nukshopashke.

22. Micha hatak vt isht illa he vhpesa ho nan ashvchi yvmihchi cha, illa chi vhpesa na, iti ish in takalichi tukma;

23. Nipi vt iti ya takali na ont onna he keyu, ik kaniohmi kia nitak yummak inli ho ish hohpi pullashke; (iti yo atakali hokvto Chitokaka a kallakshi hoka,) yvmohmi ho chi yakni ya chi ho chin Chitokaka Chihowah yvt chima tok vt ik liteho kashke, (achi tok.)

CHAPTA XXII.

CHITIBAPISHI i wak toksuli, keyukmut in chukfi vhpoea yvt kvnia na, ish pisakmut, i filvmmmit ish luma he keyu; ik kaniohmi kia falvmmminchit chitibapishi a isht ish im ona pullashke.

2. Atuk o chitibapishi hvt chi bilika keyu, keyukmut chik ithano yohmit, yvmohmikmut chin chuka isht ish ona na, chim ahanta tuk o, chitibapishi vt hoyot aya hi oke: mikma falvmmminchit ish ima hi oke.

3. Im issuba nashoba ya ish yvmihchikmut, i nafohka ya ish yvmihcha hi oke: micha na kvnia puta chitibapishi vt i kvnia tuk o ish ahayuchikmut ish yvmihchi ak inla hi oke, ish luma he keyu hoke.

4. Chitibapishi im issuba nashoba, keyukmut i wak toksuli hina takla aka itula tuk osh itonla na, ish pisa mut, i filvmmmit ish luma he keyu: yvmma apelvchit anonti ish wakayvchi pulla hi oke.

5. Ohoyo hvt hatak immi ha fohka he keyu, mikma hatak ak kia ohoyo i nafohka ya fohka he keyu hoke: yvmma yvmohmi moma kvt chin Chitokaka Chihowah nan isht yuwala yoka.

6. Hina takla iti hikia ho, keyukmut aka yo hushi im vhpichik vt chi tikba talaia yobakma, hofullichi yokma lubonchi yokma, nana ho ishki vt hofulli yash, keyukmut lubonchi on ashakma, ishki yo ushi aieninchit ish isha he keyu hoke.

7 Amba ik kaniohmi kia ishki ya ish hikvchi cha, ushi

ya ish isha hi oke: yvmohmi hosh chim achukma cha, chi nitak a ish falaiahashke.

8. Chuka himona yo ish ikbikmvt, chin chuka paknaka ya aholihta ish ikbashke: yvmohmi ho hatak nana kia yvma aka ont itula ma, issish a chin chuka ya isht chik onochi pullashke,

9. Pakupi chim ahollokchi ya na nihi ilaiyukali ho ish ahokcha he keyu: ish yohmi na, chi na nihi ish hokchi tuk waya kut, micha pakupi chim ahollokchi a waya kut ik achukmo na.

10. Wak toksuli ya issuba nashoba itapotolit yakni ish patvfficha he keyu hoke.

11. Nafohka ilaiyukali chukfi hishi tvnna, micha linen chohmi ka himona achvfa ish fohka he keyu hoke.

12. Chim anchi ya ish il anchi vt chukbi ushta ka i poshota ish ikbashke.

13. Hatak kva hosh ohoyo itauwaya tuk osh iba chukowa mvt shitilema,

14. Michi na mihachit isht anumpula he anumpa onochit anumpa ik achukmo ka hohchifo ha onochi cha, Ohoyo ilvppa ishi li tuk osh im ona li mvt, ohoyo himita keyu ha pisa lishke, achikma;

15. Mikma ohoyo hash iki, micha ishki ita tuklo kut ohoyo himita yvt hatak haleli yatuk keyu ishtatokowa ya tmaha holihta im asvnonchi vhleha ha isht im onvt holihta okhissa ya isht im onashke.

16. Mikmvt ohoyo himita iki vt im asvnonchi vhleha ha, Svso tek vt hatak ilvppa tekchi ya chi ho ima li tuk ak o shitilemvshke.

17. Michi yakeh, na mihachit isht anumpula he anumpa: onochit, chiso tek vt ohoyo himita ya tuk keyu ho pisa lishke, achishke; atuk o, yohmi kia svso tek vt hatak haleli ya tuk keyu isht otvni ilvppak oke, achashke. Mikmvt tmaha holihta im asvnonchi vhleha itikba ya nantvna yash patalashke.

18. Mikma tmaha holihta yvmma im asvnonchi vhleha hash osh hatak yvmmak ash ishi cha na hotopa onocha hi oke.

19. Micha tuli hvta shekel tahlepa achvfa ho i hoyo cha, ohoyo himita yash iki ya imashke: Israel ohoyo himita hatak haleli keyu ho hohchifo ik achukmo onochi hokvt; mikma tekchi yashke; okchayvt ahanta nitak takla kvk kancha he keyu.

20. Amba nana ilupptv ahli ha tuk ma, atuk o ohoyo himita vt hatak haleli ya tuk keyu isht atokowa vt ik im ikshokma,

21. Yohmikma ohoyo himita yash iki in chuka okhissa ya isht onakma, in tmaha holihta yash hatak vhleha hvv tuli ishit boli na, illashke; iki in chuka ya havi tovvv ahanta cha, Israel i yakni ya nana makali ya yvmihchi hokvt: yvmohmi hosh nan ik achukmo ka hvch itin takla ai ishit ish kanchashke.

22. Hatak vt ohoyo i hatak asha yo iba tvshki na, pisakma, ita tuklo hosh illashke; ohoyo iba tvshki tuk hatak ash: micha ohoyo hash ita tuklot illashke: yohmi hosh nan ik achukmo ya Israel a ai ishit ish kanchashke.

23. Ohoyo himita hatak haleli keyu hosh hatak im vlvpoa tuk osh tmaha holihta anta na, hatak vt pisa cha, iba tvshki tukma;

24. Yohmikma kohchit tmaha holihta, okhissa yvmma ita tuklo ka ishit hvsh ona cha, tuli ishit boli na, illashke; ohoyo hvv tmaha holihta anta hok akosh ik payo tuk okvt: mikma hatak vt in chuka a bilika hatak tekchi ya hofahyali hokvt: yvmohmi hosh nan ik achukmo ka hvch iti takla ya ai ishit ish kanchashke.

25. Amba hatak vt ohoyo himita yosh inla im vlvpoa yosh osapa anta na, ahayuchi cha, ai issvt iba tvshkikmvt, hatak ash illa hosh illa hi oke.

26. Amba ohoyo himita ano nana ish kaniohmicha he keyu; ohoyo himita vt nan ashvchi isht illa he vlvpesa kvv atokoli keyu hoke: hatak osh in chuka a bilika hatak a i saneli cha, hikia cha, vbi chatuk a nana iluppa yvmmak inli chohmi hoka.

27. Osapa anta na pisa ma, inla im vlvpoa ohoyo himita kash osh paya tuk, mihma hlakoficha he vt iksho tuk oka.

28. Hatak osh ohoyo himita hatak haleli keyu hosh inla im vlhpoa keyu hō pisa mvt, hoklit ishi cha, iba tvshki tuk osh haiakakma,

29. Yohmikma iba tvshki tuk hatak ash osh ohoyo himita iki ya tuk shekel pokoli tahlapi hō imakma, tekchi ya hi oke, hofahyali tuk okvt, okchayvt ahanta kv̄t kancha he keyu hoke.

30. Hatak okvt iki tekchi ya isha he keyu, micha iki im anchi a wakumma he keyu hoke. (achi tok)

CHAPTA XXIII.

TULI i kuhla, keyukmvt im a lumaka tupa yokvt Chihowah im okla moma itvnaha ka iba chukowa he keyu hoke.

2. Iki iksho vt Chihowah im okla moma itvnaha ka iba chukowa he keyu hoke; ai iti shali ont ishit pokoli ont vhli takla kv̄t Chihowah im okla moma itvnaha ka iba chukowa he keyu hoke.

3. Ammonait, keyukmvt Moabait vt Chihowah im okla moma itvnaha ka iba chukowa he keyu; ai iti shali ont ishit pokoli ont vhli takla hokvt Chihowah im okla moma itvnaha ka ik iba chukowo bilia hi oke.

4. Echip a kohchvt hvsh minti ma hina takla ya pvska micha oka aiena isht ik hvchi afamo tok oka; micha Mesopotamia Pehlu, minti Beo ushi Balaam vt kallakshichi anumpa hvchi onocha chi hō tohno tok okvt.

5. Yohmi kia chin Chitokaka Chihowah yvt Balaam a i haponakla he keyu tok; amba chin Chitokaka Chihowah yvt chi holitobli hatuk okvt anumpa hallakshichi yash filimmit na yukpali chim ikbi tok.

6. Chi okchaya nitak moma ka im iti nanaiya, micha nana kv̄t im aiahli achukmvt mahaya he a chik i hohoyo hō bilia hi oke.

7. Etomait a ish shitilema he keyu, chitibapishi hoka; Echip okla ha ish shitilema he keyu, hatak ik ithano yosh i yakni a ish aiasha tok okvt.

8. Yummak o vlla a toba hokvto ai iti shali ont atuchinakmvt, Chihowah im okla moma itvnaha ka iba chukowa hi oke.

9. Tvshka chipota in tunvp a itibit ish iakma, nana okpu-lo moma ka chik ahalaiyo kashke.

10. Hatak kvna kia hvch itin takla ya na liteha ninak a yohmi yoba cha, litihakmvt binah ha kohcha ia hi oke, binah anukaka ya ant ikchukowo ka hi oke.

11. Yohmi tuk kia yakohma hi oke, opivt tahakma, oka isht il achefa hi oke; atuk osh hvshi vt okatulakma anonti binah ha ant chukowashke.

12. Micha binah kohcha ya ai vtta vt chin talaia cha, yummak o kohchvt ish onashke,

13. Micha chi na haluppa ha patvssa ish aienchashke: atuk osh yakohma hi oke: kohchvt ish ia cha, ish ile nukta-lala chikmvt, yakni isht ish kullashke; atukmvt ish filema cha, chi a kohcha kash ish ompohomashke.

14. Chin Chitokaka Chihowah yvt chi okchalincha chi hosh, micha chi tikba chin tunvp a a chim issa chi hosh, hvch itin takla chi binah anohowa hoka; yvmohmi hoka chi binah hvt kashofashke; yvmohmi ho naliteha hvt chi a takali na, ik peso hosh chi filvmmmit ik aiyo kashke.

15. Tishu hvt impushnayo ya i maleli cha, chim vvlakma, falvmminchit impushnayo ibbak a ish fohka he keyu.

16. Chi takla ahanta hi oke, hvch itin takla kanima ho atokolikmvt chi holihta okhissa puta achvfa kanima ho ahnikmvt, yvmma fehna ak a hi oke; ish ilbvshala he keyu hoke.

17. Israel ushetik vhleha ha hauit iksho kashke, micha Israel ushi vhleha Sotomait vt iksho kashke.

18. Anumpa il onochi ya haui isht vlhtoba, keyukmvt ofi isht vlhtoba ya chin Chitokaka Chihowah im aboha ya isht ish ona he keyu; ilvppa ita tuklo kvv chin Chitokaka Chihowah ishit yuwala yoka.

19. Chitibapishi nana ish im pota kvv chelichi ish i hoya he keyu, tvli holisso chelichi, ilhpak chelichi, micha nana hoh kia chelicha chi hosh im pota ya chelichi a ish i hoya he keyu.

20. Okla inla hano impotvt ish chelicha hinla hoke: amba chitibapishi hano impotvt ish chelicha he keyu: yvmoh-mi hō yakni ish isha chī hosh ishia kv̄t yv̄mma ish ai ashvt nana ho chibbak isht ish ishi moma k̄a chin Chitokaka Chihowah yvt na chiyukpalashke.

21. Chin Chitokaka Chihowah yā anumpa ilonochi ish im ilonochi tukmvt, atobbi kv̄t ish sulaha he keyu; chin Chitokaka Chihowah yvt chī hoyo pulla hi oka, micha na ish ashvchi yā hinla hoke.

22. Amba anumpa ilonochi chik ilonocho tuk okm̄vno na ish ashvcha he keyu hoke.

23. Nana kv̄t chitih h̄a a kohcha tuk a ilap ahnit im issa fehna k̄a, chin Chitokaka Chihowah anumpa ish im ilonochi tuk vt chitih h̄a mihvt isht ish im issa tuk a holitoblit ish ai ahlichā hi oke.

24. Chin chuka a bilika i pak̄vpi ahollokchi ish onakmvt, chishnō ish ahni hosh pak̄i v̄pvt chi kaiyashke: yohmi kia nana chim aivlhto yā ish apitta he keyu hoke.

25. Chin chuka abilika im onush hikia yā ish iba chukowakmvt, noshkobo yā chibbak isht ish tv̄ptulashke: yohmi kia chin chuka abilika hatak im onush hikia yā ishit bv̄sha yā ish o wiela he keyu hoke. (achi tok.)

CHAPTA XXIV.

HATAK osh ohoyo ishi cha, itauwaya tuk osh, atuk osh yakohmikma, aliteha kaniohmi kia takali ha tuk a ahayuchi cha, ik ahninchokmvt, yohmikmvt iti mokofa holisso yō i holissochit ibbak fohki cha, in chuka yā kohchichashke.

2. Atuk o in chuka yā kohchvt iakmvt, hatak inla tekchi toba hinla ak inli hoke.

3. Atuk o i hatak ishtaiopi kash osh shitilema mvt, iti mokofa holisso i holissochit ibbak fohki cha, in chuka yā kohchit chv̄ffichikma, keyukmvt i hatak ishtaiopi vt tekchi ya chī hosh ishi kash osh illikma;

4. I hatak tikba chvffichi tok vt anonti tekchi ya chi ho liteha ha ya hokuno isha he keyu: yummak okvt Chihowah itikba ya nan ishit yuwala yoka: mikma chi yakni ya chi ho chin Chitokaka Chihowah yvt chima tok a ish yoshobli-cha he keyu.

5. Hatak vt tekchi himonna yo ishi tukmut kolchvt ta-nampit ia he keyu, micha anumpa nana kia vltokoha he keyu: nana atakluma ikshot afummit in chuka ahanta cha, tekchi ishi tuk vt yupalashke.

6. Hatak nana kia tanchi afotoha nutaka itola, keyukmut paknaka itola ish atonichit isha he keyu, hatak im ilhfiopak o isht atonichi ha hinla ishi hokvt.

7. Hatak osh itibapishi vhleha Israel im vlla vhleha aichvfa yo hukopvt na knia ikbi, keyukmut kanchi, yohmikmut hukopa yummvt illashke, micha nana ik achukmo ka a hvch iti takla ya ai ishit ish kanchashke.

8. Leplosi ililli okpulo ya ahah ish ahnashke, micha naholitompa isht asha vhleha Lefait vhleha hvvt nana moma ka hvchim avvchi tuk mak o, achukmalit ithaiyanvt ish yumi-chashke: yummak ash o i miha li tuk mak o ithaiyanvt ish yumi-chashke.

9. Echip a kohchvt ish minti ha ya hina takla chin Chitokaka Chihowah yvt Miliam a kaniohmichi tok a ish ithai-yanashke.

10. Chitibapishi ha nan ish impota tuk vt isht atonichi ya im aboha ont chukowvt ish isha he keyu.

11. Kocha ish hikia na, ish impota, kash hatak ak osh isht atonichi ya kohchvt kocha ya isht chim vla hi oke.

12. Michi hatak ash osh ilbvsha yokma, nan isht atonichi yash ishit chi nusa he keyu hoke.

13. Ik kaniohmi kia nan isht atonichi yash hvshi vt okatulkama, anonti ish imashke; yumohmi ho im anchi ak inli ho anchit nusa hinla cha, anumpa yukpali chi onuchashke; mikma chin Chitokaka Chihowah itikba ya isht ai vllhpiesa yvt chim vllhpisashke,

14. Ilhtohnno tishu vhleha hvvt chitibapishi vhleha immi yosh keyukmut, okla inla immi yosh chi holihta okhissa

anukaka chi hikia yut nan ik im iksho hosh ilbushakma ish ilbushala he keyu hoke.

15. Nitak ont im vlhpesakma asitubi tuk a ish ima hi oke; micha hvshi vt ont okatula he keyu, ilbusha hatuk osh chukvsh vt onvtoyula hoka, keyukma chi sanalit Chihowah pit i pahaya na, nan ashvchi chin toba na.

16. Ulla vhleha ya tuk mak o, iki vhleha hv illa he keyu, mikma iki vhleha hatuk mak o, ushi vhleha hv illa he keyu ak inli; hatak puta kv ilap nan ashvchi tuk mak osh illa he.

17. Okla inla micha vlla vlhtakla iki iksho aiena ka ai vlhpiesa i yvmihchi ka ish shanaiyvcha he keyu; micha ohoyo vlhtakla i nafohka ya isht atonichi ish im isha he keyu hoke.

18. Amba Echip a hatak yuka hosh hvsh aiasha tuk o chin Chitokaka Chihowah yut falvmminchit chumpvt yvmak o chi kohchi tok o ish ithaiyanashke; yvmohmi ha tuk o nana ilvppa ish yvmihcha chi ho chi miha lishke.

19. Chim osapa ya na waya bvshlit ish akvchi tuk osh, sita achvfa ka chim ahaksi na, osapa itoula tukma, hoyot chik aiyo kashke; okla inla vlla iki illi, micha ohoyo vlhtakla aiena kak o immi ha hi oke: yvmohmi ho nana moma chibbak vt toksulikma chin Chitokaka Chihowah chi yukpa lashke.

20. Chim alif iti ya ish bolikmvt, anonti naksish a vlbitelit ish bola he keyu; okla inla vlla iki illi, micha ohoyo vlhtakla aiena kak o immi ha hi oke.

21. Pakvpi chim ahollokechi paki ish aivmokmvt, himmakma ish vlbulla he keyu; okla inla vlla iki illi, micha ohoyo vlhtakla aiena kak o immi ha hi oke.

22. Micha Echip yakui ya hatak yuka hosh hvsh aiasha tuk vt, hvsh ithaiyanashke: yvmohmi ha tuk osh nana ilvppa hvsh yvmihcha he ya hvchi miha lishke (achi tok.)

CAPTA XXV.

HATAK vt anumpa itachowa nan apesa vhleha hvt nan im apesa chi hō, nan ai vlhpisa ya vlakma, aivlhpiesa yano i kashofi cha, yoshuba tuk a anumpa onucha hi oke.

2. Atukma yakohma hi oke, hatak yoshuba tuk vt boa he vlhpesakma, pisa hō ishtakanumi tuk a itvlhpisa hō holhtina kaniohmi kv̄t aka itola cha, onvtola chi k̄a nan apesa vt apesashke.

3. Fahama pokoli ushta hō ima hinla; micha vbanvpa he keyu; keyukma ilvppa vbanvblichit fahama laua ishit boli hokma, chitibapishi hvt nan isht ik chim ahobo na.

4. Waktoksvli vt onush a nihechikma, ibichilu fohka ish fohka he keyu.

5. Itibapishi vhleha hvt itapihvt asha tuk o, achvfa kv̄t illi mvt, vlla ik im ikshokma illi yash tekchi ya tuk vt nak-sika hatak inla yō auwaya he keyu; i hatak itibapishi ak osh iba chukowvt itauwaya cha, i hatak itibapishi nana akaniohma he vlhpesa kak o i yvmihchashke.

6. Atukma yakohma hi oke; vta ahpi ishikma itibapishi hohchifo illi tuk a vlhtobvt hikiashke: yvmohmi hō hohchifo kv̄t Israel a ik mosholo kashke.

7. Atuk o hatak ash osh itibapishi tekchi yash ishi ik-bvnnokma, yohmikma itibapishi tekchi vt holihta okhissa ya onvt im asvnonchi vhleha h̄a im ona cha, A hatak itibapishi hvt itibapishi hohchifo h̄a ikbit Israel a ai i hilechi ik bvn-noshke; a hatak itibapishi nana akaniohma he vlhpesa k̄a yvmihchi ik bvn-noshke, achashke.

8. Yohmikma in tvnaha holihta im asvnonchi vhleha hvt hoyo cha, im anumpulashke; mikma kv̄llot hikia cha, ishi ik sa bvn-noshke, achikma,

9. Yohmikma itibapishi tekchi ash osh im asvnonchi ai itin takla hō bilika ona cha, iyi shulush honlo tuk a i shufi cha, nashuka ya on tofashke, micha afalaminchit, Itibapishi

ha chuka ikbit i hilechi ik bunno yano, hatak a yakohmi-chashke achashke.

10. Mikma hohchifo kut Israel a; shulush i shufa in chuka, achashke.

11. Hatak vt ita pakshuvut asha ma, achufa kash tekchi vt i hatak isso ka ibbak a ahlakoficha chi hosh bilika ona cha, ibbak pit weli mut, obvlh takla ya isht ishikma,

12. Yohmikma ibbak a ish tvblashke; chi nishkin vt i nukhakla he keyu.

13. Chi bahta ya ishit weki itaiyukali chito, micha iskitini vt ik chi fohko kashke.

14. Chim aboha ya isht vlhpisa ilaiyukali, chito, micha iskitini aiena kut chim aiasha keyu kashke.

15. Amba nan isht weki ahli, micha aivlhpiesa yo, micha nan isht vlhpisa ahli, micha aivlhpiesa yosh chim aiashashke, micha yvmohmi hosh nitak chi falaivt chin Chitokaka Chihowah yvt yakni chima tok a hvsh aiashashke.

16. Nana yakohmi ka yvmihchi moma kut, micha aivlhpiesa keyu yvmihchi moma kut chin Chitokaka Chihowah nan isht yuwala yoka.

17. Echip a kohchvt ish minti ma, hina takla ya Amalek vt chi kaniohmichi tok a ish ithaiyanashke.

18. Hina takla yash chi afama cha, olbul aya ya, olbul aya ik kvlllo fehna moma ka chi hoyvblit chi kota ma, chi fahama tok; micha Chitokaka ya ik i nukshopo tok.

19. Yvmohmi hoka yakohma hi oke, yakni yash a binilit ish iesha chi ho chin Chitokaka Chihowah yvt chima tok a, chin tvnvp puta fullota ka chin Chitokaka Chihowah yvt chi fohvchikma, shutik nutaka ya Amalek isht ithana ya kashofit ish kanchashke, ik chim ahakso kashke. (achi tok.)

CHAPTA XXVI.

ATUKMA yakohma hi oke, chi yakni ya chi ho chin Chitokaka Chihowah yvt yakni chima tok a ish ona cha, yvmmak o abinilit ish aiashakmut,

2. Yakni awaya ummona moma chi yakni chin Chitokaka Chihowah yvt chima tok a ish ai ishi cha isht ayvt, kishi ish fohkikmut, kanima ho chin Chitokaka Chihowah yvt aiato-kolit hohchifo ha a bohla he ahnikma, yumma isht ish onashke.

3. Micha naholitompa isht utta vt nitak yumma anta tuk a im ona cha, Himak nitak a Chihowah yvt yakni pima chi hosh piki vhleha ha anumpa kullo il im onochi tok a vla li kv, chin Chitokaka Chihowah ya im anohonli lishke, ish im acha hi oke.

4. Mihma naholitompa isht utta yvt kishi chibbak fohka kash ishi cha chin Chitokaka Chihowah im alta itikba ya talala hi oke.

5. Mikma chin Chitokaka Chihowah itikba ya ish anum-pulit, Aki vt Silian illa hosi a tok; atuk osh kanomosi hosh aittpehvt Echip a ona cha, yummak o aiasha tok, micha yummak o aiashvt oklushi chito, kullo, micha laua aiena toba tok.

6. Mihma Echip okla hut na ik achukmo ka pi yumih-chit, pilbvshali cha, yuka kullo pi onuchi tok.

7. Mihma piki vhleha in Chitokaka Chihowah ya il i pa-haya ma, Chihowah yvt pi haponaklo mut, pilbvsha ka, mi-cha pim atoksvli ka, micha pissikkopali ka pihisa tok.

8. Micha Chihowah yvt ibbak kullo hosh, micha shakba ashatapa hosh, micha palvmmi chito hosh micha nan ishta-tokowa, micha na fehna yumihinchit pi pehlichit Echip a kohchi tok.

9. Atuk osh ilvppa pisht vlshke, micha yakni ilvppa, yakni pishukchi, micha foe-bila aiena kvt ayanahanli ilvppa fehna ka pimvshke.

10. Atuk o himak a yakeh, Chihowah ma, is suma tok a yakni yash awaya ummona ka isht chim vla lishke, ish acha hi oke; micha chin Chitokaka Chihowah itikba ya ish tala-lashke, micha chin Chitokaka Chihowah itikba ya ish ai-okpvchashke.

11. Micha nana achukma puta chin Chitokaka Chihowah yvt chima tok a micha chin chuka achvfa, chishno, micha

Lefait, micha okla ik ithano chi takla aiasha ka ima tuk a isht ish aiypukpashke,

12. Afummi ont isht atuchina yumniak osh ishit pokoli ishi afummi hoka, na chi waya ishit pokoli moma ka ishit pokoli ya apesut chim vlhtaha cha, chi holihta okhissa anukaka ya impvt kaiyvt aiasha chi ka Lefait, okla inla, vlla iki illi, micha ohoyo vlhtakla aiena ka ish emakmut,

13. Yohmikmut chin Chitokaka Chihowah itikba ya, Na hullochi yash an chuka ya ishit kohcha lishke, micha chim anumpa moma is sum apihisa tuk mak o, Lefait, micha okla inla, vlla iki illi, micha ohoyo vlhtakla aiena ka ima lishke; chim anumpa ha ak vbanvbloshke, micha ik sumahakoshke,

14. Yaya li moma kut ak po tuk oke; micha nana achvfa kia na liteha isht ikbi li tuk keyu, micha nana achvfa kia illi ya ima li tuk keyu hoke; amba an Chitokaka Chihowah im anumpa ha haiyaklo li mut, nana is sum apesa tuk moma ka yumihchi li tuk oke.

15. Ish aiahanta holitopa, vba. aholitopa ya binilit aka et ish hopokoyashke, micha chim okla Israel, micha yakni ilvppa piki vhleha ha anumpa kullo ish im ilonochi tok mak osh, yakni pishukchi micha foe-bila aiena kut ayanahanli ya ish pima tok vt na yukpali ish onochashke, ish achashke.

16. Himak nitak a nanvlhpisa bilia, micha aivlhpiesa ish yumihinch chi ho, chin Chitokaka Chihowah yvt chim apesvshke; yumohmi hoka chukvsh aiokluhvt, micha chimi shilombish aiokluhvt ieshit ish yumihinchashke.

17. Himak nitak a Chihowah ak osh chin Chitokaka ya chi, micha i hina ak o ish ai itynowa chi, micha i nanvlhpisa bilia, micha im anumpa micha aivlhpiesa yumihinchi aiena ka ish iesha chi, micha im anumpa ha ish i haponakla chi, ahli hosh ish mihvshke.

18. Mikma mihvt chim issa tok mak osh himak nitak a, Chihowah yvt im okla ila chia ha chi ho ahli hosh mihvshke; mikma im anumpa moma ka holitoblit ish ieshikma;

19. Anumpuli tuk mak osh, chi chahvchit, ahninchit isht anumpuli ya micha hohchifo ha, micha holitopvt vmmona ka, oklushi puta moma ka yummak oka ikbi tok vt i shahle-

chi ya chishno ak o chi ihikbi ha tuk oke; yvmohmi ho chin Chitokaka Chihowah ya okla i holitopa chia ha chi ha tok, im ahanchi tok.

CHAPTA XXVII.

MICHA Moses vt Israel im asvnonchi vhleha aienvt okla ha im anumpulit, Anumpa moma himak nitak a hvchim anumpohonli li ka hvsh ieshashke.

2. Atuk osh yakohma hi oke, Chatan a vbanvblit chin Chitokaka Chihowah yvt yakni chima tok a hvsh ona, nitak mvt, tvi hochito ish hiohlichy cha, isht vhlpolosa ya isht ish apoluslashke.

3. Micha chiki vhleha in Chitokaka Chihowah yvt mihvt im issa tuk mak osh, chin Chitokaka Chihowah yvt yakni chima tok; yvmvt yakni pishukchi, micha foe-bila aiena kvv ayanahanli ya ish chukowa chi hosh ish vbanvblikmvt, nan vhlpisa ilvppa moma anumpa ha ish ai o holissochashke.

4. Yvmohmi hoka yakohma hi oke: Chatan a hvsh vbanvblikmvt, himak nitak a Ebal nvniha a hvchi miha li ka, tvi puta ilvppa hvsh hiohlichy cha, isht vhlpolosa isht ish apoluslashke.

5. Micha yvmmak o chin Chitokaka Chihowah ya alta tvi alta yo ish im ikbashke; tvi ishit pilesa nana kia ish o wiela he keyu,

6. Chin Chitokaka Chihowah ya tvi kaniohmi tuk vt moma yo alta isht ish im ikbashke; micha hukmit im issa onochit chin Chitokaka Chihowah ya ish im issa hi oke,

7. Micha iti nanaiyvchit im issa ish im issakmvt, yvmmak o ish impa cha, chin Chitokaka Chihowah itikba ya na yukvt ish aiashashke.

8. Micha haiaka achukma fehna ho nan vhlpisa ilvppa anumpa moma ka tvi yash ish ai o holissochashke, im achi tok.

9. Mihmvt Moses micha naholitoblit isht asha, Lefait vhleha aiena kvv Israel moma ka im anumpulit, Ahah ish

ahni cha ish haklashke, Isra^{el} ma, Himak nitak a chin Chi-
tokaka Chihowah ya im okla ish tobvshke.

10. Yvmohmi hoka chin Chitokaka Chihowah im anum-
pa ha i haponaklot, im anumpa vlhpisa, micha nan vlhpisa
bil^{ia} himak nitak a chi miha li ka ish yvmihinchashke, achi
tok.

11. Micha Moses vt mih nitak ak inli ho okla atokolit i
mihvt,

12. Chatan hvsh vbanvbli tukma ilvppa puta, Simeon, Le-
fai, micha Chuta, micha Issaka, micha Chosif, micha Ben-
chamin aiena kak osh nvni^h Kelisim paknaka ya hie^{li} cha,
okla ha na yukpali anumpa onochashke,

13. Mikma ilvppa puta, L^uben, micha Kat, micha Asha,
micha Sebulun, Tan, micha Naftali aiena kak osh Ebal nvni^h
paknaka hie^{li} cha, kallakshichi anumpa onochashke,

14. Mihma Lefai vhleha hv^t Isra^{el} hatak vhleha moma ka
im anumpulit anumpa chitoli hosh,

15. Hatak nana hosh tvh^{li}t naholbv^t toba, keyukmv^t bilv^t
akm^{ot} naholbv^t toba, Chihowah nan isht yuwa^{la}, hatak nan
ikbi imponna ibbak osh atah^{li} yo ikbi cha, alumaka hile-
chikmv^t, kallakshashke: mikma okla moma kv^t, Amen,
achashke;

16. Kvna hosh i^{ki} keyukmv^t ishki ya ik ahobalokmv^t
kallakshashke, mikma okla moma kv^t, Amen, achashke.

17. Kvna hosh in chuka abilika hatak i yakni vlhpisa ya
kanvlichikmv^t, kallakshashke: mikma okla moma kv^t
Amen, achashke.

18. Kvna hosh nishkin l^upa ya i hina kohchichikmv^t kal-
lakshashke: mikma okla moma kv^t, Amen, achashke.

19. Kvna hosh okla inla, vlla i^{ki} illi, micha ohoyo vlh-
takla aiena nan im apesa kv^t shanaiyvchikmv^t, kallakshashke:
mikma okla moma kv^t, Amen, achashke.

20. Kvna hosh i^{ki} tekchi ya iba tvshki kv^t i^{ki} im anchi
ya wakvmmi hokv^t, kallakshashke; mikma okla moma kv^t,
Amen, achashke.

21. Kvna hosh vlhp^oa kaniohmi hoh kia iba tvshkikmv^t,
kallakshashke: mikma okla moma kv^t, Amen, achashke.

22. Kuna hosh in tek, iki ushetik, keyukmvt ishki ushetik a iba tvshkikmvt kallakshashke, mikma okla moma kv̄t, Amen, achashke.

23. Kuna hosh ipochi ohoyo iba tvshkikmvt kallakshashke: mikma okla moma kv̄t, Amen, achashke.

24. Kuna hosh in chuka abilika hatak a luma hosh fahamakmvt kallakshashke: mikma okla moma kv̄t, Amen, achashke.

25. Kuna hosh hatak nan okp̄ni keyu ho uba chi hosh nahabenakmvt kallakshashke; mikma okla moma kv̄t, Amen, achaske.

26. Kuna hosh nan vlhpisa ilvppa anumpa moma ka iakaiyvt ik yvmihchokmvt kallakshashke: mikma okla moma kv̄t, Amen, achashke. (achi tok)

CHAPTER XXVIII.

ATUKMA yakohma hi oke, chin Chitokaka Chihowah im anumpa ha achunanchit ish i haponaklo cha, im anumpa moma ka himak nitak a chi miha li ka ithaiyanvt ish yvmihinchikma, chin Chitokaka Chihowah yvt oklushi moma yakni paknaka ai asha ka i shahlechit a chaha ka chi binilicha hi oke.

2. Mikma chin Chitokaka Chihowah im anumpa ha ish i haponaklokma, na yukpali ilvppa puta moma kv̄t chi sakki cha chi onvtoyula hi oke.

3. Tumaha holihta ya na yukpvt a chi onvtoyula hi oke, osapa na yukpa vt chi onvtoyula hi oke,

4. Chi haknip a toba tuk, micha chi yakni a waya tuk, micha chi nanvlhpoba a waya tuk, micha chi wak tek a waya tuk, micha chin chukfi aya puta aiena kv̄t na yukpa hi oke.

5. Chi kishi micha tapvshi chim a yamvska yvt na yukpashke.

6. Ant ish chukowakmvt na chi yukpa hi oke, micha ish kohchakmvt na chi yukpa hi oke.

7. Chin tnvvp chi sanalit wakaya vhleha ha chin Chitokaka Chihowah yvt chi nashuka itikba akakohvcha hi oke; hina achvfa ho minti tuk kia, hina untuklo ho chi tikba yihlepa hi oke.

8. Chihowah yvt chima vllhpoyak ai itola chuka, micha nana ho chibbak a isht ish ishikma, na isht yukpali chi onucha hi oke; micha chin Chitokaka Chihowah yvt yakni a chima tok vt a chi yukpa la hi oke.

9. Chihowah yvt anumpa kullo chim ilonohonchi tok mak osh, chin Chitokaka ya im anumpa ish ieshi cha, i hina ya ish itanowakma, im okla i holitopa kullo hosh chikba hi oke.

10. Mikma okla moma yakni paknaka aiasha kvv Chihowah hohchifo ak o ishit chi hohchifo ka ithaiyana hi oke; micha chi nukshopa hi oke.

11. Yakni ya chima chi hosh chiki vhleha ha anumpa kullo im ilonochi tok vt, Chihowah yvt chim vllhpoyak, chi haknip a toba, micha chi nan vllhpoba a waya, micha chi yakni a waya aiena ka a chi lauacha hi oke.

12. Chihowah yvt im vllhpoyak achukma vba ya chin tiwi cha, ont ai vllhpiesakma, yakni ya chim umbvcha he, micha chibbak nan toksahanli tuk moma ka na chi yukpala hi oke; mikma oklushi laua ka ish impota cha, chishno chik poto ka hi oke.

13. Micha Chihowah yvt noshkobo ak o chikba hi oke, micha hasimbish ak a he keyu: paknaka ak o ish bieka, ish nutaka he keyu hoke, chin Chitokaka Chihowah im anumpa ha himak nitak a chim anumpohonli li ka i haponaklot ithaiyanvt ish yvmihinchikmvt,

14. Himak nitak a chim anumpohonli li tuk a anumpa kanima kia, i filvmmitt naksi ka ishtimpakimma, keyukmvt vllhfvbekimma, kanima kia ivt nakolvt toba iakaiyvt ish aiokpvcha he keyu hoke.

15. Amba yakohma hi oke, chin Chitokaka Chihowah im anumpa ha ish i haponakla he keyukma, im anumpa moma, micha i nan vllhpisa bilia himak nitak a chim anumpohonli li ka ithaiyanvt ish yvmihcha he keyukma, na kallakshi ilvppa puta kvv chi onvtula hi oke, micha chi sakka hi oke.

16. Tumaha holihta ya a chi kallaksha hi oke, micha osapa ya a chi kallaksha hi oke.

17. Chi kishi hut micha ta pushi chim ayamvuka yut kallaksha hi oke.

18. Chi haknip a toba tuk, micha chi yakni a waya tuk, micha chi wak tek a waya tuk, micha chin chukfi vhpoa aya puta aiena kut kallaksha hi oke.

19. Ant ish chukowakmut chi kallaksha hi oke, micha kohchut ish iakmut, chi kallaksha hi oke.

20. Chihowah yut nana moma yvmihcha chi ho chibbak isht ish ishikma, nan isht kallakshi, micha ishit chukvsh okpulo, micha nahotupa puta et chi onohonchi na, aiokpulokut chi taha hi oke, micha tushpvt ont ish moshola hi oke; nana ish akaniohmi kut okpulo hosh is sa kanchi tuk oka.

21. Chihowah yut ililli okpulo ya chi atakalichikma, yakni ish isha chi kash osh yvma ont a chi taha hi oke.

22. Chihowah yut tahat ishit yvna, micha yvna, micha nipi lua, micha nipi lua atampa, micha bvshpo falaia, micha bvshshi, micha shummit toshbi aiena ka isht chissa hi oke; mikma chi akaiya na, ont ish moshola hi oke.

23. Mikma chi shutik vt chi noshkobo paknaka talaia kut asonak lakna ya hi oke; mikma yakni vt chiyi nutaka talaia kut tvli ya hi oke.

24. Chihowah yut chi yakni ai umba ka hituk micha lukfi pushi chohmicha hi oke; vba ya mintit chi onvtohonlakma chi taha hi oke,

25. Chihowah yut chin tvnvp vhleha itikba ya a chi akakohvcha hi oke; hina achvfa ho ivt ish i sanali tukmut, itikba ya hina untuklo ho ish yihlepa hi oke; mikma apehlichika puta yakni paknaka aiasha moma ka chisht ona hi oke.

26. Michi chi haknip vt vba hushi moma, michi nampoapa puta yakni aiasha ka im ilhpak toba hi oke, mikma hatak nana kia mahlolit tiblela he keyu hoke.

27. Chihowah yut Echip hichi a, michi isht asha hla-

chowa, micha hlachowa fachanli, micha wushko aiena ka isht chissokma chi hlakofa he keyu ka hi oke.

28. Chihowah yvt tasimbo, micha nishkin lupa, micha chukvsh okokko, ahni aiena ka isht chissa hi oke.

29. Mikma hvshi tvbokoli hoh kia posholit ish hikikia hi oke, nishkin lupa vt aiokhlileka ya na posholit hikikia kak o ish chohmi cha nana ish a kaniohmi kvv chim aiahla he keyu; peh chilbvshalit, chi wehpohonli na bilia; mikma hatak nana kia chi okchalinya he keyu hoke.

30. Ohoyo ish itim vlhpoa tukma hatak inla hosh iba tvshka hi oke, chuka ish ikbi tukmvt yvmma ish ai vttta he keyu, pavpi ahollokchi ish hokchi tukmvt yvmma paki a ish ai vma he keyu hoke:

31. Chi wak toksvli ya ish pisa ho chi tikba ai vba he, mikma yvmma ish ai vpa he keyu hoke; chim issuba hakso-bish falaia ya afvt chi tikba ai isha hi oke, mikma chi falama he keyu ka hi oke; chin chukfi ha chin tvvvp a ima hi oke, hlakoficha he vt ik chim iksho ka hi oke.

32. Chiso vhleha micha chiso tek vhleha aiena ka okla inla ho ima hi oke, mikma chi nishkin vt pisa bvnnvt taha hosh, anukfilli na biliat illa hi oke, mikma kullo kvv chibbak a ik foyuko ka hi oke.

33. Yakni nana a chi waya, micha na ish toksvli tuk moma ka oklushi chik ithano hosh vvvv tahla hi oke; micha peh ilbvsha micha litovvt ish bilia hi oke.

34. Yvmohmi ho chi nishkin vt pisa ka ish pisa kak osh chi tasimba hi oke.

35. Chihowah yvt chiyikvlaba ya, micha chiyi ya hichi chi hotopa fehna, micha vttta keyu ho isht chissokma, chiyi pvttta vttvt ia hosh chi noshkobo tabokaka ont vlla hi oke.

36. Chihowah yvt oklushi ya chishno, micha chiki vhleha aiena kvv ithana tok keyu ho, chishno micha chi miko chi pehlichia he o ish hilechi tuk a aiena ka chisht im ona hi oke; mikma yvmmak o naholvvv toba inla iti, micha tvli aiena ka ish aiokpvcha hi oke.

37. Chihowah yvt oklushi moma itin takla chishtia ka

yummak o okokko, isht ahni nana achi, micha isht anum-puli yo ish ita nowa hi oke.

38. Osapa ya pehna laua ho isht ish ia tukmut, kanomosi ho ish hoya hi oke; hawa yvt tahla chi hoka.

39. Pakupi ahollokchi ya ish hokchi cha, ish apoksia cha hi oke; yohmi kia oka paki ya ish ishka he keyu, micha paki ya ish ma he keyu hoke: shushi vt vpa hi oke.

40. Chim ai vhli moma ka alif iti vt chim aiasha hi oke, yohmi kia bila ya isht ish il ai ahumma he keyu hoke: chim alif uni vt chilofa hi oke.

41. Chiso vhleha micha chiso tek vhleha ha ish tobacha hi oke; yohmi kia ish aiyukpa he keyu, yuka tobacha kunia hi oke.

42. Chim iti puta ka micha chi yakni a waya puta ka hawa yvt tahla hi oke,

43. Okla inla chitin takla ahanta kut wakayvt chi shahlit chaha fehna hi oke; mikma akanlosi fehna ish ona hi oke,

44. Chimpota hi oke, mikma ish impota he keyu hoke: noshkobo ya hi oke, mihma chishno vto hasimbish chia ya hi oke

45. Micha na kallakshi iluppa puta moma kut chi onvtula hi oke; micha chiakaiyvt chi sahakki na, ont chi taha hi oke; chin Chitokaka Chihowah im anumpa ha haponaklot, im anumpa vlpisa, micha i nan vlpisa bilia chi miha tok a chik holitoblo tok oka.

46. Micha nan isht atokowa, micha okokko, isht ahni aiena kut chishno micha chim isht atiaka aiena ka onvtoyula na bilia hi oke,

47. Nana moma apakna atuk mak o, na yukvt chukvsh yukpa hosh chin Chitokaka Chihowah ya chik im antio tuk okvt,

48. Yvmohmi hokvt chin tunvp vhleha yummak oka Chihowah yvt chi sanali et pila chi ka hohchvfo hosh, micha itukshila hosh, micha nipi bano, micha nana puta moma ka bvna hosh, ish im antia chi hoke; mikma tvli ikunla abana yo chikunla abanalikma ont chi taha hi oke.

49. Chihowah yvt oklushi chi sanalichit, yakni hopaki,

yakni ont a taha ka shinimpa kvt ossi hika choyuhmi, oklushi yvmma im anumpa ha ish ithana keyu ho isht vla hi oke.

50. Oklushi pisa chilita hosh, yvmmak okvt sipokni yoka, ahna he keyu, micha vlla yoh kia i nukhakla he keyu hoke.

51. Michi chi wak awaya, micha chi yakni awaya aiena ka ai ihimpa na, chi taha hi oke; micha yvmmvt onush, oka paki, micha bila, wak tek, micha chin chukfi isht achakvt ia yoh kia ik chim ashanchi ho ont chitaha hi oke.

52. Michi chi holihta okhissa puta ka abinanchit fullota na, a chin chaha ka puta, micha holihta chaha puta yvmmak o ish anukchieto chatuk vt, chi yakni hlopulli moma ka aka itula hi oke; micha chi yakni chin Chitokaka Chihowah yvt chima tok hlopulli moma ka chi holihta okhissa puta ka abinancha hi oke.

53. Michi chin tvnvp puta kvt abinanchit chilbvshali na, chi hohchvfmvt chi haknip atoba ak inli, chiso vhleha, chisotek vhleha nipi chin Chitokaka Chihowah yvt chima tok a ish pa hi oke,

54. Yvmohmi ho hatak vt ahah ahnit, ile holitobli hosh chi takla ahanta chatuk kia itibapishi ha, micha tekchi i holitopa tuk a, micha im vlla vhleha atampa ashachi tuk vt i holhponayo ik achukmot pisa hi oke.

55. Yvmohmi cha, im vlla vhleha nipi vpa kvt, yvmma kanima kia ipeta he keyu hoke: chi holihta okhissa moma ka chin tvnvp vt abinanchit, a fullota cha, chilbvshalit abinanchit fullota ha tuk o nana kvt ik chim iksho ha tuk okvt.

56. Ohoyo ahah ahnit ile holitobli hosh, chi takla ahanta kvt, ile holitoblit ahah ahni kvt iyi pvta ya aka ishit hvhla he keyu tuk kia, i hatak i holitopa a tuk a, micha ushi a tuk, micha ushetik a tuk,

57. Michi vlla yosh iyi itin takla ya minti tuk, micha im vlla vhleha shoyuli tuk i holhponayo ik achukmot pisa hi oke: micha chin tvnvp vt chi holihta okhissa puta ka a chilbvshalikma, abinanchit a fullotvt atikkonofikma nana moma bvna hosh lumvt vpa hi oke.

58. Nan vlvhpa ilvppa anumpa moma holisso ilvppa aho-

lisso ka ithaiyanvt ish yvmihinchí hosh, hohchifo holitopa i nukwia he vlhpiesa CHIN CHITOKAKA CHIHOWAH ILUPPA hv-chik i nukwiokma;

59. Yohmikma Chihowah yvt nan isht chim ilbvsha palvmmi, chim isht atiaka nan isht i palvmmi chinto, micha hopaki ho yvmohmi, micha abeka palvmmi hopaki ho yvmohmi ya chi onocha hi oke.

60. Micha Echip ililli okpulo ish i nukshopa chatuk a moma chi onocha hi oke; mikma chi atakala hi oke.

61. Micha nan abeka puta, micha napalvmmi puta nan vlhpisa ilvppa aholisso ha atakali keyu aiena ka Chihowah yvt chi onohonchikma, chi taha hi oke.

62. Mikma apakna kvv vba fochik oka ish, chiyuhmi tuk oh kia, holhtina kanomosi hosh ish ahomba hi oke; chin Chitokaka Chihowah anumpa ha ish i haponakla he keyu hokvt.

63. Atukma yakohma hi oke, Chihowah yvt nana achukma kak o chi yvmihchi cha; chi apaknvchi kvv im achukma tuk vt, anonti chi tahlit ont chi mosholichi kvv, im achukma hi oke; mikma yakni yvmma ish isha chi hosh ish ia ka, ai isht chi kancha hi oke.

64. Micha Chihowah yvt okla moma ka aiyokomvt, yakni a taha ka achvfa vttvt ia hosh, in tvnnvp ont vhli chi fimma hi oke; micha yvmmak o naholbvt toba inla chishno, micha chiki vhleha aiena kvv ish ithana tuk keyu, iti, micha tvli aiena yo ish im antia hi oke.

65. Micha oklushi yvmma puta ai iti takla ya anuktala ya ish ahayucha he keyu; micha chiyi putta yvt afoha pisa he keyu hoke: amba Chihowah yvt yvmmak oka chukvsh wvnihinchi micha nishkin elli, micha im anukfila nukhaklo chima hi oke.

66. Mikma chim ilhfiopak a ai isht chi nuktahlaklaka hi oke, micha nitak, micha ninak moma ka chi nukshopa cha, sai okchaya fehna chi chik ahno ka hi oke.

67. Chi chukvsh nukshopa ishít chi nukshopakmvt, micha chi nishkin pisa ish pihisakmvt, onnahinlikma, Chihowah yvt vlhpesa ahni, Ôpiakbano, ish acha hi oke; atuk osh

opiakma, Chihowah yvt vllhpesa ahni, Onnahinlikbano, ish
acha hi oke,

68. Mikma Chihowah yvt anonti Echip yummak oka hi-
na ya isht chim anumpule li mvt, Anonti ish pisa he keyu
hoka, achi li tok a peni hochito apittvt chisht ona hi oke:
mikma yummak oka ohoyo yuka micha hatak yuka ikbit
chin tvnvp chi kancha hi oke, mikma hatak nana kia ik chi
chumpo ka hi oke, (achi tok.)

CHAPTA XXIX.

ILUPPA puta kak osh nan itim apesa anumpa ho Holeb
a nan ai itim apesa tok vt asha na, Chihowah yvt Moses
a tohno na, Israel im vlla vhleha ha Moab yakni ya ai itim
apesa tok mak okē.

2. Mihma Moses vt Israel moma ka hoyo cha, im anum-
pult, Echip yakni chi tikba ya Falaoh, micha in tishu vhleha
moma aiena, micha i yakni moma aiena ka Chihowah yvt
kaniohmichi tok moma ka hvsh pisa ha tuk oke.

3. Nan isht imomaka pisa hochito, micha nan isht atoko-
wa, micha na fehna hochito yumma aiena ka chi nishkin vt
pisa ha tuk oke.

4. Yohmi kia Chihowah yvt chukvsh nan isht akostinin-
chi, micha nishkin isht pisa, micha haksobish isht haponaklo
ya ik hvchimo tok, himak nitak ant vhlshke.

5. Mikma afvmmi pokoli ushta ho yakni haiaka ya hvchi
pehlichit aya li tuk oke; micha nafohka hvsh foyuka kv
tahvt ishtia keyu, mikma shulush chiyi isht ish holo kv
tahvt isht ik aiyo tuk oke.

6. Pvska hvchik po, micha oka paki, micha nan ishko
homi nana kia hvsh ishko tuk keyushke; yvmohmi hosh
vno ak osh hvchin Chitokaka Chihowah sia ka hvsh it-
haiyana chi hatuk oke

7. Atuk osh iluppa hvsh la ma, Heshbon i, miko Sihon,
micha Bashan i miko Ok ita tuklo kv kohevvt pi sanalit
pitibi tok; mikma issot e kanchi tok.

8. Mihmut i yakni ya il ishi cha, Lubenait micha Katait, micha Manasseh apelihi iklvna aiena kv̄t i yakni ya chi h̄o il ima tok.

9. Yvmohmi hoka anumpa nan itim apesa ilvppa hvsh ieshi cha, hvsh yvmihchashke; yvmohmi hosh nana hvsh yvmihinchi moma kv̄t hvchim aiahli hvchim achukmashke.

10. Himak nitak a hvsh moma kv̄t hvchin Chitokaka Chihowah itikba ya hvsh hielishke, hvchim apelihi puta i kv̄potvni vhleha, hvchim asvnonchi vhleha, micha na hvchim vlhtoka vhleha Israel hatak vhleha moma aiena,

11. Hvchim vlla vhleha, hvchi tekchi vhleha, micha chim okla inla vhleha hosh chi binah ha aiasha ya aienvt iti chin chanli vttvt ia hosh, oka chim ochi ont vhli ya aienvt hvsh hiel i kv̄t;

12. Chin Chitokaka Chihowah ya nan itim apesa, micha im anumpa kullo anumpulit, himak nitak a chin Chitokaka Chihowah yvt chitim apihisa ka ish itim apesa chi ha tuk oke.

13. Yvmohmi h̄o himak nitak a nana hvchi miha tok mak o, micha chiki vhleha Eblaham micha Aisak, micha Chekob aiena ka anumpa kullo im il onochi tok mak osh, kullochit im okla hvch ikbi cha, hvchin Chitokaka chi ha tok.

14. Michā hvchishno ak bano h̄o nan itim apesa ilvppa, micha anumpa kullo anumpuli ilvppa hvchitim apesa li keyu.

15. Amba himak nitak a pi apelv̄t pin Chitokaka Chihowah itikba hiel i, micha himak nitak a pi apelv̄t ik hinlo aiena hoke.

16. Echip yakni ya kanihmit il aiasha tok, micha oklushi puta kanihmit hlopullit il itvnowa tok a hvsh ithana.

17. Michā nan isht a yuwala, micha i naholv̄t toba puta, iti micha tvli, micha tvli hvta, micha tvli lakna aiena kv̄t im ai itin takla ya aiasha h̄o hvsh pisa tok okvt.

18. Keyukma hvch itin takla ya hatak, keyukmvt ohoyo, keyukmvt chuka achvfa, keyukmvt apelihi himak nitak a pin Chitokaka Chihowah ya chukvsh i filvmmi cha, oklushi ilvppa puta i naholv̄t toba puta ka ona cha im antia yoba na, keyukma chukvsh homi cha, nan isht yuwala waya chi kv̄t, akshish hvch itin takla ya itoyula na,

19. Atuk osh yakohmi na, kallakshichi anumpa ilvppa haklokmvt, ilap chukvsh vt na ile yukpalit anumpa il onochit, Sa chukvsh vm anukfila hosh itukshila ya oka haksi akaieninchi hoh kia nana kv̄t vm achukma chi hoka, achi yoba na:

20. Chihowah yvt apoancha he keyu hoke; amba Chihowah im ai i nukkilli, micha i nuktahta yvt hatak yv̄mma i sanalit shobohonla hi oke; mikma kallakshichi anumpa moma holisso ilvppa aholisso tuk vt onvtoyula he; mikma Chihowah yvt hohchifo ha shutik nutaka ya a kashofit kancha hi oke.

21. Micha Chihowah yvt yv̄mma Israel apelhichi puta moma ka ila filvmmichit, nana ik achukmo ak o isht onvt, nan vlhpisa holisso ilvppa nan itim apesa ya kallakshichi anumpa hv̄t takali tuk mak o yvmihcha hi oke.

22. Yvmohmi ho hv̄chim vlla vhleha ai iti shali vt hv̄ch iakaiyvt aiasha he vt, micha okla inla yakni hopaki minti aiena kv̄t, yakni vt na palvmmi onvtola tuk, micha abeka ilaiyuka puta Chihowah yvt onochi tuk a pisa ka,

23. Mihma yakni yv̄mma moma kv̄t hituk lakna, micha hv̄pi, micha luhua, nana ahollokchi keyu, micha nana awaya keyu, micha hv̄shuk nana kia ai offo keyu, okpulot taha kv̄t, Sotom micha Komolah, Atmah micha Seboim aiena okpulot taha tok mak o, yv̄mmak oka Chihowah yvt nukhobela hosh, micha im ai i nukkilli vt libbi hosh okpv̄nit tahli tok choyuhmi ka pisa mak osh, acha hi oke.

24. Oklushi moma kak kia, Nanta katiohmi ho Chihowah yvt yakni ilvppa yvmihchi tuk oh cho? nanta katiohmi ho nuklibisha chito lv̄shpa kv̄t yakohmi hoh cho? okla acha hi oke.

25. Yohmikma hatak puta kv̄t, In Chitokaka. Chihowah yvt nan itim apesa iki vhleha ha Echip yakni ya pehlichit kohcha mvt, itim apesa tok a kobv̄ffit kanchi kak oke,

26. Ivt, naholbvt toba inla, naholbvt toba puta ithana tuk keyu, micha ima tuk keyu ka im antia cha ai okpv̄chi tuk oke.

27. Mikma Chihowah im ai i nukkilli vt yakni ilvppa i

sanalit libbi cha, kallakshichi anumpa moma holisso ilvppa a holisso tuk a onohonchi tuk oke.

28. Micha Chihowah yvt nuklibisha, micha im ai i nukkilli vt libbi kak osh, micha nukkillit shitilema kak osh teh-lit i yakni ya kohchi tuk osh yakni inla yo pit kanchi tok a himak nitak a yvmohmi hoke, acha hi oke,

29. Na luma puta hokvt pin Chitokaka Chihowah immi hoke; amba nana ka otvnichi tok okvto pishno, micha pim vlla vhleha aiena immi bilia he a tok; yvmohmi hosh nan vhpisa ilvppa anumpa moma ka e yvmihcha chi ha tok oke. (achi tok.)

CHAPTA XXX.

ATUKMA yakohma hi oke; nana ilvppa puta moma na yukpali, micha nan isht kallakshi chi tikba takalichi li kv̄t chi onvtoyula cha, oklushi puta itin takla chin Chitokaka Chihowah yvt chi tihleli tuk a hiel̄i ont ish anukfilli,

2. Micha chin Chitokaka Chihowah ya falamvt ish im ona cha, chishno, micha chim vlla vhleha aienvt chi chukvsh mominchit, micha chimi shilombish mominchit himak nitak a nana moma chim ahanchi li tuk mak o, yvmohmit im anumpa ha ish im antiakma;

3. Yohmikma chin Chitokaka Chihowah yvt chi nukhak-lokmvt, falama cha, chi yuka tuk a chi falvmm̄inchi cha, ok-lushi moma chin Chitokaka Chihowah yvt pit chi fimmi tuk vt, a hoyot chitvnala hi oke.

4. Chimmi ha tihlelit shutik a tahaka pilla isht ik ona tuk oh kia, yvmmak o chin Chitokaka Chihowah yvt ont a hoyot chitvnala he, micha yvmmak o ont chisht vla hi oke,

5. Micha chin Chitokaka Chihowah yvt, yakni chiki vhleha hv̄t a binili tuk a chisht vla na, ish a binila hi oke; micha nana achukma chi yvmihchikmv̄t, chi apaknv̄chi kv̄t chiki vhleha ha tok a i shahliche hi oke.

6. Mikma chin Chitokaka Chihowah yvt chi chukvsh, micha chim vlla vhleha chukvsh aiena ka hakshup tvbli na, chin Chitokaka Chihowah ya chi chukvsh mominchit micha

chimi shilombish a mominchit isht ish holitobli cha chi okchaya hi oke,

7. Mikmut chin Chitokaka Chihowah yvt chin tnnvp puta micha chi nukkillit chilvushali tuk puta kak o kalakshichi ilvppa puta ka onocha hi oke.

8. Mikma ish falama cha, Chihowah im anumpa ha ish im antiakmut, im anumpa moma himak nitak a chi miha li ka ish yvmihcha hi oke.

9. Mikma chin Chitokaka Chihowah yvt na toksvli puta chibbak isht ish ishi ka, chi haknip a toba micha chi wak a toba micha chi yakni a toba aiena ka achukma ho anukfillit, chin lauacha hi oke: Chihowah yvt chiki vhleha anukfilli mvt, yukpa tok mak osh, anonti achukma ho chi anukfillit yukpa chi hoke,

10. Chin Chitokaka Chihowah ya im anumpa ha ish i haponaklo cha, im anumpa vlhpisa, micha i nan vlhpisa bilia, nan vlhpisa holisso ilvppa aholisso tuk a ish ieshikma, micha falamvt chi chukvsh a mominchit, micha chimi shilombish a mominchi hosh ish im onakma,

11. Anumpa ilvppa himak nitak a chim anumpohonli li kvv chin luma keyu; micha chi hopaki keyu hoka;

12. Uba yakni ak o itonla tuk o, Kvta hosh vba yakni ya pim ia cha, ont isht pim vla na, e haklo cha e yvmihcha chi cho? ish acha he o keyu hoka,

13. Micha okhvta mish tnnvp ak o itonla tuk o, Kvta hosh okhvta ha pit pi hlopulli cha, ont isht pim vla na, e haklo cha e yvmihcha chi cho? ish acha he o keyu hoka,

14. Amba ish yvmihcha chi kvv anumpa hvv chi bilinchi fehvt, chitih, micha chi chukvsh a foyuka hoke.

15. Yakeh, himak nitak a okchaya micha achukma, illi micha nan ik achukmo aiena ka chi tikba takalichi lishke,

16. Yohmi hosh himak nitak a chin Chitokaka Chihowah ya ish holitobli cha, i hina ya ish ai itvnowvt, im anumpa, micha i nan vlhpisa bilia, micha im aivlhpesa yvmihinchi ya ish ieshi cha, chi okchayvt ish apaknvcha he o chi miha lishke: mikma chin Chitokaka Chihowah yvt yakni ya ish isha chi hosh yvma pilla ish ia ka a chi yukpala hi oke,

17. Amba chi chukvsh vt filvmmi, yohmi hosh ish i ha-ponakla he keyu; amba naksika ia cha, naholbvt toba puta aiokpvchi, micha ish im antiakma;

18. Himak nitak a anumpa ahli mak o hvch illi pulla he: micha yakni a ish isha chi hosh, Chatan a hlopullit, yvmma pillla ish ia kvv hvchi nitak a hvsh falaiacha he keyu ka hvchi miha lishke.

19. Ai okchaya micha ai illi, aiyukpa micha akalakshi aiena ka hvchi tikba takalichi li ka, vba micha yakni aiena kvv himak nitak a hvchi atokolit holissocha chi ka hoyo lishke; yvmohmi hoka ai okchaya ak o ish atokolashke: yvmohmi hosh hvchishno micha chim isht atiaka yvt okchayashke,

20. Yvmohmi hosh chin Chitokaka Chihowah ya ish ho-litoblashke, micha yvmohmi hosh im anumpa ha ish im antiashke, micha yvmohmi hosh hvsh asitiashke, (yvmmak osh chi ai okchaya, micha nitak isht chi falaia yoke;) yvmohmi hosh Chihowah yvt chiki vhleha Eblaham, Aisak, micha Chekob aiena ka ima chi hosh anumpa kvvlo im il onochi tok a, yakni ya ish aiashashke, (achi tok.)

CHAPTA XXXI.

MIHMA Moses vt anumpa ilvppa puta kak o Israel mo-ma ka ont im anumpuli tek.

2. Micha himak nitak a afvmmi tahlepa cha, pokoli tuklo li hoke; himakma kuhchvt ivt, ant chukowa la he keyu hoke; micha Chihowah yvt Chatan ilvppa ish hlopulla he keyu, a miha ha tuk oke;

3. Chin Chitokaka Chihowah ak osh chi tikba ivt hlopul-li cha oklushi ilvppa puta ka chi tikba ai isht kancha chi hoke, mikma ish isha chi hoke: mikma Chihowah yvt achi tukmak o, Choshua yvmmak osh chi tikba ivt hlopulla chi hoke.

4. Mikma Chihowah yvt Amolait i miko tuklo Sihon, micha Ok, micha i yakni aiena yvmmak oka ishit kanchi tuk vt chohmicha chi hoke.

5. Micha Chihowah yvt anumpa vlhpisa moma hvchi miha li tuk mak o, hvsh yumihecha chi ho, hvchi tikba hvchima chi hoke,

6. Hvchi kvllashke, micha hvsh aiyimitashke, hvsh i nukshopa na; chin Chitokaka Chihowah yummak osh chi auwant ia hoka, ik chim ai ahlo ka he keyu, micha chi kancha he keyu hoke, achi tok.

7. Mihmut Moses vt Choshua ya hoyo cha, Israel moma kvt pisa ho, Ish kvllashke; micha ish aiyimitashke; okla ilvppa pehlichit, Chihowah yvt iki vhleha ha yakni ya ima chi hosh anumpa kvll im ilonochi tok a ish onashke; micha ish a binilicha chi hoke,

8. Mikma Chihowah yummak osh chi tikba ia hoke, yummak osh chiba foyuka chi hoke; ik chim ai ahlo ka he keyu, micha chi kancha he keyu hoka; ik chi nukshopo kashke, micha ik chi nukhlakancho kashke, im achi tok,

9. Mihmut Moses vt nan vlhpisa ilvppa holissochi cha, Lefai ushi vhleha naholitompa isht asha Chihowah nan itim apesa a fohka itombi holitopa sholi tuk a, micha Israel im asvnonchi moma ka ibbak fohki tok.

10. Micha Moses vt i mihvt, Afvmmi untuklo kvt ont taha aiyukali i hotofa afvmmi chukvsh nuktaiyala ya tabenakel ai impvchi,

11. Israel moma kvt chin Chitokaka Chihowah itikba hvsh hiela chi hosh, kanima ho ai atokoli tuk o, vlakma, Israel moma kvt haklo ho nan vlhpisa ilvppa itikba ish ai itim anumpula hi oke.

12. Okla, hatak, ohoyo, micha vlla vhleha, micha okla inla yosh chi holihta okhissa anukaka chim ahanta aiena ka hoyot ish itvnashke; yvmohmi hosh haklashke, micha yvmohmi hosh ithvnashke, micha hvchin Chitokaka Chihowah ya i nukwia cha nan vlhpisa ilvppa anumpa moma ka ithaiyanvt yumihechashke.

13. Mikma im vlla vhleha nana ka ithana tuk keyu kvt, haklo cha, hvchin Chitokaka Chihowah ya okchayvt yakni ya hvsh isha chi hosh Chatan a hlopullit, yvmma pilla hvsh ia kvt hvsh aiasha ka ithaiyanvt i nukwiashe, achi tok.

14. Mihma Chihowah yvt Moses a, Yakeh, chilla chi chi nitak vt mihintishke: Choshua ya hoyo cha, okla moma in tabenakel a hvsh hieli na, anumpa ima lashke, im achi tok. Mihma Moses micha Choshua vt ia cha, okla moma in tabenakel a hieli tok.

15. Mihma Chihowah yvt tabenakel a hoshonti tonik afoyukvt haiaka tok: mihma hoshonti tonik vt tabenakel okhissa paknaka hikia tok.

16. Mihma Chihowah yvt Moses a, Chiki vhleha ha takla chi nusa chi hoke; mikma okla ilvppvt, takla aiasha chi hosh, yumma ia kvv wakaya cha, hauit yakni yash okla inla i naholbvt toba puta ka iakaiyvt itvnova chi hoka; micha sa kanchikmvt, nana itim apesa li tuk a kobuffa hi oke.

17. Yohmikma nitak yumma vm ai i nukkilli vt i sanalit libba hi oke; micha kanchi likmvt, sa nashuka ya in luhmi likma, okpulot taha hi oke; micha nan ik achukmo, micha ishtatakluma laua kvv onvtoyula hi oke; yohmi cha nitak yumma, Nan ik achukmo ilvppa puta kvv pin Chitokaka osh pitakla anta keyu kak o pi onvtola keyu cho? acha hi oke,

18. Mikma fullotvt naholbvt toba inla asitvvt nan ik achukmo moma toksuli tuk pulla kak o, nitak yumma sa nashuka ya luhmi li pulla hi oke.

19. Yvmohmi hoka himak a taloa ilvppa ish holissochi cha, Israel im vlla vhleha ha ish im avvchashke; itih ho ish fohkashke; yvmohmi na, taloa ilvppvt Israel im vlla vhleha ha i sanalit a witnes ak ashke.

20. Iki vhleha ha anumpa kullo im ilonochi li tuk vt yakni pishukchi, micha foe-bila ayvnahanli ya pehlichit isht ona li tuk o; impa tuk osh kaiyvt taha cha, niakmvt; fullotvt naholbvt toba inla iakaiyvt im antiakmvt sa nokovvchi cha, a nan itim apesa ya kobuffa hi oke,

21. Atukma yakohma hi oke, nan ik achukmo, micha aiataklamo laua hosh onvtolakma, taloa ilvppvt witnes mak osh i sanalit atokolashke; im ishtatia ka itih ha foyuka ka im ahaksa chi keyu hoke; himak a fehna kak kia anumpa kullo im ilonochi li tuk vt yakni ya isht ak ono kisha ka im

anukfila hut kaniohmit itvnowa ka ithana li hoka, im achi tok.

22. Yvmohmi ma Moses vt mih nitak ak inli ho taloa ilvppa holissochi cha, Israel im vlla vhleha ha im avuchi tok.

23. Mihma Nvn ushi Choshua ya anumpa imvt, chi kvl-lashke, micha chi aiyimitashke, anumpa kvlllo im ilonochi li tok mak o Israel im vlla vhleha ha pehlichit yakni ya isht ish chukowa chi hoke; mikma chibafoyuka la chi hoke, achi tok.

24. Atuk o yakohmi tok, Moses vt nan vlhpisa ilvppa anumpa ha holisso ha atakalichit tahli na ont taiyaha ma,

25. Moses vt Lefait vhleha Chihowah nan itim apesa afohka itombi holitopa sholi ya tuk a i mihvt,

26. Nan vlhpisa holisso ilvppa ishi cha, hvchin Chitokaka Chihowah nan itim apesa afohka itombi holitopa anukaka hvsh bohlashke; yvmohmi ho witnes chi sanalit yvmma itoyulashke.

27. Ish ile flvmmichi, micha chikunla kvlllo ka ithana li hoke; yakeh, himak nitak a si okchayvt hvchi takla anta li moma ka Chihowah ya i flvmmi hvchi shahli fehnvshke; a svlli ha yok mak heno i shahli fehna chi keyu cho?

28. Hvchim apehlichi puta im asvnonchi, micha hvchi nan vlhtoka puta ka hvš svn itvnahli na, anumpa ilvppa puta ka haksobish a haklochi lashke; micha vba, micha yakni vt i sanalit holisso takalicha chi ka hoyo lashke.

29. Svlli ha ma il okprnit hvsh kaiyanchi cha, hina nana hvchi miha li tuk a pit hvsh filema chi: atuk o nitak ont ishtaiopikma, Chihowah itikba ya nan ik achukmo ka yvmi-hinchit hvchibbak isht hvsh toksvlit, hvsh nokovuchi kak o nana ik achukmo kvv hvchi onvtola chi ka ithana li hoka, im achi tok;

30. Mihmvt Moses vt Israel okla moma ka haklochit taloa ilvppa anumpa ha im anumpohonli na ont taiyaha tok.

CAPTA XXXII.

UBA puta ma, hvsh haklashke, mikma anumpule lashke, mikma yakni ma, svtih anumpa ha ish haklashke.

2. Um anumpa hvv umba chiyuhmit itola chi hoke, micha vm anumpa hvv fichak chiyuhmit chilofa chi hoke, okshimihinchi yosh haiyukpulo waloha onvtola kak o chiyuhmi, micha umba hosh hvshuk onvtola kak o chiyuhmi hoke.

3. Chihowah hohchifo kak o anoli la chi hokvt; pin Chitokaka yo isht a holitopa ya hvsh imashke.

4. Yvmmak osh tvli chito ak oke; nan isht ai ahanta yvt vltaha hoke; nan im a kaniohmi puta kvv aivlhpiessa hoke; Chitokaka ai ahli, micha nan ashvchi iksho: aivlhpiessa, micha vlpesa yoke.

5. Il okpvni tuk oke; litelit takali kvv im vlla vhleha liteli yo keyu; ai itishali nan ashvchi, micha shana Iowa vhleha ak oke.

6. Okla im anukfila iksho, micha ik hopoyukso ma; yvmohmi hosh Chihowah ya hvsh im atobbi cho? chiki yosh chi chumpa tuk keyu cho? chikbi cha kvullochit chi hilechi tuk keyu cho?

7. Nitak chashpo a tok a ish ithaiyanashke, micha ai iti shali laua afvmmi puta ka ish anukfillashke; chiki ya ish i ponaklashke, chi pisvcha hinla hoke, mikmvt chim asvnonchi ma yvmmak okvt chim anola hinla hoke,

8. Chaha Moma i Shahli vt oklushi puta ka i yakni ya chi ho ita kvshkoli tok, Alam ushi vhleha ha ita filvmmichi mvt, Israel im vlla vhleha holhtina ha tuk mak o, okla im ai vlli ya apesa tok.

9. Chihowah immi hato im okla hak oke: im ai isha he vlpesa yvt Chekob ak oke.

10. Yakni chokushmi foka yo, micha yakni haiaka achukillissa, nampo a woha ai ahayuchi tok; fullota hosh ilauelit

isht aya tok: im abvchi tok, ilap nishkin lumbo ak o im itilauit ieshi tok.

11. Ossi yosh im vhlpicchik a koyohlit, ushi ya paknaka hlopohvchit, sanahchi ashatablit ishi sanahchi ya ishit shaiyali chatuk ak o chiyuhmit,

12. Chihowah ak illa hosh ilauei tok: mihma okla inla i naholbut toba vt ik ibafoyuko tok.

13. Osapa nati awaya ka ai vpa chi kak o, yakni achahaka ya om binflichit tok; micha tvli chito foe-bila yo, micha tasonak tvli chito bila yo a shukvchi tok.

14. Wak i pishukchi nia, micha chukfi i pishukchi, chukfushi nia aiena, micha Bashan aivlhpoa chukfi nakni, micha issi-kosoma yosh haiyihchi nia aiena, micha onush aiena ho ish imvchi tok: mihma paki okchi ahli issish chohmi ka ish ishko tok.

15. Yohmi tuk kia Cheshulvn vt ni vt taha mv, hvhli tok: chi ni vt tahvshke, chi chitot tahvshke, nia yosh ishit chi ompoholmoshke: yohmi mv ikbi tok Chitokaka ya kanchi tok, micha aiokchaya tvli chito yosh ik ahobalo tok.

16. Okla inla i naholbut toba ishit nuktahlali mv, na yuwala ya ishit nukovchi tok.

17. Shilombish okpulo ak o nan vbit isht aiokpchi tok, Chihowah ak a tok keyu; naholbut toba ithana ya tuk keyu, naholbut toba himona, himona yosh hikia tuk hvchiki vhleha hv i nukshopa tok keyu ya tuk oke.

18. Tvli chito chi tobachi tok ano chik anukfilloshe, micha chikbi tok Chitokaka ano issvt ish kanchishke.

19. Atuk o Chihowah yvt pisa mv shitilema tok; ushi vhleha micha ushetik vhleha hv nokovchi ha tuk oka.

20. Michas nashuka ya in luhmi lashke: ishtaiopi kanihmi na pisa lashke: ai itishali ila filimmi fehna, micha aiyimmi ka iksho vlla vhleha hoka.

21. Chihowah keyu ka ishit sa nuktahlali tuk oke; i na makali ya ishit sa nokovchi tuk oke. Atuk o vno vt okla keyu yo ishit nuktahlali la chi hoke; oklushi im anukfila iksho yo ishit nokovchi la chi hoke.

22. Sa nokowa ma luak vt libbi kv hukmit aiokpuloka

aka pilla ishtona chi: micha yakni, nan awaya ai ona ka hukmit tabli cha, nvni chaha puta in tola puta ka luak ti-kelicha chi hoke.

23. Nana ik achukmo ka o fohobli la chi hoka, vm oski naki ya a tahli la chi hoke.

24. Hochvfo ho ishit lua he, micha naluachi lvshpa yo micha okpulot taha homi ho ishit taha hi oke: micha nam-poa noti, micha lukfi pushi sinti im isht illi aiena ka on ti-hleli la hi oke.

25. Kocha ya bvshpo falaia, micha anukaka ya komunta yosh hatak himita, micha ohoyo himita hatak ik halelo, micha pishi hatak noshkobo tohbi aiena ka vbit tahla hi oke.

26. Ita fimmit achukbeli ya isht ona lashke; ithaiyana ka hatak ai itin takla ya ai issvchi lashke, achi li tuk oke.

27. In tvnvp vhleha nukhobela ha tuk micha i sanali vhleha hvv kaniohmi kvv inli fehna, micha pibbak vt chahvshke, Chihowah ak osh ilvppa moma ka yvmihchi tuk keyu hoke, acha he ak o, ik sa nukwio tuk okmvt.

28. Oklushi ahopoyuksa kvv ik im iksho, micha nana ithana anukfoka keyu hokvt.

29. Hopoyuksa tuk okbano, ilvppa ithana tuk okbano, im isht aiopa he vt anukfilli tuk okbano.

30. Katiohmi kak osh achvfa kia tahlepa sipokni hoh kia tihlela he tuk keyu? micha tuklokmtv tahlepa sipokni pokoli kia tihlela he tuk keyu? in Tvli chito yak osh kanchi tuk keyukma: micha Chihowah ak osh im okshita tuk keyukma?

31. In tvli chito vt pin Tvli chito ya chohmi keyu hoka; pin tvnvp vhleha ak inli kvv nan apesa hoka.

32. I pakvpi vt Sotom i pakvpi, micha Komolah osapa ak o ai achvfa chohmi hoka; i paki vt basunlvsh paki yoke, in lokoli vt homi hoke.

33. Im oka paki vt sinti vt isht illich, micha asp vt isht illich isht ilbvshali yoke.

34. Ilvppvt vm vlhtahvt an toyula keyu cho? micha vm ilayak takla ashanvt itoyula keyu cho?

35. Il aiokhvt hotopali, micha falvmminchit im atobbi vt

vmmi hoke: ont aivlhpesakma iyi yvt shakavlla hi oke; nan isht im aiokpuloka chi nitak vt olanlosi hoke: micha nana onvtola chi kv̄t tushpa hoke.

36. Chihowah yvt im okla ha nan im apesa chi hoka; micha isht akv̄llo vt i kv̄nia, micha im okshilita kv̄t iksho, micha hlakofi kv̄t iksho ma, pisa kak osh, in tishu vhleha ha ishit i nukhakla hi oke.

37. Michā, I naholbvt toba puta, in tvli chito anukchiēto tuk.

38. Yvmmak osh i nan vbit isht aiokpv̄chi nia vpa tuk, micha ishko im issa oka paki yō im ishko tuk mv̄to? Wākaya cha chi apelashke, micha chi okchalinchi yashke, acha hi oke.

39. Himak a pisá, vno, vno fehna kak osh mih sia hoke, yohmi ka naholbvt toba yvt sv̄ba foyuka keyu hoke: vbe li, micha okchalinchi li hoke; hotopali li, micha hlakofiche li hoke; mikma kv̄na hosh sv̄bbak a akohchit hlakoficha he vt iksho hoke.

40. Sv̄bbak a vba pit weli lish, Okchayvt ahanta li bilia yoke, achi li hoke.

41. Am bv̄shpo falaia shohkauali ya halupv̄chi likmvt, micha sv̄bbak a nana apesa isht eshi likmvt, an tv̄nv̄p vhleha ha il aiokhvt na hotopali onochi la chi hoke: micha a nukkilli puta ka im atobbi la chi hoke.

42. Ūm oski naki ya issish a ishit fihobli la hi oke: mikma a bv̄shpo falaia yvt nipi ya tahla hi oke, micha yvmvt in tv̄nv̄p a il ai okha ishtia vmmona ma illi tuk issish, micha yuka tuk ak a hi oke.

43. Oklushi puta ma, im okla takla hv̄chi yukpashke: in tishu vhleha im issish atuk a ilai okha chi, micha i sanali vhleha ha ilai okhvt nahotopa onocha chi; micha i yakni micha im okla ha i nukhakla hi oka, achi tok.

44. Mihma Moses micha Nvn ushi Choshua vt vla chā, okla hv̄t hakla hō taloa ilv̄ppa anumpa moma ka anumpohonli tok.

45. Mihmvt Moses vt anumpa ilv̄ppa mominchit Israel moma ka im anumpuli tuk vt ont tahli tok.

46. Micha anumpa moma himak nitak a hvch iti takla ya ai atokoli li ka hvchi chukvsh a hvsh onochashke, micha hvchim vlla vhleha hvv nan vlvhisa ilvppa anumpa moma ka ithanvt yvmihcha chi ka hvsh i mihashke.

47. Nan ik ahobo hvchi nana keyu hoka; hvchim ilhfio-pak okvt; nana ilvppak o yakni hvsh isha chi hosh Chatan hvsh hlopullit, yvmma hvsh ia kvv nitak ishit hvchi falaia chi hoke, achi tok.

48. Nitak yvmmak inli ma, Chihowah yvt Moses a im anumpulit,

49. Nvnih chaha Abalim ilvppa oiyvt Nebo bokko, yvm-mvt Moab yakni hikia, Cheliko ichapaka ya ish onashke; micha Kenan yakni Israel im vlla vhleha hak osh i yakni ya chi ho ima li tuk a ish pisashke.

50. Micha chitibapishi Alon vt Ho nvnih ha ai illi cha, im okla ha ibafohka tok a, chohmit nvnih yvmma pit ish oiya kvv chilli cha chim okla ha ish iba fohka chi hoke.

51. Yakni haiaka Sin Melibah-Katesh oka ya Israel im vlla vhleha ha ai iti takla ya a sanalit ish vbanvbli tok okvt, Israel im vlla vhleha ai iti takla ya chik sa holitoblo tok okvt.

52. Yohmi kia yakni vt chi tikba talaia na ish pisa chi hoke; yohmi kia yakni Israel im vlla vhleha ima li tok a yvmma ivt ish ona he keyu hoke, achi tok.

CHAPTA XXXIII.

MICHA nan isht yukpali Chitokaka im antia hatak Moses vt ik illo kisha mvt, Israel im vlla vhleha ha isht yukpali tok.

2. Micha Chihowah yvt Sinai a minti tok, micha Sei yak o i wakaya tok, Palan nvnih hak o atohwikelit et a kohcha tok: micha saint vhleha tahlepa sipokni pokoli ho pehlichit vla tok: ibbak isht impakimma ya nan vlvhisa libbi vt vttvt ia tok.

3. Ahli, okla ha i holitopa tok, imi saint vhleha moma kvv chibbak foyuka hoke, micha chiyi ituma chieya tok: moma kvv chim anumpa ha ai isha hi oke.

4. Moses vt nan v^lhpisa pim apesa tok, Chekob okla moma immi ha ch_i im aiv^lhpiesa.

5. Micha okla i noshkoboka v^hleha, micha Israel im ap^helichi puta kv^t iti hoyot it^unaha ma, Cheshul^un a mi^kot ahanta tok.

6. Luben vt ik okchaya cha, ik illo kashke; micha hatak vt ik i kanomoso kashke.

7. Mikina ilvppak osh Chutah nan isht ai^yukpa yoke, micha Chutah vt anumpohonlikm^ut, Chihowah ma, im anumpa ha ish haklo cha, im okla ha isht ish im onashke; ibbak ak inli kv^t im v^lhpesashke; apela chia hosh in t^un^up v^hleha ha ish i hlakofichashke, achi tok.

8. Micha Lefai ano Chin Hl^ummim, micha chim Ulim ak osh ch_i holitopa takla yashke, y^ummak oka Massa ya ai i momaka ish pisa tok; micha y^umma Melibah oka ya ish iti kv^llo tok.

9. Y^ummak osh i^ki, micha ishki ya pisa li tuk keyu, im achi tok: micha itibapishi v^hleha ha ik ithano, micha im v^lla v^hleha hak inli kash mih yoh ik acho tok: ch_i nan v^lhpisa ha ithaiyana cha, ch_i nan itim apesa ieshi ha tuk okv^t.

10. Nana chim ai v^lhpiesa y^umi^hinchi ak o Chekob a im av^ucha ch_i, micha ch_i nan v^lhpisa Israel a im av^ucha hi oke; na balama ya chi tikba talalikm^ut, mominchit hukmit isht aiokp^uchi ya chim alta ya onocha hi oke.

11. Chihowah ma, im ilayak a ish yukpalashke, micha ibbak toksv^li tuk a ish im aiokp^uchashke; i sanalit wakayvt hikia, micha i nukkilli puta aiena in chushwa ya nv^hlit ish hlopullich_i na, anonti ik wakayo kashke, achi tok.

12. Micha Benchamin ano, Chihowah i holitopa vt achukma^uka bilika ai ahanta hi oke, micha CHIHOWAH yvt nitak moma ompohoma hi oke; mikma tahchi itin takla ya ahanta hi oke, achi tok.

13. Micha Chosef ano, I yakni vto Chihowah yvt yukpali ashke, micha vba nan achukma puta, micha fichak, micha oka hofobi yakni nutaka et a tob^uhonli kak o,

14. Micha na waya holitopa puta hvshi vt tobahanchi ya,

micha nana holitopa puta hvshi ninak aya vt tobahanchi puta kak o,

15. Micha chaspo atok nvni^h chaha puta nan i shahli kak o; micha nvni^h hikia na bilia puta nana holitopa aiasha kak o,

16. Micha yakni ya na holitopa aiasha, micha isht alotowa aiena kak o, micha bvfaha ya ahanta tok vt aiokpanchi kak o, holitopashke, nan isht yukpali vt Chosef noshkobo ha, micha itibapishi ha ila filvmmi tok noshkobo paknaka ya onvtolashke.

17. Im aholitopa yvt i wak nakni vttahpi ak o chohmi hoke, micha in lvpi^h vt yunikon lvpi^h ak o chohmi hoke; yvminak o okla ha ishit toblit yakni atahaka ya isht ona hi oke; micha yvmmvt Eflaim in tahlepa sipokni pokoli yoke, micha yvmmvt Manasseh in tahlepa sipokni yoke achi tok.

18. Micha Sebulon ano, Sebulon ma, Kohchvt ish iakmvt chi yukpashke; mikma Issaka yvt chi binah antvt chi yukpashke, achi tok.

19. Okla ha i howvt nvni^h ha isht ona hi oke; yvmmak o aivlhpi^hsa nan vbit isht aiokpvchi ai im issa hi oke; okhvta hochito nan aiapakna, micha naholitopa luma shinuk aiasha ka shuka hi okvt, achi tok.

20. Mikmvt Kat ano, Kat a chitolichi hokvt, holitopashke; koi chito chiyuhmi hosh ahanta cha, shakba, noshkobo tabokaka aiena ka hlilichi tuk oke.

21. Micha vmmona ka yvmmak o nan vlvpi^hsa ima yvt binilichi ha tuk oka, ila tahli tok; micha okla i noshkoboka apchvt vla tok; Chihowah im vlvpi^hsa, micha Israel a aivlhpi^hsa i yvmihinchⁱ ya aiahlichⁱ tok, achi tok.

22. Mikmvt Tan ano, Tan vt Koi chito ushi yoke; Bashan a vttvt tolubla hi oke, achi tok.

23. Mikmvt Naftali ano, Naftali ma, im isht ikana ishit filhpa, micha Chihowah ishit yukpali isht alotowa yoke; hvshi ai okatula, micha oka mahli ya ish ishashke, achi tok.

24. Mikmvt Asha ano, Asha yvt vlla vhleha ishit yukpashke; itibapishi vhleha hv^t aiokpanchit ishit yukpashke, mikma iyi ya bila yo a hilechashke.

25. Chi shulush vt tvli, micha asonak lakna yashke; chim i hlampko vt chi nitak puta ka chohmashke.

26. Cheshulvñ in Chitokaka yummak okvt chi apela kv̄t vba aya im aholitopa vba ya chohmi kv̄t iksho hoke, achi tok.

27. Chitokaka ahanta bilia ak osh ish aiatuko yoke; shakba ataba iksho yak osh nuta talaiuvshke; micha tv̄nv̄p a chi tikba ya kocha pit tobla chi hoke, micha, Ishit kanchi, acha chi hoke.

28. Yohmikma Israel vt ilap bano hosh ai achukmaka ho ahanta chi hoke; Chekob i kv̄li ak osh yakni onush, micha oka paki ya onv̄toyula chi hoke; micha i shutik vt fichak o akv̄cha chi hoke.

29. Israel ma na chi yukpashke, kuta hosh Chitokaka okchalinchī chishno ya chohmi cho? okla ma, yummak osh chin tilehpa chi apela, micha yummak osh bv̄shpo falaia ishī chi aholitopa mak oke: chin tv̄nv̄p v̄hleha hv̄t chi holabi atuk o pisa chi hoke, mikma im achahaka puta ish ahv̄hlichā chi hoke, (achi tok.)

CHAPTA XXXIV.

MIHMA Moses vt Moab yakni patali ya v̄tv̄tv̄t Nebo nv̄nih chaha Piskah paknaka, yummvt Cheliko ichapaka ya ona tok; mihma Chihowah yvt Kileat yakni moma Tan ont v̄hli ka,

2. Micha Naftali moma, micha Eflaim, micha Manasseh yakni, micha Chutah yakni moma okhv̄ta ont v̄hli fehna,

3. Micha oka-mahli, micha Cheliko okfa yakni patali pam ititv̄maha holihta Soa ont v̄hli ka pisachi tok.

4. Micha Chihowah yvt, Yakni ilv̄ppak o Eblaham Aisak, micha Chekob aiena ka anumpa kv̄llo im ilonochit, chim ishtatiaka ya ima la hi yoke, achi li tok mak oke: chi nishkin ishī chi pisachi lishke, yohmi kia pit hlopullit yv̄mma ish ia he keyu hoke.

5. Yohmi hosh Chihowah im anumpa hatuk mak o,

Chihowah in tishu Moses vt Moab yakni yummak o ai illi tok.

6. Mihma Moab yakni Belhpeo ichapaka okfa ho ahohpi tok; yohmi kia im a hollohpi ya kuna ik ithano ho himak nitak ant ai vhli hoke.

7. Yohmi ka Moses vt illi mvt, afummi tahlepa achufa cha pokoli tuklo tok; nishkin vt illi keyu, micha nipi kullo kut tahvt isht ik aiyo tok.

8. Mihma Israel im vlla vhleha hvt Moab yakni patali Moses a ai ishit yaiya na, nitak pokoli tuchina tok; atuk o Moses a ishit nishkin okchi mintit, ishit yaiyvt aiasha tuk nitak vt ont taha tok.

9. Mihma Nun ushi Choshua hopoyuksa shilombish a alo-towa tok; Moses vt ibbak a onochi tuk a tuk oka: mihma Israel im vlla vhleha hvt i haponaklo cha, Chihowah yvt Moses a tohno tok mak o, yumihihi tok.

10. Yohmi ka ola i himmak minti ka Moses a chiyuhmi, yummak oka Chihowah yvt nashuka iti sanalit ithana tok a chiyuhmi kut hopaii vt wakayvt ik hikiyo chatuk oke.

11. Yohmi kut nan isht atokowa puta, micha nana afehna puta, yummak oka Echip yakni Falaoh, micha in tishu vhleha moma, micha i yakni moma aiena ka onochit yumiha chi ka Chihowah yvt tohno tok.

12. Mich a ibbak kullo moma yumma, micha napalvmmi chinto yumma, Israel moma kut pisa ho Moses vt haiakvchi tok, (achi tok.)